



# ТӨРӨҮНДӨРСЭН ЧОГААЛ

7



Е.Т. Чамзырын  
Н.Ш. Куулар  
А.Х. Херел

# Төрээн чогаал

Нийти өөредилгэ организацияларынга  
өөредилгэ номуу

7 класс

Федералдыг күрүнениц өөредилгэ  
стандартыныц негелдelerинге дүүштүр  
тургускан шенелделиг ийиги үндүрүлгези

Тыва Республиканыц өөредилгэ болгаш  
эртем яамызы сүмөлээн

Кызыл — 2016

ББК 83.3 Ту

Ч 12

Эртем талазы-бile редактору *A. С. Шаалы*, педагогика эртемнериниң кандидады, доцент.

Рецензентилери *Л. С. Мижит*, филология эртемнериниң кандидады; *M. Н. Ооржак*, дәэди категорияның тыва дыл, чогаал башкызы.

Номнүң даштыкы каасталгазы *Май-оол Чоодунуу*.

Өөредилгө номунаң I-ги, V-ки кезектерин *A. X. Херел*; II-ги, VI-гы кезектерин ТР-ниң улустуң чогаалчызы *H. Ш. Күулар*; III-ку, IV-ку, VII-ги кезектерин филология эртемнериниң кандидады, доцент *E. Т. Чамзырын* тургускан.

### Тускай демдеглелдер:



— номчаан чогаалывысты сайгараалы;



— номчаан чүүлүнгө боданыр айтырыглар;



— литература болгаш уран чүүлдүң өске хевирлери;



— шинчилел ажылын чорудаалы; — бодуң бодалың илерет;



— чогаадыкчы ажылдар; — немелде медээлерни дилээли;



— чугаавысты сайзырадыылы; — литературлуг оюн;



— демнежип сайгараалы; — чогаадыкчы номчулга.

Учебное издание

**ЧАМЗЫРЫН** Екатерина Тамбыевна, **КҮҮЛАР** Николай Шагдыр-оолович,  
**ХЕРЕЛ** Алимаа Хензиг-ооловна

### РОДНАЯ ЛИТЕРАТУРА. 7 класс

Учебник для общеобразовательных учреждений

Второе издание

На тувинском языке

Редактор *O. M. Баир*. Обложка *M. Ч. Чооду*. Верстка и дизайн *Л. А. Ооржак*. Фотографии *B. Савиных*,  
*A. Филиппова*. Корректор *У. Г. Домур-оол*.

Подписано в печать 12.08.16. Формат 70 × 90 1/16. Бумага офсетная. Печать офсетная. Гарнитура TTSchoolBook.  
Физ.печ. л. 16,5. Тираж 1441 экз. Заказ № .

Оригинал-макет подготовлен ГБНУ Министерства образования и науки Республики Тыва  
“Институт развития национальной школы”, 667011, г. Кызыл, ул. Калинина, 16.  
Отпечатано в ОАО “ПИК “Офсет”, 660075, г. Красноярск, ул. Республики, 51.

Чамзырын Е.Т. болгаш өскелер-даа.

Ч 12 Төрээн чогаал, 7 класс. Нийти өөредилгө организацияларынга өөредилгө ному. 2-ги үндүрүлгө. — Кызыл: Национал школа хөгжүүдер институт, 2016. — 264 ар.

Өөредилгө ному РФ-тиң ФКӨС-түң негелдөлөринге дүүштүр ортумак нийти өөредилгө организацияларының 5–11 класстарынга тыва аас чогаалы болгаш литературада чижек программага даянып кылдынган.

ББК 83.3 Ту

ISBN978-5-904864-61-3

© Авторы-составители Е.Т. Чамзырын и др., 2015, 2016

© Институт развития национальной школы, 2015, 2016

Все права защищены

## Чогаал делегейинче аян-чоруктуң уланчызы

Амыргын-на, хұндұлұғ өөреникчилер!

Чечен чогаалдың улуг-делгем, кайгамчық солун ужурадарлығ делегейинче аян-чоруувусту уламчылап, чаа чогаалдар-бile, оларның янзы-бүрү маадырлары-бile таныжып, билигеривисти немеп аар арганы биске бо ном берип тураг-дыр. Тыва дылывыстың чечен-мергени, байлак курлавыры, өткүт, тодазы бисти магададыр. Ада-өгбевистиң арттырып берген аас чогаалын, бижимел тыва чогаалдың улуг салым-чаянныгларының чогаалдарын өөренгеш, хәйнү билип ап, сагыш-сеткиливисти байыдып, угаан-медерели-висти чырыдар бис.

Тыва аас чогаалының эртинези болур маадырлығ тоолдар: «Танаа-Херел», «Бокту-Кириш, Бора-Шээлей», «Ачыты Кезер-Мерген» болгаш аас чогаалынга үндезилеп бижээн Владимир Серен-оолдуң «Каң-кызы»-бile таныжылға сilerниң шуптуңарга ачылығ салдарын чедирер.

Биске хайырлаан дәәжи эртине чогаалдар дәәш Степан Сарығ-оол, Салчак Тока, Байкара Хөвеңмей, Монгуш Кенин-Лопсан, Кызыл-Эник Қудажы, Владимир Серен-оол болгаш өске-даа чогаалчыларывыска өөрүп четтирип, «Аңғыр-оолдуң тоожузунун», «Араттың сөзүнүң» чаа әгелери-бile, «Хайыралығ Қалчан-Шилгиде» аyttтың овур-хевири-бile, «Он бир» деп тыва эки турачылар дугайында шииниң маадырлары-бile, баштайғы тыва ужуудукчу Кидиспей-бile таныжар бис.

Амыдыралдың шынын уран-чечен овур-хевирлерге чуруп көр-гүсекен чогаалдар чуртталганы шуут-ла олчаан өттүндүр дамчытпайн, шингээдип алышкын болгаш маадырларның салымы дәәш сагыш човаашкын дамчыштыр бодандырып, кайгадып, бағай чүве бile эки чүвени ылғап билиринге өөредир база кижи мезүлүг кылдыр бисти хевирләэр буюнның ажылды чорудуп, биске улуг ачы-дузалығ болур. Ынчангаш чаа чогаалдарны таалал-бile номчуп, эки шингээдип ап, амыдыралыңарга ажыглаарыңарны күзедивис!

# I кезээ. ЧЕЧЕННЕРНИЦ СӨНҮ...

## Маадырлыг тоолдар (эпос)

Эпос чоннуң эрте-буунгудан бәэр мөөннеттинген төөгүлүг дуржулгазынга үндезилеттинген. Эпостуң кол чөрүлдәэзи ыдыктыг төрәэн черин камгалаары дәеш, даштыкы эжелекчилерге удур демисел болур. Ооң-бile кады нийтилелге шаг шаандан турup келген ийи удурланышкак аңгы – мөлчүкчүлөр биле мөлчүттүргеннерниң, байлар биле ядыыларның аразында демисел маадырлыг тоолдарда кол черни ээләэн.

Эпостуң маадыры бодунуң оруунга таварышкан каш-каш дакпыр моондактарны кажар арга-бile азы кызыл күжү-бile ажып эртер. Ук маадырның овур-хевири, бүдүжү ынчангаш онзагай көскү, улуг-чаагай, күчүлүг. Эпостуң дылы эң-не чечен, ында кирген деңнелгелер, дылдың уран аргалары байлак, тодаргай болгаш күштүг болур.

Тыва улустуң аас чогаалында эпос үш кол хевирлиг: бирәэде, даштыкы эжелекчилерге удур демиселди көргүсken маадырлыг тоолдарны кириштилер; ийиде, душтук тып алыр дәеш демиселди көргүсken маадырлыг тоолдарны хамаарыштыrap; үште, ол ийи демиселдиң кайызын-даа көргүсken маадырлыг тоолдар кирер. «Танаа-Херел», «Каңгывай-Мерген», «Ачыты Кезер-Мерген», «Бокту-Кириш, Бора-Шәэләй» дәэн ышкаш маадырлыг тоолдардан эпостуң онзагай демдектерин болгаш хевирлерин көрүп болур.

Тыва улустуң аас чогаалын үе-дүптен бәэр амгы сайзыраңгай бижиктиг үеге чедир нептередип, буянныг үүлени кылып келген чечен-мерген кижилер чон аразынга хәй чораан. Ындыг салым-чаяанныг кижилерге тоолчулар хамааржыр. Тываның улуг тоолчулары Ооржак Чанчы-Хөөнү, Тұлұш Баазацайны, Ооржак Маңнайны, Баян Балбырны, Салчак Биченни болгаш өскелерни-даа адап болур.

- 
- ⌚ 1. Тыва улустуң аас чогаалында эпостуң үш кол хевирин ылган турар бөлүктерниң дөмей болгаш ылгавырлаг талаларын тодаргай номчаан тоолдарыңацарга даянып, сайгарылгадан кылырын оралдажыңац.
  - 👤 2. Номчаан тоолдарыңацарга даянып алгаш, «Тыва маадырлыг тоолдарда кол маадырның овур-хевири» деп төлевилелден эштерицер-бile демнежип кылыңац.
-

## Ачыты Кезер-Мерген

«Кезер тоожузу» дээрge тибет, кыдат, моол, бурят, калмык улустарның үр цениң иштинде демнежип чогаадып тургусканы кайгамчык уран-чечен аас чогаалы болур. Ону кожа-хелбээ чурттай чораан элээн хөй улустарның ниити чогаалы деп санап турар. Чүгэ дээрге ук тоожуну кайы-даа улустуң дылынга тоолдап турда, ында кезээде өскерилбейн чоруур мөнгө идеялар бар.

### «Ачыты Кезер-Мергенниң Сарыг өртемчайгэ кээп төрүттүнгени»

Он чүктүң ээзи, он хоранның үндүсүн<sup>1</sup> үскен Ачыты Кезер-Мерген хаанның дугайында тоожу эгеледи.

\* \* \*

Сарыг өртемчайниң улузу Кадын-Хемниң бажынга улуг оваа тургузуп алгаш, үш чүс аңгы сөөк ара-амытан улуг шуулган<sup>2</sup> кылып чыылгаш, чүве чугаалажып турган-даа чүвөң иргин. Ол хөй улусту Чода ноян, Сергээ ноян, Сергелең ноян баштап турган чүвө-дир. Ук ара-амытанның иштинде бүдүү билир үш төлгечи туруп турган-даа чүвөң иргин. Хамык ара-албатылар, бүгү чон маңгысты базар, хаан төрени тудар кижи тывар дээш, чадажып каап-тырлар. Черле чадашкаш, демги ол үш төлгечини, бистиң бо хаан-төрени тудар, маңгысты базар кижи бар-дыр бе, төлгөнцөр көрүнцөр дээш туруп берип-тирлөр.

Баштай Откарлы төлгечи төлгэ салгаш, чугаалаан-даа чүвөң иргин:

— Чаш уруг бо орандан төрүттүнер-дир. Чамбы-дип өртемчайгэ өнү-херели делгерээн, тос эртинеден бүткен уруг дээрни эжелээр-дир.

Даги-Боры төлгечи төлгелээш:

— Чамбы-дип өртемчайгэ өнү-херели делгерээн, тос эртинеден бүткен, бистиң сарыг өртемчайни эжелээр уруг база төрүттүнер-дир — деп туруп-тур эвеспе.

Лоо-Күнчут хаан төлгечи төлгелээш:

<sup>1</sup> Үндүсүн («үндэсэн» деп моол сөстен укталган) — үндэзин дээн. Тоолчуунц тоол ыдар аянын өскертпес дээш, бо сөстү болгаш өске-даа моол сөстерни хөвээр арттырган.

<sup>2</sup> Шуулган — чыыш.

— Бажы он чүктүү бүрүн төгүссәэн<sup>1</sup>, ортузу дөрт улуг дээр төгүссәэн, бели дөрт ус хаан төгүссәэн, он чүктүң ээзи Ачыты Кезер-Мерген хаан бистиң сарыг өртемчейге төрүттүнер-дир. Он чүктүң хамык дайзынын базар хаан ол-дур — деп чугаалаан-даа чүвең иргин.

Шыялан ам, Чода ноян кончуг сагыжы бак кижи турган-даа чүве-дир. Төлгечинин чугаазын дыңнааш, бир эвес мәңгүн кадыным чырык Сарыг өртемчей чагырар маңгыс оол төрүүр болза, мен ноян эргемден дүжер чадавас кижи-ле-дир мен деп бодап олуруп-тур.

Чода ноян Сергелең ашак-бile Амыр-Чыргал кадынын Каңгыгурун оранынчe шелүп чорудуптар.

**Амыр-Чыргал кадын олура:**

— Мен чәэргеннеп алыр дээш, үнүп келиримге, хенертен үстүмде чүве-ле хоолаан-шииләэн ышкаш болду. Көрүп келиримге, херели Каңгыгурун өртемчейни шыва алган, бажын, белин ылавылаарга, кижи хевирлиг улуг чалгынныг күш-кижи ужуп чору. А өршээ, бажыңарны көөрге, чүге киҗиниил, чалгыныңарны көөрге, чүге күштуул, чүү деп мындыг, Каңгыгурун өртемчейни шыва алган херелдиг амытан силер деп айтырарымга, күш ужуп туралар: «Мен сарыг өртемчейге төрүттүнер ие тыппайн чор мен, төрүттүнер ием сен-дир але, авай» дээш, чиде берди. Оон чанып олуарарымга, харда бир кулаш төш чартыы кижи изи чыткан, эләэн истей бәэrimge, куйже кире берген болду. Куйну бакылаарымга, куй иштинде пар шокар тоннуг, пар шокар идиктиг, пар шокар бергүү алдын ширээ кырында алдын кундага аялан салып алган хүрең шырайлыг кончуг ноян олур. Оон үнген сөөлүмден эгелээш, ээлбестеп, иштимде аар чүве бар апаарды — деп чугаалаан иргин.

Кадыны дөрт уруг божуур, үш кызын сарыг чаанны мәңгүн дериг-бile дерээн, лама-хуурак улустар хунаап алгаш баар, чаңгыс оглу артар.

**Оглу чугаалаан иргин:**

— Сәэн хыйырааң мәңгүн хинимге дыынмас, бистиң чадырывыстың мурнуунда, далай кыдышында үш өңнүг үш дөс терезин бар, ооң-бile мәңгүн хинимни бoggаш, ында ийи өң — ак, көк даштар бар, ооң-бile мәңгүн хинимни кезер сен. Ол кезериңде, хинимни бооп чыткаш, мәңгүн

<sup>1</sup> Төгүссәэн — («төгс» деп моол сөстен укталган) — болбаазыраткан, өндүржүткен.

оглумнуц аг-шерии сиғен ышқаш көвей болзун, кезип чыткаш, мээн оглумнуц амы-тыны даш ышқаш быжыг болзун деп йөрээр сен, авай — дээн иргин.

Кадай оглуунуц чугаалааны ёзугаар далай қыдыынга йөрээп туруп кезип ап-тыр.

Оон ам оглу чыда:

— Бээр дынна, авай! Оң талакы холумну дыгдындырып алган ужурум болза, дошкун маңгыс дайзыннарны базарым демдээ-дир, авай. Оң талакы будумну дыгдынып алган ужурум болза, дошкун маңгыс дайзынны базып алыр будум-дур, солагай чарыкы будумну көстүп алганым — төрени делгередиrimниң демдээ-дир. Солагай чарыкы караамны көрүп алганым — Қурбусту, Сарыг өртемчейлерни база Алдыы Ус оранын көрүп төрүттүнгеним ол-дур. Оң чарыкы караамны базып алганым — шажын номналды шээжилеп өөренип төрүттүнгеним ол-дур, дөртен беш ак дижимни ызырнып алганым — дошкун дайзыннарның үре-үндүзүн үзе дайнап төрүттүнгеним ол-дур, авай — деп чугаалап-даа чыдып-тыр.

Оол төрүттүнгэ-ле дөрт хонга-ла, кылаштап чоруур, думаазы уштунчак багай оол болу берип-тири. Ирей-кадай оглун Чуру деп адап-даа алган чүвең иргин.

Сергелен ашак Чода ноянга:

— Сээн шөлүп чорудупканың багай кадайындан бир багай оол төрүттүндү, сээн берген малындан мал аайы-бile түме-сая мал өстү, багай оолга әжеп, мал кадартыр оол дилеп алыр дээш чор мен, ноян — деп олуруп-тур.

Чода ноян олурал:

— Чазын-Чигир, Орунзаа деп ийи оол бар чүве, оларны ап ал — дээргэ, Сергелен ашак ол оолдарны эдертип алгаш, чанып келгендэе чүвең иргин.

Сергелен ашак үш оглуунуц угаан-шинээзин билип алыр дээш, ары чыып, хааржакка шыгжап туруп-даа турган ашак чүвең иргин.

Шыялан ам, бир-ле хүн хайнак шарызын муунуп алгаш, улуг оглу Чазын-Чигирни ушкарыйп алгаш, чоруп олурал, хоюнда хааржаан ажыткаш, арыларын салыптарга, арылар шарыны шага бээр орта, шары-даа мөөп-мөөп, ашак биле Чазын-Чигирни октап каапкаш, чоруй баар орта, ашак өлүүчеңнеп чыдып берип-тири. Чазын-Чигир

туруп келгеш, ачазын ол-бо тырткылааш, чанынга ыглап олуруп бээрge, ашак кээргеп туруп келгеш, дедир аалынче чанып келип-тир. Ам даартазында ортун оглун Орунзаазын ушкарып алгаш, база-ла элээн чоруп олургаш, чула барып дүжүп-түр. Орунзаа тура халып келгеш, ачазын ол-бо тырткылааш, ыглап олуруп бээрge, ашак туруп келип-тир эвеспе.

Ам эртенинде ашак хайнак шарызынга Чурузун ушкарып алгаш, чорупкан чүвең иргин. Кыдат кижи тараа тараан шөлдүң кыдышынга келгеш, ашак хойнундан хааржаан ужуулгаш, арыларын ажыдыптарга, арылар шарыны шага бээрge, шары мөөп-мөөп, аппарып дүжүрүп-түр. Ашак-даа өлүүченеп чыдып берген. Чуру тура халып келгеш, ачазын ол-бо тырткылааш, элээн ыглап чоруй:

— Ачазы өлүп калган дээш, үстүү оран, алдыы оран мени кээргээр бе, хей чүве-дир, ыглааш чоор, кыдат-били чаргылдажырдыр, ол мацаа тараа тарываан болза, ол ыяш бажынга өлген хартыга азып кагбаан болза, шары чүге хоя бээрил, ындиг эвес, кыдатка черниң арыг аржаанын, артыш ыяжын эккелдиргеш, ачамның сөөгүн өрттедип тургаш, үстүү өртемчайге төрүттүндүрер мен — деп чугаалааш, чоруур деп баарга, Сергелең ашак бүдүү көрүп келирге:

— Улуг кижи ийи караан кылайтып алгаш өлүрге, соңгу ачы-урезинге багай чүве дээн — дээш, караанче довурак адыштааш, тырый чажыптып-тый. Ашак карааның ажыыр, өеринге шыдашпайн, будун шимчеди кааптарга, Чуру тура:

— Улуг кижи будун дырбаңнадып өлүрге багай чүве дээн — дээш, будун шимчевес кылдыр шарып кааш, кыдатче чорувуткан чувези иргин.

Кыдатка чедип келгеш:

— Сээн тараа тарааш, хоютку кылдыр азып каан хартыгандан ачамның муунуп чораан шарызы хойгаш октаарга, ачам өлүп калды. Сен эвес болзуңза, мээн адам чүге өлүрүл, адамны арыг үстүү оранга төрүттүнер кылдыр ажаар кижи мен. Шымда-декте, арыг артыш ыяжындан тып эккеп бер — деп-даа турган Чуру чүвең иргин.

Чуру-даа чүү боор, ачазын:

— Арыг үстүү өртемчайге төрүттүнзүн — деп алгап-йөрээгеш, улуг отту ажыыр октаптарга, ачазы:

— Өлбээн мен, оглум, дириг мен, оглум, өршээ-авыра — деп чанып тепкиленип, алгыра берген чувези иргин.

Чуру адазының караанда довурак-элезинни аштап алгаш, шарызынга ушкаждып алгаш, чанып кәэп-тири. Сергелең ашак өөнгө келгеш, кадайынга:

— Мен үш оолдарымның угаан хире-шинээзин үш хонук иш-тинде хынаап келдим. Улуг оглум чүгээр-ле угаан-сегээнгир оол-дур, ортун оглум чүгле чем чииринге эки, ындыг-ла оол хире-дир, эң бичии оглум Чуру-даа угааныг-ла-дыр, өртемчейде аңаа эннежир угааныг, сагынгыр эр-даа чок-ла боор — деп хөөреп-даа олуруп турган чүвең иргин.

Чуру дыңнаарга, Искәэле хааның уруу Орукмаа кадын деп дөлгөйдө эң чараш кадын: «Мээн үш мөгемни октаар, үш адыгжымны ажыр адар кижиге баар мен» деп туразында аажылап турар бооп-тур.

Чода ноянның кода-хүрээзинге маргылдааларга киржир дээш, Чуру база чоруп каап-тыр. Чедип кээргэ, үш түме кижи чыылган, улуг хүреш кылган туруп-тур.

Орукмааның улуг мөгези:

— Бо багай Чуруда чүү боор, чаңгыс холдап октаай-ла мен — дээш, чүгүрүп кәэп-тири эвеспе.

Чуру-даа чүү боор, барып тудуп алгаш, хөй амытан көөрдө, багай Чуру болуп, хүрежирдө, хуулгаазын илби-били Кезер хаан боду болуп алгаш, бир будун далай эриинге баскаш, бир будун таңды бажынга баскаш, демги мөгени чүс бир кулаш черже октап, өлүрүп каап-тыр. Орукмааның ортун мөгезин тургузуп эккелген, база-ла иийи муң кулаш черже октап, өлүрүп каап-тыр. Эң биче мөгезин тургузуп эккәэргэ, үш муң кулаш хире черже октап, өлүрүп каап-тыр эвеспе.

Үш адыгжызын тургускаш, үш муң кулаш черге демдек салгаш аттырагра, чедирер-даа кижи бар, чедирбес-даа кижи бар болуп-тур. Биеэги үш адыгжыны Чуру ажыр адып-тыр.

Шыялан ам, күжүр Чуру-даа чүзу боор, үш мөөрөйгө ажып алгаш, Орукмаа кадынга:

— Үш мөөрөй мээции болду, сени мен алтыр мен — дээргэ, Орукмаа кадын, ооң ха-дуңма, төрөл-дөргүлү болгаш Чода ноян олура:

— Ам эртен айт чарыштырып, мөөрөй кылсыр чүве, аңаа айды эрткен кижи Орукмаа кадынны албышаан, мөөрөйгө киришкен бүгү кижиниң огун-чемзээн кады алтыр чүве — деп чугаалап-даа туруп-тур эвеспе.

Эртенинде хамык улус-даа аyttарын мунгулапкан чер-дээрниң кыдының бар чыткан. Хамыктың кара сөөлүнде Чуру чадаг кылаштап бар чыдырда, Орукмаа кадынның ачазы Иксээле хаан ужуражып келгеш:

— Халак, халак, күжүр оглумну, мәэн уруумну сен алыр чүвеңни, ам-на алзырың ол-дур, мәэн Бумба-Доктаавас аъдымны мунуп алгаш, чарыштыраар чүвеңни — деп чугаалаарга, Чуру ынавайн, чадаг кылаштап чоруй барып-тыр эвеспе.

Шыялан ам, Чуру Курбусту дээр адазын, иезин кыйгырган.

Иези:

— Күжүр оглум Үүле-Бүдүгекчи сарыг өртемчейде аyttан чадаглап, адаан-мөөрейде чадаг кылаштап чоруур-дур — дээш, хунан доруг аyttы дөнен кылдыр хуулдургаш, бадырып берип-тири эвеспе.

Ук айт-даа чүү боор, черге дүжүп келгеш, Чурунун чыдын билгеш, туттурбайн туруп берип-тири. Чуру бужар бак саң салыптарга, дөнен айт доруг чаваа болу бергеш, туттуруп алган-даа чүвең иргин. Чуру-даа ажыт кирип арлы берген үш түме амытанның соондан чыпшир чедип келип-тири эвеспе. Чер-дээрниң кыдынындан хамык улус-даа аъдын салып үндүрүпкен, чүгле чаңгыс Чуру аъдын тыртып алгаш туруп каар мындыг-даа болган чувези иргин. Чурудаа бичии болгаш аъдын бир дап бээрge, бир түме айт соонда-ла калып-тыр, ийи дап бээрge, ийи түме айт ында-ла чыдып калган, а үш дап бээрge, шупту аyttы эрткен, ам чүгле Чода ноянның сарыг аъды, Усумай ноянның бора аъды — ийи айт артып-тыр. Чуру хап олура, аъдынга чугаалап-тыр:

— Чода ноянның сарыг аъдының чодазын сый таварааш, эрте бээр сен — дээш, дап бээрge, Чода ноянның сарыг аъдының чодазын сый таварааш эрте бээрge, мурнунда чүгле чаңгыс Усумай ноянның бора аъды артып-тыр.

Чурунун аъды туралы:

— Мен черле бо айтка четпес-тири мен, бо оранның оъдун оъттап, суун ижип чораан эвес мен, мәэн назыным база биче-дир; бора айт бо черниң суун ишкен, оъдун оъттаан, назыны база улуг-дур, өскээр аргазын хайдынып көр — деп-тири.

Чуру ам канчаар-даа аайын тыппайн:

— Курбусту дээр адам, ием, чүү болду, канчалдыңар, ат болдум — деп кый дээрge, иези дыңнап кааш, булут аразындан:

— Алдыы оранда мээн оглум Үүле-Бүдүгекчи, далашпа. Алдыы оранда бо оранның ээзи Лоо-Кунчут, Чурунук аъдын эрттириерин сен бил, Усумай ноянның бора аъдын үстүүртөн чаңык дүжүргеш, мен билийн — деп кыйгырарга, Лоо-Кунчут дыңрап кааш, дээрge шаштыккан кызыл доозун болдуруптарга, Усумай ноянның бора аъдын Чурунук доруг аъды эртип чоруй барып-тыр. Удаваанда үстүүртөн чаңык дүшкеш, Усумай ноянның бора аъдын чылча дүжүп каан иргин.

Орукмаа кадын олура:

— Ам-даа бир адаан-мөөрөй бар. Карак чивеш дээр аразында муң хойнуң ээгизин үш түме кижиге үлей кааптар, аyt бажы дег оюм эртинени аксынче суптар кижиге баар мен — деп-тир.

Түветтиң ужен маадыры, Чода ноян маргылдажып эгелеп-тир. Ынча маадырның аразында муң хойнуң ээгизин үш түме кижиге үлеп четтигер-даа, оюм эртинени аксынче суптар-даа кижи чок бооп-тур. Адактың сөөлүнде Чуруга ээлчег кээрge, Чуру карак чивеш дээр аразында муң хойнуң ээгизин үш түме кижиге үлей каапкан, аyt бажы дег оюм эртинени аксынче супкан туруп-тур. Хамык амытан Чуруну кайгап-харап тарай берген.

Орукмаа кадын:

— Думаалыг-чараалыг Чуру сенээ ам-даа барбас мен, хөлдүң көк бугазының кудуруун үзе адып берген кижиге баар мен — дээн-даа кадын чүвең иргин.

Чуру база-ла ынаар чоруп каап-тыр. Ынча-мынча чеде бергеш, хөлдүң көк бугазының кудуруун ынча улустуң аразындан чаңгыс-даа кижи адып чадап каан. Чуру хөлдүң көк бугазының кудуруун үзе аткаш, ап турда, Чода ноян чедип келгеш, чугаалап-тыр:

— Чая, Чуру, моон соонда сени мен аттынмас мен, сенээ мен согунуму берейн, бо кудурууңу менээ бер — дээн иргин.

Чуру тургаш, Чода ноянның успаан деп согунун алгаш, кудуруун көргүспейн, оон унундан чүг кезип берип-тир.

Хамык улус-даа ээп чаныш-тыр. Искээле хаанның аалынга Чода: «Көк буганы мен өлүрдүм, кудуруун мен үзе аттым, Орукмаа кадынны мен алыр мен» деп хамыкты мурнай келип-тир.

— Кудурук деп чүве бо-дур, нүгүлдүг мегечи Чода — дээш, кудурукту хойнундан ушта соккаш, кадынның хойнунче октапкан-даа Чуру иргин.

Орукмаа кадын олурас:

— Ам-даа бир мөөрөй бар, дээрде Керээди күш деп күштүң иий чалгынының алдында иий бижек чалгыны бар, ону үзе адып берген кижиге баар мен — дээн иргин.

Шыялан ам, үстүү оранга барып мөөрөйлөжип эгелээнде алдыы оранның үжен маадыры баштаан үш түмен амытанда Керээди күшкэ чедирер кижи чок бооп турган черге Чуру чеде берип-тир эвсле.

Чуру тургаш:

— Мынча амытанда сенээ чедир адар кижи чок-тур, чарааш-чаагай-ла күш-тур сен, иий чалгының хере далбаңнадып эдер болзуңза, бо чон сени магадап мактаар боор — деп мактап-тыр.

Биңчаарга демги күш Чурунуң чугаалааны-бile иий чалгынын херип чыдырда, Чуру хей илби хуулгаазыны-бile тырттынгаш, иий бижек чалгынын үзе адып ап-тыр эвсле.

Чуру хуулгаазын илби-бile Керээди күштүң иий чалгынын Орукмаа кадынның бөргүнүң иий талазынга чыпшындыр илбилеп каан иргин.

Шыялан ам, Чуру биле Орукмаа кадын бир-ле эртен туруп келиргэ, Чода ноянның хөй шерии аалын үш долгандыр бүзээлэй берген туруп-тур. Бир эвес Чода ноянның шериин кырып кагбазымза, мээн ара-албатымга каражала-лынаан, Чода ноянны өлүрүп каар дээрge, мээн чер кырынга төрүттүнген адамның акызы кижи болур болгай. Ол сагыжы багай ашакты коргуудуптар-дыр деп Чуру бодап алгаш, өөнчө киргеш, алтара иштинден кадыг кара чазын уштуп алгаш, даштыгаа үнүп келгеш, кирижин тыртып-тыртып салырга, муң улу алгыржып, чер-дээр динмирий бээрge, Чода ноян дезип чоруп берип-тир эвсле. Чода ноян аалынга дезип, коргуп чанып келгеш: «Чуру чүнү чугаалап олур, дыңнааш кел» дээш, кижи домаа-сөзү билир ыдын чорудуп-тур.

Ыт Чурудан дыңнаан чүвезин Чода ноянга чугаалап бээрge, ноян эртенинде хамык шерииниң ок-чемзээн үргэдээш, Кадын-Хемниң кыдырынга үш кижииниң дискектерин ожук дажы кылгаш, паштарга суг куткаш, демги үш кижи дискээ ожуктарынга тиккеш, адаанга от салгаш, бүгү ок-чемзекти өрттедиптерин дужааган. Ок-чемзээн өрттеттирипкеш, Кадын-Хемни куду хамык аскак шериин эдерткеш: «Ам-на Орукмаа кадыннын алыр-дыр» дээш, чорупкан-

даа ноян чүвең иргин. Кадын-Хемни өрү-куду чеже-даа дилээрge, Чурунун дүүнгү ытка чугаалааны ок-чемзээ чок болуп-тур.

— Чүс буганың эъдин чаңгыс буга саргыланга сыңырыптар эр болза, Орукмаа кадынны алыр — деп, Чода ноян чар тарадып-даа туруп-тур эвеспе. Чаа, Чода ноянның ынча күрүзүнүң иштинден чүс буганың эъдин чаңгыс буга саргыланга сыңырыптар кижи тывылбаан турда, Чуру чедип келгеш, карак чивеш дээр аразында чүс буганың эъдин чаңгыс буга саргыланче суп каап-даа турган чүвең иргин.

Шыялан ам, каш хонуп чорда, Чода ноян: «Октун-Мөрүн деп терең болгаш долу суглуг, кештинмес хем бар, бир буга, бир чээрэн болгаш Чода ноян, Сергээ ноян, Сергелең ноян оларны ол хемни кежирген кижи Орукмаа кадынны алыр чүве» деп улуг чар тарадып-тыр эвеспе. Чода ноянның улуг күрүзүнден буганы, чээренин болгаш үш ноянны хем кежирер кижи тывылбайн турда, Чуру чедип келгеш, буганы сугже чыгаптарга, буганың ооргазы көстүп кеже берген, чээренин кежирерге, суг ооң ээгизиниң ортузундан болуп кеже берген.

Чуру тургаш:

— Силер иелээн буга кешкен черден кеже берицер — дээрge, Сергээ биле Сергелең ашак сугну сүстү кириптерге, терең-не чери эзенгиден ашпас болуп-тур.

Адак сөөлүнде Чода-даа кешкен-не, таптыг-ла сугнуң ортузунга чорда, ноянны суг алгаш бадыпкан чүвең иргин.

— Ооң тынын ап көр, Чуру — деп, Сергээ биле Сергелең дилээрge, Чуру кымчызын ийи бистиг селеме кылдыр тарбыдааш, Чода ноянче сунарга, оон туттунупкаш, үнүп келгеш:

— Үндүрерин үндүрдүң, Чуру, ийи холумну үредин — дээрge, Чуру турал:

— Черле сен кижи дузазы билир эвес сен, ындыг болза ындыг-ла ыйнаан — дээш, дедир сугже киир кааптарга, Чоданы суг базала алгаш бадып бар чыткан.

Чода ноян:

— Өршээ-авыра, оглум Чуру, тынымны ап көр, моон соңгаар черле ынчанмас мен — деп дилеп-чанып, алгырып бадып чыдар боорга, Чуру кымчызының баандан туттунургаш, эрикке үндүрүп каап-даа туруп-тур эвеспе.

Чуру-даа аалынга хап чанып келгеш: «Бо чоокта кижиге хор салыр чүү бар эвес, алды чүзүн амьтанга хор кара салыр чүү

барыл?» дээш, бодап олурага, чиге соңгу чүкте Күжүген-Маңгыс деп күчүтен амытан бар болуп-тур.

Маңгыстың улуг суургазы чөөн чүктен үнген хүннү дуглап алгаш, артында улусту караңгыладып, хилинчектеп, барыны чүкке хүн барган турда, соңгу-чөөн чүгүн караңгыладып алгаш, ол чүктүң улузун даржылдырып, хилинчектеп турага бооп-тур. Багай тарбаганчы ашак болуп хуулуп алгаш, Чуру суурганың адаанга чедип келирге, Күжүген-Маңгыс ашакты көрүп кааш, өлүрер дээш огун-чемзээн белеткей бээрge:

— Бо суурганың чарааш магалыын, чүү хаанның мындыг чарааш суургазы ирги? — деп чоруй, маңгысты көрүп кааш, — Ча-селемец чайып, мени өлүрүп кааптар болзуңза, бодуңнуң адыңга-ла багай болгай — деп чугаалап-тыр.

Күжүген-Маңгыс олура:

— Чaa, багай ашак-тыр сен, мээн суургам хөлөгезинге дыштанып олуруп ал — дээн иргин ийин ам.

Ашак суурганың чанынга олуруп алгаш, селемези-бile суургани кезе шаалтарга, Күжүген-Маңгыс оон чайлып баткаш, черге дырбацайнып чыдырда, Чуру үзе-чаза шаап каапкан иргин. Оондаа чүзү боор, Чуру боду болуп алгаш, аалынга чедип келип-тири.

Орукмаа кадын Сергелең нояндан:

— Бо хамык чувени кым ажып-тиилеп тураг чүвел? — деп айтырып олурган.

— Bo хамык чувени Шило ажып-тиилеп тураг чүве, Чурунун шола ады-дыр — деп, Сергелең ноян харыылап-тыр.

Кадын ам-на кээп, Чуру кончуг кижи-дир, ацаа эннежир кижи чок-тур деп бодап олуруп-тур эвеспе.

Чуру авазының өөндөн үнгеш, Орукмаа кадынның өөнгө келгеш, алдын хевин кеткеш, алдын ширээгэ олуруп ап, чугаалап-тыр.

— Сен үш мөгени әдертил алгаш келдин; улуг мөгөнчи муң перээ<sup>1</sup> черже, ортун мөгөнчи иийи муң перээ черже октагыладым, адыгжыларың эккелдин, оларыңны эрттирил аткан мен. Үш түме кижи аъдын чарыштырар дидиц. Билингин-Доруг аъдым-бile үш түме аътты эрткен мен; карак чивеш дээр аразында муң хойнуң ээгизин үш түме кижи гэх үлей кааптым; аът бажы дег оюм эртинени аксымче суга кааптым; үш түме кижи хөлдүң көк бугазының

<sup>1</sup> Перээ — ак, бора аъттың өңү ылгаттынмас көстүр чөр аразы.

кудуруун үзе кезип адып чадашкан, мен үзе адып шыдап, дээрде Көрээди күштүң ийи чалгынының алдында ийи бижек чалгынны мен үзе адып, сээн бөргүңгэ кадап бердим. Мен болза он чүктүң ээзи Ачыты-Кезер-Мерген хаан мен боор мен. Дөртен тос багай чүвени амыржыткан Кезер болбас мен бе, мегечи кижииниң дылынга дүк үндүрүп, коккааракка конгуулур баглап каар дээним чыдып калды — деп, мону сөглөп-даа турган Ачыты Кезер-Мерген хаан иргин.



1. Ачыты Кезер-Мергенниң сарыг өртемчейге тыптып бодараанын сөзүг-лелге даянып, бижицер.
2. Тоолга кыска пландан тургузунар.
3. «Ачыты Кезер-Мерген» деп тоолду кымнар деп тоолчулар ыдып чорааныл?



4. Чода ноян, Амыр-Чыргал кадын, Сергелен, Чуру деп кымнарыл? Оларның овур-хевирлерин тоолдан канчаар билип алдынар?
5. Чурунуң Орукмаа кадынны тиилеп аар дээш киришкен мөөрэйлерин сөзүглелге даянып, чыскаап бижицер.
6. Тоолда ажыглаан уран-чечен аргаларны тывынар. Оларны допчуулап бижээш, ажыглаан сорулгазын тайылбырлацаар.



7. Тоолда кирген эргижирээн болгаш ховар ажыглаттынып турар сөстерниң болгаш сөс каттыжышкыннарының уткаларын бөлүктежип тайылбырлацаар.



8. «Он чүктүң ээзи, он хоранның үндүсүн үскен Ачыты Кезер-Мерген» деп чуге ынча дээнил?



9. «Кезер тоожузу» кымның чогаалыл?, «Кезер тоожузу» Тывага кажан келгенил?, «Кезер тоожузун» Тывага чыып, бижип келгени деп дың-надыглардан кылышар.

## Танаа-Херел

Шаң-Хаан барынын чүкте чурттап турар Пат-Пат-Палчын хаанының даңғыназын чалап эккээр дээн.

Ара-албатызын бөлүп эккээргэ, ынаар чедип шыдаар кижи чок бооп-тур эвеспе. Ынчап турда, чыып алган ара-албатызы тарай берген соонда, хырайланган кызыл дилги кежи бөрттүг, ушпа кырган ашак кирип келгеш, бараалгап туруп-тур эвеспе.

Хаан олургаш:

— Өрү олуртунар, ак хептен кедирицер, ак олбуктан чадынар ол кижи бир эки чуве чугаалаар боор — деп чарлык бооп-тур.

**Ашак олурас:**

— Ол черже мээн үш харлыг балдыр-бээжек оглум шыдаза, ол шыдап болур боор — деп чугаалаан.

Оон биеэ ашак чанарда, ацаа хаан үш айт чедискеш, үш кижи эдерткеш:

— Ол оглууну чорудувут — деп чагааш, ашакты айткарып чорудупкан-дыр эвеспе.

Хааның чоруткан үш элчизи баргаш, ашактың үш харлыг балдыр-бээжек оглунга четкен үш айдын мундуурага, ооргалары сынгылап калгылаан. Мунган үш айдын мундуурага база-ла ооргалары сына бээр мындыг бооп-тур.

Элчилер ол орта айт-хөлүндөн чадаглаан, демги чалаткан оглу:

— Хааның ынча көвей айт-актазын өлүргеш, ынаар канчап шуут-ла бараалгап баар мен — дээш, чыдып каап-тыр.

**Демги элчилери хаанынга келгеш:**

— Хаанымның ынча көвей айт-актазын өлүргеш, ынаар канчап баар дээш чыдып калды — деп-тирлер эвеспе.

**Хаан олургаш:**

— Мээн мун-түме малымдан чаңгыс дүне кулун салып каар шаа четпес чүве-дир оц — дээш, он айт чедискеш, он элчи чоруткан.

Үш харлыг бичии маадыр ындыг янзы-били Шаң-Хааның он, чээрби, үжен, дөртен, бежен, алдан айт четкен элчилериниң айттарының шуптузунуң ооргаларын сый мунган. Ону ууптар айт тывылбаан.

**Оол олургаш, адазындан:**

— Сээн каш малында мени уур чүве чок бе, ачай? — деп айтырып-тыр эвеспе.

**Адазы ашак:**

— Чая, чоп кончуг сагыш чованчыг чүве апаарды, каш малындан бир хорам чүведен мунгаш, соңардан бараалгап чеде бергей aan, ам моон соңгаар сүрүп келбес силер — деп, харыы бергеш, ашак элчилерни дедир чорудупкан.

Иий адалышылар боттары аразында чугаалажып олурганнаар.

**Оглу олурас:**

— Чоп кончуг сагыш чованчыг чүве апаарды, канчалзымза экил, ачай? — деп база айтырган.

— Улуг хүрең бе үш чылда боозааш, үш айда долгаткаш, чылан

өтпес шыргай арыгның ортузунда улуг сарыг алаакче кирген чүве, ында төрээн боор. Эр чүве төрээн болза, сени ол бир ууп болур боор — деп чугаалап олуруп-тур.

Оглу олургаш:

— Ону канчап тудуп мунарыл, ачай? — дээрge, адазы улуг кара аптаразын ажыткаш, алдан кулаш арылыг чараш кара сыйдымын уштуп берип олурган.

Оглу сыйдымын алгаш, чылан өтпес шыргай арыгны өде кылаштап чеде бээрge, улуг хүрең бэзи төрүп алган, эр хүрең кулун иезин үш долгандыр куржалы берген ээп турган. Оол магадап көрүп олуурарга, эр хүрең кулун, иезиниң мурнуундан маңнап келгеш, соонга халып дүжүп, соондан маңнап келгеш, мурнуунга халып дүжүп, ол-бо арта халып, шурап-дүжүп дешкилевишаан, ээп тураг мындыг бооп-тур.

Оол аргамчызын дуруп алгаш, кылаштап чедип келгеш, эр хүрең кулуннуң аргалыктыг алды мойнунче киир каггаш, олуруптар орта, моюннап ыңай-ла бооп-тур. Кулун дывылааш, черниң довураан дээринге үндүр, дээриниң сыйдымын черинге дүжүр, суг чок черге баарга — сугланы бээр, суглуг черге баарга — соглу бээр, даглыг черге баарга — элезин-кум апаар, ыяштыг черге баарга — ос-чээрген апаар, кыжын болур — хыраазын хылышрадыр, чайын болур — шалыңын чайтыладыр, алдан хонук амыр чок, тозан хонук доктаал чок моюннап, дывылап кээп-тир. Ол-ла дывылап-дывылап, доктаап турупкаш, чугаалап-тыр:

— Ээмниң эр кара чаңгыс оглу боорга, бир шагда ээ боорун чадавас дээш, арай хумагалап турдум — деп-тир.

Оол олургаш:

— Адамның эки малының оглу боорга, аргалыктыг алды мойнун адыра соптайн бе дээш, бир шагда айт бооруң чадавас ирги дээш, арай хумагалап турдум — деп-тир эвессе.

Айт тургаш:

— Менээ сен ээ-даа бооп шыдаар-дыр сен, сеңээ мен айт-даа бооп шыдаар-дыр мен — деп чугаалап туруп-тур.

Оол тургаш:

— Менээ сен айт-даа бооп шыдаар-дыр сен, сеңээ мен ээ-даа бооп шыдаар-дыр мен — деп харылаан.

Оол ону хөмештээш мунар дей бээрge, аъды тургаш:

— Эмдик мал мунар кижи хөмештеп алгаш мунар боор бе, эзертеп, чүгеннеп алгаш мунар болбас ийикпе — деп мынчанган.

Оол аъдының сөзүн дыңдааш, мунмайн, чедип алгаш кылаштап келгеш, адазының баглаажынга баглап кааш, өөнгө кылаштап кирип келгеш:

— Бо малды чүнүң-бile эзертеп, чүгеннеп мунар чүвел, ачай?— деп айтырып-тыр.

Адазы улуг кара аптаразын ажыткаш, чүс лаң өртектиг хұмуш чүгенин чарылбас болзун дәэш сандан ыяш-бile чавылап кылган, бузулбас болзун дәэш булан сөөгү-бile баштап кылган қаңгайған-кеңгейген кызыл чунғу әзерин, хөл болган хөлбең кара чонаан, кара саар идиин, кара торгу тонун, кара дордум курун, карактыг, одагалыг кара киши кежи бөргүн, чеден тениң мыйызын бириктирип, ширилеп, дозулап кылган, үстүү сагында үжен улу сиилип туруп кылган, алдыы сагында алдан те, чунма сиилип туруп кылган, кара тениң кежин успейн-дытпайн туруп кылган кадыг кара чазын, Борзуктут-Хемниң ыяжын боос беге деңнеп туруп кылган, Кырзалыг-Хемниң ыяжын кызыр беге деңнеп туруп кадырган, Хаан-Херети күштуң чуун успейн-дытпайн туруп чүгләэн, кара казылган-бile казылғаннап туруп кылган, чеден кара паштың демирин сырыладып-бириктирип туруп соккан, чарт сөөкке чаңчарылбас, чалым хаяа эмирилбес, қаң-хожуула огун уштуп берип олурган.

Оол хұмуш чүгенин кулуннуң бажынга сугарга, бөгба болу берген, хөлбең кара чонаан салырга, хунан болган, арт болган әнгайған-кеңгейген кызыл чунғу әзерин салырга, дөнен болу берген, он сес колун, чиримин санап тыртарга, он сес хөндүргезин санап туруп тыртарга, он сес күдургазын санап туруп тыртып сугарга — үжен кулаш дүрт-сынныг, үш кулаш күдуруктуг, даг дег хүрең айт болу берип-тир. Оол боду кара торгу тонун, кара саар идиин, кара дордум курун, карактыг одагалыг бөргүн кедип, белеткенип туруп-тур әвеспе.

Арга болган аргай-хоргай саадаан, карыш бистиг қаң-хожуула огун азынгаш, кадыг кара чазын хоюндуруктааш, аъдынга кылаштап чедип келгеш, аyttаныр деп барып-тыр.

Аъды тургаш:

— Эмдик мал мунар кижи огун, чемзээн астып аар боор бе, аъдың кадалза, бодуң кадалза канчаар сен? — дәрге, оол огун-чемзээн өөнгө әккеп чөлөп кааш, кылаштап келгеш, аyttаныр деп барып-тыр.

**Аъттаныр деп баарга:**

— Аъттаныр деп чүңүл, эмдик мал мунар кижи алаңгы, соңгу эдектерин астып аар боор — деп-тир.

Оол алаңгы, соңгу эдектерин авый-шавый астып алгаш, аъттаныпкан.

**Аъды тургаш:**

— Бектенип алдың бе? — деп айтырага:

— Бектенип деп чүңүл? — дээн.

— Солагай холу-бile мунгаш-дынын деңнеп туткаш, он холубиле ажыргы чарыкы дергиден туттунгаш, иий эзенгизин дыңзыг кылдыр хере теп аар боор ийин — деп, аъды чугаалааш:

— Ам белен сен бе? — деп айтырага, оол:

— Ийе, белен мен, че! — дээш, дап-ла берип-тир эвеспе.

Аът көк дээрин хөлбеш кылдыр, кара черин сирт кылдыр мөөп үнүп-түр. Күжүр хүрец ол-ла мөггеш, черниң довураан дээрge үндүр, дээрниң сылдызын черге дүжүр, суглуг черге баарга — суг чок апаар, суг чок черге баарга — суглуг апаар, даглыг черге баарга — элезин-кум апаар, арга-ыяштыг черге баарга — ос-чээрген апаар, майының эъдин баглаштыр, дуюунун эъдин дужаштыр, тозан хонукта доктаал чок, алдан хонукта амыр чок мөөп-мөөп келгеш, доктаап тура дүшкен.

— Оорга-мойнуң сый октаптайн дээш, ээмниң эр кара чаңгыс оглу боорга, арай кайгап, бир шагда мээ ээ бооруң чадавас ирги дээш, хумагалап турдум — деп-тир.

**Оол тургаш:**

— Оорга-мойнуң сый мунуптайн дээш, адамның эки малының оглу боорга, бир шагда мээ аът болуруң чадавас ирги дээш, арай хумагалап турдум — деп-тир.

**Аът тургаш:**

— Сеңээ мен аът-даа бооп шыдаар-дыр мен, меңээ сен ээ-даа бооп шыдаар-дыр сен — дээн.

**Оол тургаш:**

— Меңээ сен аът-даа бооп шыдаар-дыр сен, сеңээ мен ээ-даа бооп шыдаар-дыр мен — дээн.

Даш-Хүрец аъттыг Танаа-Херел деп ат алган маадыр иий шынчы эжи — Белгечинин оглу Бели-Шынар Бег, Төлгечинин оглу Дөжү-Шынар Бег олар-бile кады ырак-узак орукче үнүптер. Олар Ай-Хаан биле Хүн-

Хааның аалдарын таварааш, аңа хүндүледип-ямбылаткаш, ол ийи хааның даңғыналарын чаалап алыр бооп дугуржур. Оң соонда олар Шулбус хааның аалынга чоокшулай бәэ.

Шулбус хааның ыды әәре берип-тир.

Шулбус хаан олургаш:

— Даشتын ыт чүнү әәрип тур, кайнаар көрүп алган, канчаар әәрип олур, үнүп көрем, шивишкин — дәэн.

Шивишкин кирип келгеш:

— Ыт кудуруун мунуп, кулаан кызып алган, чиге соңгаар чүкче көрнүп алган әәрип-ле олур — деп чугаалап-тыр эвеспе.

Шулбус хаан хоочун шагның хопчу сарыг судурун ажып көөрге, чиге барынын-мурнуу чүктө чурттап турар Пат-Пат-Палчын хааның алдын даңғыназын чаалап аар дәәш, ийи бег баштыңыг, тозан шериглиг, үш кайгал бар чыдар бооп-тур эвеспе.

Шулбус хаан судурун көрүп олургаш: «Чүве эннекип шыдажыр арга чок сүр-күчүлүг Дашиб-Хүрең аyttыг Танаа-Херел, Белгечиниң оглу Бедик-Хүрең аyttыг Бели-Шынар Бег, Төлгечиниң оглу Дөжү-Хүрең аyttыг Дөжү-Шынар Бег олар кел чыдарлар-дыр, ынчангаш оларга эйт-шай белеткеп, эйттедип, шайладып, хүндүлөп эрттирбес болза, хоржок» дәәш, айт алыр, от тудар улузун чызып туруп-тур эвеспе.

Чаа, ам даартазында аал мурну-бile әртип чыдып-тырлар. Шулбус хаан оон ийи кижи ыдып: «Эйттеп, шайлап алгаш барыңар» диртипкен-дир эвеспе.

Танаа-Херел, Бели-Шынар олар Шулбус хааның тос кაът шил бажыңының иштинидиве киир маңнады берип-тирлер.

Шулбус хаанга келгеш:

— Күм-сай ажың-чемиң бодуң ижип, чип олурбайн, кижээ сыгаар, дөгээр херээжен сен бе? — деп, алгыжа-ла берип-тирлер эвеспе.

Та чежеге, та кажанга чедир алгыжып келген чүве ийик, Шулбус хааның шил бажыңын хурең-кызыл кылдыр алгыжып олуруп-турлар эвеспе. Оон алгыжып орза-орза, ак-кызыл кыннып кәэптирип. Ынчап олурда, Шулбус хааның эдээниң адаа өрттенип үнүп олурганын Танаа-Херелдин эжи Бели-Шынар Бег көрүп олуруп-тур. Бели-Шынар Бег оон көрүп олурарга, Танаа-Херел эжиниң болгаш бодунуң айдының кудуруктары сыйырткайнып, эдектерииниң адаа чаа-ла дыгдынып чоктап олуруп-тур эвеспе.

— Ойт, чоондуң-канчалдың?.. — дээш, Бели-Шынар Бег эжи Танаа-Херелди тырткылап: — Боттарывыстың аyttарывыс кудурктары, эдектеривис адаа өрттенип келди, боттарывыстың аксывыстың өртүнгэ боттарывыс өрттенир дей бердивис — дээштиң, аyttанып туруп-турлар эвеспе.

Шил бажыңың иштинден аyttангаш, чоруп турда, ол бажыңы хеглип барып дүжүп-тур эвеспе. Оон олар орук улап бар чорда, Танаа-Херел эжинге:

— Хорадаан өкпемниң өртүнгэ бодум өрттенип өлүп кал частым — деп хөөрөп чоруп олуруп-тур.

Танаа-Херел оон ыңай база-ла бергелерге таваржыр. Кускун-Куюрам, Сааскан-Сайырам алышкыларны кажарлап эртер. Хоран далайга келгеш, Даш-Хүрең ацаа будун дегизипкеш, өлүр. Маадырлар эки айдын эм-дом ойт биле әмнеп тургаш, диргизип аар.

Пат-Пат-Палчын хааның ыды ээрे бериp-тир.

Хаан олургаш, шивишкинни:

— Даштын ыт чүнү ээрэ-дир барып көрем, канчаар олуруп алган, кайы чүкче ээрип олур? — дээш, айбылап үндүрүп-тур.

Шивишкин кирип келгеш, хаанынга:

— Ыт чиге соңгаар көрүп алган, кудуруун мунуп алган, кулаан кызып алган ээрип олураг-ла чүве-дир — деп чугаалап-тыр.

Пат-Пат-Палчын хаан хоочун шагның хопчу судурун ажып көрүп олурага, ийи бег баштыңыг, тозан шериглиг Даш-Хүрең аyttтыг Танаа-Херел дээрзи баштаан, Белгечиниң оглу Бедик-Хүрең аyttтыг Бели-Шынар Бег, Төлгечиниң оглу Дөжү-Хүрең аyttтыг Дөжү-Шынар Бег олар кел чыдар бооп-тур эвеспе.

Хаан ора:

— Оларның-бile чүве эннежир-деңнежир арга чок, кончуг сүркүчүлүг, эрес-шиник эрлер болгай, оларны эки хүндүлел, ёзулал биле ужурашпас болза хоржок эвеспе — дээш, айт алыр, от тудар улузун белеткеп, өг-өрегезин тип туруп-тур эвеспе.

Удаткан-дүдөткен чок чедип келзе-ле, Даш-Хүрең аyttтыг Танаа-Херел арган хүрең bogбалыг, ыт кежи көвүнчүктүг ыңғыржак эзерлиг чудаңгы багай оол бооп хуулуп алган, ийи бегде баштаткан чедип келгеш, улустуң адаанга олуруп алыр мындыг бооп-тур эвеспе.

Тос каят шил бажың иштинде олуруп турар алдын даңгына ара-албатызынга:

— Бөгүн келген аалчыларыбыстың адаандан өрү хүндүлээш, бажындан куду хүндүлээр эвеспе — деп чарлык берген чүвең иргин.

Даңғынаның чарлының ёзугаар келген аалчыларның адаандан өрү хүндүлээш, бажындан куду хүндүлеп туруп-турлар.

Танаа-Херел өөрүнгө чедип келгеш:

— Уваа, кандыг аайлыг чүве боор, билип каар чүве бар чоор бе? Ам даарта ортузунга олурайн шиве, эштер — деп чугаалап-тыр эвеспе.

Танаа-Херел, шынап-ла, ам эртенинде аалчыларның дал ортузунга барып олуруп ап-тыр эвеспе.

Шыялан, оон ам даартазында:

— Бөгүн аалчыларыбыстың ортузундан төш чарып, хүндүлээр эвеспе — деп, алдын даңғына мындыг чарлык бооп-тур.

Даңғынаның чарлысы-бile ара-албатылары аалчыларның дал ортузундан төш чарып, хүндүлеп туруп-турлар эвеспе он.

Танаа-Херел өөрүнгө чедип келгеш:

— Кандыг аайлыг чиктиг чоор, билип каар чүве бар чоор бе? — деп чугаалап-тыр.

Ам даартазында Танаа-Херел биеэги боду бооп хуулуп алгаш, аалчыларның бажынга олуруп ап-тыр эвеспе.

Ам ол хүн даңғына ара-албатыларынга:

— Бөгүн аалчыларыбыстың бажындан куду хүндүлээр сiler — деп чарлык бооп-тур.

Даңғыназының чарлысы-бile ара-албатылары аалчыларны, шынап-ла, бажындан куду хүндүлеп туруп-турлар эвеспе.

— Даарта ара-албатыңар чыып бериндер, арагавыс кудар бис, агывысты тудар бис — деп, аалчылар хааның бодунче сөс берип-тирлер эвеспе.

Аалчыларның чоруткан сөзү-бile ам даартазында, шынап-ла, хаан боду баштааш, ара-албатызы шупту чыглып олуруп берип-тир. Аалчылары кээп арагазын кудуп, агын-көгүн хаан баштады тудуп-турлар.

Хааның ара-албатызындан агы-көгү, азы-кижи артарга аалчылар оозун хааның үш бажыңын доллур дыгып берип-тирлер эвеспе он.

Ам даартазында хаан аалчыларын бодунуң өөнгө олбук, ши-рээзин салгаш, чалап-тыр. Аалчылары чедип кээрге, Танаа-Херелди баштаткаш, хаан арагазын сөңнеп туруп-тур.

Шыялан ам, хаан-даа алдын даңғыназын айның чаазында, хүннүң экизинде көжүрүп чорудар бооп туруп-тур эвеспе.

Айның чаазы-даа, хүннүң экизи-даа келген, хаан малдың ортузундан мал, единиң ортузундан эт, ара-албатызының ортузундан ара-албатыны уруунга үзүп берип-тир.

Танаа-Херел өөрү-бile кады чоруптар. Орук ара Шулбус хааның өрттедипкен черинге чаа-дайынга таварышкаш, ажып эртпишаан, маадырлар Ай-Хаан биле Хүн-Хааның даңғыналарын чаалап алыр.

Шыялан ам, Танаа-Херел Хүн-Хааның алдын даңғыназын Белгечиниң оглу Бедик-Хүрең аyttыг Бели-Шынар Бегге, Ай-Хааның алдын даңғыназын Төлгечиниң оглу Дәжү-Хүрең аyttыг Дәжү-Шынар Бегге берип-тир эвеспе.

Бедик-Хүрең аyttыг Бели-Шынар Бег, Дәжү-Хүрең аyttыг Дәжү-Шынар Бег оларның иии кадыны, ара-албатызы, аг-шерии-бile доозазын: «Үстүндөн сiler карактаңар, адаандан мен карактаайын» деп чагыг сөзүн чугаалааш, тос чүзүн чөләэжин тырткаш, күжүр Танаа-Херел үстүү орандыва чорудупкан чүвең иргин.

Танаа-Херел боду база-ла ара-албатызын, алдын даңғыназын, аг-шериин эдертекеш, келген изи-бile хап-ла каап-тыр. Чер ортузу чедип келгеш, алдын даңғыназын, ара-албатызын, аг-шерии-бile кады каапкаш, Бош-Дагны доорзундан хоора тыртып, төрепчилип алгаш:

— Доора шыйган черимге хонуп, дорт шыйган черимге чоруп олурап сiler — деп чагыг сөзүн бергеш, боду мурнап хап чоруп каап-тыр эвеспе.

Ол-ла хап чоруткаш, бодунуң аал-оранынга чедип келгеш, соңгу улузун манап туруп турда, чедип кәэп-тирлер. Улузу чедип кәэрge, тозан айт долганып четпес докулчак ак өргээзин тип, белеткеп туруп-тур.

Чүс сес кадынныг Шаң-Хаан Танаа-Херелдиң чалап эккеп алган алдын даңғына кадынын арга-меге-бile ап алыр деп бодай бергеш, Танаа-Херелди кел деп эккелгеш:

— Аза оранында Эрлик-Ловуң хаанга дәэлдиген кежи чагым, кара хураган кежи хүрмем, карактыг одагалыг кара киш кежи бөргүм берген мен, мәэң ол чүвелеримниң өртәэнгө чүнү-даа бербәэн хаан чүве, ону алымнап эккеп бер — деп чугаалааш: — Баар сен бе, барбас сен бе? — деп чоргаар айтырып олуруп-тур.

Танаа-Херел олургаш:

— Хаан кижи айбылаар хамаанчок, бөрттүг бажын бөргү-бile, чеңниг холун чеңи-бile алыр дээр болза, туралыг тудуп сунар чүве дээни кай, барбайн канчаар боор — деп харылап олуруп-тур.

Танаа-Херел аалынга чанып кээрge, кадыны ора:

— Ханныг-каралыг хааның чүү дидир? — деп айттырып-тыр.

— Аза оранында Эрлик-Ловуң хаанда дээлдиген кежи чагым, кара хураган кежи хүрмем, карактыг кара киш кежи бөргүм берген мен, меңэ чүнү-даа бербээн чүве, оомну алымнап эккеп бер деп чугаалап олур — дээн.

Алдын даңғына олургаш:

— Харын бооп-тур, сени ынаар баар болза деп бодап олурган кижи мен, ол Шаң-Хаан меңэ туралааш, ынчап туурапы ол-дур, оондаа белен чүү боор. Бистиң бо черде тос эртине чок. Аза оранында Эрлик-Ловуң хаан чааскаан тудуп олурап хаан-дыр, ону бо черге эккеп тарадыр дээн чүве — деп мону чугаалап олуруп-тур эвеспе.

Ашааның чоруур оруун, канчаар эртип, чанып кээринин дугайын даңғына кадайы мынча деп сүмелээн:

— Моон аyttангаш, чер аксындан уне маңнады бээриңгэ, чер аксын манаан чөмдик кара өглүг, чөмдик кара паштыг Челбиге кадай олурап эвеспе. «Бо өгнүң бүдүн чаагайын, өгге база кирип-ле чораан мен — дээш киргеш, — бо паштың бүдүн чаагайын, пашты база көрүп-ле чораан мен, бо шайның чаагайын, шайны база ижип-ле чораан мен, мындыг чаагай шай ижип көрбээн мен» деп чугаалаар сен. Ооң ындынга бар чыдарыңга, ийи кодур кара теве кээп: «Аъдынга өгенийн, бодунга өгенийн, аъдының дерин чылгаайн, бодунун дерин чылгаайн» дээр эвеспе, ийи өртең кара төш кадап бээр сен. Сенээ ийи таар дус бээр мен, тевелерге ол ийи таар дузун төп бээр сен. Ооң ындынга бар чыдарыңга ийи ала-сааскан кээп: «Аъдының чаарын, бодунун чаарын карттаайн» дээр эвеспе, сенээ ийи хап чаар уруп бээр мен, ийи ала-саасканга ийи хап чаарыңны төп бээр сен. Ооң ындынга бар чыдарыңга, ийи кара кускун: «Аъдының ийи караан соктаайн, бодунун ийи караан соктаайн» деп келирлер эвеспе, сенээ ийи хап карак уруп бээр мен, оларга ийи хап караацны төп бээр сен. Ооң ындынга бар чыдарыңга, даш кажыктаан, хол-буду дешти берген ийи оол: «Аъдының кажыын

кагайн, бодунуң кажын кагайн» деп келирлер эвеспе, сеңээ ийи хап кажык уруп бээр мен, оларга ийи хап кажыңын төп бээр сен. Ооң ындынга бар чыдарыңга, сиғен каткан, холдары дешти берген уруглар келгеш: «Аъдының сирин кадайн, бодунуң сирин кадайн» дээрлер эвеспе, сеңээ ийи хап сирин төп бээр сен. Оон ыңай бар чыдарыңга, өлеңде өртээн өле бе, кумда өртээн кула бе өлүр чеде берген туарлар эвеспе, оларны өлеңге, кумга болуп өртеп кааш, чоруй баар сен. Оон ыңай бар чыдарыңга, кончуг кара шалбаа далай чыдар. «Оранга база чоруп-ла чораан мен, мындыг чаагай далай база көрбээн мен» дээш чаламалааш, саңын салып, чажыңың чашкаш эртер сен. Оон ыңай бар чыдарыңга, чылан ётпес шыргай арыг тураг. «Оранга база чоруп-ла чораан мен, мындыг чараш оран көрбээн мен» дээш чаламалааш, саңың салып, чажыңың чашкаш, эртер сен. Оон улаштыр чоруткаш, хааның аалынга чеде бээр сен, баргаш баглаашка аъдыңын чаңгыс чеже тыртар кылдыр баглап каар сен. Оон хааның өргээзинге кире бергеш: «Хаан, амыр» деп бараалгаар сен. «Чүгэ келдин, Танаа-Херел?» деп айтырар эвеспе, ынча дээргэ, «Чус сес кадынныг Шаң-Хаан силерде дээлдиген кеки чагым, кара хураган кеки хурмем, карактыг одагалыг кара киш кеки бөргүм берген мен, меңээ чаңгыс даа чүве бербээн чүве, оомну алымнац эккеп бер дээргэ, чор мен» деп сөглээр сен. Үинча дээрингэ, Эрлик-Ловун хаан: «Ол чүү дээриң ол, меңээ чүзүн берген ол? Чүнү ынчап мегелээри ол?» дээр эвеспе, оон кыржы-ла бээр сен, кыржы бээриң орта, чыышкын артындан Шулбус хаан бажын уштуп келгеш: «Танаа-Херелдин ыыдын дыңцаанымда, куйга бажым чымыраар, алыр дээнил алзын, чиир дээнил чизин, меңээ ооң ыыдын дыңнатпацар, хаан агбай» дээр эвеспе. Ооң соонда Эрлик-Ловун хаан хая көрүнгеш, аптаразын үжей бээр эвеспе, ширээзиниң кырында тос эртине чыдар, ону көрбээнде алгаш, ажырыптар сен. База ол-ла ширээниң кырында хоюг кызыл чүве чыдар, ону ооң талакы холун-бile адыштаптар сен, ону кижи чивес чүве эвеспе, чиптип ат болдуң халак. Алган чүвөлөрин аптаразының иштинден бөле туткаш, сеңээ сунар эвеспе, ону ол-ла бөлүү-бile туткан хөвээр үне халааш, айттаныптар сен шиве — деп чагып-тыр эвеспе.

Танаа-Херел кадайының белек чагын ала салы-ла, айттангаш хап-ла каап-тыр.

Ол-ла каккаштың, чер аксындан үне халдып кээрге, чер аксын манаан чемдик кара өглүг, чемдик кара паштыг, Челбиге кадай олуруп-тур эвеспе.

— Ээ, мен өгнүү база көрүп-ле чораан мен, бо өгнүү бүдүн чаагайын — деп чугаалааш, аъдын өгтөг баглааш, кирип кээп-тир.

Кирип кээрге, чемдик кара пашта черзи сарыг шайны хайындырып каан турууп-тур.

— Мен пашты көрүп, шайны ижип-ле чораан кижи мен, мындыг бүдүн чаагай пашты көрбээн мен, мындыг чаагай шайны ишпээн мен, чаагайын — деп ижип олуруп-тур.

Кадай олургаш:

— Кезээде өө, пажы чемдик, кезээде чер аксы манаар Челбиге кара кадай дээш, карак-кулак деже шаап каар чазып турар улус болгаяан моң, эки аастыг хөөкүйнүүч чоруу чогузун, чолу таарышсын! — деп алгап-йөрээп чугаалап-тыр.

Шыялан ам, оон күжүр Танаа-Херел база-ла улаштыр хап чоруп олурда, ийи кодур кара тeve келгеш:

— Аъдының дерин, бодунуң дерин чылгаайн, аъдынга, бодунга өгенийн — дижип-тирлер.

Маңнажып кээрге, ийи өртең кара төжүн кадааш, ийи таар дузун төп берип-тир эвеспе.

Тевелер тургаш:

— Кезээде чазый-чилби, кодур-бузур кулугурлар дээш, караавыс деже шаап каар чазар улус болгаяан моң, төш кадап, дус төп берген хөөкүйнүүч чоруу чогузун, чолу таарышсын! — деп алгап-йөрээп-тирлер.

Шыялан, оон улаштыр хап олурага:

— Аъдының чаарын, бодунуң чаарын карттаайн — деп, ийи ала-сааскан кээрге, оларга ийи хап чаар төп берип-тир.

Ийи ала-сааскан:

— Кезээде чаар чиир чазый-чилби, хоптак кулугурлар дээш, караавыс деже соктап кааптар чазар улус болгаяан моң, чаар төп берген күжүрнүүч чоруу чогузун, чолу таарышсын! — деп алгап-йөрээп каап-тырлар.

Оон база-ла улаштыр хап олурага:

— Аъдының караан, бодунуң, караан деже соктаайн — дижип, ийи кара кускун ужуп кээп-тир эвеспе.

Оларга ийи хап караан төп бээрge:

— Кезээде карак дээр чазый-хоптак кулугурлар дээш, карак дежип кагы дег улус болгаян мон, карак төп берген хөөкүйнүц чоруу чогузун, чолу таарышсын! — деп алгап-йөрээп каап-тырлар.

Оон база-ла улаштыр хап олурага, хол-бууду дешти берген даш каккан оолдар:

— Альдының кажыын, бодунуң кажыын кагайн — деп кээрge, ийи хап кажыын төп бээр орта:

— Кезээде кажык дээр кулугурлар дээш, караавыс деже шаап каар чазар улус болгаян, кажык төп берген хөөкүйнүн чоруу чогузун, чолу таарышсын! — деп алгап-йөрээп каап-тырлар.

Оон база-ла улаштыр хап олурага, холу дешти берген, сижен каткан уруглар кээп:

— Альдының сирин, бодунун сирин кадайн — деп келир орта, ийи хап сирин төп бээрge:

— Кезээде сижен каткан, холу дежилген кулугурларны дээш, караавыс деже шаап каар чазар улус болгаян, сиир төп берген хөөкүйнүң чоруу чогузун, чолу таарышсын! — деп алгап-йөрээп каап-тырлар.

Оон база-ла улаштыр хап олурага, өлеңдэ өртээн өле бе өлүр чеде берген, кумда өртээн кула бе өде-чара семирээш өлүр четкен туруп туррага, солуй өртеп каар орта:

— Солуп өртээн күжүрнүң чоруу чогузун, чолу таарышсын! — деп алгап-йөрээп каап-тырлар.

Оон база-ла улаштыр хап бар чыдарга, кадыр кызыл-кум одуруг туруп турган, ол орта чаламазын баглааш, чажыын чашкаш, саңын салгаш, чоруптарга:

— Кезээде кадыр чыдар дээш, аттынып, карганыр улус болгаян мон, саң салган, чалама баглаан, чажыын чашкан хөөкүйнүң чоруу чогузун, чолу таарышсын! — деп алгап-йөрээп, кончуг ак чаагай кыннып туруп-тур.

Оон база-ла улаштыр хап олурага, кара шалбаа далай чыткан, ол орта саңын салып, чажыын чажып, чаламалааш, чортарга, кургаг-чаагай апарып:

— Кезээде кара шалбаа далай апарган чыдар дээш, аттынып, карганыр улус болгаян мон, саңын салган, чажыын чашкан, чаламазын баглаан хөөкүйнүң чоруу чогузун, чолу таарышсын! — деп алгап-йөрээп каап-тыр.

Оон улаштыр хап олуаргага, чылан өтпес шыргай арыг туруптур, ол орта чажынын чашкаш, саңын салгаш, чаламазын баглааш, чоруптар орта, чылан өтпес шыргай арыг ак чаагай кынны бергеш:

— Кезээде шыргай чыдар кулугур дээш, аттынып, карганыр улус болгаян мон, чаламазын баглап, чажынын чажып, саңын салганаң хөөкүйнүң чоруу чогузун, чолу таарышсын! — деп алгап-йөрээп каап-тыр.

Оон улаштыр каккаш, ам-на хааның аалынга хап чеде бээрge, Эрлик-Ловун ҳааның демир баглаажы, хүлөр баглаажы турup турган, демир баглаажынга аъдын чаңгыс чеже тыртар кылдыр баглааш, ҳааның өргээзинге кире бергеш:

— Хаан, амыр — деп бараалгап-тыр.

Эрлик-Ловун ҳаан олургаш:

— Мында чүнүң ужурунда, чүнү алыр дээш келдиң, Танаа-Херел? — деп айттырып-тыр.

— Чүс сес кадынныг Шаң-Хаандан силерде «дээлдиген кежи чагым, кара хураган кежи хүрмем, карактыг одагалыг кара киш кежи бөргүм берген мен, ооң өртээнгэ чүнү-даа бербээн чүве, ону алымнап эккеп бер» дээрge, чор мен — деп-тири.

Үнчээри билек-ле, Эрлик-Ловун ҳаан оргаш:

— Ол чүү дээриң ол, оон мен чүнү-даа албаан мен — деп аттынала берип-тири.

Танаа-Херел олургаш:

— Сен албаан болзуңза, мынча черге кижи айбылаар чүве бе? Чазыйлаан, чилбилээн кулугур, чип-сырыпп алгаш, канчап олуарың ол? — деп удур кыржып, кончуй-ла берип-тири.

Үнчап-ла алгыжып олурбуже, биеэги аксының өртү-билие өрттедип өлүрген Шулбус ҳааны чыышкын артындан хенертен бажын көзүлдүруп келгеш:

— Танаа-Херелдиң ыыдын дыңнаанымда, куйга бажым чымыраар-дыр, өршээп-авырап көрүнер, алыр дээнил алзын, чиир дээнил чизин — деп алгыра каапкаш, катап чиде берип-тири.

Үнчээри билек-ле, Эрлик-Ловун ҳаан хая көрнүп, аптаразын үжей бээр аразында, ширээзиниң кырында чыткан тос эртинезин Танаа-Херел ап ажыра каап, хоюг кызыл чүвэзин адыштай кааптып-тыр.

Хаан дедир көрнүп келгеш, Танаа-Херелдиң алымнаң чораан чүвөлөрин бөле-хаара туткаш, тутсуру билек-ле, күжүр Танаа-Херел алы-туда салыла үне халааш айттаныпкаш, дедирги изи-били хапла каап-тыр оо!

Эрлик-Ловуң хаан хая көрнүп келгеш, ширээзиниң кырынчे көөргө, тос эртинези-даа, хоюг кызыл чүвөзи-даа чок боорга:

— Танаа-Херел хамык чүвөвис аппарды, хой баштыг, инек баштыг, айт баштыг эрликтөр-элчилөр, кагыңар! Шымдаңар! — деп кускуннаң үнер орта, демги эрликтөри Танаа-Херелдиң сыр соондан сүрүп хапла каап-тырлар.

Демги эрликтөр чылан өтпес шыргай арыг чанынга сүрүп ора:

— Чылан өтпес шыргай арыг, Танаа-Херелди тут, хак! — дээр орта:

— Чаламалааш, саңын салып, чажынын чашкан хөөкүй эртсийн! — дээш, ак чаагай болу берип, эрттириптип-тир.

Оон-на каккаш, кара шалбаа далай чанынга келгеш, демги эрликтөр:

— Танаа-Херелди тут, хак! — дээр орта:

— Чаламалааш, саңын салган, чажынын чашкан хөөкүй эртсийн — дээш, кургаг ак хову болу берип, эрттириптип-тир.

Оон-на улаштыр хап олура, кадыр кызыл-кум одуруг чанынга келгеш, демги-ле эрликтөр:

— Танаа-Херелди тут, хак! — дээр орта:

— Чаламалааш, саңын салган, чажынын чашкан хөөкүй эртсийн — дээш, ак чаагай хову болу берип, эрттириптип-тир.

Оон-на улаштыр чоруп олургаш, өлөнде өртээн өле бе, кумда өртээн кула бе чанынга келгеш:

— Танаа-Херелди тут, хак! — дээр орта, өле бе, кула бе:

— Солуп өртээн хөөкүй эртсийн — дээш, эрттириптип-тир.

Оон-на улаштыр сүрүп чоруп олургаш, сижен каткан уруглар чанынга чедип келгеш, демги-ле эрликтөр:

— Аъдыйның сирин, бодунуң сирин кадар силөр, Танаа-Херелди тудуңар, кагыңар! — дээргө:

— Кезээде сижен каткан, холу-буду оюлган, кезээде сиир дээр кулугурлар дээш, аайлыг эвестер, сиир берген хөөкүй эртсийн! — дээш, эрттириптип-тир.

Оон-на улаштыр сүрүп бар чыда, даш кажыктаан оолдар чанынга келгеш:

— Аъдының кажынын, бодунуң кажынын кагар сiler, оолдар, Танаа-Херелди тудуңар, кагыңар! — дээрge:

— Кезээде даш кажыктаар, холу-бду оюлган, кезээде кажык дээр кулугурлар деп айлыг эвес сiler, кажык берген хөөкүй эртсин! — дээш, база-ла эрттириптип-тир.

Оон-на улаштыр сүргеш, ийи кара кускуннуң чанынга келгеш:

— Аъдының караан, бодунуң караан соктаар сiler, Танаа-Херелди тудуңар, кагыңар! — дээр орта:

— Кезээде карак дээр, чазый-хоптак кулугурлар дээш, көөр эвес сiler, карак төп берген хөөкүй эртсин — дээш, база-ла эрттириптип-тир.

Оон-на улаштыр сүргеш, ийи ала-саасканның чанынга келгеш:

— Аъдының чаарын, бодунуң чаарын карттаар сiler, Танаа-Херелди тудуңар, кагыңар! — дээр орта:

— Кезээде чаар дээр чазый-хоптак кулугурлар дээш, көөр эвес сiler, чаар төп берген хөөкүй эртсин — дээш, база-ла эрттириптип-тир.

Оон-на улаштыр сүргеш, ийи кодур кара тевениң чанынга келгеш:

— Аъдынга, бодунга өгенир сiler, аъдының, бодунуң дерин чылгаар сiler, Танаа-Херелди тудуңар, кагыңар! — дээр орта:

— Кезээде аъдынга, бодунга өгенир, аъдының, бодунуң дерин чылгаар дээр, чазый-хоптак, кодур-бузур кулугурлар дээш, көөр эвес сiler, өгенир төш кадап, чылгаар дус төп берген хөөкүй эртсин — дээш, база-ла эрттириптип-тир.

Оон-на улаштыр сүргеш, чер аксы манаан чемдик кара өглүг Челбиге кадайга келгеш:

— Чер аксы манаан чемдик кара өглүг Челбиге кара кадай, Танаа-Херелди тут, хак! — дээр орта:

— Кезээде чер аксы манаар чемдик кара өглүг Челбиге кара кадай дээш, айлыг эвес сiler, өөнүң, пажының бүдүнүн, шайының чаагайын деп киргеш эрткен хөөкүй эртсин — дээш, база эрттириптип-тир эвеспе.

Оон күжүр Танаа-Херел чер аксындан үне маңнадып келгеш, ажырыпкан тос эртингизин тос чүкче бүлгүрупкеш, хааның аалынчे хап кирип оргаш, адыштап алган хоюг кызыл чүвэзин аал коданындыва чажыпкаш, хааның өргээзиниң эжийнге хап келгеш:

— Хомуданчыг чүвең ол-дур! — дээш октапкаш, кирбейн-даа аалынче хап чана берип-тир эвеспе.

Оон чүс сес кадынныг Шаң-Хаан Танаа-Херелге шак ынчалдыр бастырып каап-тыр oo!

Эрниң эрези, оолдуң омаа, экер-эрлик Даң-Хүрең альттыг Танаа-Херел Бег оюн оя чурттап, чигин чире чурттап чоруй барып-тыр oo!

Ол барды, мен келдим.

- 
-  1. Дилги кежи бөрттүг чөнүк ашактың оглунга, ооң аъдынга, дериг-хөрекселингэ хамаарышкан эпитеттерни болгаш деңгелгелерни ушта бижиндер. Олар тоолга кандыг утка илередип турарын тайылбырлаңар.
-  2. Тоолдуң сюжеттиг шугумунга даянып алгаш, кыска пландан тургузуңар.
-  3. Шаң-Хаан ырак, берге орукче кымны чорудар дәэніл? Ону күчүү күштүг деп канчап билип алышыл?
4. Шулбус хааның авыяастыын чүден көрүп болурул? Ооң аъш-чемин чүгө чип болбазыл? Тоолдуң сөзү-бile тайылбырлаңар.
-  5. Тоолда кирген эргижириән болгаш ховар ажыглаттынып турар сөстерниң болгаш сөс каттыжышкыннарының уткаларын бөлүктөжип тайылбырлаңар.
-  6. «Аза оранында Эрлик-Ловуң хааның тос эртинезин Танаа-Херелдин ап үнгени», «Атт чарыштыгыр мөөрейге Даң-Хүреңнин эртип келгени» деп кыска чогаадыглардан сөзүглелге даянып тургаш бижиндер.
- 

### Бокту-Кириш, Бора-Шээлей

Шыян ам,  
Эртөнгинин әртезинде,  
Бурунгунуң мурнунда,  
Буганың мыйызы буступ дүжүп,  
Тениң мыйызы дәэринге шаштыгып,  
Эки шагның эктинде,  
Бак шагның бажында,  
Дөңгелчикиң бажындан  
Дөрт өң чечек үнүп,  
Дөңгүр инектиң бажындан  
Мыйыс үнүп турар шагда чүвөң иргин.  
Эт дәэр эди-даа чок,  
Мал дәэр малы-даа чок,  
Ядый-түреңги ирей-кадай  
Чурттап чоруп-тур әвеспе.

Ирей-кадай үш уруглуг чүмези иргин.  
Үш уруглары дуза кадып,  
Өскүлөп келген-даа мындыг туруп-тур эвеспе.

Бир хүн үш угбалышкы каттааш кээрge, Кара Маңгыс кырган ада-иезин чип алган олуар. Угбашкылар Маңгыстан дескеш, Каratы-Хаанның үш тажызы- биле чурттай бээр. Хаанның үш оглу аңын-мецин аңнаар дээш чоруптарга, үш угбашкының бичези алдын бөскектиг оол уругну, мөңгүн бөскектиг кыс уругну божуп алыр. Меге арга-бile улуг угбазы ийи уругну иезинден чаргаш, Улуг Успа далайынче киир октаптар. Хаанның биче оглу кадайының бир караан каза соккаш, бир чарыкы кырызын хоора кескеш, бир чарыкы будун үзе кескеш, өдек адаанга чадыр туткаш, шуваганчы кадайының чанынга каапкаштың көже бээр.

Багай шуваганчы кадай  
Бир эртен туруп келгештиң  
Улуг далайының эрииндиве,  
Успа далайының кыдынындыва көөрге,  
Ында хүн-не херелденип турган иргин ийин.  
«Тайга бажынга хүн шалыпкан турда,  
Ында чүнүң мындыг  
Алдын херели чырып тураг чоор?» — деп  
Кайгап олурган.  
Көрүп турарга  
Успа далайының кыдынынга  
Алдын бөскектиг оол уруг,  
Мөңгүн бөскектиг херээжэн ийи уруг-даа  
Эштип-даа ойнап чүгүржүп турган ийин.  
Шуваганчы ону көргештиң  
Багай чөвүрээ чадырынга  
Чеде чүгүрүп келген мындыг турган иргин ийин.  
— Элдептиг-ле чүме көрдүм, уруум — деп олуруп-тур...  
Оглунуң алдар-адын  
Бора-Шокар аyttыг Бокту-Кириш — деп  
Адап олурган иргин ийин.  
Херээжэн уругну Бокту-Кириштиң дунмазы  
Бора-Шээлей деп адап берип олуруп-тур эвеспе.

\* \* \*

Бора-Шээлей база-ла  
Дыка эртемниг уруг турган чүвең иргин.

Үжүглеп, бижиглеп көрүп олурарга,  
Үстүү оранда үш дээрниң кырында  
Үш хаанның үш алдын даңгыназы  
Үш куу бооп алган  
Үжуп чоруур мындыг бооп-тур.  
Ай-Хаанның алдын даңгыназы,  
Хүн-Хаанның хүмүш даңгыназы,  
Улуг-Эге хаанның Улаан-Сайгыл даңгыназының  
Адын бижип каан бооп-тур эвеспе.  
Үстүү оранда үш дээрниң кырында  
Ол үш хаанның аал оранынга  
Адыг-тудуг, адаан-мөөрөй болур,  
Шак ол орта Бокту-Киришти  
Келзин деп бижип каан туруп-тур эвеспе.  
Акызының алды ай болгаш ажып көөр  
Алдын-сарыг хопчу-каразын  
Көрүп олурарга, акызының ол оранга  
Хереглеттингени-даа шынныг бооп  
Дүшкен чүвең иргин.  
Оранга баргаштың,  
Адыг-тудугну-даа, адаан-мөөрөйни-даа  
Тиилеп үнер,  
Үш алдын даңгынаны-даа бодунга  
Кадын кылдыр чаалап алыр  
Мындыг салымныг кижи бооп  
Дүжүп чыдар бооп-тур...

\* \* \*

Бора-Шээлэй акызының адыйын ажыда соккаш,  
Адыйының таваанга алдын-бile  
Бижий-ле берген олуруп-тур.  
«Бокту-Кириш акым бооп хуулуп алгаш,  
Үстүү оранда Ай, Хүн, Улуг-Эге-Хаанын  
Оранынга четкештиң,  
Улуг адаан-мөөрөйгө  
Шүглүп үнгештиң,  
Ол үш хааның

Үш алдын дангыназын чаалап эккелдим,  
Үш алдын даңгына  
Сээн даңгынаң болур ужурлуг,  
Эгээрилбес эди  
Сээнд эдин болур ужурлуг.  
Мен-даа бора-тоолай бооп,  
Хувулуп алгаш,  
Арга аразындыва кире бердим, акый» — деп  
Бижип кааштың,  
Бора-Шээлей дуңмазы бора-тоолай бооп  
Хуулуп алгаштың,  
Аргадыва маңрап-даа сала берип-тир эвеспе.

\* \* \*

Ара-албатызынга бора тоолай кылдыр хуула берген дуңмазын Бокту-Кириш диледип турда, ооң тонунуң эдээниң азындыва бора тоолай хоруп кире бээр. Ону Ай-Хааның алдын дангыназынга, Хүн-Хааның хүмүш даңгыназынга азыраар кылдыр бээрge, «ине, чүскүк, сиир-даа арттырбас-тыр, оранынчे аппарып сал» дээрge, салыптар.

Бокту-Кириш эзимде улуг кара чадырынга кире халып кээрge, дуңмазы чадырының дөрүндө каттырып олурап. Бокту-Кириш аңрап чоруй баарга, иийи кадыны соондан чаштып чорааш, Бора-Шээлейнийн чадырынга кирип кээр.

— Ченгелерим, амыр-ла! — деп тура халааштың,  
Чолугуп, бараалгап четкен туруп-тур.  
Иийи ченгезин дөрүнүң бажындыва олуртуп,  
Дөрт каът олбук-кудузун  
Салып берген-не олуруп-тур.  
Чиң шайын кудуп,  
Чигир-боова, боорзаан салып,  
Хүндүлөп, ямбылап-даа олуруп-тур.  
Алдын, хүмүш иийи даңгына  
Ол уругну шинчилеп көрүп олурага,  
Бокту-Кириш-бile кара чаңгыс дөмей  
Мындыг-ла болуп туруп-тур.  
Чаңгыс боонуң огу дег,  
Чаңгыс хепке куткан-бile дөмей бооп-тур.  
«Бокту-Киришиң-даа аргажок-ла  
Төрээн дуңмазы-дыр ийин» — деп  
Көрүп олургулап тур.

— Аал-оранга-даа барбас,  
Чааскаан-на мында олурар,  
Бокту-Кириш акың  
Канчап барган кижил  
Сени аппарбас — дижип олуруп-тур.

— Бокту-Кириш акым  
Үстүү орандыва үне бээрge,  
Кара чааскаан чурттап  
Олурган кижи мен,  
Чүве-даа тоочувас кижи мен — деп олуруп-тур:  
— Мунгаш кара эзим иштинге  
Буугуп, сарыгып-даа олурган-даа  
Кижи эвес сен бе?

Бажыңын ажып көрейн — дээш,  
Алдын даңгына бажын ажа берген олуруп-тур.  
Ийи чаавазы ийи улуг кара кежегезин  
Чара соп алгаштың,  
Ай-Хаанның алдын даңгыназы  
Алдын тевенезин ол уругнуң кулаандыва  
Киир шаап бадырыпкан олуруп-тур.  
Хүн-Хаанның хүмүш даңгыназы  
Хүлер тевенезин бир чарыкы кулаандыва  
Кадай шаап бадырыпкан туруп-тур.  
Улуг кара чадырдан үне халыжып алгаш,  
Ийи кадын чана-даа берген-дир.

Аңрап чораан Бокту-Кириш дунмазының чадырынга кээрge, дунмазы тын чок чыдар.

Чүс ак төвөзиниң аразындан  
Улуг ак аданны чедип-даа  
Эккелген туруп-тур.  
Тос каът кадак торгу-бile ораап,  
Хөө хөвөң-бile чымчактааш,  
Дунмазын аптарага суп олуруп-тур.  
База бир аптаразынга  
Дунмазының эдилээр эдин,  
Идик-хевин, ине-чүскүүн суккаш,  
Алдын, мөңгүн, чавага боошкуунун,

Алдын, мөңгүн билзээн  
Дуцмазынга деңнеп суп-тур.  
Ак аданга деңнеп-даа чудургештиц,  
«Ону черле ышкынмайн  
Кадарар сiler» — дээш,  
Бежен-алдан кижээ кадартып каап-тыр.

Бир хүн кончуг улуг шуурган боорга оозу тывылбайн баар. Бокту-Кириш тос чылдың нүүрүндө дилеп кээр. Чиге бурунгаар чүкте кашпал кара хемниң бажында Быдаакай-Тараакай дээр ашак уруу-бile аптара чудурүп каан чаажы кончуг ак аданны курунуң ужу-бile баглай соккаш, чудурүп каан аптараларны адырып көөрге, бирээзинде херээжен кижиниң херексели, а бирээзинде тос каът кадак хөвөц иштинде алдыы эрнинден «A» деп үжүүк, үстүү эрнинден «Y» деп үжүүк бүткен, алдыы эрнинде аьш-чем сиңген, үстүү эрнинде үзүм-чигир сиңген, ай, хүн херелдиг алдын даңгына уруг уштуунуп кээр. Ооң солагай талакы кулааның үдүндүве мөңгүн тевене, а ёскезинче алдын тевене кадал каан боор. Ашак элтеп чыткаш хавының чушкуузу-бile ушта соп каарга, оозу бичии тынып чыдар.

Быдаакай-Тараакай ашак  
Аьш-чемниң чыдын чыткарып,  
Аксынга суп тургаш,  
Деткерилдирип ап-тыр.  
Ам-даа ёзуулуг кижи бооп  
Дирлип келген,  
Альштанып-чемненип турар  
Бооп келген иргин ийин.  
Быдаакай-Тараакай ашактың  
Өөрүшкүлүг, байырлыг деп чүвези  
Аргажок олуруп-тур.  
«Кара чаңгыс уруумга база  
Эш-кош уруг тывылды» — деп  
Амырап олуруп-тур.

Кара-Хемниң аксын эжелей чурттаан Тун-Караты-Хаан дээр хааның Кара-Бүдегей тажызы ча-согуну-бile күшкаштап чорааш, огун Быдаакай ашактың өөнүң дүндүндүве киир шишпий кааптар. Ында кончуг чарааш ай, хүн херелдиг даңгынаны көрүп кааш, дилеп бээр кылдыр адазынга чугаалаарга, ашакты кыйгыртыр.

Хаан олурагаштың:  
— Ынчаарга бора-тоолай харындан

Санап эккээр сен,  
Бир эвес санап тыппазыңза,  
Бөрттүг бажыңы бөргүң-бile кезер,  
Чеңниг кырыңы чеңиң-бile сыгар мен — деп-тири.  
Ашак муңгарап, ыглаан-сыктаан өөнгө кәэрge, Бора-Шээлэй:  
— Муңгарааштың чоор сен, ачай,  
Бир тавак ишти үзүм-чиғирден алгаштың  
Бора-тоолайның кокпазынга уруп кааштың,  
Кончуг таптыг дыңнап чыдып аар сен.  
Бир тавак үзүм-чиғирни  
Хапка-даа уруп алгаштың,  
Бора-тоолайның кокпазын дилеп чоруурга,  
Бир бора-тоолайның кокпазынга  
Таваржып келген иргин ийин.  
Ол кокпа орта үзүм-чиғирин уруп кааштың  
Быдаакай-Тараакай ашак  
Кончуг таптыг чаштып алгаштың,  
Көрүп чыдып-тыр.  
Кежээликтей бора-тоолай  
Кокпазынга маңнап келгештиң  
Уруп каан үзүм-чиғирни-даа көргештиң,  
Чыдындан амзап чип кергеш:  
— Бежен харлап келген ийик мен,  
Бо назыным иштинде  
Ындыг амданныг чаагай чуве  
Чип көрбээн мен — деп  
Чугаалап-даа чип чыдып-тыр эвеспе.  
— Ындыг болза, ашак,  
Бээр ийниң аргазының санын санап кел,  
Бээр ийниң кара адзының харын  
Тып эккээр эвес сен бе,  
Аар ийниң аргазының санын  
Санап келир сен,  
Ак адзының хары чеже-дир,  
База тып эккел, кулугур.  
Ону санап тыппазыңза,  
Бөрттүг бажыңы бөргүң-бile,

Чеңниг кырыңны чеңиң-бile  
Кезер мен, кулугур — дәэн иргин ийин.  
Ашак мұңгарап, ыглаан-сыктаан өөнгө кәэрge, Бора-Шәэләй:  
— Мұңгарааш чоор сен, ачай,  
Алды куу кижи бажындан  
Тып эккел — деп адазын-даа чоргузуп-тур.  
Ашак чоруткаш,  
Алды куу кижи бажы-даа  
Тып эккелген-не.  
Ашактың әктиниң кырынга  
Алды куу кижи бажын-даа  
Кожа кылдыр илип берип-тир.  
— Ындыг болза, ачай,  
Бәэр ийинге баргаштың,  
Адыгның аргып турар оруунга  
Чаштып чыдып аар сен,  
Адыг кылаштап эртип чыдырда,  
Хеп-хенертең тура халыыр сен — деп олуруп-тур.  
Аар ийинге база-ла адыгның оруунга  
Чаштып чыдып алгаштың,  
База-ла хенертең тура халы! — деп  
Чугаалап олурган иргин ийин.  
Ашак-даа базып чоруп каан.  
Бәэр ийиниң аргазының мәэс чарынга  
Чаштып-даа чыдып ап-тыр.  
Бәэр ийиниң аргазының  
Кара ады үнгештиң  
Мәэс чарындыва кылаштап чоруп олурган.  
Чанынга чооктап келирге,  
Хеп-хенертең тура-ла халаан иргин.  
Кара адыг чожуп белиңдег бергештиң:  
— Бәэр ийиниң аргазын  
Бежен түмен кылдыр  
Санаан ийик мен.  
Бежен беш харны  
Харлаан ийик мен,  
Шак мындыг алды-чеди баштыг

Кижи көрбээн ийик мен — деп  
Салып ыңай бооп-тур.  
Аар ийиндиве кылаштап ашкаштың  
Аар ийниң аргазының  
Адыг оруунга чаштып чыдып ап-тыр.  
Дал дүүш хиреде  
Аар ийниң ак адый  
Бо кылаштап чоруп олуруп-тур.  
Анча-мынча чанынга алгырылкаш,  
Ашак-даа тура-ла халып келген иргин ийин.  
— Аар ийниң аргазын  
Алдан-чеден кылдыр санаан ийик мен,  
Алдан алды харны  
Назыдап келген ийик мен,  
Бо назыным иштинде  
Алды-чеди баштыг кижи  
Көрбээн ийик мен — дээштиң  
Дезип алгаштың,  
Ыңай-ла бооп калган иргин ийин.  
Туң-Караты-Хаан чурагайын тыртып,  
Хопчу-каразын ажып көөрге,  
Ол кара хевэерти дүшкен бооп-тур.  
Туң-Караты-Хаан олургаш:  
— Бир хүн шарыдан ап алгаштың,  
Иштинде чиң каңгыр чок кылдыр,  
Даштындан чиг кылдыр  
Бүдүнгэ быжырып кээр сен, ашак — деп  
Мындыг айыткал кылган иргин ийин.  
Бора-Шээлэй уруу олургаш:  
— Бо чүнүң шарызын  
Айдал чорууруң ол, ачай — деп-тир.  
— Туң-Караты-Хаан иштинден чиң каңгыр чок кылдыр,  
Даштындан чиг кылдыр  
Быжырар кижи сен дээр чуве-дир, уруум — деп-тир.  
— Ында чүү боор, ачай,  
Туткаш, бурундуектааш, баглап кал — деп олуруп-тур.  
Ашак-даа бурундуектааш, баглап кааштың

Шайлап-даа олуруп-тур.

Уруу олургаштың:

— Бир чылапча дусту эзилдиргеш,

Ол шарыга ижирип ал, ачай — деп олуруп-тур.

Ашак-даа бир чылапчага

Дусту эзилдирип алгаш,

Ол шарыга албадап тургаш,

Аксындыва кудуп тургаш,

Ижирип-даа алган туруп-тур.

— Ийи өл ыргайны кезип алгаш,

Бош дагны долгандыр сывыртавыт, ачай — деп-тир.

Ашак-даа хемни өруу чүгүргеш,

Ийи өл суук ыргайны кезип алгаш,

Чүгүрүп кээп-тир.

Дөрт эдээн төмүрээрти астып каапкаштың,

Ийи хончузун даап каапкаш,

Улуг хүрең шарызын

Бош дагны долгандыр шывыктап

Ойладып кээп-тир.

Ойлады-ойлады келирге,

Ханныг-ханныг чин-бile

Кыжыктап-тыр шарызы

Ойлады-ойлады келирге,

Чаш хан-бile кыжыктаан

Чоруп турар бооп келген иргин ийин.

Уруу:

— Ам ойладып экkel, ачай,

Ажырбас — деп алгырара,

Ашак ойладып чедип-даа кээп-тир.

— Хаваандыва кара чаңгыс

Демир маскаң-бile тутсуут — дээн

Мындыг туруп-тур.

Хаваандыва масказы-бile

Хак-ла кылган,

Өлүп-даа барып ушкан.

Уруу:

— Ургайдан казып ал, ачай,

Ооң бетинге элезинден деңнелдир төккештиң,  
Ооң қырынга кончуг улуг оттан одавыт, ачай — деп  
Чугаалап-тыр.

Элезинни дөңнелдир төккештиң,  
Ооң қырынга улуг одун одап туруп-тур.  
Элезини изип, қызып кәэр орта уруу:  
— Ол казып алган чериңдиве киир каавыткаш,  
Кырындыва изиг элезинни  
Хөме эживит — деп-тир.

Ашак шарызын казып каан черинче суккаш,  
Кырындыва изиг элезинни  
Киир эжипкен-даа туруп-тур.  
Ийи адашкы ыяштап тургаш,  
Дүн-хүн чок қырынга  
От-ла салып туруп-турлар.  
Үш хонукта одап кәэрge,  
Шарызының ужазының үдүндөн  
Үс-даа дырыгайнып төктүп  
Туарар бооп-тур.

— Ам болзун, ачай — дәэш,  
Ужулдуруп каан-на  
Мындыг олуруп-тур.

Эртенинде хаан ашакты кыйгыртыр.  
— Ынчаарга сен, ашак,  
Ийи шарыдан сүрүп алгаш,  
Сүдү-бile эрегей тарактан шуглап каар сен,  
Эртен баргаштың ижер мен — деп-даа  
Мындыг чарлык бооп олуруп-тур.

Бора-Шээлей:  
— Тонунду эжингеш,  
Дөжээнниң қырынга уёлап,  
Човуурлап чыдып ал, ачай — деп-тир.

Хаан-даа өг адаанда  
Саяктадып чоруп олуруп-тур.

Бора-Шээлей эжиииниң дедир чарынынга  
Бажын дырап-даа олуруп-тур.  
Хаан уругнуң чанынга чедип келгештиң:

— Бажыңың дүгүн чеже катап дырадың, кыс.  
Чеже катап дыраанын  
Кым санады? — деп айтырып-тыр.

— Силерниң аъдыңар аалыңардан бээр  
Чеже катап базып келди,  
Чеже катап басканын кым санады? — деп  
Удур айтырып-тыр.

Хаандан харыны чок болган иргин ийин.  
Хаан аъдындан дүшкештиң  
Өгдүве кирер деп чорда:

— Өгдүве кирип болбас, хаан — деп,  
Уруг чугаалап-тыр.

— Чүгө кирип болбас чүвөл, кыс? — деп,  
Хаан айтырып туруп-тур.

— Ачамның эъди аарый берген,  
Эжик ажыдып болбас,  
Соок хаптар — деп харыылап-тыр.

— Эр кижииниң эъди  
Канчап аарыыр чүвөл, уруг? — деп,  
Хаан айтырган иргин.

— Эр кижииниң эъди аарывас болза,  
Эр шарыдан сүт үнер бе? — деп  
Айтырган иргин ийин.

Хаан тургаштың,  
Кандыг-даа харыны сөглевейн,  
Ыяткаш, шаап чана берген чүвөң иргин...

Туң-Караты-Хаан алдын даңғынаны оглунга кудалап бээр.  
«Черле кайы хире эртем-шидилиг уруг ирги,  
Мону көрүп көрейн» — деп  
Бир хүн боданып олургаш,  
Хаан кадынын кеннинге,  
«Бөгүн хойдан кадартывыт» — деп олуруп-тур.

Кадыны кенниниң өөнгө баргаш,  
«Бөгүн хоювусту кадарып көрем, уруум» — дээн иргин.  
Чечен-Уруг хоюн дагның баарынга,  
Сугнуң кыздыынга кадарып чораан иргин.  
Туң-Караты-Хаан Таңдының дарган көк бөрүзү бооп

Хуулуп алгаш,  
Үстүндөн куду кедеп чедип келгештиң,  
Кенниниц хоюндан бирээни тө соккаш,  
Чартыын чий каапкаш,  
Ыңай-ла бооп-тур.

Хаан аалының дужунга  
Боду бооп хувулуп алгаш,  
Улуг чаагай өөндүве кире берип-тир.

Хою-даа дал дүйште кирип келген.  
Хаан кенниниц өөнгө баргаш:

— Чая, чүнү көрдүң, уруум? — деп айттырып-тыр.  
— Чуглурнуң мурнуунга,

Агарның чанынга,  
Улуур келгештиң  
Маалаарны сыйрыпты,  
Кукулаа биле шажылаа  
Ооң чанынга тырыкыланып  
Тура хүнзеди — деп

Ойзуп-даа чугаалап олуруп-тур.

Хаан олургаш:  
«Мээн бо кенним-даа  
Аргажок эртем-шидиллиг  
Арылган оранның дарийгизи-дир» — деп  
Бодап олуруп-тур.

Түң-Караты-Хаан уругнуң эртем-шидизин эскергеш, оглунун орнунга боду кадайланып деп улуг сеткип, оглун аннаарынче чалап тураг.

— Чаңгыс эвес үш хонук чорааш,  
Аданга чедер эвес сен бе — деп  
Олуруп-тур эвеспе.  
— Бир хонууңу каяа чордун,  
Чүгө хожудадың, кулугур? — дээр эвеспе.  
Каңмыыл-били чугаалажып  
Хондум дээр сен,  
Чүү деп чугаалаштың, кулугур — дээргэе,  
Дазылы чок ыяш база кончуг,  
Хат кээргэ база кончуг,  
Төлү чок кижи база кончуг,

Чаа кээрge база кончуг деп  
Мону чугаалаар чорду дээр сен — деп-тир.  
База бир хонууцну  
Каяа чордуц, кулугур — дээр эвеспе.  
Эзир койгун теп алган,  
Ооц койгунун Хаан-Херети былаашкан,  
Хаан-Херети күштуц хааны болгаш  
Чиир мен деп,  
Хаан кижининц оглу-дур сен,  
Моон чаргызын үзүп бер дээрge,  
Чаргызын үзүп хондум деп  
Чугаалаар сен — деп-тир.  
— Чүү деп үстүн, кулугур? — дээр эвеспе.  
Теп алган чүве болганда,  
Эзир чизин деп үстүм деп чугаалаар сен.  
Чеже-даа күштуц хааны болза,  
Хаан-Херети ону чиир ужуру чок дээш,  
Ынчалдым, ачай — дээр сен.  
База бир хонууцну  
Каяа хондуц, кулугур — дээрge,  
Кадыргы эртине тып алган  
Ооц эртинезин бел былаашкан,  
Хаан кижининц оглу-дур сен,  
Бистиц чаргызыс үс дээрge,  
Чаргызын үзүп саададым дээр сен,  
Чүү деп үстүн, кулугур — дээрge,  
Эртинени тып алган  
Кадыргы алыр кылдыр үстүм,  
Чеже-даа күштүг болза,  
Бел ону алыр эргези чок деп  
Чугааладым дээр сен.

Үш хонганды Кара-Бүдегей тажызы адазынга чеде бергеш, кадыныныц айтып бергени ёзугаар чугаалаан.

Хаан олургаштыц боданып, шүгдүнүп  
Олуруп берип-тир эвеспе он.  
«Дазылы чок ыяш  
Хат кээрge берге болгай,

Ужуп каар,  
Төлү чок кижи  
Чаа-чалгак кээрge бергези шын,  
Болур ужурлуг  
Адаан-өжээн кырыыр эвес,  
Адазы өлүр-даа болза  
Ажы-төлү ежүн негээр ужурлуг» — деп  
Боданып олуруп-тур.  
Бодун боду боданып олуруп-тур:  
«Мен чежемейниң-даа  
Хаан болдум бизе,  
Чеже-даа күштүг болдум бизе  
Мээн күжүмден,  
Мээн хаан эргемден  
Чүме болур эвес,  
Кандыг-даа чүве  
Чувениң ужурун әдерер  
Ужурлуг болгай» — деп  
Боданып олуруп-тур.  
«Мен чеже-даа хаан болдум бизе,  
Бодумдан төрүттүнгөн  
Чаңгыс оглумнуң кадайын мен  
Чарып аарымга,  
Ол меңээ ажык-даа,  
Дуза-даа болбас-тыр ийин,  
Аксының кежии бооп,  
Алдын даңғынаны тып алган кижи  
Мээн оглумнуң чурттаары-даа  
Чөптүг болур-дур.  
Буруулуг, бузуттүг багай чувени  
Кылган-дыр мен» — деп  
Бодунуң буруузун боданып олуруп-тур.

\* \* \*

Түң-Караты-Хаан мурнуу чүкте Өжээти-Хаан-бile шыдыраа маргылдаазы кылгаш, уттургаш, сааскандан сөс дамчыдар. Сааскан Кара-Бүдегей тажының баглаажының бажынга хонуп алгаш, хааның чугаазын бирден бирээ чокка чугаалап олурар.

Чечен-Уруг олургаш, чугаалап олуруп-тур:  
— Көк олбуктуң кырында чыдыр мен дээни —  
Харлыг доштуң кырында чыдыр мен дээни ол-дур,  
Көк олбук-били шугланып алган чыдыр мен дээни —  
Үстүнде көк дээри ол-дур, кулугур,  
Дөрт чүгүмде дөрт кара эр  
Бараачылыг олур мен дээни —  
Дөрт даванымдан демир өрген-били  
Хере шаптырып алган чыдыр мен  
Дээн сөзү ол-дур.  
Кызыл серге эъди сүүзүнүг чыдыр мен дээни —  
Аксы-думчуунун ханын төгүлдүр  
Эриидеп тур мени дээни ол-дур, мелегей,  
Чиң шай, чигир-боова чооглап чыдыр мен дээни —  
Ажыг сарыг суг-били  
Арган хеңме чип чыдыр мен дээни ол-дур.  
Аалымның коданында  
Үш демир терек баглаажым бар дээни —  
Моон үш элчи чеде бээр эвеспе,  
Бирээзин алга өлүргеш,  
Бирээзин чер ортузунга өлүргеш,  
Бирээзин орук баштадып алгаш,  
Менээ дүрген келиңер дээни ол-дур.  
Улуг кара аъдыңы чушкуулап аар сен дээни —  
Улуг кара аъдыңы соодуп ал дээни ол-дур.  
Улуг кара чаңың кирижин кезип аар сен дээни —  
Улуг кара чаңың кирижин  
Дыңзыдып ал дээни ол-дур, мелегей,  
Улуг кара селемеңниң бизин  
Дөгей кылдыр эттеп аар сен дээни —  
Селемеңни чидидип ал дээни ол-дур.  
Мыйыстыг малыңарны мурнуундан айдацар дээни —  
Октуг-чемзектиг аг-шериимни  
Дүрген мурнадып чоргузуңар дээни ол-дур.  
Дөңгүр малыңарны соондан айдацар дээни —  
Албаты-чонуңу соондан  
Чоргузуп олур дээни ол-дур, кулугур.

Будумнуң адаанда чыдар  
Чидиг сарыг хачым дээни —  
Кенни мен-дир мен.  
Дөрүмнүң бажында дөгей бистиг кестиим дээни —  
Сени ынча дээни ол-дур, кулугур — деп олуруп-тур.  
Олурган херек чүү боор,  
Аг-шеригни мурнадыр,  
Ара-албатыны соңнадыр,  
Аргалыг-ла болза Өжээти-Хаанның  
Аг-шерииин узуткааш,  
Албаты-чонунга хол дегбенер! — деп  
Айыткаал берген иргин ийин.  
Аг-шерииин кирипкеш,  
Дош кырында хере хап каан Түң-Караты-Хаанны  
Хостап ап-даа турган иргин ийин.  
Чечен-Уругнуң аг-шерии  
Өжээти-Хаанның чуртун хөме  
Таварып кирген.  
Чаа-дайынга белеткел чок  
Өжээти-Хаанның аг-шерии-даа  
Холга дүжүп берипкен туруп-тур.



1. Бокту-Кириш, Бора-Шээлей иезинден канчап чарлы бергенил?
2. Алышкыларның «Успа далай иелиг бис, улуг далай адалыг бис» деп чугаазының утказын канчаар билип тур сiler, сайгарып чугаалажыңар?
3. Бокту-Кириштиң алдын, хұмуш даңғыналары Бора-Шээлейниң тынынга канчап четкенил?
4. Быдаакай-Тараакай деп кымыл? Өске маадырлыг тоолдардан оон овур-хевииринге чоок кым деп маадырларны билир сiler? Оларның дөмей талалары чудел?

\* \* \*

Бир эртен баг адар черге чеде бәэрge, эрте-бурунгу шагда чоруткан Бокту-Кириш чедип келген боор.

Иий алышкы экизин чугаалажып,  
Иий мойнундан сегиржип алган каттыржып,

Багын чугаалажып — ыглажып  
Хүнзеп олуруп-турлар.  
Бокту-Кириш олургаш:  
— Биеэде мээц караамның оду болган,  
Баарымның өдү болган  
Кара чаңгыс дунмамны — Бора-Шээлейни  
Бак кара сагыш-бile  
Чүге өлүрген силер, кулугурлар?  
Багай дунмамны ынчанган деп  
Кайын билир мен.  
Ай, Хүн-Хааның ийи даңғыназын  
Ийи чажындан кожа берген турup-тур.  
Демир чагызынга аскаштың  
Ийи кадынны өл шывык-бile  
Шывыктап-даа эгелээн-дир.  
Шывыктап-шывыктап дүжүр соккаштың  
«Кайыңар өлүргенил,  
Иелээн өлүрген силер бе?» — дээрge,  
«Сээн багың, сээн багың» — деп  
Ийи бодунуң аразында  
Ийи чара сокчур болган иргин.  
— Бир-тээ мындыг бак кара сагыштыг  
Кылган болган чүмеде,  
Чанымга силер ийини олуртуп,  
Шай-суксун хайындыртып олурганының  
Менээ бичии-даа херээ чок-тур — деп,  
Бокту-Кириш күзүр-казыр чугаалап-тыр.  
Частың ортаа айының он бештиң хүнүнде  
Үстүү орандан үш дээрниң кырындан  
Үш өңнүг солаңгызын тырттыргаштын,  
Ийи кадынны ону кырладып  
Чоргузупкан иргин ийин.  
«Аскаштың, тенээшиң келген силер бе,  
Аалчы-шүүлчү бооп келген силер бе» — деп,  
Ай, Хүн адалары айтрып олуруп-тур.  
Черле ыыт чок, арны-бажы хөлүе берген,  
Куду көрүпкен олурар

Мындыг-ла бооп-тур эвеспе.  
Сөглевес-даа ужур чок бооп келгештиң  
Ийи даңғына чугаалап турлар:  
— Алдыы оранга Бокту-Кириштиң  
Бора-Шээлей дүңмазы бар,  
Ону өлүрүп каан улус бис.  
«Силерниң херээндер чок,  
Чут бооп турган ажының чок» — дээш,  
Үстүү орандыва бисти  
Ойладып чоргускан чүве.  
Амытанга херээ чок болганда,  
Ада-иелиг улус,  
Ада-иезинге келбейн кайнаар баарыл? — деп  
Өчээн туруп-турлар.  
Үстүү оранның үш дүжүмеди  
Ийи даңғынаны бир-тээ  
Ол өртемчейге айыыл-херек  
Үүлгеткен чүме болганда,  
Тос хонуктуң иштинде  
Эрии шаагайны-даа көргүзүп туруп-тур эвеспе.  
«Мооң соонда чуладан чырык сагыштыг,  
Сүттен ак сеткилдиг чоруңар!» — дээш,  
Салып чорудуп турган иргин ийин.  
Алдыы оранда Бокту-Кириш, Бора-Шээлей алышкылар  
Өзен черинге малын чалап,  
Өлчей буянын делгередип,  
Аргалыг черге малын чалап,  
Албаты-чонун башкарып,  
Үстүүртөн үер, чаңыңк дыынмас,  
Алдыы оранның аза-четкери чагдал болбас  
Каң демир дег күчү шыдалдыг  
Алышкылар бооп,  
Оюн оя, чигин чире  
Чурттап-даа сала берип-тир эвеспе оо!

- 
- 1. Тоолду уткалыг кезектерге чаргаш, пландан тургузуңар.
  - 2. Бора-Шээлейниң өртөм-билиглиг илби-шидизин тоолдан ушта бижээш, сюжетке кандыг хүлээлгэ күүседип турарын сайгарыңар.

-  3. Сөзүглелден гиперболалар, деңнелгелерни ушта бижээш, сайгарыңдар.
-  4. Тоолда утказы билдинмес сөстерни башкыңар азы ада-иелериңер-бile тайылбырлажыңар.
-  5. «Бокту-Кириш, Бора-Шәэлей» деп тоолдуң сюжединге даянып алгаш, хөрөжен кижиниң маадырлыг чоруктарын көргүсken чогаалдар-бile деңнелгелиг биче шинчилел ажылындан кылтырын оралдажыңар.

## ЧОГААЛ ТЕОРИЯЗЫ

### Маадырлыг тоолдар дугайында билиг

Маадырлыг тоолдар азы эпос чогаалы тыва улустуң аас чогаалының улуг хемчәэлдиг болгаш хөй болуушкуннарлыг хевири болур. Тоол-бile бир дөмей, эпоста болуушкуннарның болуп турар чери болгаш үези тодаргай эвес, фантазияны болгаш хөөредиглерни хөйү-бile ажыглаар. Эпостуң тоолдан ылгалдыг чүүлу болза, колдуунда-ла эрес-дидим кижилерниң маадырлыг чоруктарын алдаржыдып тоолдааны болур.

Тыва улус чүс-чүс чылдарның дургузунда дыка улуг хемчәэлдиг, чамдыкта иий-үш кежээ дургузунда ыдып келир, маадырлыг тоолдарны тургускан. Ооң чижээнге «Танаа-Херелди», «Тоң-Аралчын хаанны», «Каңгывай-Мергенни» адап болур. Олар тыва чоннуң эгээртинмес төөгүлүг тураскаалдыг чогаалдары бооп «Сибирьниң болгаш Ыраккы Чөөн чүк улустарының аас чогаалының тураскаалдары» деп Россияның Эртемнер академиязының Сибирь салбырының Новосибирск хоорайда үндүрүп турары 60 томнуг академиктиг серияның томнарында парлаттынган: «Тыва улустуң тоолдары» (1994), «Тыва маадырлыг тоолдар» (1997). Оларны тыва эртемденнер С. М. Орус-оол, З. Б. Самдан тургусчуп турган.

Тыва аас чогаалын сайгарган эртем-шинчилел ажылдары дөлөгейниң аас чогаал шинчилээр эртеминиң даңзызынче шагдала кире берген. Этнограф-эртемден Л. В. Гребневтиң «Тувинский героический эпос» деп ному төөгү-этнография талазынче кол кичээнгейни угландырган-даа болза, маадырлыг тоолдарны классификастаар, оларның уран-чеченин болгаш тывылган үезин допчуулап анализтээрде, төөгү айтырыгларын тодаргайлаар сорулгалыг шинчилелге чагырткан болуп турар. Л. В. Гребнев маадырлыг тоолдарның баштайгы тывылган үезин VII—IX вектерге

хамаарыштыргаш, оон бээр төөгүнүц узун оруунуц дургузунда чаа-чаа салгалдарже дамчып чорааш, база төөгүлүг болуушкуннарның салдары-бile чоорту өскерилгелерге таваржып хөгжүп келген деп бадыткап тураг. Амгы үеге чедир тыва маадырлыг тоолдарны чыып бижип, парладырындан аңгыда, оларны шинчилээриниң талазы-бile эртем ажылдары кылдынып келген. Билдингир тыва эртемденнер Д. С. Куулар, С. М. Орус-оол, З. Б. Самдан оларның эртем-шинчилел ажылдарын хамаарыштырып болур.


## II кезээ. ААС ЧОГААЛЫНЫң САЛДАРЫ-БИЛЕ...

Владимир СЕРЕН-ООЛ

(1942—1994)

### Каң-кыс

Кайгамчык маадыр  
Каң-болат уруг,  
Ханы ынакшыл,  
Кара сагыш,  
Өзөр назы,  
Өлүм-чидим,  
Адаан-мөөрей,  
Адыш-чарыш,  
Арын-нүүр,  
Ат-алдар,  
Уяранчыг ынакшыл,  
Уран хуулгаазыннаар,  
Ужуралдар дугайында  
Тоожу  
Тоол.



### Хаанның хомуудааны

Арбак-Мөгө альттан дүшпейн,  
Аалды каш-даа долгандылаан.  
Төрүттүнер төлүн бодааш,  
Дөстүнмези киткеп турган.

Чырык имир шагда эрткен,  
Сылдыстар-даа четчиp үнген.  
Аңгыр-Ала кадын ам-даа  
Аарбышаан хевээр болган.  
Дүннүң таптыг ортузунда  
Дувурээзин улам хөлзээн.  
Алгы дыцнааш, Арбак ам-на  
Альттан дүшкеш, өгже шиглээн.  
Шуваганчы Карбын ацаа  
Чугаалаан-даа чүвөн иргин:  
— Каң-болат кестиицни бээр  
Хайырлавыт, экер оглум.  
Чаяан ындыг турган-дыр ийин,  
Сагышсырааш канчаар ийик сен:  
Кыс уруг төрүттүндү,  
Кымга хирнин кестирир сен?  
Ону дыцнааш, Арбак-Мөге  
От-көс ышкаш изигленген:  
— Төре хөрээ шиитпирлешпес,  
Дөргө орап эргези чок  
Төлдүң хинин бодуң кес — дээш,  
Кестиин дегийт сунувуткаш,  
Херт-бурт чаңыг альттаныпкан.

Девиржээн аyt Аян-Кула  
Дээскиндиr араалчылааш,  
Тура дүшкеш, чугаалап-тыр:  
— Дайын-чаа деп барганыңда,  
Таан-даа кончуг далаш сен ийин.  
Дунун божаан кадайыңга  
Тураскаал чоп арттырбадың?  
Оолдуг кижи — оя чоруур,  
Кыстыг кижи — кыя чоруур.  
Ок-чепсек тутпас-даа бол,  
Кызың барда — күдээ кай баар.  
Караа чырып, чиигеп алган  
Кадайыңга белек кылдыр

Чалым хая кую черде  
Чажыттарны сиилбип бижээн  
Көвенчииндэ аржылыңы  
Хөөкүйлерге арттырып каг.  
«Доктарлыны!» деп боданмышаан,  
Тос каът чонаан ажа соккаш,  
Аккыр өргээ дүндүүндүве  
Аржылын ол киир каапкаш,  
Чиге мурнуу чүкче шиглей  
Шивенчнедип чорувуткан.

### Арбак-Мөгениң алдагдалы

Сайын-Уран — кажар қадын  
Шаңгыр-Хаанын чажырыпкаш,  
Арбак-Мөгө күчүтенни  
Аалчы ышкаш уткуп алган.  
Олбук салып, чемин делгеп,  
Оюн-тоглаа — найыр қылгаш,  
Арбак-Мөгө ээзирzin дээш  
Арагазын сөннеп турган.  
Чараш қыстар ыры, самы,  
Чаныг қадын оптуг сөзү —  
Дүлгээзинче Арбак-Мөгө<sup>1</sup>  
Дүлнү берген чувең иргин...  
Бияңгылыг хоюг үннер,  
Бинакшылдыг чугаа-сооттар,  
Ямбылдыг хүндүлелдер  
Биндыг-ла үр болбайн барган.

«Алтай-Танды чагырганы  
Ам кым ээлеп, тудар чувел?  
Арбак-Мөгө дириг чок-тур,  
Аъды, боду катай ушкан.  
Хоран холаан арагадан,  
Хоран оъттуг сүүзүнден

Кайызы-даа өлген-дир!» деп,  
Качыгдалдыг аар медээ  
Каптагайга тарай берген.  
Ону дыннаан Шой-Төгүс  
Ол-ла дораан дөгерингеш,  
Аңгыр-Ала кадын тураг  
Аал-чуртче халдап кирген.  
Шой-Төгүс өжээнин ап,  
Согуш-чаага шүглүп үнгеш,  
Үзеш кынныр дириг малды,  
Үстүг кара чүлгүүштү-даа  
Хөлүш кынныр албатыны,  
Хөөлүг кара туткуушту-даа  
Арттырбайн эжелээштиң,  
Аңгыр-Ала кадын-бile  
Катай-хаара алгаш барган.  
Хамык турлаг ээн калган.  
Кускун куйт деп алгы салбас  
Куруг дазыр — хову-шөлдү,  
Сааскан сайт деп шимээргевес  
Чазаг, күзег хонаштарны  
Көжээ-даштар хоюткулап,  
Хөөрлер соргаан сөглөп турган.  
Канчап чаштып арткан чуве,  
Шуваганчы кадай биле  
Кавайлыг чаш бичии уруг  
Чуртка чыдып калган иргин.

### **Маадыр кыстың мандып өскени**

Чиирбей дег өл-чаш төлге  
Чиртинтер чем, сүт чок боорга,  
Сүтсүг чулук дазылдарлыг  
Чүзүн оъттар сордургулап,  
Эм-таң үнүш хандыларын  
Эмискикке шүүрэй кудуп,

Кокпаларга салган дузак  
Койгун-тоолай хайырлаарга,  
Хоюг мүннү аартадып,  
Эмишкеек, айны-бести  
Ээжегей кылдыр чиртип,  
Шуваганчы кадай уруун  
Чулазының оду кылып,  
Чурттап чораан чүвөң иргин.

### Каң-кыстың бұрун дериттингени

Чалым хая кую черниң  
Чажыт эжин Кәң-кыс тыпкаш,  
Кара-Калдар эки аъдын  
Каастап, дерип турған иргин:  
Алдын, мөңгүн атпактарлыг  
Аар чүген альтты каастаан.  
Хәндүргелиг, кудургалыг,  
Көвей колун шидиглерлиг,  
Кончуг чымчак чонактарлыг,  
Чаан, булан сөөгүндөн  
Шап турғаш хыралап каан  
Хомду сарығ бедик эзер  
Чидиг кызыл ийи бажы  
Чиргилчинней альтты каастаан.  
Кызыл сөөскен сырттыг кымчы  
Кырлыг өрүү тода көстүр,  
Сарығ сыйдым дашпылсырылыг,  
Сарығ былгаар таалыңынг,  
Дордум торгу төрепчилиг,  
Тос-тос карыш деспелерлиг,  
Дергизиниң баа безин —  
Дәәктерлиг хүлбүс мойнаа.  
Күзүңгү дег базыткыштар  
Күлүк дайны аян киирген.  
Арыг мөңгүн эзенғилер  
Аялгалыг кыңгырашкан.

Үлгүн маңынг болзун дигеш,  
Хар дег аккыр кадактарны  
Үйдүк-чели, кудуруунда  
Каастай дерип, чечектеп каан  
Кара-Калдар көстүп турган.

Кара торгу хилиц тоннуг,  
Кара булгаар кадыг идиин  
Хүрең, ногаан ыскыттардан  
Хүн-хээ кылдыр угулзалаан,  
Күчүтен дег Каң-кыс турган.  
Кадыр хаваан, каастыктарын  
Камгаландыр демирлеп каан,  
Кара, хүрең бышкактардан  
Каастап кылган бедик бөргүн  
Салдырыктааш аткаар октаан  
Чалышы маадыр Каң-кыс турган.  
Дордум торгу калбак курун  
Долгандырган дакпыр курда  
Эндерик хәй шидиглерге  
Эдин-чепсээн Каң-кыс дискен:  
Хылыш, монун, селемезин  
Кыдышын куду халаңнаткаш,  
Аккыр туңнуг оттук-бижээн  
Астыптарга, хевир кирген.  
Сыын, буурнуц мыйызындан  
Эптең кылган кадыг чазын,  
Сыйда октар — согуннарын  
Экөр кыс-даа эгиннепкен.  
Хөнү сыптыг чидиг чыда,  
Содак-шудак идик-хеви,  
Көгээржикте суксуну дээш,  
Чорук чоруур экөр кижи  
Ажыглаптар этти-септи  
Арттырбайн артып алган.  
Чалым хая баарынга  
Чалбаргылап мөгейгилээш,

Арбак-Мөге адазының,  
Аңғыр-Ала иезининң,  
Шуваганчы энезининң  
Сураан сурал кыс-даа хапкан.  
Кара-Калдар эки аъттыг  
Каң-кыс дәэрзи ырактан-на  
Түмен кижи сузун базып,  
Түрлүг көстүп чораан иргин...

### Чаалажыг

Чүглүг согун сыйыңайнып,  
Чүс-чүс аъттар киштешкилеп,  
Хылыш, бижек, селемелер  
Кылаңнажып, кыңгыражып,  
Докпак, моннар ында-мында  
Токкуңайныр дагжап турган.  
Дажаан даштар дүжүп турда,  
Даш долу чагганы дег.  
Октаан чыда тудалары  
Озаңнар дег овааланган...

Чорук-херек чогуваска,  
Шой-Төгүс өттүр билгеш,  
Шилиттинген өөрү-бile  
Чиге мурнуу чүгүн шиглей  
Дезип ыңай бооп чорда,  
Теппиже-ле кыңчыктырбайн,  
Каң-кыс ону дозуп алган.  
Каптагайны ыржым шыпкан.  
Хаяалыг хүн доктаай берген.  
Чапсар чарлаан чүве ышкаш,  
Чаа кезек үзүктелген.

Каң-кыс биле Шой-Төгүс  
Карактарын удур көржүп,  
Дегжип чадаан мөгелер дег,  
Дээргилей кавыдашкан.

Шериглери удур-дедир  
Чергелештири чыскаалышкан,  
Баштыңардан карак салбайн  
Манагзынып тургулааннар.  
Чүү-ле болур ирги дээнзиг,  
Чүректер-даа тиккилешкен,  
Сарыг хову ыржым-шыппшиц —  
Чашпан безин чайганмастаан.  
Алтай, Таңды, Саян даглар  
Аккыр меңги — көстүктөрүн  
Хөвөң-аржыыл — булут-бите  
Көску кылдыр чодуп турган.  
Өртөмчейге туруп көрбээн  
Өлтүг ыржым ынчан дүшкен.  
Каң-кыс биле Шой-Төгүс  
Кайызы-даа сөстер этпээн.  
Кыжаныгдан ийи холдар  
Хылыш сывын дыңзыг туткан.  
Альттар база хыйырташкан,  
Адаан оду хөрек долган...

### Көржүүшкүн

Харбаш кынган холдар орта  
Кадыг чалар туттунгулаан.  
Чүглүг согун кезеттинген,  
Чүстөр херлип, кириш дыңзаан.  
Кадыг кара ийи чалар  
Какпак дээрбек апаргыже,  
Согуннарныц чидиг бажы  
Солагай хол салааларын  
Кезип туар кылдыр тыртып,  
Херлип-херлип: «Чеве!» дишкеш,  
Кудай-дээрже согуннарын  
Кулуксаду салган иргин.  
Согуннарныц эзининден  
Шокар булут дүргектелип,

Кудай ынды — октаргайның  
Хуулгаазын кужу ышкаш,  
Сылаан дааш хат бооп дагжап,  
Сылдыстар-даа тоглап турган.  
«Айга, Хүнге барып дегзе,  
Айыыл-халап үнмес бе?!» деп,  
Албаты чон коргуп-иргип,  
Аймап-хөлзеп турган иргин.  
Хаяалыг хүн дагже ашкан.  
Хамык улус тарап чорбаан.  
Көккүр дээрде ийи согун,  
Көрүнчүкте көзүлген дег,  
Сылдыстарның аразында  
Чырып чоруур мындыг болган.  
Уш-Мыйгак бажын доза,  
Үзе чазып эрткен согун  
Өскезинге барып дээрge,  
Өлчейлиг дээр чырыш кыннып,  
Сылдыстарже оттар чаштап,  
Сырыланып турган иргин...  
Дангаар эртен бирги согун  
Дазыр шөлгө қээп дүшкеш,  
Кадыг черже карыш ажыр  
Кадалы-даа берип-тир oo!  
Каң-кыс биле Шой-Төгүс  
Халытпышаан ацаа келген.  
«Мээн аткан согунум-дур.  
Мээн бирги тиилелгем!» — деп,  
Чоргаарланып кыс-даа сөглээн.  
Шой-Төгүс үзе кирген:  
«Мээции ам-даа дүшпээн-дир көр.  
Бедип, ырап — кулуксаан-дыр».  
Шак ол өйде дая согун  
Чартылары черге дүшкен.  
Шой-Төгүс ону эптей  
Согун кылдыр тудуп турган.  
Черже кирген согунун кыс

Шеле аарак ушта тырткан.  
Өжээтиниң согунунуң  
Өрүмнелчек молдуруундан  
Өттүр дегген согунун кыс  
Өргүн чонче октавыткан.  
Демир чұстұг согунну улус  
Дескиндирип көрүп турган.

Шой-Төгүс дергизинден  
Сарығ сыйдым чежип алгаш,  
Чоогунда турган тейни  
Шалбалааштың, төрепчиләэн.  
Бош тей черден турлу қазып,  
Божаңайнып шимчеп турган.  
«Аъттың, боттуң күжүн шенәэр  
Адааны бо чүве бе?» дәэш,  
Демги тейни сыйдымнапкаш,  
Дедир угже кыс-даа сөөрткен.  
Кара-Калдар чұтқұптерге,  
Хая-даштар сөктүп бадып,  
Бош тей өг дег опаңайнып,  
Борбаңайндыр чуглуп орган.  
Ажынгаштың, Шой-Төгүс  
Аъдын улдал, тепсенгиләэн.  
Шокар аъды херлип-херлип,  
Соонче базар мындығ болган.  
Хенергеткеш дап бәэр дәэрge,  
Херилген баг үстүп чаштааш,  
Шой-Төгүс аъды-бile  
Согунналдыр чаштай берген.

Сарығ хову кыдыры черде  
Чашпан, bogun аштанғылап,  
Эзенғи теп турган эрже  
Эрес Каң-кыс кыйгырып-тыр:  
«Иий удаа мөөрейлешкеш,  
Кайызын-даа ажып үндүм.

Идегел ам — менде-ле-дир.  
Канчаптар бис? Соксаар сен бе?...»  
Кандыг-даа сөс сөглевейн,  
Халып бергүн дуглай тырткаш,  
Узун сыртыг чыдазын ол  
Уннай тудуп, хөме келген.  
Каң-кыс баштай мөлдүк-калдык  
Камгаланып — орук чайлаан.  
Казыргы дег катап кәэрge,  
Каң-кыс чүгле карбаш кынган.  
Чыпшыр эрткен өжээтиниң  
Чыдазы-даа сыйлып чаштаан.  
Кыстың ам-на кылышы хайнып,  
Кылыштышыашан удур барган.  
Хылыштарның бистеринден  
Кызаңнааштар шөйүлгүллээн.  
Арга-оптуг Шой-Төгүс  
Аъттың ол-бо талазынче  
Эриг хаак дег эглип бадып,  
Эптиг ейну манагылаан.

Каккылашкаш дедир чаштап,  
Каш-даа удаа шенешкеннер.  
Шой-Төгүс кышкырыпкаш,  
Чоору ол ийик, хөме келген.  
Камгаланы чазып чоруй,  
Каң-кыс чүгле херли каапкан.  
Баш чок ээлиг шокар аът-даа  
Баалык ажыр ыңай болган...

Тоолчуунуң тоожу  
Тоолун доозар  
Хевирлиг доктааганы.  
Шыялан ам, чүзү боор ийик,  
Чыргалдыг бо өртемчейге  
Көстүп көрбээн куда-дой-даа  
Хөглүг, шыырак эрткен иргин.  
Чамбы-диптиң албатызы

Чалаттырып аңаа келген.  
Чүгүрүктү чарыштырган,  
Чүректигни маргыштырган,  
Эът-ханы чедишкеннер  
Эгин содаан аңаа кеткен.  
Хөгжүм-ыры чаңгыланган,  
Хөөмей-сыгыт ындынналган,  
Оюн-тоглаа уламчылаан —  
Олут орбайн самнадывыс.

Курбустунуң оранындан  
Күштуң хааны — эрес Эзир  
Белек-сөләэн бадырарга,  
Мен-даа ону дозуп турдум.  
Арбак-Мөгө хөглезин дээш,  
Аңаа хымыс тудуп турдум.  
Аңгыр-Ала кадын меңээ  
Альжын-чемин сартыктады.  
Шуваганчы эневистен  
Шуру-чинчи белек алдым.  
Келин уруг — Кан-кыстың  
Хевин безин кедириштим.  
Күдээвис оол — Эзир-Мерген  
Хүлөр кестик меңээ берди.  
Экөр маадыр Ирбин меңээ  
Эзир чүглүг согун берди.  
Төве малдыг акым Аржай  
Төве дүгү энчек берди.  
Сайын-Уран чаавамдан  
Чайыр мөңгүн билзек алдым.  
Алган чүүлүм — дыка көвей,  
Аартыктааштың албайн келдим.

Шыян ам! Оон ыңай...  
Шынап, ынчап канчап боорул!  
Эки айттар дугайында  
Эгэ-ле шуут уткан-дыр мен.  
Аян-Кула айт-бите

Аалды бир долгандым-даа.  
Кара-Калдар эки аъттың  
Кастаан чежип, одарлаттым.  
Эзир-Кара дыштанзын дээш,  
Эзерин-даа союп турдум.  
Чааш аъттар тывылбаска —  
Чадаг базып чанып келдим.  
Олар ынчаар эптиг-демниг,  
Оюн оя, чигин чире  
Омак-хөглүг, ыры-шоорлуг  
Олчаан чурттап артып калды.  
Менде чүү боор, араңарда  
Менди-чаагай олур-ла мен.  
Тоожу тоол доктаай берди,  
Доозулган-на хире боор ийин.

- 
1. «Каң-кыс» деп чогаалдың укталган кол дөзү болур «Бокту-Кириш, Бора-Шээлэй» деп тыва маадырлыг тоол-бile авторлуг тоолдун дөмей талаларын болгаш ылгалдарын сайгарып, тайылбырлап көрүңер.
2. Каң-кыстың Арбак-Мөге ачазының адаан-өжээнин канчаар алганын тайылбырланар.
3. Шой-Төгустүң овур-хевирин сайгарып, оон аажы-чаңының кол шынарларын айтыңдар.
4. Каң-кыстың мандып өзүп, маадыр кыс апарганынга кым эң улуг киржилгелиг болганим?
5. «Каң-кыстың бүрүн дериттингени» деп эгеде чуруп көргүскен аъттың болгаш оон мунукчузунуң эдилелдерин амгы үеде канчаар ажыглап турарын шинчилеңер база ол эдилелдерни боттарыңар каяа көргенинерни сактыңар.
6. Тоолда кирген эргижирээн болгаш ховар ажыглattyнып турар даразында сөстерниң болгаш сөс каттыжышкыннарының утказын билип ап, тайылбырланар: *дордум торгу, каптагай, караа чырыыр, сыйда ок, ямбылдыг, чиирбей, кудай, суспарады, албаты-чон*.
7. Каң-кыстың овур-хевирин көргүскен чуруктан чурааш, утказын тайылбырланар.
8. Тыва чурукчу-модельер Кулчана Шоюн «Каң-кыс» деп аттыг хеп коллекциязын чогааткан. Театр режиссёру Сюзанна Ооржак «Каң-кыс» деп чогаалды шиижиткеш, В.Ш. Көк-оол аттыг Национал театрның сценазынга тургускан. Силер база шииге даянып алгаш, чогаадыкчы ажылдан кылып шенеп көрүңер.



## Монгуш Борахович КЕНИН-ЛОПСАН

(1925)

### Хайыралыг Калчан-Шилги

Тоожулал

#### Холу чадагай ирэй

Күнгүртү суурнуц улуг назылыг кижизин Эртине дижир болган. Музей ажылдакчызы болгаш, чоннуц ырларын, эрги шагныц эдилелдерин чыып чораан мен. Хамыкты мурнай кырганнар-

бile чугаалажыр чаңым киргеш, тускай бажыңыг, пенсиялыг чурттап орган ирэйге чеде бердим. Чугаалажып танышкан мен.

Пенсия акшазын алгаш, авш-чем садыынга баар, элдеп чаңыг кырган чораан. Буур кежин чымчадыр эттээш, шагда-ла кадайынга даарадып алган таалыңыг. Тыва ёзуда өру аастыг саваны эки дээр, ынчангаш кадайыныц шаанда-ла угулзалап даарап берген эдин камны кончуг эдилеп чоруур кырган деп билген мен. Ажы-төлүнүц болгаш кожазы бажыңарныц уруг-дарыы четкилеп кээрge, бир дөмөй чассыдар, чугаалажыр, сартыын бээр ирэй чораан. Чуве бээрде, хамык уругларны долгандыр тургузупкаш, энд бичиизинден эгелеп бээр. Оон ыңдай кым кончуг арыг-силиг кеттингенил, ону база чугулага көөр ирэй болган. Ол ирэйниц пенсия алыр хүнүнде барык үштен тос хар чедир уруглар ооң хериминиц иштинге боттары-ла чыглып келир. Өөренип турага уругларга карандаш, кыдырааш, чуруктуг номнар база садып бээр ирэй болган.

— Силерге бээр сартыым ол-дур. Ам үнүп ойнацар чээ, уругларым! — деп, кагжыргайларын болгаш карандаш-саазынын белек кылдыр үлегилеп берипкеш, сеткили кончуг таалаар. Чаш уругларныц, дешкилешкен кулуннар дег, херим иштиндэн уне маңнажып турагын чолдак даңзазыныц ыжын буруладыр сорбуу-шаан, көрүп-ле тураг.

Ийи кызы, бир оглу чаш турда, кадайы мөчүп калган. Өскүс уругларын хирге-чамга дээспейн азырап алган. Уругларын эртемгэ өөредип аарын бир ыдыктыг херек кылдыр көрүп чораан. Улуг уруу назы четкеш, өглени берген, ажы-төлдүг апарган, Тере-Хөлдүң мурнакчы хойжузу бооп алдаржып чоруур. Оглу бир-ле черниң дээди сургуулун доозуп алырга, оозунга белек кылдыр көк торгу додарлыг хураган кежи тон даарадып берген. Ам ол оглу — кайнаар-даа чалаттырып турар кезер эмчи. Хеймер кызы дун оглун божуптарга, бир кончуг бергедээн. Он класс дооскан уруун өөредип чорудупкан. Авазының сүдүн бир ай эмген төл-бile кады чаңгыс ёгге артып калган.

— Кырган кижи-дир сiler. Тамчыктыг чурттаңар. Уруун оглун азырап аал! — деп, чеже кижи келбеди дээр.

«Эмисик эмер кылдыр өөредип алган мен. Оол чүве-дир. Бир шагда чорта берзимзе, сөөгүм тудар ыйнаан» деп ырак бодап, харыылаар кырган турган-дыр. Хеймер уруу төөгү башкызы, тускай өглүг-баштыг, ужар-хеме-бile аргыжар черде чурттап, ажылдан турар. Ол оол кырган адазынга өөрени берген. Он класс дооскаш, шериг албанын эрттиргеш, ооң соонда бир каш чыл шөлээчилеп чорааш, чылгычылай берген. Хөөкүй чаш чорда, кырган адазы чунү-даа далдавас чиир кылдыр өөредип каан, ынчангаш ооң адын Хоптак-оол дээн. Арай чассыг өскен болгаш, дөргүл-төрели болур акыларының, угбаларының сөс-домаан тоовас, чүгле кырган адазындан сестир.

Хоптак-оолду өглөп-башкарып кааш, Эртине кырган суурга кирип келген. Оолдарының тудуп берген бажыңынга чурттай берген.

Эмчи оглу, башкы кызы бир чыл дургузунда чаңгыс катап келир. Келир дооста, чылгычы оглу даады-ла бо халдып келир. Ол келирде, чаа баскан быштак, саржаг, хеңмелеп каан эйттээккеп бээр. Ооң чедип келир үезин кырган-ачазы болгаш ооң бичии таныштары база билир апарган.

### Шоодайлаткан кулун

Сыгыр даң бажында херим аксы шыгыраан. Кырган кызыл-даван үнүп келген. Хоптак-оол кидис хап иштинде бир-ле чүве үнгерип келген. Эртине караан чодуп-чодуп, уткуй кылаштай берген. Элдептиг чуъгүн адазынга тутсуптарга, кырган ол олчаан тендерээш,

ышкына чоруй сиген кырынга дүжүрген. Хоптак-оол казыргыладыр дүже халааш, чүң-бile даараан тиглерни сөге тыртыпкан. Калчан ак хавактыг шилги кулун аксын аазадып чыткан.

— Дүүн дүне өөр бөрүлөр шилги бени тудуп кагды. Ядараан, өөрүндөн ойлап ойттаар мал болбас ийикпе. Оглун камгалап турда, хөөкүйнүң боскун одура соп каан. Бо кулунну канчаарыл? Чемгерип чададывыс, ачай! Чаш амытан өзээннегип өлүр деп барды.

Чаш анай иезинден чарлырга, өстүр азырап ап болур. Чаш кулун иезинден чарлырга, бут кырынга тургузары берге дээрзин Эртине билир болгаш, малга сундулуг оглун муңгаратпас бодаан.

— Ачаңның холунга кирген мал аштап өлбес. Ачаңның эттеп каан сыйымын мал үзе тыртпас! — диген.

Оон ол-ла болган. Эртине ирей өскүс кулун азырап чыдып калган.

### Аяк сүттүң ачызы

“Тений берген ашак-тыр ийин. Колхозтуң пенсизин алган-дыр. Анаа олурза. Өскүс кулун азырап чүзү дээр сiler?” деп, тудуг кылыш тураг Салдыгбан чулчуруп эрткен. Эртине кырыза-даа, кулаа кончуг дыынгыр болгаш, ол чемени дыңнааш, хорадаанындан өду чарлы бер часкан. Моолдал бир-ле каргыштыг сөс сымырангаш, Калчан-Шилгиниң аксындыва сүт кудар деп олурган.

Иезин ээп чораан кулун дора өлүр деп барган. Дазыл аякка сүт кудуп алгаш, эриннеринге чедире бээрge, ческингөн чүве дег, бажын борбаңнадыр. Чаш кулун ак энчек кырында чытса-ла чыдар. Эртинениң дискектери кезек-кезек саргып аарыыр дээрден башка, холу мөгө-шыырак хевээр турган. Калчан-Шилгиниң ак хаваан суйбап-суйбап, база катап аксындыва сүт кударга, даамчырап чыткан боду даваннарын хорадаанзыг дырбаңнадып, бажын түвексингензиг силгий бээр болган. Кедергей чөрүү кулун болган.

Хүн бичии хөөрөп чорда, Эртинениң бажыңының чанынга бичии-бичии оолдар эндерлип келгилээн. Кырган ирэйниң чаш кулун-бile бержип турарын магадап, долгандыр бүзээлеп келгеннер. Өскүс чаш кулуннуң болгаш өскүс чаш оолдуң салым-чолун Эртине кырган дөмейлеп келгеш, хавааның дерин чеци-бile чоттунгаш, муңгараксал олурган. Кулун бир кулаан содуш кылгаш, кидис кырында өеэдип чыткан. Эртине кырган чүлүдүп алган бажының

база катап шаарартыр үнгүлөп келген ак-ак дүктерин сүйбангаш, аар кажыыдалга таварышкан дег, ыыт чок олурган.

— Бо кулунну тутчуп берицер, оолдарым. Аксындыва сүт кудайн! — деп, Эртине бичии чаштардан күш дилей берген. Сес хар үези чаш оолдар белек бээр кырганынга дузалажып, чыткан кулунну холдарындан, буттарындан, кулактарындан, кудуруундан сегирип алганнар. Аштаан кулуннуң аксын ажыда тырткаш, Эртине кырган дазыл аякта шай сүттээр дээн хоюг сүдүн бичиилеп куткаш, селеңнедир силгиирге, кулун боду сүт ишпейн чыдарын чаш оолдар безин билип каапкан. Чүү-даа болза, бир аяк сүттү Эртине кырган күш-бile кулуннуң боскундува, төгө-чая-даа бол, ажыртыптар аргалыг болган. Бир аяк сүттүң күжү-ле ыйнаан, Калчан-Шилги бир кезек удумзурап чыткаш, карактарын шыпыраңнадыр көрүп, кырганың кадыг холдарының адыжын чыттагылай берген.

— Иези канчап барган? — деп, бопугур чаактыг Достак-оол сонуургай берген.

— Каапкан-дыры.

— Канчап?

— Өкпелээр, могадыр, дескелээр боорга.

Тенек болур болза, бе безин кулунун кааптар ышкаждыл деп, бичии-бичии оолдар, уруглар угаадып турганнар. Чаш уругларны бичиизинде черле коргудуп болбас, ынчангаш Эртине кырган чакпышылзырак бениң бөрүгө туттуруп каанын ойзуп каан. Кандыг-бир аргазын бодап тургаш, чаш кулунну канчап доруктуруп аарын бодай берген. Сүт-ле тывары берге бооп тураг.

— Бо кулун өлүп каар бе? — деп, Достак-оол айтыра берген.

— Бирээнер-ле хүннүң-не бир аяк сүт эккеп берип турар болзуңарза, бо кулун өлбейн барып болур — деп, кажар угаанныг кырган кожазы бажыңнарның бичии-бичии оолдарын, уругларын бодунуң аайынга кирипкен.

Эртенниң-не Достак-оол хензиг тос-хуунга чаа сагган сүттү кырганың бажыңынга хамык өөрүн мурнай эккээр. Калчан-Шилги сүт ижип өөрени берген. Чүгле кырганың дазыл аяланга куткан сүт ижип өөрени берген. Өске чүвеге куткан сүттү, өске кижи берген чувени чивес чаңыг кулун шымбай доругуп келген.

Эртинениң хериминиң иштинде терец сиженниг дазыр бар. Ол шөлчүгешке Калчан-Шилги хүннүң-не дешкилеп тураг апарган.

Сүт эккеп берген чаштарын Эртине кырган ээлчештири Калчан-Шилгиге мундурупкаш, челинден чедер турган. Чоорту-чиорту Калчан-Шилгини бичии чаштар ээлчежип мунар хөлгези кылып алган. Даң адарга-ла, Эртине кырганның бажыңынче бичии оолдар, уруглар далажып бар чыдaryн Салдыгбан пат кайгаар турган. Ол бодунуң оглун хоруурга безин, Эртине кырганның бажыңынче чоруй баар апарган.

“Күлүн мунма, кемдедир октаптар!” деп, Салдыгбан коргударга, бичии оглу Хунажық хоруп турар. Адазының барааны көзүлбейн баарга, Калчан-Шилгиниң чанындыва Хунажық чүгүрүп чеде бәэр. Чыскаалдыр тургулапкан өөрүнүң сөөлүнге сыйнып туруттар. Ээлчээ чедип кәэрge, Калчан-Шилгини бошка мунупкаш, херим иштин беш долгандыр дескинер, амыранчынын канчаар ону!

Эртине кырган Калчан-Шилгиниң холга чаңбыктырып өөреткен. Дазыл аяан көргүзүтерге, маңнап келир. Эдээнге сула чиртип өөреткен болгаш ындыг ыйнаан, хөвеңниг тонунуң эдээн салгара тудуптарга, дораан маңнап келир. Адыжынга күжур, дус чылгадып өөредип алган болгаш ындыг ыйнаан, Эртине кырган холун сунарга-ла, Калчан-Шилги кудуруун саглаңнады чайып-чайып, девиржиидип келир. Чаңгыс чайының дургузунда Калчан-Шилгини буянныг кырган мунар хөлгө кылдыр, кижи домаа билир дылдыг кылдыр, Құңгурту хемниң кыдыында шыктан оъттап-оъттап, шала кежээликтей бажыңының чанынга чанып келир аажы-чаңыг кылдыр өөредип алган.

Калчан-Шилги дыка угаанныг кулун болган. Изиг хұндус Эртине кырган сарлық кежин дөженгеш, бажың чанында чадырының иштинге девәелеп чыткаш, кум кынны бәэр. Ээзиниң чанынга тояланчы бызаа келирге, сывырып чорудуптар. Чакпышыл ыт келирге, кырындыва хөме шурай бергеш, коргудуп чорудуптар. Ээзи кырган удуп чыдырда, Калчан-Шилги бажыңының чанындан көңгүс ыравас, кызыгаар таңныылы дег, хайгаарап турар кулунчак болган.

### Чарлышишкын

Чер чырып чорда, Хоптак-оол аъдын эзертеңкен. Адазы-бileкады шайлааш, аъттанып чорупкан.

— Че, чорувут. Ёзулуғ эәң келген-дир. Удавас хар чааптар, суурга турар болза, баксыраар сен. Оъттуг черге кыштап ал. Че,

чорувут! — деп эргеледип чассыткаш, Эртине кырган даңзазы биле хоюскулаан. Калчан-Шилги чөпшүлү кончуг херим аксындан үнгеш, чортуп бар чыткан аyttыг кижиниң изин истеп базывыткан. Таптыг-ла Күңгүртү хемни кешкеш, Калчан-Шилги кырганың бажыңындыва маңнап чоктавыткан. Хоптак-оол сүрүп шапкан — четтирибейн келген. Хериминиң иштиндиве кирип келген — ээзи көзүлбәэн. Эжик аксын холу-бile халырадыр каккылагылаан.

— Барып кичәэлденер. Барып ойнаңар. Калчан-Шилги чок-тур. Аан келиңер. Бичии кум кыннып алыйн! — деп кончуттунгулаан. Эжикти мыйыс токпак-бile бир-ле чаш уруг улдап турганзыг. Кымның төлү ирги деп кәэргей бергеш, кырган туруп келген.

Эжикти ажыдыптарга, Калчан-Шилги дургуннап келген бооптур. Айт даваны сидирәэн соонда, Хоптак-оол база сүрүштүр халдып келген.

— Чорук кижизинге saat кылды, кончуг дайзын! — деп, Хоптак-оол адазынга хомуудаан.

Эртине кырган Калчан-Шилгиниң мойнун дырбагылап, ак хаваан суудур-суудур суйбагылап, дастагар саарын хоюңнадыр часкагылаан. Калчан-Шилги сегелин кырганың эктиниң кырынга салгаш, чылгычыже caratterарын хыйыртап көргүләэн.

— Мен кайын дораан чорта бәэр мен. Доругуп ал. Оорганга эзер салыптар кылдыр өзе бәэриңге, кады чоруп-ла тургай бис чәэ — деп сымырангаш, Эртине кырган Калчан-Шилгини баг-бile чуларлай каапкан.

Хоптак-оол чылгычыларынчे сагыш салгаш, база катап эзениден дүшпәэн. Адазының тутсуп берген баандан сегирип алгаш, дургун кулунну чедип алгаш, сыйладыр чортуп чорувуткан. Эртине кырган олуруп чадаан. Хаалгадан аяар үнгеш, ызыртыр көрүп турган. Каара туманналып келген, бажыңнар көжүп тургулаан ышкаш апарылаан, Калчан-Шилги чымчак холдуг ээзиниң коданындан ырап бар чыдарын билип каан боор оң, барааннап турган кырганыңч хая көрүнгеш. чаш уруг ыглааны дег, чалынган яңзылыг киштей каапкан. Карак шоозу баксыраан болгаш, Эртине кырган доруктуруп алган кулунчааның бараанын көрүп чадаан, чүгле чарлып чоруурунун аар халазын илереткен арыг-чаагай үнүн дыңнап чыдып калган.

- 
1. Чогаалдың кол маадыры болур Эртине кырган биле Калчан-Шилги деп куулуннуң найыралы кайынын, канчалдыр эгелээнин база суурнуң уруглары чаш куулуга кандыг ачылыг болганын тайылбырлап чугаалацаар.
2. Чогаалдың болуушкуннары болуп турар Тере-Хөл кожуун болгаш Күңгүртү суур дугайында, оларның онзагай талаларының дугайында чүнү билир, дыңнаан сiler? Билбес болзуңарза, улуг улустан айтырып, медээлерден чыңар.
3. Аъттың тыва улуска шаг шаандан бээр база амгы-даа үеде ажык-дузазын тайылбырлап, «Аът — тыва кижииниң өңүү» деп темага кыска чогаадыгдан бижицер.
4. «Холу чадагай ирей» деп эгеге даянып алгаш, Эртине кырганның мөзү-бүдүжүн, ооң буюннын, кижиизин бодуңарның билип турарыңар-бile тайылбырлацаар. Эртине ирей биле бичии уругларның эп-найыралын чүү деп билип турар сiler?
5. Тыва улустуң кандыг чаңчылдары болгаш сагылгаларын бо чогаалда киирген-дир, тып, утказын тайылбырлацаар.
6. Чылгы мал дугайында улуг улустан айтырып, номнардан тып номчуп тургаш, улуг эвес шинчилел ажылын кылыцаар. Аъттарның чүзүнү, хар-назы аайы-бile аттары, янзы-бүрү чоруктары (челер, чыраалаар, саяктаар), чер-чуртуңарда сураглыг чүгүрүк аъттар биле оларның ээлериниң дугайында болгаш өске-даа угланышкыннарны шилип ап болур сiler.
- 

## Хол дээрбези

Эртине кырганның бажыңынга сөөлгү катаң кежээликтей кире дүшкен мен. Сыын мыйызын саткаш, думчук чарып, үш аңчы үлжип алган бис. Бурунгу кырганнарның чаңчылын сагып, алган акшам-бile бир боодал дүңзе таакпы, чээрби хааржак шүдүнзэ салып алгаш, кырганымга тутсуп берген мен. Эртине кырган мээн хензиг белээмни хаваанга дээскеш, аптаразының кырынга салып алган. Кара сакпың долдур шай хайындырып алган болду. Шаажанга шайын куткаш, меңээ баштай сунган. Баалыңыг тавак долдур арбай далганын стол кырынга салгаш, чанынга бир ак сакпың долу саржагны база салып кагды. Боду дазыл хувага шайын куткаш, изиг базырып аары ол ыйнаан, кырындыва кургаг далган бызай каапкаш, ыяш омаажы-бile былгай каапты.

Аяк шайны аартап каап, хөөрежип олур бис. Шала кырында дээрбе чыдыр. Хирезин бодаарымга, дыка-ла эдилээн байдалдыг.

— Бодуңарны бе? — деп айтырыпкан мен. Дораан чоруур дээним кайын болдунар, хол дээрбезиниц алдынга чаштып чыткан төөгүнүц уязын хоора тыртып ап-тыр мен.

— Э-э-э! Чүү дээрлаан. Бо дээрбениц ээлери бо суурда бар. Адынсывын адааш чоор мен. Сууржуп көжерде, бо дээрбени кыштаанга каапкан улус. Чогум аартыктиваан. Садыгныц хилээвинге бүзүрээш, бүдүүлүк этти каапканнары ол боор ийин он. Мен эзеримге арттынып чорааш, бажыңымга эккеп алган мен. О-оо-оо! Ам олар кезек-кезек мээн бажыңымга келгеш, сонуургап чиир далганын тыртып ап туарлар. Кижиниц чип өөренген чеми база туар чуве боор ийин он.

Ол хол дээрбезинге холбаштыр Эртине кырган бир күй иштинде чыдар чүвелер дугайын база төөгүп берген. Карангылап келген. Сайгылгаан кыппады. Эртине кырган дискээн даянып тургаш, керосин лампазын кыпсыпты.

— Чүлерил ол ынчаш? — деп, музей ажылдакчызы кижи болгаш, бурун шагыңыц эдилелин билип алыхсадым.

— Судурлар.

— Хөй бе?

— Ийи кончуг улуг аптара чык долу.

— Кайдал?

— Келир чазын чедип келицер, айтып бээр мен.

Туруп келдим. Кырганым база човууртап чоруй, туруп келди.

— Келир мен — дигеш, чоруур деп бардым.

— Соруп чоргар. Кандыг-даа кааң хүндүс суксавас сiler! — дигеш, бир дизиг куруттарны ийи холдап сунуп келди. Оон ыңай ол кырганыц бир кончуг ховар буяны — ол черниц төөгүзүн кедергей билир. Хөрээн өндеш кылдыр бурунгаар чуткуй каапкаш, ак салын сүйбай каапкаш, хола баштыг чолдак даңзазын соруп каап, ындын алып тоолдаар ирей чораан.

### Кестирген пөш

Удуп чыткан чаш уруг оттуурттарындан kortкан чүве дег, Эртине кырган оожуму кончуг чортуп олурган. «Өөренген чаңын канчаар, өртээр эвес, баглаар эвес». Аныяк шаандан аңнап өөренген болгаш, ындыг ыйнаан, Эртине кырган чер чорааш, дааш үндүрбес, шүдүнзени безин чымчаңнадыр шагар. Кырып назыдаанындан караа

шырыңмаланыр, ыракта чүвени тода танывас апарган. Араатан чүвелерниң орук уунга чораанын Қалчан-Шилгизи баш удур көрүп каапкаш, тура дүжер. Улуг аң оруу-бile чортуп орарга, хепхенертен айды тура дүшкен. Айдының аксын шеле тыртарга, оозу кулаан кызар, орук хажызынче чүткүүр болган. Топтап көөрге, бир улуг пөш сыын оруун кежилдири барып ушкан чыткан.

Эртине кырган бурун шагның бир чугаазын сактып келген: «Кырган кижи чер чоруп чорааш, оруунуң уунга хат ужур шаап каан кырган ыяш көөр болза, назынынга багай». Бо канчап барып ушкан пөш боор деп бодааш, дelemнештир чортуп келген.

Туристер дээр тоянчы кижилер ацаа чоруп чораан хире. Пөштүң кедергей үнген тооруун дүжүрүп аар дигеш, чидиг балдызы-бile кам-хайыра чокка одура шаапкан. Черниң черинге чорааш, белен-селен ыглавас Эртине кырган эзим иштинге саваажок кишиниң балды-бile ужуруп каан чоон пәжүн көргеш, чүрээ бырланындыр дывылап, холдары сириңейнип, карааның чажы төктүп келген. Ушкан пөшту көрүп кааш, Эртине кырган дыка кээргей берген. Ыңдай-бээр көргүлээн. Ол кырган чанынга улуг кижи, ылангыя чаштар турган болза, хорадаан сеткилин моолдап илередир чораан. Кым-даа көзүлбээн. Эртине кырган ужуртуп каан пөштүң дайзыннарынга каргыжын салып турган:

— Кончуг ядараан кулугурлар. Бо пөш силерге кандыг хора чедирген чүвел? Тооруун чиксээн болзуңарза, бажындыва үне бергеш, бышкан тооруктарны дүжүрүп алган болзуңарза, ужурдур. Силерни кым тооруктуг пөш ужуруңар деп дужаал берген чүвел? Пөш дээргэ оранның байлаа-дыр. Чылыг оранда виноград үнер талды одура кескен кишини база-ла дайзын дээр боор. Бистиң кадыг-берге агаар-байдустуг черивиске үнер пөшту одура кезип турага барасканнар бети дээрде мээн дайзыннарым силер, харындаа чоннуң каргыжы чедер буктар силер. Кончуунарны көрем? Бышкан тооруктарны чыып-чыып алгылаан. Чиг-чиг тооруктар будуктарында халацайнып арткылаан. Мээн адам кончуг ядыы чораан. Ажы-төлүн тандының ай, бези, тооруу-бile азырап чораан. Мен бодум-даа тооруктуг тандымга чоргаарланыр мен. Силер чүү силер? Чежемейниң-даа солун номчуур, ном номчуур, оон туржук кармакта дээди сургуул дооскан шынзылгалыг-даа болзуңарза, ёзулаг мелегейлер-дир силер! Тооруктуг пөш силерге кандыг хора

chedirgen чүвөл, кончуг сойлуктар! Беш шоодай тоорук бээр бо пөш болза чус ажыг чыл иштинде өзүп келген, чурттап келген-дир, ол хире улуг назылыг, улуг буянынг ыяшты силер чүгле бир шак иштинде узуткап каан-дыр силер. Тооруктуг пөштү балды-бile ужур шаапкан кижилер дээргэ чаш бызаалыг инекти тудуп чээн аш бөрүлерге демей деп бодаар мен.

Бо пөш турган болза, мен ооң-бile чугаалажып-даа болур мен. Кандыг-даа ыяш хатка чайганырга, ооң ириин-даа, чартын-даа эндевес мен. Хайыраан пөш! Кестирген пөш! Сен мээн үнүм дөмей-ле дыңнавайн чыдар-дыр сен ийин. Мени угааны алдаан диве. Сени балды-бile ужур кезип каан чүвелерге карганып тур мен. Мээн караамга көзүлдүр пөш кезип тураг кижи көзүлзе, мойнундан шалбалааш, чогуур черинге төрепчилеп чедире бээр мен.

Эртине кырган ушкан пөштүң дөңгүр төжээниң чанынга дүшкеш, ооң дөзүнгө келир чылын үнер хензиг чочагайны черге хандыр хөөп каан. Оран байлаан четтирип чораан кырганың сеткили-дир ийин, ол хензиг чочагай бир шагда улуг пөш кылдыр өзе бээрин күзээн күзели-дир ийин. Эрги чудукка аъдын чоокшулай чедип эккелгеш, эзериниң кырынга Эртине кырган олурупкан.

### Бомбалаткан балыктар

«Бакка бак улажыр». Шаандагының кижилери чувениң шынын-на чугаалап чораан-дыр ийин. Тоянчыларга ужур шаптырып каан пөштүң ажыны ажып, Эртине кырган бир хемниң чоогунга келген. Ол кырганың аңнап өскен тайгаларында ам-даа кижи барбаан черлер бар, харын-даа амга чедир ады чок даглар болгаш хемнер бар. Ол кырганың Балыктыг дээр хеми көстүп келген. Кедергей балыктыг хем. Альттыг кижи оваарымча чок кежер болза, дыка хөй балыктар бастырып каар. Эртине кырган ол хемни кежерде, баштай хамык балыктарны даш, будук октап, өскээр хойзупкаш, кежер турган.

Саарыглап чыдар черниң чоогунга кел чорда, Калчан-Шилги багай чыт апкаш, бөрүден хойган чuve дег, аткаар шурай берген. Эртине кырган эзеринден чайлы бер часкан. Думчуунга база-ла багай чыт келген. Балыксыы кончуг. Дээлдигеннер сай кыдышында кара шаар олургулаар. Бир чамдык дээлдигеннер балыктар теп алгаш, ээртиндир ужуп-даа тургулаар. Дээлдиген өрге, күске теп

чиир-ле күш болгай, ам канчап балык теп чип турар апарган чоор деп, Эртине кырган элдепсинип турган. Кежиг чоогунга чоокшулай чортуп кээрge, чыдаан балыктар чыды хөөн баксырадыр болган.

Кежиг үстүнгө даады балыктар чыглыр кара ос ширбий шаптыра берген. Чаашкын соонда дажып баткан суглар безин арылдыр шаал чадаан оству чүү деп кончуг күштүг амытан когун үзе аштап каанын сонуургак кырган билип алыхсай берген. Ол оствуң дужунга чортуп кээрge, куурумчу балыкчылар чораан. Ол кончуг думчуун хараан чүвелер балык турар оству көрүп кааш, доктаай берген. Суг иштинге бичии чыткаш, часты бээр «бомбаны» шак ынчаар суп кирипкеннер. Ол кончуг кара сагыштыг чүвелерниң чажыды-бile кылып алган чаза тевер былдазы имилеме балыктарның аразынга кире берген. Кажан кезээде кара туразында чурттап чораан балыктар чүүден-даа кортпайн, ортузунда кожайып олурган былданы долгандыр тырлып тургулааннар хире. Ол кончуг былда хеп-хенертен частырда, улуг ос чуртун карартыр хоорлуп чаштай берген. Ол оствуң шапкын агымындан камгалап турган онгулчак черинге чыглып турган түме-сая балыктар дөгерези кырлыгылап калган. Ол кончуг дээрбечи балыкчылар өлүрткен балыктарны алрын чыып алгылааш, карак ажыт чорупканнар. Одагланган черинде безин дүлүп чээн балыктарның сеги овааланып чыткан. Араатан ац-мең болгаш күштар «бомбалаткан» балыктарны чип турганнар.

Эртине кырган чаңгыс чүве чугаалаан:

— Кончуун аа! Чер чорааш, күш-хүнезин төне бергенде, Балык-тыг хемге келир чораан мен. Бир дүлүм балыкты холдап өлүргеш, соксал каар чораан мен. Балыктыг хем дээрge суунуң иштинде дириг кадыргылар үүжелеп алган бай оран-на болгай. Хем чеже-даа балык-бile бай болза, оларны «бомбалап» хыдышыр чүве болза, оранның байлаа безин келир үениң кижилеринге канчап артар боор. Кизи хүнүн бодавас, даартазын база бодаар ужурлуг. Оранның байлаан кайы-хамаанчок төтчеглээр кижилер-бile демисежир үе келген!

Бир кончуг кара мажаалай база сугже холун суккаш, бом-балаттырып каапкан өлүг балыктарны таваар уштуп ап, бүдүн-бүдүнү-бile чооглап турар болган. Чыдыгылай бергилээн балыктарны арылдырып турар күштарны болгаш мажаалайны дүүретпес дээш, Эртине кырган оя чортуп чоруй барган.

«Дүрген-не Пөштүг-Хаяның кырынга үне берейн. Бажыңымның чанынга четкилеп келир чаштарымга бышкан тооруктан бир таалың долдур чедире берейн. Оранның байлаан чөп ажыглаар. Оранның байлаан төтчеглеп болбас!» деп бодал кырганың көксү-хөрээниң иштинге хайны берген.

- 
1. Эртине кырган — тайганың ылап әэзи деп бодалды чүнүң-бile бадыткап болур-дур, тайылбырлаңар? Ооң чылдың-на малчииннарга чедирип чоруур буянның ажыл-хөрэе кандыг-дыр?
2. «Кестирген пөш», «Бомбалаткан балыктар» деп эгелерге даянып алгаш, төрөэн бойдузувуска хумагалыг, камныг болурунун чугулазын бадыткап, ону боттарыңарның билип турарыңар-бile немеп чугаалаңар.
3. Судурларны ээн күйларга чүге чажырып турган деп бодаар сiler? Шажын-чүдүлгө хоруглуг турган үелер дугайында улуг улустан айтырып тургаш, билип алышар.
4. «Хол дээрбези» деп эгениң утказын канчаар билдицер? Эрги шагның, көшкүн тыва амыдыралдың янзы-буру әдилелдерин кайы хире билир сiler? Оларны музейлерден база амдыгаа чедир ажыглап чоруур улустан көрген болзуңарза, сактып чугаалаңар.
5. *Шүдүнзэ, кон ээт, өвөэнчи сиген, судур, ос, былда* деп сөстерниц утказын тайылбырлап, улустан айтырып алышар. *Шүдүнзэ* деп сөстүң тыва дылда синонимнерин тывыңар.

### Пөш дөзүнде чыдын

Эртине кырган Пөштүг-Хаяның сиртиниң кырынга дөңгүп-даңгып үнүп келген. Мадагар пөштүң дөзүнгө келген. Ол пөштүң дөзүнде тооргулар чыдыны бар болган. Хар, чаъс дүшпезинден ол пөштүң дөзү кургаг, сарыг-сарыг күдүрээлер чымчак дүкке дөмөй сагындырар. Эртине кырган хайыралыг Калчан-Шилгизиниң эзер, чонаан сойгаш, чүгенин ужуулгаш, бажынга чүгле чолдак дынның чулар суп кааш, бошка салыпкан. Калчан-Шилги кырган ээзиниң кадыг кештиг адыжынга думчуун үстүргүллээн. Эртине кырган аъдының хаваан суйбап-суйбап, мойнун суудур-суудур дырбагылааш, бажын согаш кылган. Калчан-Шилги кудуруун саглаш кылгаш, ағылыг оъттуг чердиве кылаштай берген.

Черниң бедии. Шаг төөгүдөн бээр аңчыларның доктаар чери. Бо бедикке сыйн аткан аңчылар пөштер будуунга эътти халаң-надыр азып кааш, аңнап чоруй баар турган. Бир чамдыкта

шелегей тырыпкан улуг аң база бо бедиккө хоргадап келир. Хүнезиннинг таалықын Эртине кырган ууп чадаан, кайы чап аразында күш-шыдалы хөлүн эрттири суларай бергенин боду безин билбейн олурган. Далганныг, ааржылыг, тараалыг хапты будуктарга халаңнадыр аскылап каан. Бир дустуг хапты өл дүшпес черге азып каан. Таалықы бичии чиигей бээрge, халагар будукка арта каап каан. Меңги дожун эзилдиргеш, шай хайындырып ижер дээрge, тыныжы кончуг кыскалаар болган. Тооргунуң дүннеп турган чыдыннынга кидис чонаан дөжээш, эзерин сыртык кылдыр салып алган. Балдызын пөш дөзүнгө чөлөндөр тургузуп каан.

Тайганың сирти сериин болгаш шөлээн. Кээрген-не чиртиледир эдип-ле тураг.

«Тоорук-даа кедергей-ле үнген-дир. Маңаа чеже-даа шоодай сайлаан тоорукту ажаап ап болур-дур ийин. Чер ортузунга чедирип аары берге. Чүү-даа канчаар, бо удаада бажыңымның чанынга келир чаштарымга бир таалың тооруктан аппарып берейн. Мээн куруг келбезимни билир, мени манап турар чүвелерим болгай аан. Келир чылын ол кончуг орланнарымны эдертип алгаш, моон тооруктап көрейн. Бежен шоодай сайлаан тоорукту садыгга сатса, колхозтуң кассазынга шымбай олча кирбес деп бе? Чыл боорга-ла, Пөштүг-Хаяның тооруун кээргеннер чип каар, кончуг-ла хомууданчыг-дыр! Оранның байлаан чөп ажыглаар болза, кижинин балдыры дыңзыр болгай. Бичии чаштарны тооруктадып өөредир мен!» деп, Эртине кырган ынчаар күзелин илередип орган.

Эртине кырганың шагзырааны кончуг, харалаан, аар чудукту чүгэ-ле көдүре бержик ирги? Улуска дуза кадар деп чорааш, бодунуң баксырап чораанын безин уттуп алган кырган-дыр ийин. Эртине кырган идиин безин ужулбайн, эзерин сыртангаш, ийленип чыдып алган.

### Кырганың читкени

Улуг далайга эжиндирип чораан бичии пароход айыылга таварышкаш, дүже берген болза, оон ол черин дораан тывары берге, бир чамдыкта бажы-бile баар дижир. Улуг дагларлыг, дүмбей эзимниг бистиң черге аныяк аңчылар безин аза бээр таварылгалар тургулаар, бир чамдыкта читкен аңчы ол олчаан аалынга безин келбейн баргылаан төөгүлерни кырганнар ам-даа чугаалажып оргулаар.

Эртине кырган Күңгүртү суурдан айттанып үнгенден бээр, чээрби чеди хонган. Аъды-даа сураг, боду-даа сураг. Ол суурнуц улуг, биче кижилери айттыг, чадаг дилеп шаангага киргеннер. Хойжулар, сарлыкчылар, ивижилер, чылгычылар аргыжар оруктарны кезип каапканнар. Школа башкылары сургуулдарын эдертиг алгаш, чоок-кавыныц арга-арыны болгаш каразаан черлерин шаангага киир чиндип каапканнар. Эртине кырганыц караан бир катап эмнеп турган эмчилери тускай вертолёт чагыдып алгаш, Тере-Хөлдүң кыдыны долгандыр ужуудуп, кадыр-берге дагларны харагылап, шырыш эзимнерин бакылап, дыка-ла дилээннер. Чүве-ле сураг болган.

Кандыг-даа ырак чер чорааш, суурда бажыңынга чедип келир кырган-на болгай. Күңгүртү суурнуц кижилери элдептиг читкен кырганы дилээрин соксаткаш, чүгле дыңнаар ужурга таварышкан.

«Сураг бар бе?» деп чаңгыс айтырыг кижи болганныц чүлдүчүрээн саргыды дээптер апарган.

### Ээзиниц чагыы

Аъдын кыйгырап дээрge, хөрээ кагылгаш, тыныжы кыскалаар болган. Арай боорунда кош-адыжын көргүзерге, Калчан-Шилги бирде туруп, бирде хоюп чорааш, ээзиниц чанынга кылаштап келген. Эртине кырган мадагар пөштүц кургаг будуундан солагай холу-бile туттуунуп алгаш, сөгедектей олуурп алган. Калчан-Шилги хайыралыг ээзиниц эктиниң кырынга сегелин салып бергеш, йөрээл салырын манап турган. Эртине кырган оц холу-бile Калчан-Шилгиниң ыдык-челин суйбагылааш, карааныц чажын төп бадырыпкан. Чүве чугаалаттынмас — дылы кагылар, ол хиреде угааны чарт. Төрээн чуртунга ынаан, мунаар аъдынга сүзүктүүн кончуг оожум сымыранган.

«Калчан-Шилгим! Адам-өгбем чуртун эргип алдым. Ол — сээн ачың. Кежиксээн хемнерим кешкилеп алдым. үнүксээн сыннарым үнүп алдым. Ол — сээн ачың. Мен ам чер чедип албас апардым. Сен аалыңче чанывыт. Мээн чанымга турба — бөрүлер сени чип кааптар. Мен маада дыштанып чыдайн. Дек одунмас боор мен. Сен ам мээн-бile чеже-ле чер кезип чоруур сен, чарылганный чарлы берээл. Сени кым баштай муунуптар болдур, аңчылар оруунга кирип алгаш, чарылган черивиске чедирип-ле бергей сен. Аңчылар кокпазын

истеп өөренген-не болгай сен. Тайганың бедиинге хажылай бергеш, хат-салгын дег, хостуг маңнап чорууруң барааннап чыткай мен аан. Черле муңгарава. Черле муңчулба. Черле чааскаанзырава. Тайга черниң оъдун оъттаан кулун чүгүрүк болбайн канчаар сен. Че, чана бер, Калчан-Шилгим! Сен чаш чорунда, дузалаар шаамбили дузалаан мен, меңээ хомудалың чок. Сен өзүп келгеш, меңээ база дузалаан сен, сеңээ хомудалым чок. Мен бо меңгилиг тайганы кара чааскаан ээлеп чыдайн. Чана маңнавыт. Сени көрзе, Хоптак-оглум чедип келир, мени тып аар. Че, сен ам мээн чанымга дыка үр турба. Мени каавыт, Калчан-Шилгим. Мен чааскаан дыштанып чыдайн».

### Манаашкын

Калчан-Шилги хайыралыг ээзин кайын каарыл? Бир ай тос хонук иштинде мөңгерей берген Эртине кырганың мөчү-сөөгүн кадарып-карактап келген. Суксай бергеш-ле, чәэрби беш километр ырак хемден сугну барып ижип алгаш, одунмас апарган кырган эжиниң чанынга маңнап чедип келир. Мадагар пөштүң дөзүнде чытса-ла чыдар кырган эжиниң чанын долгандыр оъттап турган. Дөзүн бөрүлерге касканнаткан даялар, чыткан черинден мажаалайга хоора тырттырган чудуктар каарып чыткылаар. Үнген хүн, ашкан хүн шонуп эртер бедик черде дыштанып чыдар кырган эжиниң чанынга Калчан-Шилги кандыг-даа дайзын чагдатпаан-дыр. Меңги чеже-даа каракты чылчырыкталдыр чайнап турза, соок хат үргүлчү хадып тураг, тооруктуг пөштер, чалым үскүләэн калчаа чалгыглар дег, каагайндыр-хийгейндири шимәэрgeп тургулаар.

Дал дүүш турда, хем иштин өрү чоктап бар чыткан айттыг кижилер барааны көргеш, Калчан-Шилги хая-дашты сирлеңнедир, эзим-арганы чаңгыландыр киштей каапкан...

Хоптак-оол хемче кирип, дагже үнүп турган айт изин тып алгаш, кыр кырынга булгандырып үнүп келген. Калчан-Шилги мадагар пөштүң дөзүнге тамчыктыг уйгузун удуп чыдар кырган өңүүнүң кажан оттуп кәэрин манавышаан, Төрөэн чуртунун кызыгаарын таңныылдаан солдат дег, меңгилиг сыйның бедиинден ак-көк шынааларже харап-ла тураг болган.

## Эзирниң өлүмү даглар бажында

Оглум Хоптак-оол! Сени палырааш кижилир чүү деп-даа болур. Кырган адазы чер кезип чорааш, чорта берген деп база болур. Сен мени суурда бажынга чыттыр азыраар дээриңге, бодум ушта чүткүп чораан мен. Өңгө олуртур азыраар дээриңге, бодум ынавайн чораан мен. Кезек-кезек уругларым аал-оранынга баар чораан мен. Кара чажындан бедик сынныг черге өскен кижн даады суурга тамчыктандыр олуруп шыдавас чүве-дир. Дуруяя биле эзирни канчап деңнээр сiler. Эзирниң чалгынын сый адыптар-даа болза, ол дөмейле шынааның чыдыг кара шалбаазының чанынга сөөгүн салбас, ыяап-ла сын бажынга кээп өлүр! Мен база эзирлер чурттаар бедик тайгаларның оглу-дур мен.

Ак-ак тоннарлыг эмчилирниң холунга бир катап кирген мен. Ынчан караам аарый бергеш, чыттырып эмнеткеним ол. Мени чаш уруг-бile дөмей азырап турганнар. Бистиң Күңгүртү суурга шакындыг дываажаң ораны кажан-даа турбаан чүве. Сегий бергеш, аңап-меңнеп өөренген сыннарым база катап кезип чорупкан мен.

Бошагның ажы-төлү эртем-сургуулга өөренир, ол кончугэки-дир. Бистиң суурнуң чалыы чаштары чүгле суурнуң кудумчуларының адын билир боордан башка, дескиндир турар тайгаларының адынсывын билбестер-дир, ында кандыг-кандыг аңнар чурттап турарын билбес-тирлер, кандыг-кандыг үнүштер үнүп турарын база билбес-тирлер. Калчан-Шилгини аңчылар оруун часпас базар кылдыр өөредип каан мен. Мәэң айдым бажы хоя берзе, бажыңым чанынга кээп турар бичии өңүктерим Калчан-Шилгиге оруктан баштадып алгаш, чай шагда ада-өгбезиниң эрги чуртун эргип көргейлер aan. Чүвени канчап билир, мәэң кокпам истээр чаштар тывылбайн барып болур. Чагып каайн, оглум. Бодуңнун ажы-төлүндү бурун өгбелериниң чурттап чорааны улуг сыннарының бажын теп чоруур эзирлер кылдыр өстүрүп аар сен.

Мен бажыңымга олургаш, тыныштаар апарган мен. Малчыннарның кыштагларының өдек-көржеин коптарып, көжердүжер черлериниң орук-чириин аштап, дуза кадар сылдак тыпкаш, тайгалап келген мен.

База катап чугаалап каайн. Орлан оглум сен. Арага-дарыга хандыкшывайн чоруур сен. Уругларың чаш-тыр. Уругларыңны

эртем-сургуулга өөредип аар сен. Уругларыңың кырган-ачазының алыс чуртун эргип чоруур кылдыр өөредип аар сен.

Үяш дазылы чок болза, кургап каар. Кижи төлү чок болза, чурту каараар. Эзир чалғын чок болза, сек болур. Дээр сылдыс чок болза, дүнгө алзыптар. Бо болза бурун улустуң чугаазы-дыр.

Мен бедик тайга черниң кижизи-дир мен. Эзирлер аразынга чурттап чораан мен. Эзирлиг, хаяларлыг бедик сынның кырынга ал-бодум чортуп үнүп келген мен. Черниң бедииндөн шынааларны харап көрүп чыдар дээн мен. Мээн чанымга эзирлер чурттап тургайлар аан. Тайгам кончуг. Тооруктуг тайгам кончуг!

- 
1. Эртине кырганың эң сөөлгү тайгалаанын болгаш ооң мөчээнин чогаалчы канчаар чуруп көргүскен-дир?
2. Калчан-Шилгиниң ээзинге шынчызы сөөлгү катап канчаар илерээн-дир? «Эки айт ээзинге шынчы» деп темага чогаадыгдан бижинер.
3. Эртине кырганың тураскаалы чоннуң сагыжында канчаар артып калган деп билгенинерни тайылбырлаңар.
4. «Эзирниң өлүмү тайга бажында» деп әгениң утказын билген аайындар-бile тайылбырлаңар. Эртине кырганың оглунга сөөлгү чагының утказын канчаар билип алдыңар?
5. Чогаалчы Монгуш Кенин-Лопсан бо чогаалын чуге айт ады-бile адап алган деп бодаар сiler? Ооң еске айттаг чогаалы бар бе?
6. Күңгүртү деп суурнуң болгаш ооң чурттакчыларының онзагай талаларының дугайында чуну дыңнаан, билир сiler? Улуг улустан айтырып, номнардан тыш номчуп тургаш, ол дугайында улуг эвес сайгарылгадан кылыңар.
- 

## ЧОГААЛ ТЕОРИЯЗЫ

### Чогаалдың темазы болгаш идеязы

Чечен чогаалдың кандыг-даа аймаанга болгаш хевиринге хамааржыр чогаал бүрүзүн сайгарар дизе, ооң тема бile идеязын ылган билири эргежок чугула. Бо ийи теоретикиг билишишин шаг шаандан бээр туруп келген болгаш хөй-ле янзы-буру тодарадылгаларлыг болур. Оларның кол-колун көргүзөр болза, мындыг.

Чогаалдың темазы дээргэ чогаалда ооң дугайында чугаалап турар чүүл, ында чуруп көргүскен амыдыралдың барымдаалары болгаш

булуушкуннары азы чогаалда тургускан кол айтырыг болур. Тема деп сөстү эрте-бурунгу грек дылдан очулдурага, «ұндезин қылган чүүл» деп уткалыг. Тема уран-чечен сөзүглелдиң бүгү кезектерин тудуштур быжыктырып, ооң аңғы-аңғы кезектерин чаңғыс аай қылыш туар. Тема дәэрге чуруп көргүзер, ұнеләэр, билип алыр дәэн бүгү чүүл-дүр. Чогаалдың ниити утказы темада синғен, азы тема дәэрге чогаалдың боттуг ұндезини-дир, ооң чуруп көргүзүп туар кезәэ-дир. Теманы шилип аары, ооң-бile ажылдаары чогаалчының дуржулгазы, сонуургалдары болгаш сеткил-хөөнүнден хамааржыр. Чогаалга бир тема тергиидеп, өске бүгү утканы, бүгү сөзүглелдиң составын бодунга чагырып ап болур, ындыг теманы кол азы *башкарыкчы* дәэр. Кол темадан аңғыда, тускай әгелерниң, кезектерниң, оон туржук абзацтар болгаш домактарның безин темалары туруп болур. Чогаалга әләэн каш тема дең ужур-уткалыг бооп, кол темалар ышкаш қылдыр көргүстүнүп база болур. Оларның каттышканын *тематика* деп адаар.

Идея дәэрге чогаалда илереттинген, албан овур-хевирлер дузазы-бile ажыттынган бодал-дыр. Идея уран-чечен овур-хевирлер дамчыштыр азы өскәэр чугаалаарга, амыдыралдың чурумалдарын, чогаал маадырларының аажы-чаңын, оларның қылыш туар чүүл-дери болгаш сагыш-сеткилиниң хөлзәэшкіннерин дамчыштыр илерәэр. Бо сөстү эрте-бурунгу грек дылдан очулдурага, «билиши-кин азы көргүзүп туар чүүл» деп уткалыг. Идея чогаалчының маадырга болгаш делегейге хамаарыштыр ұнеләэшкінин азы авторнуң чуруп көргүзүп туар чүүлүнге хамаарылгазын илередир. Идея кандыг-бир болуушкуннарны чуруп көргүскен сорулгазы чүл деп айтырыгга харыылаар. Чогаалга чаңғыс кол идеядан аңғыда, әләэн хөй өске идеялар туар.

Тема биле идея чогаалдың утказының эң чугула тургузукчу кезектери болур.



## Монгуш Баянович ДОРЖУ

(1939–1992)

### Аас чогаал

«Чеден альт-даа челип четпес  
Челээш курлуг өглер» болгаши  
«Тозан альт-даа долганы албас  
Докулчак ак өргээлерниц»  
Эжин ажар нарын дүлгүүр —  
Эрги шагныц тоолдары ол.

Оларны ыткан өгбелер-даа,  
Октаргайда сыйлыстар-даа,  
Ады-сывы билдинмес бол,  
Аравыста чурттавышаан.  
«Оюн оя, чигин чире»  
Олар «дустап» чоруй барбаан.

Оттүг чүрек чүглэжи бээр,  
Он-он салгал дамчып эртер,  
Бурун шагдан маадыр чоннуун  
Буян-чол дээн шынчы хөнгүн  
Амгы биске арттырып каан,  
Аас чогаал болуп хуулган.

- 
1. «Тыва улустуң аас чогаалы – бижимел тыва чечен чогаалдың үндэзини» деп бодалды бадыткап тайылбырлацаар.
2. Бо шүлүкте гипербола деп уран арганыц чижээн тывынцар.
3. Аас чогаалының, ооң иштинде тоолдарныц, кандыг кол хевирлерин билир силер? Силерниц черицерге чурттап чораан тоолчулар дугайында медээлдерден чыып, дыннадыгдан кылынцар.
4. Аас чогаалында тыва чоннуң бурунгу өгбелериниц кандыг чугуула үзэл-бодалдары кадагалаттырып арткан деп бодаар силер. Кандыг-бир тодаргай тоолдуң болгаши ооң маадырларыныц чижээнгэ тайылбырдан кылынцар.
-

# **Салчак Калбакхөрекович**

## **ТОКА**

*(1901–1973)*

**«Араттың сөзү» деп  
романдан эгелер**

**ИЙИГИ КЕЗЭЭ**

**Үшкү әге**

**Чаа ужуражышкыннар**

Чадырывысты Дерзиг-Аксынга, Каа-Хемниң эриинге, уннарында saatтар агып баткылаан дыттар аразынга тип алган бис.

Шак ол ынчаарда Дерзиг-Аксынга орус тараачыннар чурттап турғаннар — аңаа беш-алды хире бажыннар турған.

Чаа чуртка келгенивис дараазында Дерзиг-Аксының орус чоннарының бажыннарынчे чоокшулай кылаштаарындан коргар болгаш, чүгле ырактан бараан хараар турған мен. Бажыннарже харай бәэrimge-ле, Мекейниң оолдары сагыжымга кире хонуп кәэр. Деревняның ындыы қыдышынче баарымда, оя-оя кылаштаар, кижи сегирип алгаш баарый-на дәэн ышкаш, борбак бажымны ол-бо талаже мокураңнадыр көргүләэн бар чыдар мен. Бо кижәэ ужуру билдинмес кижилер чудуктардан кылгылаан чадырында қандыг яңзылыг чурттап туар ирги дәеш, барықсаарым-на кончуг турған. Орус уругларның ойнап туарар аргазын, аажы-чаңын билип, шәэжилеп алыр дәеш, ырактан пат-ла кайгаан туарар мен. Ол ынчаарда бодумга безин билдирибейн бо-ла чоокшулай бергеш, сөсчугаазын дыңнаттар апарған мен. Ойнап турғаннар мени база-ла сонуургап көрүп туар апарғаннар.

Чааскаан, борбак ыяштар тып алгаш, хап ойнап чыткан Ванька Родин — дидимненип, чанынга чоокшулап кылаштай бергеш, танышкан бирги оглум ол. Ужуражканым дараазындала, бо-даа мәэц-бile дең оол-дур деп бодааш, дораан-на иштимде төрелзине берген мен. Чай шагда агаар қандыг-даа болза, хөйлең



чок, дискектери чамашкылыг, будуттунмаан хеден чүвүржүгештиг чоруур эр болгай. Мерге-бile доорбаштарны кагар дээш Ваньканың дап берген турарын көөрге, узун даваннары так кылдыр кадап каан адагаштар-ла, ээгилери агжая бергилээн, кыскыл-ак өндүг бажының дүгү дөңгелик бажында сарыг сиженни хат тарады хадыпкан чүве ышкаш болгулай берген турар. Мергени холга алган соонда, шоолуг далашпайн кагар дээш дап бээр. Октапкан соонда хиг-ле дээр, бир көөрге, чаңгыс-ла кагыгдан доорбаштар шагда-ла шыйыгның даштында чыткылаар. Арган оол-бile улам чоокшулай танышкаш, кымның мергези оккур болурун деңнежип көргеш, эжимниң чаачаа байдалын пат-ла кайгап билип ап турган мен. Быжар думааның уржуундан чүгле арны шокарара берген эвес, харын карааның бирээзи безин чок болган. Оон ужурунда өңүктери Согур Ванька, Шокар Ванька деп адаар турганнар. Ваньканың боду мөге-шыырак, ооң кырынче халый бээрлер ховар болза-даа, бодунуң хевири бөрзен-барзаң пат боорга, оолдар кезээде кыжырыыр турганнар. Мени база-ла — идик-хевим самдар, ооң иштинден өзүп үне берген дег боорумга, олар база-ла шоодар, кочулап-электеп турганнар. Ол байдал бис ийини улам чоокшулаштырган. Бистиң талавыска базала элээн каш оолдар турган, бот-бодувусту камгалажыр апарган бис.

Мээн чaa өңүктерим кырын саваң-бile шып каан казанактарга чурттап турганнар. Көөрге, казанак болза-даа, өг-чадырга дөмей-лээрge, ана тоолдарга үнгүлээр ордулар-дыр оң. Маңаа чаа танышып алганым кижилир-бile кады кайгап ханмас чүвелер-бile таныштым. Оон аңгыда, багай чадырывыска тургаш, ооң иштинде чарык ченги паштан, каш чылдарны эрткен, кырган ада-өгбеден шилчиp келген, та чеже кижи Мергенниң суун узуп ишкен каш уру аяктардан, тос одуштардан, айлаар озуктан өске, билир чүвем чок чораан болза, ацаа, Дерзиг-Аксынга келгеш, көрбээним көрдүм, билбээним билдим.

Чадырга соок, от салырга, чадагай одаг дег болур турда, бажынга киргеш, изиг-демирни билип алдым. Тарааны хооргаш, соктаашка ону ургаш, күшкүүр-бile уу шаап алгаш, ооң соонда аякка каап, кырынче кайы орандан эккелген хөл азы даг дузу-бile дузаан шай кудуп, моон артык чөм чок дей аарак чиир турган мен. Дээрбелээш, хоюткаш, изиг балгашка быжырып чиир — хлеб деп адап турар чөм-бile таныштым, харын оон артык, ол чокка чурттай албас

апардым. Мурнунда чүгле Мергенниң суун сүзүп кежип тургаш, ында-хаая чунар, эштир, арыг-шевер деп чүве билбес чораан бодум, ам Ванька-бile чунар-бажыңга чоруп, изиг суг-бile чунуп, баня деп сөстү билип алдым...

Мен бажыңарның шуптузунга барып турзумза-даа, хөй нуруу-зунда Санниковтарга чеде бээр мен.

Максим Санников дээрge Каа-Хемде мээн билирим тараачын-нарның эц бедии болгаш, дыт ышкаш шилгедек кижи чораан. Бодунуң бажыңының дүндүүнгө бажы-бile үзөр турган. Бажы калчан тас, эриннери чуга-чуга, үнү ыыткыр, аныяксыг. Ооң оолдары ийи: бирээзи дүлэй Васька, а өскези Сергей, ийилдирзи менден хары улуг. Авазындан олар каш чыл мурнунда чарылганныар. Кожаларның чугаазындан дыңнаарымга, хостуг чер болгаш эки чуртталга дилеп, Санников төп Россияядан Сибирьже чедип келген чораан. Ооң тарыыр черин помещик былаап аппарган. Ол уеде тараачын үймээннер бооп тургулаан. Санниковту кызып-кыйып турганнаар. Ол-ла дезип чоруп тургаш, Санников өг-бүлэзиниң дең кезиин ышкынган: кадайы аарыгдан өлгөн, улуг оглу каторгага<sup>1</sup> тургаш, оон дургуннап үнгеш, ис чок читкен, уруу дагдан баткан шапкын хем кежип чыткаш, сүгга дүже берген. Угбазының тынын алыр дээш, доштук сүтга эштип тургаш, оон улам Васька дүлейзимээр апарган.

Бодумнуң баштайгы өңүүм — Согур деп шолалыг Ванька Родинни кажан-даа утпайн турган мен. Ынчаарга кыска ўе иштинде Санниковтуң оглу дүлэй Васька-бile улам чоокшулажып, ооң акызы-бile, адазы-бile база-ла аажок өңнеги берген мен. Кежээ оларга келгеш, стол алдынчे кире бергеш, чадырымга дег, сезиг чокка удуй бээр мен.

Эртен бир-ле кижи бажымдан силгий бээр. Оттууп кээр мен. Ол — Максим Санников болур.

— Сен ам база стол адаанче кире берген сен бе? Тур — деп, хөөрөй аарак чугааланган турар. Мен ону дыңнап кааш, стол адаандан союп туруп кээр мен.

Чамдыкта мындыг болгулаар: мээн будумдан туткаш, Санников стол адаандан тургузу сөөртүп кээр. Каттыргылааш, бажын чайгылап: «Дыка-ла удуур-дур сен, дыңзыг-дыр» деп кагылаар.

<sup>1</sup> Каторга — аар-берге ажылдар кылыш хоругдал чери.

Чамдыкта бодунуң столунуң кырында картошкада азы хаарган далгандың айыткаш: «Чоп кончуг удуур сен, бо хире чемден эрттир удуп калзыңца, бодуң шоруң болгай, чемни кылганда, боду-ла боостааже кире бээр өйде чизе эки болгай» дээш, анаа-ла ойнаарак көдүрген чүве дег, мени стол артынга Васька, Серёжа-билие кады олуртуп каар. Амырап дайнап олурап мен. Оолдарның бирээзи «Са чемненип ал» деп караа чивеңнээн, бирээзи хувада чемин менче чоокшулаткан олуарлар. «Мындыг адалыг, мындыг алышкыларлыг болза кандыг дээр-лаан» деп магадаан олургулаар мен.

Санников кезек када мээн төрээн адам ышкаш, а ооң оолдары — Вася биле Сергей — мээн акыларым ышкаш болганнаар.

Дерзиг-Аксынга Максим Санников үр болбаан, бир-ле ырак черже көже берген. Көжер дээниниц мурнуу чарында адалышкыларның аразында:

— Бо Дерзиг-Аксынга чурттаар дээргэ тарааның-даа, сиженниң-даа шөлдери чок-тур, доозазын Михайлов эжелээн-дир. Бир помещиктен дескеш, өскезиниң холунга кирген хэрэ бар деппе. Таңды эдээнчे көже берээлицер — деп, адазы оолдарынга муңгаргай чугаалап олурганын дыңнаан мен.

— Дүүн Чаңгыс-Хадың ховузундан, буга шазындан аյтка каап бээр сижен кезип алыр дээш чеде бээримге, Михайлов боду келгеш, кажаа өргени тудуп алгаш, сывырып чорудупту. Черле канчаар кончуг чүве? Дерзиг-Аксы-даа ооң-на шөлү боор, Кыс-Кежиг-даа ооңуу, Чөйлүг-даа ооң сыйннарының тураг чери болур — деп, Сергей химиренип үнүп келди.

Үндиг чугааларны дыңнаар төдүү боордан башка, помещик деп чогум кымыл, Михайлов дээрзи чогум кымыл деп черле билбейн, угаавайн чораан мен. Бодалымда «Санников Таңды эдээнче чоруй баар-дыр, чаа акыларым база чок болуру ол-дур» деп боданып олурап мен.

Ооң соонда, үр болбаанда, та бодунуң туразы-билие чүве, та Михайловтуң кызып-кыйганынга шыдывааны ол чүве, Санников көжүп чорупкан. Ооң өг-бүлэзинден чарлыры меңээ чиик эвес болган, ооң көшкенин хөөн багай үдээн мен. Ооң хосталып ээнзириээн бажыңын көргеш, аар бодалдыг чадырымче чана берген мен...

Каш чыл болган соонда, Санников дагын ээп келген, ол ынчаарда мээн амыдыралымга улуг өскерлиишкиннер болган.

## Дөрткү эгэ. Кайнаар баарыл?

Бир-ле чадырывыстан үнүп кээривиске, авам чаа бажыңнарже көрүнгүлээш, чугаалай-дыр:

— Сени мен бо орустарга ажылдаары-бile бериптейн. Сен ам улуг оол апарган кижи ышкаждыңчыл.

Авамны дыңнааш, чөпшээрээн мен. Харым он ажа берген — шынап-ла, шору эр апарган мен. Орус чон мээн амыдыралымга чырыкты-даа берген, оларга өөрени-даа берген мен.

Элээн каш хонукта авам кымга ажылдаза әкил деп шилип көрүп келген.

Бир-ле авам мээн холумдан алгаш, суурнуң бир бажыңынга аппаргаш, чугаалай-дыр:

— Маңаа сээн ажылдап болуруң хире кижи чурттап турар-дыр. Ооң хирезин көөрге, ажылчыннар дилеп турар.

Авам биле холдарывыстан туттунчуп алгаш, Чолдак-Степан деп байның бажыңынче кире бердивис. Санников сугларның Михайлов деп адап турганы кижи ол болганыгай. Ооң бодунуң сыны чолдак боорга, ону «Чолдак» деп адап каан. Салы терең, калбак, ынчаарга ишти дээрge, бүдүн өг кидизин хөйлөенин алдында дыгып алган чүве ышкаш, уштунчак шөртегер чуве.

Авам менчэ айыткаш, мөгейип кагды. Ооң соонда, ынчаар чугаалаза, Чолдак-Степанга билдингир болур боор деп бодааш, багайтыр тываалаар орус кижилер өттүндүр чугаалай-дыр:

— Таныш, бо мээн балан. Сен ону ажылга алыр-ла. Сен меңээ тараа-хлеб бээр, сен оолду алыр. Ындыг, ча?

Чолдак-Степан хөректенип үнген:

— Мен бодум балан, шыырак батрактар бар-дыр ол. Тараа чок. Сен балан, ыт оглу, ажылдаар билмес. Уу, ядараан кулугур. Чүү сен мындыг тенек кадай мында келир? Ча, ча, үнер! Чоруур!

Авам дилевишаан:

— Ап, өршээп көрүңцер!

Чолдак-Степан авамны үндүр идипкеш, меңээ чүгүрүп келгеш:

— Ам сен бичии балан-дыр, соонда келир, мен алыр, ам чоруур, ча, ча! — дивишаан, мээн кулаамдан кээп сегирип алгаш, эжикче үндүр идипти.

Авам-бile аравыста чүнү-даа чугаалашпайн, чадырывыска чеде база берген бис.

Эжик аксынга күдүктеп олургулапкаш, чөвүлежип эгеледивис.

— Бай, дүжүмет кижи-ле болза — орузу-даа, тывазы-даа дөмейле-дир. Ам канчаар улус боор бис? Ам бир бажыңга база баар бис бе? — деп, авам чугаалай-дыр.

Мээн үнүм сирийни берди:

— Бодуң билир-ле болгай сен, авай, бодап көрем. Кайнаар баар бис, кымның-бile чугаалажыр болза экил?

Оон Дерзиг-Аксында, суурнуң эң үстүнде бажында чурттай берген бир кижээ бардывыс. Олар чаа көжүп келгеннер.

Кире бээривиске, Мекей ышкаш, ак салдыг ашак олур. Ооң кадайы — бедик, семис-шыырак кижи чораан, кижиже көөрү чымчак. Авам таптыы кончуг бажын курлакка чедир доңгайгаш, бир холун өру көдүргеш, айтырды:

— Таныш, менди бе ыңар?

Олурганнар чымчаа дегет:

— Экии, таныш, олурундар — деп харыылааннар.

Узун сандай кырынга олуруп алдывыс. Чолдак-Степанга көрген аажылалдан авам ам-даа оожургаваан, үр-ле ыыт чок олурган.

Кыңгырт кылдыр хаалга ажыттынды, чээрби бештен эртпес хире харлыг эр, херээжен иийи кижи кирип келди.

Бажыңың шалазын, ханазын дескиндир көөрүмге, эгеле чаа туткан, артында чудуктарның картын безин карттаваан болду. Чадырдан арай улуг — ындыг бажыңчыгашты казанак деп адаар боор.

Казанак бичии-даа болза, өске бажыңнар ышкаш изиг эвес турган. Иштинин арыг-силии дегет. Үлгүүрунче көөрүмге, ооң үстүү каъдын бир-ле саазыннар-бile чыпшыргылап каан. Ортаа каъдында аразы дең чоок-чоок үш хлеб чыдыр. Оон бажыңың иштинге чап-чаа быжырган хлебтиң чыды мырыңай илдең. Орта бодумнуң чадырымны бодап ордум. Кирип орарга, ооң эжинин чагында база-ла тостан бүткен үлгүүр бар чүве. Ындыг болза-даа, ында туар чүве — чүгле багай ыяш аяк, паш чуур дээш бөле шарып каан даядан, соожак деп адап туар тос савадан башка, чүве чыдар эвес.

Улусту көөрүмге, хүлүмзүрүп, чылышы-бile көрүп олургулаар. Салып каан хлебтерниң карты хүнгэ кылацайнып чыдыр.

Ыңай-бээр көрүп олур мен, казанакта менден башка, бичии уруглар черле чок.

Авам боданып ора-ора, бажын көдүргеш, менче холун айыткаш:

— Менде балан бар, сен балан чок. Сен мону алыр-ла, меңээ хлеб бээр-ле. Билген бе, таныш? — деп чугаалады.

Ашак холдарын уткуштур туткаш, ону шала чоорту өрү көдүргеш:

— Чүү сен херек, кадай, мен билбес-тири — деп багайтыр чугаалады.

Авам дыкады чугаалап, менче айыткаш: «Бо сенээ» — дээш, оон тургаш, хлебче: «Бо менээ» деп база катап тайылбырлап бээрge, ашак арай сергей берди:

— Оо, күш эки-дир. Мен бичии балан чок, сенде балан бар. Аа! Менде хлеб бар, сенде мен бээр-ле, күш эки, ажырбас? — деп мындыг.

Авам өөрүп, мээн кулаамга сымыраны-дыр: «Көрдүң бе, сен мацаа ажылдаар, чурттаар сен, олар чөвшээреп турлар».

Катап-ла ашакка чугаалаан:

— Кончуг эки-дир, мээн балан мында ажылдаар-ла, таныш.

— Чая, күш эки, сен балан мында турар-ла, мен ону карактаарла.

Авам мени казанактан үндүре берди:

— Көрдүң бе, оглум. Сен ам бо улуска ажылдаар сен. Эки, кичээнгейлиг ажылдаар болдур ийин. Оон башка сени-даа сывырылтар, меңээ-даа багай болур.

Авам мээн бажымны бодунче ээй тыртып алгаш, чыттап кагды. Оон «эки ажылда» деп база катаптап чугаалааш, кылаштап чоруй барды.

Авамның соондан көрүп алган тур мен. Ажытталы бээрge, бажыңчэе аяар кирип келгеш, эжик аксынга туруп алдым.

Бажыңның аныяк ээзи, мени көрүп кааш, олурган черинден турва халааш, мээн чанымга чедип кээп, эктиимче часкай каапты.

— Сен күш якшы-дыр. Че, хлеб чиир-ле.

Мени стол чанымга аппарды. Шүлтүзу олургулап алгаш, мени чөмгере берди. Бо казанакка мени чуге ындыг эки хүлээп ап турар чоор — Чолдак-Степан мырыңай өске деп чувени үр билбейн чораан мен — менде өскерилиген чүве бар эвес, мен оларга ажыктыг чүве кылышкан эвес мен.

Сөөлүнде мээн ээлеримни Лубошниковтар деп адаар улус-тур деп чүвени билип каан мен.

Олар ак хаандан, Санниковтар ышкаш, улуг хилинчектенип чорааннар. Саратовтуң кулактарының болгаш помещиктериниң истеп сүреринден дезип, бистиң бо черже көжүп келген улус болган. Канчаар-даа аажок ядыы улус. Лубошников ашак мырыңай буурул баштыг, арны-бажы дырыжып калган болза-даа, хамык чүвени боду кылыш турган. Ооң оглу Агейге-даа, ооң бодунга-даа ажылга дузалапкы дег уруглары чок улус. Аът дерииринге, тараа бастырарынга, хөпээн, моожа дажырынга, чер андараарда, аът бажы мунарынга оларга дузалаарынга бодум өөрүп турган мен.

Агейниң иези мени база «оглум» деп адап, бодунуң өг-бүлезиниң ишти ышкаш ашкарыйп-чемгерип турган, чаа идиқ-даа кедирип каан.

Чыл болганды, тараачыннарның оолдары-бile бир дөмей ажылдап тураган мен.

Бодум күш эвээш, бичии турзумза-даа, чүве-ле бүрүзүнгө Агейге чедерин кызыдып турган мен. Ооң шмчээшкін бүрүзүн өттүнүп чорааш, Агейниң бажыңынга келгеш, күш-ажылга өөренген мен.

Агей боду-даа, ооң адазы-даа мени өөредирин кезээде бодааш, бар-ла чүвениң доозазын мендээ айтып турганнар. Аът бажыңынга кедирер чүвени көргүскөш: «Бо хомут-тур, мону мынчаар кедирер чүве, а кедирериниң бетинде хынап көөр, довурак-доозунун кактаар, оон башка малдың мойнун өйүп кааптар; а бо муңгаш чүве — шлеядыр, ол чокка хомут малдың мойнунга элтиг ызырынмас болгай; бо ыргак ыяшты дуга дээр, мону — седёлка, мону — супонь, терге, шанак дээр, аътка мынчаар сугар чүве эвеспе» деп, ынак адазы оглун өөредири ышкаш, мени ажылга сургап өөредип келген.

Эң мурнай көдээ ажылга — чазын тараа тарыырда, аът бажы мунуп, сиген кезеринге — хөпээн сөөртүп, тарааны ажаап алыр өйде — агжагар тергеге сноптар дажып өөренген мен. Бажыңын ишти мендээ ынак турган. Ынчалза-даа кур чер андараип турда, — кур черни июнь айда, дүн дургузу кыска өйде чаарар чүве болгай, — аът бажы мунуп турда, уйгу аажок келир болгаш, ооң уъжун мал андазын оруундан өскээр чоруй баарга, ээм кымчызы-бile аъдындаа, мени-даа орааштыр шааптарга безин, ажынмайн турган мен.

Мээн ээм чүгле күш-ажылынга эвес, харын орус чоннуң оюн-тоглаазынга мени база өөреткен.

Каш хонук ажылдап турумда, «Бо хүн — улуг-хүн болгай, вознесение деп хүн, ажылдавас» деп, ээм чугаалаан. Ол хүн ажылдааан бис. Даشتыгаа үнүп келдим. Суурга аажок изиг хүн турган. Кырганнар бажыңнар хөлөгезинге олургулап, тоорук казып турда, аныяктар хемниң шыгынга калбаа-бile үнүп келгеннер. Менәэ ол хүн кажан-даа уттундурабас кылдыр чыргалдыг хөглүг бооп көзүлгөн. Ынчаарда эц-не баштай лапта деп оюнну ойнап өөренген мен. Мячикти лапта-бile кагарынга Епишка, согур Ванька хамыктың экизи турган, ынчангаш, олар ийи команданың капитаны турганнар. Мен кезээде чазар болгаш, өөрүмгө үргүлчү чемеледир турган мен. Оон ужурунда Епишканың командазы уттуар. Ол-ла үеде чижик, бабки болгаш хоровод чижектиг ёске-даа хөй оюннарга өөренген мен.

...Агейге чеже хире ажылдап турдум ыйнаан, ону билбес мен. Оларның төрели дег, оларга кезээде-ле артып каар-ла турган боор мен оң. Ынчалза-даа Агей Лубошников Даниловкадан Көк-Хаакче көжер апарган. Мырыңай чоокта чаа бажың тудуп алганы Дерзигден үнүп чоруурунче ону чүү албадаанын айтырбаан мен. Мында-даа Чолдак-Степанның балазы бар болгай aan деп бодап турган мен. Даниловканың эц эки черлерин былаап алгаш, ядышы Санников, Агей Лубошников ышкаш кижилерни оон кызып үндүрүп-кени, боду эжелеп алганы, оон садызызынга салчак ноянынга белек аппарып берип турганы ол чүве иргин.

Чарлырының мурнунда мен янзы-буру бодап турган мен: Агейни эдерер дээримгэ, авам ырай бээр, эдербес дээргэ, авамга ап четкеш, самдар соок чадырга чурттаар апаар, ынчаарда кыш ёзуулуг дүжүп келген чүве болгай.

Сөөлгү хүннerde Агейниң бажыңының чанында кудумчулап эрткileп, канчаар чоор деп боданып чоруп туар апарган мен. Ол кижи-даа менден чоруй баары ол-дур деп бодап кээримгэ, хөңнүм баксырап келир чораан.

Чолдак-Степан менәэ таварышканда, мээн-бile чугаалашкылаар апарган. Авам-бile база ужуражып, бир янзы чугаалап туар апарган.

— Оглууну менәэ эккел. Чемим-даа эки, ажыл-даа чиик. Мен сенәэ дузалаар мен — суг-суг дигилеп aan.

Ол сөстерниц соонда авам боданы берген. Чолдак-Степанның саналынга кандыг-даа харыны бербеди.

Агейниң чоруур хүнү чедип келген, чүү-хөөзүн ийи шанакка чүдүрнүп алганнар. Ырак орукче чоруурунга белен.

Мээн-бите байырлажыр дээш, баштай Агей меңээ чедип келди.

— Че, Тока, байырлыг. Көк-Хаакче чорууруус бо. Соонда катап көржүр деп бодазыңза, чеде бер, улус сөөртүп чедирип каар, ажырбас — дээш, Агей холумну быжыы-бите тудуп кагды.

— Ындыг-дыр, аргалыг болза, чедип кээр мен, байырлыг менди-чаагай — деп, каттырбышаан, алгыра аарак чарылдым.

Даштыкы байдалым хөглүг болза-даа, бодум муңгаргай турган мен.

Агейни үдеп кааш, Чолдак-Степанның бажыңынч авамның чугаалааны ёзугаар чоруй барган мен.

### Бешки эгэ . Чер-бажыңга

Кежээликтей апарган. Дээр дээрge доо-ла оранчок, шулу ак-көк чүве турган. Чүгле чер-дээрниң дегжип келген хаяазында маңыр ак туман чатты берген. Ылап соок кыш-даа келген.

Ам бодаарымга, Чолдак-Степан дыка-ла бай турган-дыр. Дерзиг-Аксының он шаа өрөгө чурттап турган бичии сууруунц хөй нуруузун ол чааскаан ээлээн турган. Дыка-ла улуг черни долгандыр ыяк херимнеп алган. Ооң иштинде ийи ацмаарлыг. Делгем кухнядан аңғыда, ийи өрээлдиг олуар бажыңыг, мал кажаазы-даа дыка хөй. Артында дарганнаар черлиг.

Мурнунда бир катап қулаамдан туткаш, үндүр октапканын сакты хонуп келгеш, Чолдак-Степанның бажыңынч кирерин дидинмейн, даштын тур мен оң. Элээн боданып турса, авамны сактып келдим: авам менден ыракта хөй берге түрөгделди көрүп-ле келген болгай, ол хирезинде кезээде чүвениң эң дээрезин бодап чораан.

«Кортпайн эки ажылда, оглум деп меңээ чагаан-на болгай, корт-пас-даа мен» деп иштимде чугаалангаш, эжикти ажыда каалтым.

Чолдак-Степан менчे уткуштур бо чоруп олур. Эжикче үнүп орда, аар-ууру хайыракан-на.

«Ам ат болду! Мени мындаагызындан-даа артык аажылап болур» деп бодааш, эжикти дегийт-ле хаай идипкеш, дедир үне халааш, даштын элээн ырай берген тур мен.

Чолдак-Степан эжикти ажыткаш, менче бозага кырындан хөректей-дир:

— Че, чуғе дезериң ол? Чоп тур сен? Ажылдаар дәэш бе азы оорланыр дәэш келдиң бе?

Чүрек-даа тиккиңейнип тур, бажыңга кире хонуп келгенимни билбейн барып-тыр мен.

— Бир эвес хөлечиктәэриң ол кижи болзуңза, орта, әки ажылдаар херек. Багай ажылдаар болза, хлеб чәэн херәэн чок. Сени эңмежок хәй хлеб-бile чемгерер болгай. Бир эвес багай ажылдаар болза, хәй мықылааш бәэр мен, билдиң бе? — дәэш, Чолдак-Степан ыжыгыр кызыл чудуруу-бile коргуда-дыр.

Ам-на кулактан сегирип-ле алыры ол-дур мооң деп бодааш, чайгаар-ла чалданып, бажымны ханаже ойтапкан тур мен.

Мәэн оомну көргеш, Чолдак-Степан каттырымзырай берген кезек тургаш:

— Наталья Прокопьевна, бо оолга бок-сак чемден ынаар бере каавыдам. Дүрген чий соп алгаш, ажылчыннар аразынга барып удуп алзын. Эртен эрте Чолдак-оол-бile ийилдирзин сиғенче чорудар чүве — деп, чаа кожай бастып, кочулай аарак чугаалады...

...Наталья Прокопьевна менче-даа көрүнмейн, чунар-демир чанындан ыяш аяк алгаш, бозага чанында дөңгүр сандайга аппарып салды. Оон аякка мүн артыы куткаш, бир кескинді өртөң кара хлебги ортузундан буза туткаш, аяк чанынга салып берди.

— Ча, олур, дүрген чемненип ал, эртен эрте ажылдаар болгай. Чоп мырыңай шышпая берген олуарың ол боор, кулугур — диidi.

Сандай чанынга барып дисектенип олурупкаш, чемнени бердим. Картошкадан хайындырган мүн артыы, өртөң хлеб карты ол херектәэшкін соонда ажыг-ла болду. Кижи чүнү-даа канчангалақ чорда, бо Наталья Прокопьевна меңәү чуғе каржыланып турары ол деп чувени билбейн, пат кайгаан олур мен.

Салып берген чемин дооза чип чорумда, Чолдак-Степан холунда элләэн-не үвүр-савыр чүве тудуп алган келгеш, чугаалай-дыр:

— Эртен Чолдак-оол-бile кады сиғенче чоруур силер, мону кедип ал, ма — дәэш, мәэн мурнумче самдар тонну каггаш, эрги бродни ндикти шала кырынче октапты. Самдар тоннуң иштинден самдар бөрт база тып алдым. Ооң бир халбаңы чок болду.

— Каяа хонар мен? — деп Чолдак-Степандан айтырдым.

Херим булунунда чер-бажыңче айытты:

— Ында хомуттар, аyt херекселдери азар чер бар, ооң адаанды

ажылчыннар удуп турар чүве-дир. Ча, чоруул — дээш, базыпты.

Менээ берген «идик-хепти» бөле куспактай соп алгаш, соондан чоруптум. Чартыы чер-бажың болду. Бир талакы ханазында өргөннөр дизе кадап каан. Адаанда шала чок, чер кырында саваң дөжеп каан, ооң аразында самдар хеден чоорганнар, дүктери дүшкүлөп калгылаан чагылар чыткан.

— Сээн орнуң бо-дур. Удуур-даа, чемненир-даа чериң бо. Хей олурган херек чок, чыдып ал.

Менээ шак ындыг сумени бергеш, Чолдак-Степан чоруй барды. Ол-ла орайтай берген хиреде, чер-бажында кижи-даа чок. Қурум чешкеш, хыйышкаш, дораан удуй берип-тир мен. Каңғыраан-коңгураан шиммээн болду. Оттуп келиримге, эжик халырткайндыр ажыттына берди. Эжиктен соок-бile кады дерзиг, кара маслазыг чыт думчуумга кээп турду. Ол дээргэ Чолдак-Степаның хөлечиктери хомуттарын, седёлкаларын болгаш айт хөрекселдерин кирип кээп турарлары ол-дур. Хомуттарын демги өргөннөрдө аскылаптылар. Он шаа кижи. Оларның аразында мээн таныштарым: бедик, хөнүсийнныг, мөгө-шыырак боттуг, орлан-омак карактарлыг, демги-ле менээ берген идик-хептиң өөрүн кеткен Тарбаган, чоон, матпак Чолдак-оол, бедик сынныг Веденей Сидоров, Родион Елисеев, Данилка Рощин суглар болгаш оон-даа өскелер болду.

Наталья Прокопьевна кирип келгеш, ниити сакпында мүннү чер кырында далаштыг салгаш, ооң чанынга ыяш савада сухарей салып бергеш, биеэги-ле ажынчак аажызы-бile:

— Ам чуге олуарыңар ол, дүрген чемненицер — дээш, ооң думчуунче багай агаар киреринден корткан-даа чүве ышкаш, ийи салаазы-бile думчуун дуй базып алгаш, үне халыды.

Хөлечиктер сакпынды долгандыр олуруптулар. Тарбаган хамыкты мурнай калгаан алгаш, чем кылыш өөрөнгөн кадайлар ышкаш, эптии кончуг, сакпында каразымаар мүннү куда шаап алды, оон ишпейн, дедир төвүттү.

— Эки-даа, багай-даа болза, ижер-ле херек. Далдал олуар болзуусса, моозун-даа бербейн баарлар — дээш, Веденей Сидоров хамыкты мурнай шөлүреди иже берди, өөрү ону эдерипкен.

Дүргени кончуг чемнени каапкаш, эрлер-даа удуп чыткылап алды. Веденей Сидоров идик-хевин-даа ужулбайн, бүдүнгө мээн чанымда чыдып алды.

— Немежип турар-дыр бис. Ындыг бе, оолдар? Мынча хәй хөлечикити чоор дәэн чоор? Бо оолду база кирип алган көрем. Ындыг-ла бооп-тур ийин. Бир шагда барып биле бәэр ыйнаан.

Сидоров ыйыт чок чыткаш, бир аңдарылгаш, оон чугаалай-дыр:

— Мен бо-ла Уъс, Минусинск ынчалдыр чоргулааш, хәй-ле эки кижилер-бile ужуражып чордум. Олардан дыңнаарга, бо Чолдак-Степан ышкаш, сilerниң Идам-Сүрүң ышкаш, каржы-дошкун, халактадып-човуурладыр араатан кижилерни үндүр сывырыптар үе келир дижип турарын дыңнаан мен.

Веденей Сидоровтуң чугаазын кичәэнгейлии-бile дыңнап, Уъс болгаш Минусинскиниң чурттакчыларының дугайында эрлер айтырып, сонуургап чытканна... Чамдыктары-ла шала чигзинип, салым-чаяан билир болгай аан дишкүлээр турган.

Хөлечиктерниң чугаазын дыңнаарымга, бир-ле эки чuve чугаалажып, эки шаг манап турган ышкаш, ужурун орта билбейн, удумзурап эгеләэн мен.

Уйгу хандыр удупкан болгаш, қатап удуп чадап чыдыр мен. Веденейниң идегелдиг, хоюг, чараш сөстери мәэн кулактарымга ана кыңгырткайнып-ла турган.

Мен Веденей Сидоровтуң чугаалааны ол күштүг, эрес-әкер кижилерниң дугайын бодап чыдыр мен. Мен оларның-бile деңнөжир ирги мен бе? Оон чер-бажының ханаларын болгаш азып каан хомуттарны көрүп чыда, «ам чаа бергелерни ажып шыдаар ирги мен бе, кайы хире болур чuve ирги?» деп боданган мен.

Кум кынны берип, уйгум кадында дыңнаарымга, эжик шыгырт диди. Көрүп чыдарымга, Чолдак-Степан аажок ажынып, коргунчуг апарган келди.

— Хо-хо! Чалгааларны! Чүгле боттарының хырнын, уйгузун бодаар. Даشتын багда аyttарның дери шагда-ла сооган-дыр. Мынчага дәэр чоп чөмгербәэн сiler? Силерге чаңгыс-даа кежәэ чөм бербейн барза, чүү дижир ийик сiler, а? Тұргулаңар, ядарааннар!

Чолдак-Степан сапыны-бile Тарбаганның ээги орта тепкеш, оон Данилка Рощинниң бажының дүктеринден иий холдап сирбектәеш, ковайты соп келгеш, ооргазынче кара шыдал-бile каш-даа катап шашты.

Данилка, бичии уруглар ышкаш, ыглапты. Аараанындан эвес, хорадаанынга шыдашпайн, ыглапканы ол-дур деп бодаан

мен. Будунуң ораашкыны-бile буттарын, садыгдан алган чүвезин шараан улус дег, ийи холдап так ораай шапкаш, идиkтерин киir тепкилеп алды.

Веденей чоорганын арк октапкаш, тура халааш, Чолдак-Степанның мурнун орта барып чеде бергеш, дыңзыг холу-бile оон эктинден чырыа соп келген:

— Чүнү кылыксай-дыр сен? Ол бичии оолду хап туарың ол бе? Сенә ындыг эргени кым берген чүвел? Сен бажыңыңга кожай сен ыйнаан. Мында оолдарның улуу мен мен. Оларны базындырбас мен. Бодуң ядараан кулугур сен.

Веденей бодунуң сыын мыйызы докпак дег чудуруун Чолдак-Степан кожайның бажынчे аннынган.

Чолдак-Степан аңгадай бергеш, эжикче дедирленипти.

Веденей бодунуң дөжээнге ээп келгеш, хөректеди:

— Моон соңгаар ынчап барзыңза, өлүргеним ол!

Чолдак-Степан чер-бажындан шагда-ла караш дээн. Даштын, хаалга ындында, арай коргуп, хөөледир күштени-дир.

— Дүрген турууп, аyttарны чөмгерциөр, бир эвес ынчанмас болзуңарза, канчаар эвес мен. А сен, Ведька, хөлүн эрте бербе, холуң харбаңнатпа. Көргүзүп бергей мен де!

— Ашакты эки-ле коргудуп алдың, хырнының сыңыйы чарлы бер часты!

Хөлечиктер шупту чир шоң каттырышканнар. Каттырышаан тоннангаш, аyttар чөмгерип үнүпкеннер.



1. Кaa-Хем унунда, Дерзиг-Аксында чаа чөргө көжүп келген бичии Токаның өг-бүлэзиниң амыдырал байдалы кандыг турган-дыр?
2. Тока чүге көжүп келген орус улуска хөлечиктээр апарғаныл?
3. Ванька, Родион, Вася болгаш Серёжа Санников дээн ышкаш оолдар-бile Токаның найыралының дугайында чугаалап көрүнөр. Олар-бile эдеришкени Токага кандыг эки салдарлыг болуп, ол кандыг чаа чүүлдерни билип алганыл?
4. Чолдак-Степан болгаш Агей Лубошниковтуң бичии Токага хамаарылгазындан оларны деңней көрүп, кандыг мэзү-бүдүштүг кижилерил деп тайылбырлацар.
5. Чолдак-Степанның бодунуң хөлечиктеринге хамаарылгазын тайылбырлап, бичии Токаның кадыг-берге амыдыралды канчаар эгелеп алганын чугаалацар.

6. Веденей Сидоровтуң чугааларының утказын чүү деп билип алдыңар, ону төөгүден билдингир кандыг болуушкуннар-бile холбап болур-дур? Аңгы демисели деп билишикинни бодуңарны-бile сайгарып көрүнег.
7. Силерниң ам чурттап турар чериңгерге шаанда баштайгы көжүп келген орус улус чурттап турган бе, бир эвес чурттап турган болза, оларның дугайында медээлерден чыыш, салгакчылары бар бе деп тодарадыңар.
- Чеңгى паsh, уру аяк, тос одуш, айлаар озук, изиг-демир, күшкүр деп сөстерниң утказын билип ап, олар-бile улустуң чүнү кылыш чораанын тодарадыңар.

## ҮШКУ КЕЗЭЭ

### Алдыгы эгө. Одаглар хып тур

Мерген унунда терең оътка Доруг дықа хәй хүннер оъттап келген. Ол база катап чылбыйтыр семирий берген. Ам ону эзертээш, Сарыг-Сепче хап чоруп болур апарган.

Оътту Доруг үзе соп чип тур. Аңаа чүген тудуп алгаш, чеде бердим. Доруг бажын көдүрүп, менче туражок көргеш, оът-сигенниң сып дөзүндөн одура база узун-узун кадарларны харамдыгып ызырыбышаан, улам шалыш үзүп чий берди.

«Бистерден чоруп, билдинмес оруктар-бile чорууру сеңээ хомуданчыг-дыр бе? Азы сен орукче чоруптарың мурнунда хәй күш чыыш алышасп тур сен бе? Бистерге болза, сен чалгааравас-ла болдур сен ийин, Доругдай?»

Аътты эзертеп алдым. Аъттангаш:

— Авай, аа, авай! Мен белен тур мен! — деп алгырдым.

Авам чадырдан үне халыш келди:

— Аъдың партизаннарга берипкеш, дүрген чаныш кел. Бурган өршээзин, орук-суур эки чор, оглум!

Авам-бile байырлашкан, Сарыг-Сеп баар орукка үне халыдып келдим.

— Кайнаар далажырың ол, Тока? — деп, танышырм ыйттар дыңналыш тургулаан.

— Партизаннарже — деп, кежэекиниң хүнү сиртедип союп чоруп турган Сарыг-Септиң сыннарынчे холум сунмушаан, харыылап чораан мен.

Чамдыктар чүүлзүнүп, бир чамдыктар кыжырып:

— Ында чүгле уштунчак думаалыг сени чоктап тур боор ийин — суг дигилеп, кочулап турганнар.

— Көк карактыг бөрүнүң диштеринге, хураган дег, ызыртына бергей сен aan.

Орук чингис шыпкан кырлаңнарның болгаш элезин тейлерниң аразынга кадыры-бile дайлаң-шайлаң чоруткан турган. Мен дорттап чорупкан мен. Доругну каккаш ыңай болурумга, бүүрелчиннерже ужугуп үнүп, чавыт черлик хараганнарны чииги-бile ажыр шурап чоруп олурган.

Сарыг-Септиң бедигээжинге үне халыдып келгеш, баарымда паараңның одагларын дораан-на көрүп кагдым.

...Партизаннар Каа-Хемниң эриинде каас-чарааш үнүштер хүрээлээн оймалыкты турлаг кылып, одаглар кыпсып алгылаан турганнар. Черниң кырын чырык херелдендир чырыткылап турган. Чаңгыс-ла канчаар-даа аажок улуг одаг хып, оортан үнген чаштанчылар алдын арыларның бүлэзи болуп ужугуп үнгеш, булуттарга барып өжүп турар дег сагындырар турган. Мен Тарбаганның тоолун болгаш Кодур-оолдуң адазы-бile ацнаарынга белеткенип олурганы чалым баарында одаан сактып келдим. Ынчалза-даа мээн бо көрүп турган чүвем кайда-бир ыракта аас-кежииниң дугайында тоол эвес турган. Ол дээрge кызыл партизаннарның паарацы. Олар бистерниң аас-кежиивис дээш тулчуушкунче чоруп турганнар.

Хем иштинге кирип келгенимде, мырыңай дүне апарган. Күжүр Доруг өөрүн билип кааш, киштепти. Аъдымны өртеп каггаш, турлагже дидим эвес чоокшулап әгеледим. Партизаннар бооларын арыглап, ок-чемзээн белеткенип турганнар. Ажылын доосканнар хөглүү-бile чугаалажып турлар. Мен бүгү-ле чүүлдерни биликсеп, ылангыя кол кижизи-бile чугаалажып, чырык өртемчейде чүү болуп турарын айтырыксап турган мен. Ыңай-бээр көрдүнмушаан, аяар кылаштап, чоокшулап, бүгү-ле чүүлдер-бile танышып ап чор мен...

Партизаннар мацаа хонары-бile доктааганнар болгаш бир-ле тулчуушкунга белеткенип турганнар. Каа-Хем бажында турумчуй берген актарга-ла удур чоор оц. Баштай мен чүгле танышпазым кижилерге ужуражып турдум. Партизаннар аразында Белбей суурга

чурттап турган Сергей Хлебниковту, Веденей Сидоровту, Тарбаганны болгаш Санчааны көрүп кааш, бодумнуң карактарымга бүзүревес турган мен. Оларның кеттинип алганын көөргө, биеэки хөвээр-ле, ынчалза-даа хевири мырыңай өске. Олар бооларын арыглап, бир-ле чүвелер дугайында хөлчок маргыжып турғаннар. Бодумнуң одагга канчап чеде бергенимни билбейн-дир мен. Чаңгыс сөс-даа сөглевээн мен, а ол хиреде холумну бооларже сунуп чедире берген тур мен.

— Силерни мен Степанның чарлыын ёзугаар кайда-бир черде ажылдан турагар улус деп бодап турғаным, ындыг эвес, боолуг партизаннар болу бергилээн улустар-дыр ийин моң — деп бодумнуң хөлечик эштеримге чугааладым.

— Ийе, бистер сээң соонда чорупкан бис, сен кайынын келдиң? — деп, Веденей Сидоров мени олуртпушаан, хөйнүң мурнундан айтырды.

Мен инектер дугайын, Хоорнуң дугайын болгаш Доругнуң дугайын, авам-бите чугаалажышкыннар дугайын чугаалап бергеш:

— Ам кожайга баар дээргэ, багайы кончуг, барбас дээргэ, база-ла багай. Силерге ужурашканым аксым кежии-дир — деп түңнедим.

— Чолдак-Степандан ам чүнү дилээр боор? — деп, Веденей каттырыбышаан чугаалады. — Ынчаарга оон кортканының хөрөэ чок. Оон орнунга бистиң партизанчы командиривиске баргаш, оон-бите сүмелеш, ол-ла эки боор — диди.

— Веденей шын сөглеп тур — деп, өске партизаннар чугааладылар.

Мен демгизинден усчок дидимнели берген мен. Долгандыр көргүлээримге, боо туткулаан хөй-ле кижилер бар. Одагларда беш-беш, алды-алды бооп алгылаан, чамдыктары кочалда чем хайындырган, бир чамдыктары хептерин кургадып, өөктерин илип, бооларын арыглап тураг болду.

...Топтап көргеш, бир катап менээ Доругну, бүдүн хлебти берген ол-ла кижини танып кагдым. Билдирбестеп чоокшулай бергеш:

— Эки-и! — дидим.

Дарга менче эргилип келгеш:

— Менди, менди! Кайынын келдиң, чүнү канчап чор сен? Олур, олур!.. — деп хөглүг үн-бите каттырды.

— Силерге келдим, мени авам чоруткан чүве.

— Чугаала, чугаала.

— Мындаа силерниң-бile аът орнашканым ояар, кожайымга барбаан мен: аът ужун Чолдак-Степан өлүрүп кааптып болур. Боттуң чадырынга олуарар чоор бе, азы кожайга баар чоор бе деп, ам чүнү кылышын бодаттынып тур мен, азы... силер мени бодуңарга ап алыр силер бе?

— Хо-хо, сен Степандан кортпа. Кожайлар турғаннар, оларга ақ хаан дузалап турған, ынчаарга ам хаан чок, кожайларны шагдала дүжүр октапкан. Ам ээ кымыл? Бо чон — дәэш, партизаннар даргазы чооккү одаглардан әгеләэш, ыраккы одагларны дургаар холу-бile айыткаш, уламчылады, — бистиң чуртувуста бүгү улус база сәэң биле бис-тир бис. Кызыл чазак бистерниң доозавыска дузалап туар.

Партизаннар даргага келгилеп турған, оларны ол ылавылап-ылавылап дыңдааш, айтышыннар берип олур, а соңда мәэн-бile база катап-ла чугаалажы бәэр. Ооң чугаазындан мен байларның эрге-чагыргазының кошкааганын болгаш ядыыларның боттары эрге-чагыргазын холунга алыр өйү келгенин эки билип алган мен. Ынчалза-даа Чолдак-Степан-бile канчалзымза экил дәэрzi меңәэ ам-даа тодаргай эвес турған.

— Мени бодуңарга ап көрүңер, мен кожайдан коргар мен — деп диледим.

— А сен кортпа! — дәэш, бир-ле чүве бижий каапкаш, менче бичии саазынчык сунду. Бир эвес херек апарза, «Сәэң аъдыңы Шетинкинниң шериглери аппарды» деп чугаалааш, бо бижик-чигешти көргүзер сен.

Мен ол саазынчыкты ап алгаш, ийи холумнуң салаалары-бile азыгларынга чыпшыр туткаш, ортузундан сыйкаш, хойлап алдым.

— Бистиң-бile чоруурун далашпа. Бис ам ырак, айыылдыг черлер баар деп тур бис, а сәэң-бile Хем-Белдиринге ужуражыр бис — деп, дарга чугаалады.

Дарга бодунче мени чыпшыр туткаш, Тарбаган ышкаш, эргеледип, бажым суйбап кагды.

— Өөренип алгаш, шынап-даа эр хей болур сен. Хем-Белдиринче чорувут. Сәэң-бile бис удатпас ужуражы бәэр бис. Аңаа чүвениң байдалы көстү-ле бәэр ыйнаан!

Партизаннарның берген чемин тottтур чип алгаш, одаг чанынга дыгдынып чыдып алгаш, удуп калдым.

Түңчунун әдискен сигналындан оттуп келдим. Партизаннар чоруптарынга белеткенип, аyttарын эзертегилеп, чүүгүн чыгдынып турлар. Янзы-бүрү демдектиг бооларны ооргаларында чүктегилепкен турлар. Каргырткайнып, ыңай болур дээш, шыдаттынмайн дап берип турар кара аъдын демги дарга мунупкан тур, ынчалза-даа партизаннар даргазының дыңзыг холу ону қыңчыктырбайн-дыр.

Дарганың дужааганын ёзугаар партизаннар ээлчег-бile бир, ийи, үш... чүс бир... ийи чүс чеди... деп санаштылар.

Ол хире эрестиг үннерниң аразында кызыл партизаннарның дузаламчызы-бile ам чүгле боттары хостуг апаргылаан эвес, харын база бистерге дузалап турар бодумнуң өңүктеримниң үннерин дыңнаарымга, магалыын кандыг дээр...

— Аyttаныңар! — деп, чаа дужаал үндү, чүс-чүс кижилер аyttарында олура каапканнар.

Чүгле Доруг артып калган. Мен олче халып чоруткаш, аргамчым дүрүп ал сал-ла, даргага чедип чедире бердим. Дарга мени көрүп кааш, бодунуң кара аъдын әргилдирип келди.

— Кайнаар баарың ол, оол? Хем-Белдирингэ ужуражыр деп сеңээ чугааладым чоп — дей-дир.

— Мен... Мен дээрge... Доругну хүлээп ап көрүңер.

— Ол болза өске херек-тир. Петров, аyttы ап ал!.. Че, че дидим, удатпас болчаавыска ужуражы бээр бис, байырлыг!

Дарга мээн-бile байырлашканш, чыскаалчэ база катап әргиле берди.

— Оң талалап үштеп ма-арш! — деп, дарга узады командылады, партизан отряды Каа-Хемни өрү шимчеп чорупту.

— Че, ырдан эгелевит!

Бир-ле кижи бедик, чоон үн-бile Саян ындының партизан ырызын эгеледи:

Хаяалыг хүн дээп кээрде...

Мээн чүрээм чымырткайнып тур. Хөлечик ақыларым Веденей Сидоров, Тарбаган олардан чарлыры, чоруурунга белеткенип, чүйктүг терге кырында олуруп алган Верадан чарлыры менээ берге болган. Вера тергелиг аъдын шимчедипкеш, менчэ аржыыл чайды. Бөргүм ушта соп алгаш:

— Байырлыг, Вера! — деп аяар алгырдым.

— Ужурашкыже, көржү бээр бис! — деп харыы келди.

Аъттар-даа кизирт дээн. Чүйктүг терге доозун булудунда дүлнүп чораан. Мен бурунгаар — кежигже дорттай халып кагдым. Кайын чедер мен: олар шагда-ла Каа-Хемниң орту үезинде барган турганнаар. Чүйктүг аъттар паромче сыймарлажып кирип турган. Боттаң аъттыглар сүстүрүп, эжиндирип кежип турлар.

Чоруп бар чыткан партизаннарың соонче үр-ле көрүп турдум. Чүгө мен бичии болганым ол, чүгө дораан-на чүгүре бээрин диттикпээн кижи боор мен. Каа-Хемниң эриинге чүнүң ужун чаас-каан артар ужурлуг кижи боор мен. «Чок, ындыг ужур турбас, авамче дурген-не чоруптайн, ол менээ эки сүмезин бээр болгай aan».

Авамга чеде бергеш, аңаа шуптузун чугаалап бердим.

— Мен ам кырган-дыр мен, сени сүрүп чорууру менээ бергедир. Сен ам улгадып, өзүп алган-дыр сен. Сеңээ мээн сүмелээр чувем бо-дур, оглум — ол партизан даргаңың чугаалаанын ёзугаар Хем-Белдиринче чорувут. Сени мен Хем-Белдиринче белеткеп, аъткарайн. Аңаа ам сени эки кижилер аайлап, амыдыралдың дорт болгаш калбак оруунче үндүрүптерлер.

Кулак байны каггаш, Хем-Белдири чоруур, өөренир, мээн көргеним партизаннар даргазы ышкаш, шак ындыг болуп алыр деп бодалым чаңгыс ол болган.

- 
- 1. Токаның амыдыралынга кандыг өскерилгелер болуп эгелээн-дир. Кызыл партизаннар деп кымнарыл?
  - 2. Хөлечиктер чүгө партизаннарга катчып, олар-бile чаңгыс аай апарганил?
  - 3. Тыва араттарның орус кызыл партизаннар-бile найыралын автор канчаар чуруп көргүскең-дир?
  - 4. Тыва чоннуң төөгүлүг салым-чолунга өскерилгелерни чогаалчы маадырларының овур-хевирлерин дамчыштыр канчаар көргүзүп турар-дыр? Тывага национал-хосталгалыг демисел дугайында медээлерден чып, силерниң черге болуп турган болуушкуннарны тодарадыңар.
  - 5. Щетинкин болгаш Кравченконуң партизан шерииниң Тывага кээп чораанының дугайында чүнү билир силер? Кызылда оларга тураскаадып адаан күдүмчуну болгаш Улуг-Хемниң эриинде тураскаалды барып тып көрүп, ол дугайында бодалдарыңарны илередицер.
-

**Степан Агбанович  
САРЫГ-ООЛ  
(1908—1983)**

**«Аңғыр-оолдуң тоожузу»  
деп романдан эгелер**

**Дагаа чылдыг мен**

Шаанды улустуң шаг-үени — хар, чылды санаары база бир янзы турган чүве-дир ол. Чижээлээрге, хүнде он ийи шак бар. Олар дөгере аттарлыг: бирээ, ийи, уш, дөрт, беш, алды, чеди, сес, тос, он, он бир, он ийи — Күске, Инек, Пар, Тоолай, Улу, Чылан, Альт, Хой, Мечи, Дагаа, Ыт, Хаван дижир.

«Мен эртенгининц дөрт шакта тургаш, орайның он ийи шак чедир ажылдадым» дээр дээн болза, «Тоолай шакта тургаш, Хаван шакка чедир ажылдадым» дээр-дир ийин. Күскеден Хаванга чедир ийи долганырга, дүн-хүннүң чээрби дөрт шагы ол. Ол ышкаш хар, чылды база он ийи эргилделиг кылдыр санаар. Үениң эргилдезинде төнмөс-батпас бар-ла чыдар — кызыгаар чок чуве чок он ийи чыл бар. Ол төнерге, база-ла катап эгелеп турар. Ол он ийи чылдың аттары-бile бо он ийи шакты адаан. Оон ужуру-бile кижиниң төрээн чылы азы хүнү-даа дийик, чыл бүрү дакпырлавас, а он ийи чылдың бодунга барып таваржырга, «чылы кирер» деп чуве ол.

Мен Дагаа чылдың күстүң адак айының он чедиде эртенгининц Хой шакта төрээн кижи-дир мен.

Бурунгу улустуң чаңчылы-бile ол чыл бүрүзү тус-тузунда ботшынарлыг болур дижир. Чижээлээрге, Хаван чыл болза тараалың — үнүш-дүжүт чаагай чыл. Чуге дээргэ хаван болза хөрзүндөн чөмненир, ынчангаш озук хаайы-бile хөрзүн коптарып ажылдаар амытан. Дагаа чыл болза, күш амытан элбек болур. Күш болза чүнү-даа чиир — тараа, мочурга, суг курту-даа чиир. Үйнчангаш база дыка бай чыл. Оон-бile кады Дагаа чылдың бир онзагай



чувези — шак-үеде чазыг чок, «болчаглыг чаагай чыл» дижир. Чүге дээрge дагаа хүннүц он ийи шагын дөгере алдаг чокка медээлэл алтырар, шак дег күш дижир. Ол чылын кижи аас-кежинден озалдал, чыдып-даа калбас, далажып эрте-даа бербес, шынчы чыл апаары ол.

Бо-ла бүгүнү сен канчап билип алган сен дээрge, шагда бичии уруглар бот-боттарыныц чылын мактап, кагжыр-маргыжар боор чүве. Кижи бүрүнүц бодунуц чылыныц тускай мөзүзүн шыдаар-ла шаа-бile мактап билир. Чижээ, мээн акым Бадый Айт чылдыг, дунмам Узун-кыс Күске чылдыг. Аравыста кагжы бээр бис. Мен үстүндө чугаалааным шынарларны оон-даа артык хөөредип билир мен. Ынчаарымга, Бадый хөөрээр:

— Черле чадаг чорбас. Ырактан кортпас. Айт турда, хову чолдак, арт чавыс, оожум чувени эртер. Чаа-чалбакта дайзынга удур мунуп кирер, тайбынц шагда дагылган, наадымга мунуп кирер, чарыштырар, челиштирир. Артында хей-айт кылдыр бурганда чураан — кижиниц омак сүр-күжү ында көрем!

Узун-кыс хөөкүй-ле арай бергедеп үнер. Шоолуг мактанир харык чок. Тараа оорлал чиир, даваны чолдак, күш-шыдал чок, эльт-кежинде өртек чок, чүү-даа ону базымчалаар. Ыт, моортай, чылан, ас, кырза ону тудуп чиир. Дээлдиген безин бо-ла сегирип алыр. «Далашкаш, сүтке безин дүжүп өлүр кулугур» дээш, бактаар-ла сөс хөй. Адак сөөлүнде бир хорадааш, кырган-авазынга ыглап четкен:

— Мээн чылым багай-дыр. Мени чүге Күске чылда төрээн? Мен ол чылда үнмес мен. Мени дедир чорудуңар. Адаа сагыш човаар дээш удувас болдум!

— Эх, мелегей кулугурларны. Кижиниц кызыныц чылын бактап тураг. Олар күскениц күжүн билбес-тирлер. А сен харыылап шыдавас, бодуң багынц-дыр. Ам мынчаар харыылап чор — дээш, ийи-даа тоолчургу чугааны чугаалап берген. Узун-кыс оон амырап, өске бүгү-ле Күске чылдыг өөрүнгө тоолдал орар чүве:

— Шыяата, күске канчап чылга киргенил? Ол болза төвө-бile мөөрөй кылгаш, ашкан кончуг кажар, угаанныг амытан чүвең иргин. Чүнү маргышкан дизе: «Эртен хүн үнүп кээрин кайывыс мурнап көрүп каар эвес, маргыжаалы, төвө, че!» — деп, күске чугаалаан. «А хувура! Мен дег бедик эвес сен, ыятпазыңы але! Че харын, көрээли» — дээн.

Күжүр төвө-даа чүү боор, дөлөм чер орта хүн үнер чүкчө көргеш, серте чок кегженип чыткан.

Кажар күске бүдүү сиғен аразы-бile чүгүргеш, тевениң сыр соондан кедеп кәэп, чолдак куудуруун кырлааш, мөгөннерин ашкаш, кылчыгыр мойнун кырлааш, мырыңай-ла ийи кулак аразынга хүн ажар чүкче көрүнгеш, чыдып алган.

Эртенигى хүн барынын сыннар бажынга дээп кәэри билек, күске чугаалаан: «Ээй, тeve, дөө көрөм! Хүнүвүс дээп келди! Хая көрүн, кегжигир саңга!» — деп алгырган.

Тeve шак ынчаар аштыргаш, чылга кирбейн барган чүве-дир. Хамык ужур бичиизинде эвес, угаанында болган.

Оон ыңдай Чолдак-Ой деп күске чемнеп чорааш, хүрээгэ кире маңрап келгеш, көрүп чыдарга, хамык амытан кончуг улуг алдын бурганга тейлеп турган. Түмен хуурак ону дагып, арамайлал, далган, тараа, чигир, саржагны ооң мурнунга мөңгүн дагылдарга салып турар мындыг бооп-тур.

«Чүү мындыг күчүтен, ачы-буянныг чувези апаады бо?» деп бодааш, бир барып шинчилеп көрген. Каткан-хуурааның, ындыг боор ийик, анаа-ла малгаштан шевер кижи тудуп каан, а ишти хос, даштын хола-бile чаап каан мындыг бооп-тур.

«Ээче, хувура, бо чоннуң-даа чөгөнчиин! Че, бир шагда биле-ле бээрлер ыйнаан. Мօоң иштинге уядан тудуп алгаш, бо белен амданныг, чаагай аъш-чемни чип, ажы-төл азырап, айыыл чок, тайбың чурттавас чүве бе» дээш, амырап уя тудуп турган иргин.

Эртенигиниң эрте шагда, бурунгунуң бурун шагда чырык хүн алдынга бир-ле кончуг «шаг багы» дүшкен. Эйт орнуунга барба хайындырып чип, тараа орнуунга хонак, үүргене тывылбас турда, дыка хөй тараачын чон күске хөмээзи-бile амыдырап, тынныг үнүп турган. Черде күске үнгүрүнүң мортуун көргеш-ле, казып эгелээр. Ырак-даа эвес, деспи ишти хамаанчок, таалың ишти хөлчок арыг тарааны үүжелеп каан чыдар. Чүгле тараа эвес, мыйыракты хөөп каар. Улус ол тарааны дораан-на хооруп, соктап чип, быдаалап ижерден аңгыда, бистиң оранга тараа үрезинин оон арттырып алган — дээш, Узун-кыстың тоолдары-даа көвүдээн.

Мындыг яңзылыг он иийи чылдың иштинде мээн чылым — Дагаа. Ынчангаш мен дагаа өлүрбес ужурлуг кижи мен — деп, Аңгыр-оол ол кежээниң чугаазын дооскан.

## Шагаа

Шагаа деп чүвени чыл бүрүде-ле көрүп келдим. Ооң иштинде барык-ла чоокта чүвейн ол, шору эр бооп өзүп-даа келгеним ол боор. Ада угум-бile элегележир бир бай алга қадарчылап қыштааш, ол чылын шагалаанымны черле утпаан дээр чүве бе азы элээн ужурун биле берген мен. Ооң мурнунда Шагааны ужур билбес бичемдаа хараазы-бile нургулайында-ла хой қадаар үлүүм таваржыр болгаш, черге муңгарап-даа эрттирип чорааным ол ыйнаан. Чамдык бай-шыдалдыг улустун әрге-чассыг, оптуг-опалыг ажы-төлү, Шагаа чоокшуулап олурда, ай-хүннү санап көрүп алгаш, олче ыялавыла мен ышкаш өскүс-чавыс, қыдыг-кыя кижилерни албадалтары тодаргай.

Шагаа дээрge бүгү чоннуң база бир сеткил сергеп, көдүрлүр байыр-дою чораан чүве.

Шыырак өг бүрүзү күзүн қыштагга көжүп кел сал-ла, кончуг семис ирт ийикпе, сергени өлүрүп, эъдин бүдүнгэ доорааш, хырнынга суп доңуруп каар — ону «доорамчы» дээр боор. Оон башка Шагаага чедир мал арыптар-ла болгай.

Өшкү, хою чок ядыы улус-ла хөөкүйлер Шагаага дой дооравас, бар-ла шаа-бile қадык хайындырып, шай-суксун кудуп эрттирир.

Ол Шагаада мээн хой қадаар үлүүм безин хөлчок таптыг таварышкан. Дөрт өг болгай бис — дөрт қадарчылар аан. Мээн ээлчээм бүдүнүң хүнү таваржы берген. Ол хүн даглар бажынга ыршоорум-даа кежээллээн. Сактырымга, черле чаңгыланмас өзээнден доң хаялар безин чаңгыланып, мени өттүнүп ырлажып турган ышкаш. Ынаар тайга тазында аргалар мээн кыйгым дыңнааш, хире-хире бөлдүнчүп келгилеп каап, одарын колуп, өскээр көжүп-даа тургулаар.

Ол-ла Бел одурту кожа-кожа қыштагларлыг алды кодан алдарның дугуржуп алгаш, үш хонукта улаштыр дойлаар болган Шагаазынга дөгерезинге барып, хамык оюн-тоглаазын көрүп, экидаа дайнап алдым!

Баг эдектээн кижи болгай мен. Мээн аалымның сураглыг кагыгжыларынга баг эдектээним ол. Олар дөгере-ле мени кагбас дээш алгыржыптар. Мээн алгап-йөрээп, ырлап бээрим оларга дыка көдүрүмчелиг турган болгай аан. «Бажында манадым, кезинде келдим! Эдектерим, хончуларым! Башкы мерген-бile мат ыл!» —

дигилээш, бүгү аал ишти дыңнап турар кылдыр ырлап, чүү деп мактавас дээр ону!

Че, ол-даа канчаар. Ол-ла байыр ёзуулалдың эгезинден сактып таныштырайн.

Хамык өглер бүдүүнүң хүнүндө-ле эки-бак эжик-ширтээн өөнүң өргөзин дүжүрүп, силгип кактааш, өгнүң ыжын аштап кааптар.

Өгнүң ыдык огун ужуулгаш, бажынга бүдүн ирт кудуруу шашкаш, сыртык бажы үзүкке тургускаш, мурнунга саң салып каар. А бурганныг өглер база-ла оозун аштап-чүлгүп, мурнунга дагыл-байлацын чөмнеп, өргүп каар. Чула, күжү үргүлчү хып турар.

Өгнүң ынаалар арты-бile долгандыр «челе» хериптер. Ол чөле дээрge аж чүнү ээрип турup кылган кулун, бызаа чөлөзи ийикпе, аны, хураган хөнезин өттүндүр кылган, ында чок-ла чүве чок: чөлениң савактары, хөнениң салбактары, согааш, бала, деспи, хуун, чүген, чулар дээш ыяштан чазап-даа каан, чүн удазындан аргып, баглап-даа каан. Бодап көөргө, ойнарактан өске чүү-даа эвес-ле хире. Биеэги доорамчыны уштуп, эргизи салып каан. Ол кежээ хамык уруглар аал артында дагдан бадар, үш чунгуунүң бажын доштап, ортузунда ойлу берген черлерин хар-бile дескилеп чамааш, ооң кырын база суг-бile шаптап доштап каан бис. Аал коданында төвөктээр, баг кагар, баг адар, ааттынып ойнаар черлерни дөгерезин аштаан — кылаа чүве.

Бир өгнүң ээзи лама кижи чүве, «бүдээл хураарым ол» деп, өрөгезин дуй тиртүп алган, коңга, дамбыразын чайып, быдыргайндыр номчуп олура хонган. Кырган улустар ынаар барып-ла турар чүве.

Хүндүс хой кадарып чорааш, дагдан харап көөрүмге, аал эжийинде Саң-Салыр деп тей кырында улус-ла шаарацайнып, чүвэле кылып турган. Кежээ чанып олура, таварып көөрүмге, база-ла солун: аразы он базым хире черде иийи талды тургускаш, оларның дэзүн хар оваалап тургаш, ыяк быжыглап каан. Ол ийиниң баарында эрги хоюткуну катап эде чыыш тургускаш, эң кырында улуг паш аксы хире калбак дашты салгаш, ооң кырында чарган кургаг ыяшибиле кажаа тудуп каан.

Ол кежээ оолдар бир өггө кажыктаан, кыстар бир өгдө даалылап, хорулдаан — мырыңай хөглүг. Мен ол-ла оюннарны көрүп, өглер аразынга салып турса, Чеди-Хаан эжик бажынга доораланып

келгенде, ынаар бүдүнгө хыйыжып чыда, удуп каап-тыр мен.

— Ойт, Аңгыр-оол! Тур, шымда, уйгу-хавы. Даشتыгаа барып, харга чунуп каавыт. Бо эртен эрттирип удуп болбас чоор! — деп, кожайымның бир эләэди оглу силгиди. Шынап-ла, өгде удаан кижи черле чок, дөгере-ле аъш-чем кылган турлар. Даشتыгаа үнүп кәәримге, даң караңгызы — сылдыс хевәэр.

Аалдың уруглары ынаар, чунгулаар дагда каттыржып, шимәәргей-дирлер ийин моң! Халып чеде бәәримге, чүм харда чунган кыстар эчигейләэн турлар. Бир өгнүң кадарчызы әжим оолдуң чанынга баргаш:

— Бо эртен чүге ыяап-ла эрте туруп чунар ужурлуг чүве ирги, әжиким? — дидим.

— Шагаада черле ындыг болгай. Ам удавас маңаа, бо душка — дәэш, демги Сан-Салыр кырынче айыткаш, — Эжен чаларап келир, аңаа уткуй барып тейләэр бис. Аңаа тейлевейн удуп калырга, бачыт-даа аривас, аксының кежии дудаар чүве-дир ийин. Билдин?

— Ой, әжен! Бис ону — бодун көөр бис бе ынчаш, әжим? — деп, дәэрде сылдыстарже көрүп, айтырдым.

— Дыка ыыттава! Эженини чүге кый дей бәәдин, дыңнап каар. Дүрген чунуп ал харын! — деп, әжим мени коргудуп кагды.

«Улус даады-ла “әжен-әжен” дижип чоруур боор, ол чүве-дир аа! Аңаа әки чалбарып көөр-дүр, аас-кежии-даа хайырлаар чадавас. Оода-ла кижи болган-на кижи базынмас, хырын даады тодуг чоруур кылдыр өршәэр болза» деп бодап, каарган даваны дег кара холумну доң харга, өрттөткөн дуюг куйгалаан чүве ышкаш, катап-катап дүрбәәш, арнымын изидир-ле чундум. Өттө кәәримге, күүйүм кадай от чырынга арнымын көргеш:

— А-че, күжүр Аңгырны! Арныбыстан өрт хып турар кылдыр дүрбүпкен ышкаш-тыр бис але — деп шынап-ла магадаан аянныг чугаалады.

— Черле ол хире бар боор. Хар безин изиңейнип турду — дидим.

— Ча, чоруулуңар! — деп, ол-ла аалдың шуптузунун агабаштыңы болур бистиң кожайывыс баштааш-ла, бир кижи тавакта чаа дүлген эът, бир кижи доңгуда изиг шай, бир кижи чалама туткан, демир-хүүректе көс салып алган, оозун туткан-даа кижи бар, ак эңчек-даа туткан, чажыча — тос-карак-даа туткан, тавакта артыш, чөкпек, саржаг холааш, туткан-даа кижи бар.

Улуглар баштаан Саң-Салырже шуужуптувус. Даң хаязы агарып келген. Баргаш демги ийи талдың баарынга энчектер чаткаш, хамық чөм дәэжизин ында салды. Талдарда өг санындан чаламаны херипти. Хоютку қырында туткан кажаа иштинче демги көстүг отту ургаш, кажааның азыгларының қырынга кончуг чаглыг чокпак ээгилерни, демги саржаглыг артышты салырга, магалыг чалбыыштыг — чаг одаг чайыцайнып-ла үнген. Аал баштың ашак доңгууда шайын чажыча-бile узуп чашпышаан:

— Өршээ, хайыракан!  
Чылан кежи чылбырады,  
Чыл бажы эртти,  
Бак чүве баады.  
Эки чүве, ээлди, хайыракан... —

дигиләэш, дивези-ле чок:

— Эът чиирден  
Хай-бак,  
Ханаа-думаа чайлап турзун!  
Оът чиирден  
Ыт-куш, эңмек сырынгы чайлап турзун!

Чамдык сөстерниң утказы-даа билдинмес, ойнап-шыннап тура-ры-даа билдинмес. Демги моорлап келген Эженни көрүксәэш, бүдүү одаг-саңың ыжынче көөрүмге-даа, сураг, алаңзып өөрүп-даа, коргуп-даа турар мен.

Чажыг чажып дооскан соонда, улуг-биче эр-херәжен — аал ишти дөгере бөрттеривис уштуп салгаш, чиге бурунгаар көрүнгеш, баштарывыс харга үзүп, тейлеп эгеледивис. Ол тейлеп турар үеде, кижи бүрү бүдүү иштинде сымыранып чугааланып турар болду. Мээн оң таламга турган кадайның чугаазының чамдыктары дыңналып турган:

Эжэн черинден келген  
Элчинин,  
Аза черинден келген  
Алдагжының  
Аъдының аксын чайладыңар,  
Аас-дылдан чайладыңар...

Ону дыңнааш, мен бодум хуумда демги чунуп тура, бодап алганым диләэмни сымыранып тур мен:

Эрген болганга базындырбаңар,  
Эдик-хептен элетеңеңер,  
Иштим-хырның аштатпаңар!..

«Оон-даа ыңай чүнү дилээр чоор?» деп боданып, сөстер тыппайн, хөй-ле бодалымга будулуп турумда-ла, хамык улузум ам дөө харда барган, бөргүн уштуп, моңдуруун борап кактаан, бүткүр боду харга аңдаштанып, кактанып эгелээн турлар. Ону барып өттүнүп, ойнап эгеледим.

Ол-ла кактанып, силгиттинген соонда, улус дөгере-ле чолукшуп, амыр-мендизин айтыржып эгеледи.

— Амыр-ла — дээш, бичии кижи ийи холун бурунгаар сунуп үзеш кылышын, улуг кижиниң ийи холунуң адаан дозуп салчыр. Дең эжи болза, кайы мурнааны-ла алдырыттан өрү чолугар. Черле улуургавас — биче сеткилдиг болур дээш, алдырыттан өрү чолукшуурун кижи бүрү оралдажыр. Ол чолугарда, аргалыг болза уштуктуг, чулдургууштук болза чогуур. Чеңин берзенип алган кижи болза, ыяап-ла кеткеш, чолугар.

Оон ыңай ол чолукшуурда, хүндүлээри улуг кижизине «ак чүве» сунуп чолугар ёзуулуг. «Ак чүве» дээрge кадак, дадаазын, оон ыңайлаарга, ээрип қаан чүнгэ чедер.

Улуг дүжүмет, лама чижектиг улуска улуг өртектиг кадак, даалымба, шай азы өлүк аймаа: киш, дииң, дилги, күзен чижектиг чүвелерни тудар.

Сумунун ҹанғы, хүндүлери, кожууннун ҹагырыкчы, мээреннери ол хүн амыраар-ла. Нојн, хүн дужаалдыглар мырыңай албан ёзугаар арбан, сумулап хавырып алыр чүве дижир.

Демги ол саң салып, Эженге тейлээр деп чүвениң ук тыптып келген үндезини болза бүгү ҹагырга иштинде албаты чон ол хүн Эжен хаанга албан өргүүрүнден тывылган чүве иргин. Өргөгө бүрүден ынча киш, ынча дииң дижип, хавырып ап турар «албан-үндүрүү» ол деп соонда билип алган мен.

Шыяата, ол-ла тейлеп, кактанып, чолукшуп алгаш, алга кээп база-ла чолукшуп, ағын-көгүн сунчуп, демги чашкан аъш-чемниң артыын ижип-чиp, эртенги чемни ижип эгелээн.

Мен сактырымга, бүгү-ле бодум чиигеп, хөрээм хозап, караам чырый берген ышкаш. Шынап-ла кижи ол-бо деп дорамчылаар кижи-даа чок.

Өг буруде тос-таңмаларда дойну быжыра берген. Келген улуска салыр шай, далган-тараа-даа белен. Кирген кижиини куруг үндүрер ужур-даа чок. Ыял-ла шайладыр.

Алды аалдың шагаазы аалывыстан эгелээр турган. Хамык аалдарның улуг-биче улузу айттыг, чадаг чыылгаш, бир аалче ырлыг-шоорлуг, каткы-чугаалыг шуужуптар. Барган-на аалынга өг санындан мурнай шайлааш, оон үнгеш, даштыгаа чуңгулап, төвектөп, ааттынып, хорулдап, даалылап, шыдыраалап ойнаар.

Ол-ла оюн аразында баштай бир өгнүң доюн чиир. Улуг-улуг кижилерге тавактарга, аныяктарга аяктарга болгаш чамдык бир бөлүк оолдарга бир деспиге салыптар. Ол келирге, ижин чаандан эгелеп доораан чүве төлээде, үс-чаг элегер-ле келир. Чаг чий албас кыстар суг ийи-үш дайнам-даа чедирбес, бажын чайып олурап. Чамдык ажылчын мөге-шыырак оолдар аразында маргыжып олургаш, чиир канчаар ону! Эъттен аңгы чүгле үс, чагны безин тавак ишти чедир арылдырыптар.

Оон кедерезе, кончуг эът, чаг чиир кайгал эрлер бүдүү чугаалажып алгаш, эки дой дооравас харам байларга «бардамнаар» чүве. Ол дээрge кайы-даа талага берге херек!

- 
- 1. Устунде номчаанызыс эгелерде чугаалап турар тыва улустуң байырлалдары болгаш ёзу-чаңчылдарының дугайында чүнү билип алдыңар? Амгы үеде оларны канчаар эрттирип турары-бile ылгалы бар-дыр бе азы чок бе, тайылбырлап чугаалаңар?
  - 2. Чөөн чүк улустарының, ооң иштинде тываларның, эрте-бурунгү үеде тывылган чыл санаашкынының дугайында чүнү билир сiler? Боттарыңарның чылышар кандыгыл, ол дириг амыттаның онзагай шынарларын адаңар.
  - 3. Бичии Аңгыр-оолдуң угаан-бодалының хевирлеттинеринге улусчу ёзу-чаңчылдарының, байырлалдарының, оюннарның ужур-дузазы кандыг болган деп бодаар сiler?
  - 4. «Мээн чылым» деп кыска чогаадыгдан бижиндер.
  - 5. Шагаа байырлалын сilerниң черинерде канчаар эрттирип турарының дугайында улустан айтырып, билип алган чүүлүцерни бижип, шинчилел ажылын чорудуңар.
  - 6. Дараазында сөстерниң утказын билип ап, ушта бижип алдыңар: *сай чаш, шавы, хелиң, эрээ, бурундук, албараан, күдүрээлиг пөш, авыралы, кош адыш, алаңғышыш, дагыыр, хөл-шыдыраа, мыйыс-шыдыраа, даалы, хорул, молдурук, бүцректиг даштар*.
-

## Пөш бажынга

Ававысты чоктааш, ала-чайгаар-ла сузу хадаан — куурагып, самдараан өөвүстү ачавыс, кырган-ававыс бар-ла шаа-бile хаара тудуп, ээлеп чорда, мун-не шыдажып, ийи-үш-даа чыл чурттадывысыла. А ачавыс ол-ла бажының суун ижип, ээдереп чорза-чорза, боду ышкаш өскүс ажы-төлдүг дулгүяк кадайга олуруп алган соонда, уязы бузулган күске оолдары дег, сандарал-ла эгелээн бис. Өвүрнүң малдыг байларынга өскүс кадарчы дээрге коданчы ыттың эниинден дудак чок. Биригээр чугаалаарга, кадарчы назынның өскүстерин доң эжик, дорамчылаан карак биеэк-ле манап турары билдингир. Олар харын аразында былаажып, адааргажып турарлар. Бак төрелдинг орнунга хары кижи дээре деп кырган-авамның чугаазының шынын дораан-на көре берген мен. «Төрел» деп сөске сылдалп алгаш, «канчалза-даа кара турам», «моон бажын мен билир мен» дээш, өскүстү бектиг кул, малының манаакайы<sup>1</sup>, паштың туткуужу кылып алганы ол. Дезип чоруй барза, хап туруп сүрүп эккелгеш, уламна кулдамыктап әдилээр. А хары кижээ эштенчилеп тургаш, дыка бергедеп келзе, дургуннап, дезип чоруй-даа барып болур-ла болгай.

Өөвүс бузулган соонда, үр-даа болбаанда, соңгу иемниң арнын безин көрбейн чорааш, ачамның дуңмазы, ары Амырак чурттуг Бараан-оол акым аалынга эккелген. Ары Амырак тараалац чер. Акым мени эккелген дээрезинде кээргеп, багай кежегемни кезип, ооң дөзүнде бузурларны кузум-бile ооккужамга чаап, тонумнуң орбактарын чамап, эрги-каксы идиктер артын селиштирип тургаш, идик улдуруп берип, шору-ла болган. Ол боду базала, Шевер-Сарыг акым ышкаш, чазаныр, даараныр кижи чүве. Ченгем-даа, «өскүс чүвениң кончуун дадайым» деп бажын чайып, таалайын таккыладып, мээн сан чок «байлаам» уруг-дарыгны углей бээринден коргуп, үнген-киргенге хөөрээн чүвези-ле ол. Ол ченгем чоок-кавыга ааспырак, орлан ады үнген берге кадайларның бирээзи-даа турган. Шору, аксынга өй малдыг-даа, ажы-төлү-даа хөй, ааткыштан кавай-даа дүшпес чурттап чораан улус.

Ынчангаш мен, сес-тос харлыг бодум, чугле «туткууш», «манаакай» эвес, а тараачын болгаш уруглар ажаакчызы мергежилдиң тос дерин тозалдырзын амзаан мен.

<sup>1</sup> Манаакай — мал кажаазының чоогунга эрги тон, алгы-кеш-бile кижизиг хоютку кылып каар, бөрү оон коргар; манаар дээн сөс (*автор*).

Ада-иеден чоокта чарылган, төрээн хеминден, өскүс акындуңмаларындан арт-сын ажыр ырап келген меңээ чаавайның чааккыры каттыжып кээрде, кандыг эрээ дээрзин ону ынчалдыр эдилевээн кижилерге билиндири чугаалаптары тоң-на берге. Ары, чыланның шагары, кызыл-даванче тенниң кадалыры, кышкы дүннүң алдан ажыг катап өрүмнээр чывары ышкаш дээр чүве бе, аяга шегелей аттырган аң-на.

Эки-даа ажылдап турзуңза, багай-даа ажылдап турзуңза: «Ой, мелегей, ой, дириг эТЬ! Ой, хугбай, ой, куурумчу» дээш, кулак амыраар эвес.

Чоорту-чоорту пат-ла шоюгуп, чаңчыгып калыр, мойнунга конгулуур баглап өөредип каан мал дег апаар чүве.

Ындыг ада-иениң ажы-төлү бэзин оларның ол дорамчылаар аажы-чаңынга өөренип, демги дорамчылатканче база ынчалдыр көөр, ынчалдыр аажылаар болу бээр.

Шынап-ла ынчап чорааш, өлү-даа берзе, негеп алыр чүве чок. Мен каш-даа удаа өлгеш, дирлип келгилээнимни черле утпас мен.

Амырактың Бестиг-Ажык деп бир чайлаанга аалывыс тайгалап үнүп келген. Изиг, ымыраадан аңгыжырап, чечекке үнүп келген малдың сүт-сааны-даа дораан-на элбээн, семирип туары-даа илдең. Чаңгыс өг бис. Бир эртен-не акым, ченгем долуп келген хойтпаан тип, арагазын ижип алгаш, чоогунда аалдарже арагалап чоруткан.

Эмиг уругну эмискиктең, кургаглап, кавайлап, өскелерин чүктеп, аргалап, шала элээдилерин көгүдүп, бызаа достуруп айбылап-даа туар мен. Өшкү, хойнун дүштекизин саап ыдыпкаш, судүн хайындырып, өремелеп кагдым.

Улузумнуң эзирииниң улуу дам барган, ырлаан-шоорлаан, ыйың-кыйың-на келдилер. Меңээ буруудай хона бээр чылдагаан муңнуг эвес, чүү-ле дээш, ченгем чыжырадып-ла үндү. Сүт хайындырар паш божудар дээш, доскаарда арбын арткан хөрөнгө кырынчे сүт күдүпкан ышкаш-тыр мен, оозун тип ижер дээргэ, сүт болбас чүве ийикпе. Ол орта хорадаан эзирик кадай чүгле аас-бите эвес, тараа хоорар былгааш-бите бажым орта дырт кылсырда, алгыра-ла берген мен. Ыяштың дегген чери дораан-на, хадың урузу дег, чоржая хонуп келген. Дең-дуң эзирик акым, база бир уруну немээр-даа дээн ышкаш, эзирик караа-бите менчэ өлерерти көргеш:

— Ча хувурай бер, доп-дораан молдургадан мунуп алгаш,

чоруп чор! Че, чуге тур сен! Чүү дидим! — дээрge, аңгадап, ыглап турган бодум, кырынче изиг божа чажыпкан эник ышкаш, эжикче хылырт-ла дээн мен.

Бир миннип кээримгэ, хем унунда ары-өвүр Амырактарныц аргыжар оруу-бile деспишаан шошкуп олур мен. Хая көрүнген, сүрген чүве-даа чок. «Мени сүрөр дизе, чүү боор, багда альтты мунупкаш, дап бээрge, кырымга кээр ол-ла» кылдыр бодааш, кончуг узун кызыл дыттар аразын өрү ыңай-ла болдум. Ол халып олурумда, аалывыс инектери бо-ла боттарындан бедик алангыштар аразында баштары көстүп, “эштип” чорлар.

Аңаа доктаай дүшкен, тыныш дээрge шапкан альт-ла, өкпем ажынчайып тур. Дагыр мыйызында бурундуун ораап кааным шартагар көк молдурга бо-ла малдырган аразында морзук дег шымнып чор. Ол орта хөй-хөй бодалдар сээк-маас дег мени долганып-ла келдилер: “...доп-дораан молдургадан мунуп алгаш, чоруп чор!” Ол менээ хорадааш, ойлатканы ол эвес, а болушкаш, “чеже-ле мынчап базындырып чоруур сен, чоруй бар” дээни ол-дур! А кайнаар чору дээнил? Кайнаар баар чувел, өвүрден өскээр, ачам, ха-дуцмамдан өскээр кайнаар баар ийик мен! Артында-ла молдурга мунуп ал дээн-дир. Ам бичии-даа озалдаан херекчок. Даарта элээреп кээр болза, катап-ла кижи холунга киргеним ол!»

Маң-бile барып малдырганы шөлүредир халып тургаш, көк морзуумну тудуп мунгаш, «сагыжымдан ыравастаан өвүр Амыраам кайы сен!» дээш, хаплаттым.

Кайда-чүде башта уру боор, кайда-чүде карак чажы боор, дээр көзүлбес эзим-аргалыг узун Амырактыц улуг оруу чырыткылыг, делгем чаагай апарган ышкаш, чызырадыр саяктадып олур мен о-о!

Молдургамны мунупсумза,  
Могачымга кире бээр мен.  
Казырамны мунупсумза,  
Кайгалымга кире бээр мен!

Ол-ла ырлап халдып олура көөрүмгэ, аалдан талыгыр ырап келген — Сайлыг-Хемни доора кешкеш, Узун-Озаңны орту кирип, Одаг-Шивиде кээп-тир мен. Элээн чоон алангыш сывы кымчым тавыланып доозулган, молдургам дылын орту киир уштупкан саяктап олур-ла.

«Ага, хөлчок дүңгүрлендир тодуп алган молдурганы мунган дораан, ол хире узак альт чарыжы черге албадап мунуптарга, бүгүле күжүн үзе чуткүпкен-дир» деп коргуп, миннип келдим.

Аалдан үнеримде, хүн дал дүйш, өгнүц аптара баарынга турган. А ам чүү хирел? Сыртык бажы эрткен азы молдургам-бите бистиң хөлегевис бодувустан база бир ынча хире бедий берген.

Ам-на молдурганы секпередип, оожум чортпушаан, мынчага чедир бодавайн чорааным оруктуң узунун бодап келдим: «Амырактың улуг арт кырынга чедир демги үнгеним Бестиг-Ажык дег — дөрт ол хире. А өрүлээн тудум, хем кызаалап, хөй сай-даш кежер, малгаш-шавыр, чудук, дазыл артаар, шапкын хемнер кежер, ооң кырындан арттың улуг дөжү дээрge багай альт ойта дүжүп, олуруптар чер-ле болгай!

Адыр, адыр. Элекке кортпа. Хүн ам-даа чайлыг-дыр. Чоннуң чоон оруунга кижи кайын өлүр...

Моон өрү Амырак иштинде чаңгыс-даа аал чок.

Адырам. Бестиг-Ажыктан дүйште айттанган кижи болза, артты ажып барып, өвүр Амырактың чайлагларында аалдарга чайлыг чеде-ле бээр. А альт болза чөлөр, даалыктаар-даа болгай. Ооң анаа кылажын безин мээн молдургам шошкуп четтес...

Хем иштинге чорумал улуска таваржыр ирги мен бе? Таварышса-даа, менээ эш болбас. Соомдан келген айттыг кижи мээн молдургам манап чоруур эвес, каапкаш баар, мурнумдан уткүй келген кижи чүгле каржып эртер. Харын кедерезе, мени ында бар чор деп аалымга барып сөглээр! Акым сергей берген олураг ийикпе, бичии-ле демгерей берген олурза, Чүгүрүк-Доруун мунупкаш, сүрүп шавар-ла! — кылдыр бодап кээримде, — мурнумдан уткүй келген кижиге, аргалыг-ла болза, көзүлбээни эки-дир» деп база-ла бир дүвүрээзин немештири тып алдым.

Ол-ла эңме-хаяажок бодалдарым аразында черле бодаар хөңнүм чок, ол хирезинде-ле, өжешкен чуве ышкаш, бо-ла каарып келир бодалым бар: «Хайыракан таваржып келзэ-ле, кончуг-дур!» Ооң биле кады адыг-мажаалай дугайында чугаа-соотту, Амырак иштинде адыгның кол-кол, чайлаш чок тураг, эрткен-дүшкен улуска бо-ла таваржыр, харын шаап кээп тураг черлерин шуптуузун билир мен. Ол черлер мурнумда — удавас барып эрткилээр-ле болгай мен!

Амырак хем ишти дээрge кайы-даа талазынче ужу-бажы-даа билдинмес, «чырта тыртпа шыргай арыг, чара какпа чалым хая»

деп болур. Ийи таладан дээрде шаштыккан түмен сыннаар чыгап чыдар хем-не болгай...

Аттыг-сураглыг, адыг таваржыр Хөлдүг-Хем аксынга кээримге, шынап-ла шыргай-даа, хооргал-даа мээц молдургамдан он-он катап улуг инек-даштарда шапкыланып, шаалаан-шиилээн ак көвүк хемде келдим-не. Чалгып чыткан шапкын хемниң даажы ол чүве, та чаңчап тураг адыгның хөрээ ол чүве, чүзү-даа билдинмес, динмирээр-ле чүве, ыңай-бээр-даа көрүнмейн, мурнумда улуг даштарны-ла оя-кыя тыртып кежиптим. Кудуруун көдүрүп алган молдургам ол-бо тендирип, күстүгэ дүжер чазып чорааш, ол чарыкы эрикче барып үндү. Хемден ырап, элээн ак черге келгеш, минниримге: «Өршээ, хайыракан! Суг-ла далай эртинелиг, үндүр чалгып каар боор оң!» — деп химиренип, ам-даа чалбараан чор мен. Кырган-авам бичии-ле шапкын суг кежерде, ынчаар чалбарыыр.

Аңаа бир бергени эрткенимге өөрүп, тыныжым хозады. Ээр-Чудуктуң улуг чайлаан эрттим — ээн. Қыйыг-Дыт аксы бир берге черни база-ла сири-кавы эртип алдым.

Оон өрүлээрге, хем кызаалаар, коргунчуг чер-ле долу, хем иштинде хүн чок, солагай талакы сыннаар хөрээнче талыйып чоктап-ла турагы хире-хире көзүлгүлээр. А хем ишти чүгле хөллегэ эвес, чоортула хоюп-шыгып, имиртиңеп-ле олураг. Дытчан-Аксы чайллагга кээримге, молдургам чыдыпты! Хүн ашкан. Шалың дүжүп тураг.

Молдургам чүгле чыдып алган эвес, уштуп алган дылы-бile кады ак көвүк шуураан, эгиштээри эгиш-даа эвес, бүткүр боду сирлеңнээр, изиргенген ыттан-даа дүрген тыныштаар, карактары өлергей. Ам бодап турагымга, ол-ла берт оруктарга сеткилим далажып, ийи будум-бile орбаландыр тепсенмишаан, ийи саарын элип-селип эрээдеп, хаш чүвүрлүг ужам-бile оорга дүгүн дедир — тазаргыже чула үзенчнеп, мырыңай-ла доңгая дүшкүже албадапканымны миннип келдим.

— А халак, хөөкүй молдургамны өлүр мунуп алганым ол-дур! — деп хомудап чугааланыпкаш, бодумнуң үнүмден база корга бээдим.

Ол өлүмзүреп чыткан молдургам-даа ышкаш, көңгүс-ле сирилеп, ыглаңнаар чүве! «Ах, бодум база өлгүже дырбаңнап алган кижи эвес мен бе?»

Ийи буттуң дэзүнгэ дээр даап алган хаш чүвүрүм болзадаа кештен сойган алгы-ла. А бүткүр бодум көк суг дериткен,

балдырларым сириңейнип турар, чараам кургаг-дыр ийин мон!

Чанымда сырғырааш кара сугну ээгип ижеримге — соок, экизи аажок. Арным чуна каапкаш, сугну долдур пактааш, кошадыжымга ускаш, молдургам бажынче эккеп кудуп, узун дылынче бүлгүреримге, чылганып чыдыр.

Ам бодаарымга, мынча ырак халыткаш, мынча хемни кешседаа, молдургамга бичии-даа суг пактатпаан-дыр мен. Бодум-даа чок.

Ол орта бодум буруум билингеш, чүгээр секпереп, молдургам бажынче суг шаптап-ла турагымга, чүгээр караа сегереп келген. А хем бажы — дөш аксы ам-даа талыгыр! Дыш айт-даа мунгаш халытса, караңы бетинде четпес.

Ах, ам бир кижи мурнумдан-даа таваржып келген болза! “Өршээп-азырап көр, акым, мени кагба! Маңаа кады хонуп алышылы. Даарта куду аалга баргаш, мени мында бар чор деп черле сөглеве!” деп чаннып, чалбарзымза деп бодангаш, ол бодалымга чем эреп, соңгаар-бурунгаар көрүп-ле тур мен.

Караңының далажып дүжүп олуарын мырыңай аайын тыппас мен. Менден бүгү-ле орукту дурген-не дуглап, чажырап дээнзиг. Сактырымга, үр-даа болбаан: сүт хөөредим четкен ирги бе. Молдургамны тургузу чедеримге, арай боорда тургаш, дижи кыжырап, эгиштевишаан тур. Ам көрген — балдырлары көңгүс-ле чин.

Халдырымга, төктүп чорааны ол чүвең иргин. «Ол харын эки-дир, оон башка шуут өлүп болур турган-дыр» деп чүгээр замыктанып бодандым. Чедерге, черле четкек билбес молдурга, бурундуундан тудуп алгаш, сүреримге, база дедир ээрлир. Ам канчаар, мунгаш чортарымга, багайтыр калгыыр. Эләэн чоон чудук артай албас. Хем иштинде кандыг чудук чок дээрил. Чок-ла болза ол чудуктуң бажын оюп, орук хажызында шырыштарже кирер апаар. Чамдызы ойдунмас, муңгаш болур ийикпе, мээн хүндүс безин коргар черлерим ол-ла болгай. Демги бодалдан ыравас энелер ындыг орук хажызынга чаштынып, кедеп чыдар. Ону көрбээчөнеп эрте бээрge, халып кээринден дидинмейн чыдып калгылаар. Бир эвес олче угландыр дап бээр ийикпе, көрүп кааш, сырбаш кыннып дезер болза, амырап шурап-ла келир дижир чугааны чежени дыңнаваан дээр.

«Оттүг болзумза! Хөлчөк улуг одагдан кыпсып үндүрүпкен болзумза! Чамдыкта даштарны дүне каккылаштырарга, от кызацайны бээр боор ийин. Хөй хаглыг болза, даштардан шаккылаштырып көрзе — деп, от үндүрүп алыр аргаларны дөгерезин бодадым: — Бир кургаг сырага чөлөндөр ушкан сыра ара ызырнып туруп алыр, дээр каяц турган үелерде, хат хадыырга, демги сыралар шалыжып шимчеп тураг болза, оон от үнгеш, эзим өрттенип болур» деп бир чугааны-даа бодадым.

Казырам тура-ла дүжер. Ол тура дүшкеш, мурнунда бир чүвени көрүп, оон корткаш-даа туруп алган ышкаш. Орук кыдыында шырыш аразында төш-ле бүрүзүн көөрүмгэ — адыг. Артында-ла кулактыг, шимчеп тураг, менче көрүп, «ам-на шимчезе, халый-ла берейн» дээнзиг, белеткени берген тураг. Ында-мында думчуу-даа шүш кынныр, будук-даа сый базар, даваны-даа дирт кынныр, черле мени долгандыр «адыг» көвүдээн. Көңгүс-ле чоруп чадааш, бир чоон пөш дөзүнгө дүштүм. Черге дүжүп кээримгэ, коргунчуу мырынай дам барган! Молдургам дораан-на чыда дүшкен, човууртады будукка баглай соп кааш, пөшче үндүм-не. Сактырымга, оон-моон маңнажып кээп, мени чандыр-соора ап тургулаан ышкаш, балдырым изицейнип-ле үндүм!

Пөштү орту эрттири үнгеш, элээн чоон будукту муна чоруй, оон адаанда будуктардан тептингеш, ам оожургап дыңнааладым. Пөштер баштары дүнеки салғынга түлүк-түлүк шыыгайнып тураг, хемниң ийи талазында бажы көзүлбес бедик сыннарның дам-дүм сомазы, кара хилиң дег, көстүр, оларның аразында ырак сылдыстарлыг дилиндек дээрни көөрге, хем иштинге, дагларга бодаарга, шору арыг, делгем-даа, чырык-даа. Ам топтап дыңнап олуурагымга, ол дүмбей арганың, өлүг кара сыннарның шыпшың деп чүвези черде чыткан кара даш-ла. Бажым ишти, ийи кулаам бүдүү дүүчейнип, кайда-ла бир черде отта өл кезек-даа мыжынайнып чытканзыг, оран-делегей дүвүнде хензиг дыңналыр шаң-кеңгиргэ-даа эдип турганзыг.

«Ол чул?» деп айтыргаш, топтап ылавылап олуурагымга, турупкан молдурганы албадап, бүткүр бодум дырбаңнааш, оон кырындан угаазырадыр корткан чүрээм согарга, хан-дамырым чарылгыже согары ынчалдыр дыңналып турары ол чүвең иргин...

Бир черде достак-чаак-даа эдер. Сылдыстарның көскүзү хөлчок. Бир сылдыс saat дег шөйүлдүр чүгүрүп баткаш, он таламда бедик кара сынның хөрээнче кире бээди. Олурган пөжүм дыңзыг салгын аайы-бите оожуунанып-даа тураг.

Ол-ла ынчап оожургап, чындырап олургаш, туттунуп олурган пөжүм унунга дирт кылдыр үскеш, сырбаш кылынган уум-бите салдынгаш, мырыңай хыл кырындан келдим. Час ойта дүжүп, шилиредип-ле бадар часканым ол. Ам кээп миннип, эде олуруп быжыгланган... Будук мунуп алган ужамның аарыры от-ла. Канчаар-даа кызып-кызып кичээниримге, уйгум келгеш, хоржок.

«Ажырбас-ажырбас, пөштен чайлырга, аарбас чүве боор, удууду» деп дүжүм мени мегелеп тураган. Бир чайылгаш, мырыңай-ла ийи балдырым-бите ытпакталгаш, салдынмайн барган, бажым куду халацайны берген. Миннип кээримге, эйт-бодумнуң көжүп шылааны, доңганым мырыңай хөлчок. Аарбас-ла черим чок. Диштер шаккыңайып тур. Чүвүрүмнүң тоскулаштыр дүрүп каан хончузун дүжүреримге, дөңмек ортузу безин четпес, чирик-чарык самдар чүве-ле болгай. Чолдак ченниг шокар-пөс быжындыларындан кожуп кылган хөйлең дорбаал боордан туржук, дери соогаш, улам хаарып олурап. Эрги самдараан пөс кур артыын өрүп каан, ону бодум курум боорга, кагбас дәэш-ле, куржанып чорааным ол боор мен. Бар-ла хеп аймаа эдилелим — ол үш. Курумну чешкеш, пөштүң уну-бите кады куржангаш, ийи холумнуң салаалар аразын ыяк чуктап-чуктап, пөштен куспактангаш, салааларымны дөзүнге киир маскай туттунуштуруп алрыымга, черле белен салдынмас болган. Хире-хире уйгум аразында мунган будуумда ужамны ийи балдыры-бите элип-селип, доңганымдан өл пөшту улам-на чыыра куспактап, хойгажып алган кырган-авам кылдыр дүжеп, «Мени эки куспакта, доңгарымны, шуглаавысты өрү тырт» деп улаарап, ыгламзырап чугааланганым шокар-шокар билгилээр мен.

Бир оттуп кээримге, дәэр эләэн чыраан, сылдыстар бичеләэн, кончуу сүргей, менче херээн кадыр сыннаар хөрээ тодарал келген, а эзим ишти, мээн пөжүм дөзү ам-даа караңгы, харын дүнезинден-даа коргунчуг ышкаш. Соогу дәэргө кижи шимчээр-даа аргажок! Чыткан ыт дег, бажымны ийи бут аразынче суккаш, дүрлүп дүрлүп алыхсаам келир. «Улуг дииң уязы болза, кире берзе! Салгын дыңзаан. Молдургамны барып куспактааш, чыдып алзымза, ооң

дүгү чылыг болдур ийин... Черже дүжерге, молдургам та бар, та чок. Дүжүм бе, чүзүл: дуне бир адыг молдургамны сөөртүп аппарып, чицгиске хөмгеш, ооң чанында манап чыдып албажыкпе. Ол хирезинде молдургам өлбээн, адыг чоруй баарга, туруп кээр дээш, мегеленип өлүүчеңнеп, бир караа-бile адыгже көрүп каап чыткан болгай. Чо-ок, чер чырыгыже, моон черле дүжүп болбас...

Бичии-ле шыдалп олурзумза, даң адып кээр оң, ам таанды кайын доңуп өлү бээр мен...

...Ах, халак-халак! Молдургамны хайыраканга өжегээр каап бергени ол-дур! — деп, чеңгем чанчаттына берген, оон корткаш, арыгже кире халырыымга, ийи будум тал будуунга кадалы берген, салбас! Бүдүү чаштынмышаан, буттарым адырып чыда, оттуп кээптири мен.

Па! Соңгу сын бажында хүн дээп келген, өрү көөрүмге, чырык-чаагайы-даа медээжок! Мырыңай чанымда пөштүң будуунда бөлүк чиг тооруктарда кээрген чаргырады алгырып олур ийин моң. Онула дүжеп чыткан боор мен. Долгандыр, куду көрген — кижи коргар чүве-даа чок. Пөжүмнүң дөзү, молдургам көзүлбес, селбер пөштүң будуктары дуглап турар. Пөште шарыттынган курумну чешкеш, шимченген: ооргам-даа ээлбес, балдырларым-даа ээлбес, ыргак будуктар дег, када-даа берген ышкаш, доңа-даа берген ышкаш! Бир будум дөзүндөн эгелээш, салааларынга чедир көңгүс билинмес, еске кижи-даа буду дег, шымчырыымга-даа аарбас, соок чүве. Артында-ла өңү безин көк.

«Ам бир бут чок, черге мынчап өлүрүм ол-дур» деп бодааш, коргуп, шимченип, будумну суйбап-нугааш, харын-даа доңган будум безин шору чылыгып келди. Чугле чаңгыс будум эвес, холдарым-даа шоолуг ээлбес, ыяшкa чөленип олурган хөрээм база чиктии сүргей: төжүм оорга сөөгүндө барып чыпшина бергензиг. Дыка үр нугуттунуп-нугуттунуп, арай боорда эглип, човууртавышаан дүжүп баттым.

Молдургам дириг, кегженип чыдыр. Черге базып кылаштаарымга, үр өеэдип чыдырда, тургузупкан хураган дег, тендириир чүве.

Көжүп, доңган кижи маңнаарга, эки чүве болгай. Сайны кежир атпаңгырлааш, ол чарыкта хүннээрек даг арнынчे углааш чоруптум. Сигенниң шалыңы-даа аажок, хорумнуг даштар баштап үнгеш,

менче уткуштур бадып олурган хүнгэ чеде бээдим. Шору чылыгып, эглип-даа келдим. Хүннүң чылынын канчаар ону. Куду хемче көөрүмгэ, хөлөгелиг, шалыңыг, соок, өнгөр кара чүве. Кырында кургаг чиңгистиг, таптыы кончуг шүүмек даш кырынга олуруп алгаш, хүнгэ хөрээм дөгеп, ооргам дөгеп эгеледим. Багай будум шымбай эки-даа болза, чиктий-ле сүргэй чымырткайнып, кеш алдында хөй кымысскаяктар маңажып турганзыг.

«Шыяата, удавас хем иштинге хүн дээп кээр, молдургам дыштаны берген. Ам таваар чортуп чорааш, бөгүн черле артты ажар боор мен» кылдыр бодап олурдум...

Өршээ-дадайым! Дер-бузум мыжыраан, оттуп кээп-тир мен. Хүн шагда-ла өрүлээн. Ол чарыкы сыннарда безин хөлөгө чок. Ыяш хөлөгези бодунуң унундан кыскалаан. Дүвү-далаш баткаш, молдургамга кээримгэ, чытпышаан.

— Че, шымда чоруулу, хүнгэ чылыккаш, эрттир удаан-дыр бис! — дээш, бурундуун чешкеш, тургузарымга, пат-ла боорда тургаш, херлир дээш серт кыннып, ооргазы хертейип баткаш, думчуу шүүш кылынгаш, бажын чайыпты. Ам көрген: тазарты мунуп алган оорга тeve мөгени-ле, ыжга берген! Ынчап барган оорганы «шык адыпкан» дижир, билир-ле болгай мен: дериткен шарының чонаан дораан сойбас чүве болгай. Ол хире ыжга берген — шык аткан ооргалыг айт, шарыга чүве чудуруп, мунуп болбас-ла болгай. Черле кандыг ыжыгыл дээш барып туда кааптарымда, хертеш кылынгаш, мырыңай өөз черге дээптер часты. Ол ыжыктың соонда-даа, мурнунда-даа олут чедер чер чок.

Ам канчаарыл?..

Бичии чедип шенеп көрген: хөрээ мырыңай ууттуунмас! Ийи холун какпа хап каан өрге-ле. Ат-ла болган мен! Мынчап турумда, акым бертен туруп келгеш: «Аңгыр-оол кайда баады? Чылгыда баады бе? Хойда баады бе?» — дээр.

Уруглары дыңнаап турган улус чүү боор: «Авам эттептерге, сен бодун: “Молдургадан мунгаш, чоруп чор!” дээриңгэ, үнэ-ле халаан!» дижир. Бир эвес кежээ инек кире бээргэ, бо молдурганы чоктаан болза, дораан-на айттангаш, сүрүп шавар. Ам халдып олур боор! А келиргэ, молдурга бо мындыг. Мени дедир-ле «ойладып бадырар» деп бодалдар меңэ дүүнгү кежээки коргуушкуннардан дора кыннып келген.

«Канчаайн-чоонуйн! Молдурганы маңаа салыпкаш, чадаг маңапсымза! Мону дораан адыг чип каар. А кым төлээрил? Чадаг чааскаан канчап чоруур мен? Мырыңай чанғыс кижээ чүү-даа таварышкай-ла...»

...Ол-ла чедип, сүрүп элеңнедип чорумда, кайда арт ажар боор. Дөш аксы чоокшулап чорумда, аанакайын, база-ла орай дүшкен. Арт кыры, сыннар бажының меңги харлары чоок көстүп, салгын дыңзыг, соогу эрте-ле илдең. Бо дүне пөш бажынга хонар болза, черле шыдашпас хире деп чүве сагыжымдан ыравастаан. «Молдурганы каапкаш, дүне-даа болза, артты кылаштап ажар чоор бе? Чок. Арттың улуг дөштө кылын пөш аразынга адыг ыялп-ла таваржыр. А арт кырының меңги хөртүүнге, ооң дүнеги соогунга чанагаш, кызыл-даван мен байтыгай, тоннуг кижи безин шыдавас». База-ла баш муңгаш. Каанаңгылаан. Доора оруқ хажызызынч-даа шоолуг көрүнмейн, элеңнедип чоруп-чоруп, бир-ле бөлүк пөштер аразынга кээримге, салгындан ыжык, чылыг-даа хире. Пөштерниң чоонунч үнгеш, дыка өрүлевейн, орту үезинде эки эптиг чоон будук диләэн, тывылбас. Ужамның хаварганы молдурга ооргазындан дудак чок, бөгүн кылаштап чадап чораанымны чугаалавас аргажок. Ооң кавынындан ийи бут бүү ыжып келген. Ынчангаш ам будук мунуп олурап кадык чер көңгүс.

Пөшке олурга, өрү-куду караңгы эзим өттүр көрүп олурапымга, бир-ле черде бөрү караа дег от кызаш кылынган — чүрээм палт кылышынды!

Ол чүү одул?! Аза оду бе, бөрү караа бе? Үгу ирги бе? Улам бедидир үнгеш, ол от уунче көрүп-ле олурапымга, хенертен хөлчок ыракта ужа берген күш чалгыны-даа ышкаш чалгыяк чалбыыш ылап-ла чырыткылаш кылышынды!

— Ылап-ла от! — деп дыкадыр чугаалай кааптым. Арным безин изиш диди. — Чорумал улус хонуп чыдыр эвес ыйнаан?! Өршээ, хайыракан! Аксым кежии таварышкан чадавас...

— Ойт! База ол-ла черинде кызаш диди! Ой өршээ, от-тур! Амырадым, амырадым! Ам ацаа канчап чедерил чээ! — деп сымыранып ырлай аарак улаштырган олур мен.

«Дыка ыыттава! Чүү-даа боорун канчап билир. Орукта эвес, сайның ол чарыында муңгаш кыйыгда от-тур. Молдурганы ынаар сокса-даа барбас, орук-даа чок. Медээжок дааш үндүрер, хай-ла

болганы ол» деп бодумну сургавышаан дүжүп баттым. Черге дүжүп келген, каракты шимген чүве-бите дөмей-ле. Ам черле коргунчуг эвес чер кайдал? Баштай орукту будум-бите эскерип, ийи холум-бите бурунгаар сунмушаан чоруптум. Хөлчок оожум дыңнаалап чоруп олура, бир сай кежер черге буттарым орук танываастаан. Мурнунда чоруп турганымны дөзевилеп, сүмелеп чоруп-ла олур мен. Өг дег улуг даштар, ос-даа таваржып кээр. Барык-ла дөрт даваннап, үңгеп, сүйбап-ла чоруп олурумда, думчуумга ыш-даа чыды келди ышкаш.

— Өршээ, хайыракан! — деп бир чалбардым. Оруум читкен. Ол чарык шырышка келген, муңгаш. Арыгга чоруп чадааш, онгул-чиңгил сайны өрү даштар бажы даянып, үңгеп чоктадым. Улуг даштар алдында суг-даа кингирээр.

Ага, дужумда арыг иштинде отту! Чоон-чоон ыяштар уннарының ындында одаг эләэн кызып көстүп келгеш, ажытталы бәэди.

Кижи бар-дыр! Хөлчок оожум чоокшулат, тыныш безин кыскалап кедеп бар чор мен... Бир чөчек кара кижи отту менден дүй олуруп алган, ыаш салып, одап олурап. Пөш баарында одаг. Пөштүң уну чырыткылацайнып, имиртилеңнеп көстүп туар.

«Дадайым, чүү улус ирги?.. Чүү-даа улус болза, бо отка барбас ужур-даа чок». Мырыңай он беш базым. Оожум чугаалажып, шай аартап олурлар. Бирээзи чоон үннүг ашак кижи. Бирээзиниң үнү оожум. Отче бичии будуктар кааптарга, оранчок чырып келди. Чеде кылаштап олурумда, оттуң ындында менче удур олурганы кижи мени көре тыртып кааш, серт кыннып:

— Ойт! — дей каапкаш, аяан черже көрбейн-даа ийлендир салбыشاан, чанында пөшче бүдүү ийленип бар чор. А бетинде кижи әжиниң арнындан билип каан боор, менче дурген хая көрүнмушаан, оң холу ооргазында-ла баады...

— Бо чүү амытан сен? — дээрge, сырбаш кылышындым. Ол аразында ангадап, аазадып турган бодум:

— Мен-дир мен, акыларым! — деп медээжок сирилээш үн-бите харыыладым...

— Чанагаш уруг-ла-дыр... Чүү мындыг кижи сен, бээр кылашта! — деп, ындында кижи пөште чөлөп каан боону алышын соксап, ылавылап көрбүшаан, сезиктии сүргей кайгап чугаалады.

— Чүү мындыг төл боор!.. — деп, бетинде кижи тура халып келгеш, ушта соп келген улуг бижээн ооргазынче чажыра тудуп тур.

- От кыдышынга кылаштап кээримге:
- Өөрүң кайдал? Кайын келдиң? — диди.
  - Өөрүм чок... Дөө ол чарыктан келдим.
  - Па... өөрүм чок деп чүү дээриң ол?..
  - Ол чарык деп, кайы ол чарыгыл? — деп, ийи кижи улайлай, менээ бүзүрвээн-даа ышкаш, элдепсинип бот-боттарының арнынчे көржүп айтырдылар.
  - Мында, бо сай ындында мунуп чораан молдургам турупкан, баглап кааш, от көргеш, келдим. Чааскаан чораан кижи мен...
  - Оммани патни хом! Орта төл бе?
  - Аскан кижи эвеспе бо?
  - Аалың кайдал? Кымның оглу сен?
  - Аалым бе?.. Аалым куду, Бестиг-Ажыкта... ачам ады Шумураш-ла дээр...
  - Ол чүңүл? Бестиг-Ажыкта чүү Шумураш бар ийик? Чоп мегелеп турагың ол?!
  - Бо черле анаа эвес, албаараан төл ышкаш. Аараан кижи бе? Арнын көрден — деп, бирээзи бижээн хыннап алгаш, одун барып чырыда бээди. Мен отка дөгеленгеш, сиринейнип турарымны ам миннип кааш, арай кедээр туруп:
  - Бестиг-Ажыкта акым Бараан-оолдуң аалы-дыр. Ачам Өвүрде кижи... олче бар чыдарым ол-дур ийин... — деп, үнүм дөмей-ле сирилээш, кызып-кызып туттунуп чугааладым.
  - Карак-ла бо ыйнаан! Бо Бараан-оолдуң өөнде чоруур өскүс дуңмазы ышкаш чүл моң, ашак! Орта-даа чүве бе? Па-а-а!
  - Ол-дур, ам-на танып кагдым. Адазы Өвүрде, база бир кадай алган болбас ийикпе aan!
  - А кажан үнгениң ол боор? Чүгэе чааскаан үнгениң ол, күжүр оглукум? — деп, демги мурнай көрүп каан ашак чырып келген от кыдышынчे олуруп алырга, танып кагдым. Арыда Чарык-Чаак ашак болду.
  - Илдең-дир, анаа кайын үнер ийик, хөөкүй эр дургуннапкан болгай aan — деп, база-ла Чаактың кожазы кара салдыг Тойлу ашак улаштыр чугаалады. Ам ашактарны танып кааш, чүве чугаалаайн дээrimge, бак чаяанныг, боостаам дуглалып, хаайым ишти ажааш, мегелеп ыжыккан кижи бооп, караам чодуп, ышкып, холдарым биле оттан арным хөлөгелеп тура, арай боорда:

— Чок, дургуннаваан мен... Акым боду-ла «молдургадан мунуп алгаш, ык... чоруп... чоруй... чана бер» дээр кижи чорду.

— Илдец-дир... Бертен үнгениц ол бе?

— Ык... ийе, эртен үндүм... — деп дүүн үнгеш, черге бир хонганымны сөглевес дээш, ашак улусту мегелепкеш, ыяды бээдим.

— Бо таңды-сын ажыр мындыг чаш амытанны молдурга мундургаш, салыптар — тенек аарый бербээн бе ол! Шигжей-язы! — деп, Тойлу ашак хавын идииниц хончузунга чырс кылдыр каккаш, таакпы тиге бээди.

— А күш-хүнезин берди бе? Эдик-хевин чүл, оглум? — деп, Чарык-Чаак ашак улуг от чанында көстели берген үш даш ожукче хола пажын салбышаан айтырды.

— Хүнезин-даа бербеди. Хевим бо-ла — дээш, өл хейлец, чувут рүм суйбагыладым.

— Ол-ла болгай. Чүнү бээр чүве-ээл деп орган чүйүк мен. Көр даан бо кижини... Арын-шырайын. Албыс, шулбус ышкаш... Часкы чалгынындан дээрэдээр чүве бе? Мен бо дүктүг шээжимектиг шыырныгып олур мен! — деп, Тойлу, эжинге-даа хорадаан ышкаш, алгырыг чугаалады.

— Олур-олур, отка дөгелен, оглум! — дээш, Чарык-Чаак чанында эзер кырындан ой тон ап: — Ма, мону эштивит шымда! — дээш, бир хола паш алгаш, ынаар-ла караңгыже кылаштап кирген соонда, суг узуп эккеп, база бир пашты кош ожукка салыпты...

... Этъ чип, мүннеп, шайлап алган, уйгу кээп, ожаарап олурумда:

— Ам даарта ушкажып баткаш, сээн ол акын-бile таптыг чугаалажып көрээли шиве! — деп, Чаак ашак бо ыйнаан. Ооргамче соок суг кудупкан ышкаш апаады.

— Чок-чок! Мен ам соп каайн дизе-даа, ынаар черле батпас мен. Акым мени сүрүп келзе-даа, черле бербенцер, акыларым! Арт ам бо-ла болгай. Чадаг-даа мацнап ажа бээр мен. Шак бо молдурганы дедир ойладып бадыра баар кижи болза! — деп база-ла үнүм баксырап эгеледи.

— Адыр-адыр. Шынап-ла бо хире дөгүп келген кижини дедир чоруткан хөрээ чүү боор. А ол мацаа сүрүп келзе, харын бир таптыг чугаалашкаш салгай бис. Ооц молдургазынга сагыш човааш чоор сен. Кижи эвес-тир ол! — деп, Тойлу ашак база-ла шырайында булут тыртып, бүргеп кээрge, амырааш:

— Бужар молдурга-дыр. Аараан боор. Ону сөөртпээн болзумза, бөгүн чадаг маңнап ажа бээр ийик мен — дидим.

— Бо аразынга хүннеш келир база-ла шыдамык молдурга турган-дыр ийин. Бодавыже, одардан тудуп мунган, тодуг чуве турган чуйүк — деп, Тойлу ону безин эндеведи.

— Шынап шыырак келген-дир. Чогум молдурга чуве бе, казыра чуве бе ооң, оглум?

— Ийи харлап чоруур — бурунгу чылын күскээр төрээн бызаа чуве.

— Барык-ла энир чылгы дүктүг-өек ышкаждыл. Харын-даа ырак кээп-тир. Кырган инек бызаазы турган боор...

— А оовусту бо дүне «иревис» хөөп албас боор аа? — деп, Чаак ашак мени бир хая көрүндүрдү.

— Ча, хөөп-даа алза чоор силер, Бараан-оолдуң каражазынна дуглаар ыйнаан. Кижи чипкен эвес, мал эъди чипкен адиг амдажыvas чоор... Адырам. Өвүр Амырактың чоокта аал бажы кайдал бо? — деп, Тойлу ашак ол сөөлгү килецин балаар дээн ышкаш, чазык айтырды.

— Черле дыңнаваан мен... — деп, эжи харыылады.

— Чорушкан улустуң чугаазы Кидистиг-Белдирде аал бар дижир чорду — деп, мен харыыладым.

— О, ынчаарга ырак эвес-тир!.. Чо, удуул алгаш, эртен таптыг сүмележир бис. Илден-дир — дээш, Тойлу ашак чиик адак тура халааш, ыңай кылаштап чоруй баады. Оон кээп:

— Өлтүр тын чок кайгалыңны, дөө чадып каан алгың өңү кеве берген, дүгү хаг-ла. Ооң бир ужун дөжээш, бир ужу-били шуглас каап көрем — деп сүмеледи.

Мыйгак кежи эжингеш, ашактарның чанынга караңгы пөштер дөзүнгө чыдарга, «база бир аас-кежий ол» кылдыр бодап келдим...

— Ча, көрдүң бе... кайгал, мынчага чедир сээн адың безин айтырбаан-дыр бис але, адың кым ийик мон, оглум? — деп, Тойлу ирей эптештири чыдып алгаш, эгеледи.

— Аңгыр-оол-ла...

— Охалай. Аңгыр-оол... Аңгыр-оол. Көрдүң бе, Аңгыр. Эртен бо ашак-били бис эртежик барып, одар көргеш кээр бис. Сен бис-били кады турбайн, удааш, хүн үнүп кээрге, таваар бичии пашка шайдан, улуг пашка дөө аскан эйт чанында белен кезип каан эйт

бар, оон дүлүп олуарар сен. Чорууруң бис кээривиске, чугаалажыр бис. Ооң бетинде чоруп болбас, билдиң бе?

— Чая. А молдургамны маңаа эккеп алзымза, ажырбас боор аа? — деп ону эртежик оруктан чайладырын бодап айттырды.

— Ажырбас-ажырбас. Эккеп ал харын. Доңмас хире болзуңца, мыя мында — куду оймакта өртеп каан ийи айт бар, эккеп баглан болур.

— Че, турза-даа, ажырбас аъттар ийин ол — деп, бирээзи чугаалады...

...Эъттеп, шайлап алганывыс соонда, Тойлу ашак:

— Ча, оолдар, ону сөөртүп бадыра кээп, союп, кевире азып кааш, бо эрни арт кырынче дөгүдүп каар бис бе?

— Ынчаар-дыр харын.

«Өршээ, хайыракан! Ам-на Өвүрге четтим-не! Бо хире кончуг мерген аңчы ашактарга үдettiriip каан кижи черле каяа торлур мен! Акым суруп келзе-даа, болар дүне чүү дижиктер» деп, өрү тейлеп-ле тур мен.

Сынынның чап-чаа ойган мыйызын-даа көрдүм. Оон бодун-даа кончуг кадырны куду чууктажып, сөөртүжүп бадырыштым. Шай хайындым хиреде-ле союп, бузуп аскаш, чилиглеп тура, ийи аңчым тоолда маадырлар-ла олчаан!

Адак сөөлүнде ийи аңчым мээн молдургамны шинчип көрүп-көрүп:

— Хөрээ бузулбаан, эъди бусту берген-дир. А ооргазының ыжысы сенип бар чыдар ышкаждыл. Арт кырынга үндүр сывыра берзивиссе, дериткеш, эъдинин бузуу часты бээр он.

— Ам-на соодуу четчиp орар-дыр — дижип, мактавышаан эзертенгилээш, таалыңга эът-даа суп алдылар. Бирээзиниң боозун безин эът чанында пөшке азып кагдылар. Чаак аңчы мени семис кула аъдынга ушкaryп алган.

Ол хире калбак ооргалыг аътка безин олуарымга, хаварык черим карак-ла! Ону аңчыларымга билдирбес дээш, будүү ызырнып, ол-бо балдырларымче солуп-ла чордум.

Амырак артының улуг оваазынга үнүп келгеш:

— Дүже халааш, казыраң тудуп ал шымда! — диди.

Ашактар оваага дүжүп, бирээзи саадаандан бичии ак пөс кескиндизи баглааш, бирээзи аъдынның ыдык челинден әлээн хыл кезип баглааш, айыс ап тейлээш, таакпылай бээдилер.

Мен ашактарны өттүнүп тейлээр дээш арай-ла дидинмейн көрүп турумда, Тойлу ирем эскерип каан:

— Ой, оглум, дөө чыткан кара-хаактар аразында чингир көк — артыш деп чүве-дир. Ма, бо бижек-бile бир тудумдан кезе шаап экkel. Даш хаптың, холуң хаптың. Бо оваага өргээш, тейлээр сен! — диди.

Хөлчок амырап, маң-бile барып демги сыын мыйызы дег хөй адыр дөстү кезип, агжайты көдүрүп эккелдим.

— Охалай. Овааның кырынче хат дүжүр шаппас кылдыр быжыглааш, бис дег кылдыр тейле. Улуг арт ашкан кижи тейлээр чоор. Оран-тандың авыралында бак чүвеге таварышпайн, менди чорааның көр! — деп, улуг аңчым сургады.

Амырап тейледим. Шынап-ла, овааның ыяштарында чеже кадак, чеже пөс баглаваан дээр ону! Хат, чаашкынга онуп, бүдүү агарып, мырыңай савалып элээни кандыг-ла бир кырган өгбениң кажараара берген бажының дүгү-даа ышкаш, ында чем дээжизи: арага, быштак, тараа, хемдээн сөөк база эзмежок...

— Ча, Аңгыр. Ам черле ажырбас сен. Бир бергени эрткениң ол. Бо улуг орукту черле часпа. Аксың кежиктиг чаш-тыр сен! Бис мынаар Ак-Адырда аалдар бар болза, бичии эът-уytt аппарып берип, дус дилеп албышаан, бараан-сараан харап чортаалы, оглум — дидилер.

Ах, ол душта ийи аңчымны көөрүмгэ... чугаалап четпес чоок, төрел мындыг ашактар кайда чогул! Олар шупту мээн эц-не ээрек-баарак адаларым, мерген угаанныг орук баштакчыларым, карак-кулаам, шак бо чыткан ары-өвүр Амырактар баштары ыдык мөөрүктөр-бile дөмөй улуг, күштүг, харын-даа, бо синнар дег, соок, ыйт чок, ырак эвес, холу чылыг, сөзү чымчак, баары эриг — ёзуулугла «бурганнарым» бо-дур ийин. «Болар чорда, кижи каяа-даа кайын ажырар» кылдыр бодап, олардан чарлыр хөөн чок... базала, аанакайын, боскум ишти дугланып, ишти-баарым дүрлүп, үнүм үнмestээш, чадаарда дөмөй хүлүмзүрээн кижи өттүнеримге, ийи караам дамырак кара сугларын, эц-не экииргээн чувези ол ышкаш, салып-ла бадырды!

Бир-тээ туттунуп чадааш, салдына берген чүве төлээде, ам чажыртынар чүү боор, ыглавышаан чугааладым:

— Өөрээнимде ындыг карактар чүве бо. Силерниң авыралындарны черле кажан-даа утпас мен, ақыларым!.. Акым бо мынчаар таваржып келзе, мени бурунгу хүн-не... дүүн-не арлы берген дээр силер. Силер ам-даа аңынг-менцнег — олчалыг чоруцар!.. — дээш, каттырарын оралдажырымга, ооң орнуунга үш-дөрт улай қавындыланган улуг тынышкын аттыга хона бээрge, хөрээм хозаш-ла кылынды.

— Ах, күжүр эрниң хөрээ шыдашпаан-дыр! Ол-ла болгай харын, чаш-даа болза, хөрээн сөглөп турганын — уткалын көрдүүц бе! Кижи боору чажындан... Кымдан артык дадыккан эр болур, көөр-даа сен! — дээш, Тойлу ашак тура халып кээп, бажымны чыт-тааш: — Ам-на хөрээн ажыдып алдың ышкаш. Мындыг эки карак чажын кижи болганга көргүспе. Ам ырлап-ырлап хап олур че! Эки ырлар ырлаар херек, кайгал! — дээш, мени көдүргеш, казырам қырынга салыптарга, ол-ла сөстер, ол көдүрген холдарның чылтыы чүрээмде мөңгө артып калган.

«Күжүр өвүр Амыраам кайы сен!» кылдыр молдургам хертең-неди саяктап ыңдай болду.

Ах, өвүр сыннарының баштары дүдүскек аразында бүлүртүүң көстүп кээрге, бүткүр бодум эстип, бир таптыг уярап, «кижи болганга көргүспес» эки чаштарны сула салып алган ийик мен!

- 
1. «Пөш бажынга» деп әгени номчааш, аал-чуртунче дезип чаныпкан өскүс оолдуң аажы-чаңының кандыг шынарларын онзалап демдеглеп болур-дур?
2. Тойлу биле Чарык-Чаак аңчыларның дугайында чүнү чугаалап болур силер?
3. Молдурганың овур-хевирин тайылбырлап, тыва кижиниң малы-билие харылзаазының кайы хире ханызын чугаалаңар.
4. «Кижи — оран төлү» деп темага бичии чогаадыгдан бижицер.
5. Чогаалда кирген ары болгаш өвүр Амырак азы херек қырында адь-билие ары болгаш өвүр Торгалыг дээр башташкак ийи хемниң кайда ағып чыдарын Тываның картазындан тодараткаш, Ангыр-оолдуң ары Торгалыгны өрүлдүр артчэ оруун эдерти корүцер.
6. «Ангыр-оол молдургазы-билие» азы «Ангыр-оол пөш бажында» деп темаларга чуруктан чуруцар.
-



## Байкара Дамчаевич ХӨВЕҢМЕЙ

(1915—1972)

### Чүү болгандыл?

Өөредилге чыллы доосту бергенде, Хөлчүк-Бажы школазының сески классчызы Монгуш-оол Кызыл хоорайга, акызының бажыңынга турар дээш, чедип келген. Акызының квартиразы хоорайның үстүү чарында ийи-ийи каът дөмей бажыңнарның бирээзиниң ийиги каъдында.

Бир-ле кааң хүндүс кудумчу талазында улуг өрээлдиң соңгазын ажыдып алгаш, кудумчуну өрүкүдү маңнашкан кызыл-ала, ногаан-ала автобустарны, янзы-буруу чарааш чычааннарны сонуургап каап, «Аңгыр-оолдуң тоожузун» номчуп олурган. Бир бөлүктүү номчуп дооскаш, дашкаар көрүп олурага, хөлзээзиннинг кудумчунуң ындыы чарында шыкта ак-көк платьелиг бир-ле аныяк уруг черде бир-ле чүве дилегзинип, ыңай-бәэр базып турарын Монгуш-оол эскерип каан. Ол ургунун бир-ле чүве чидиргени чөрле илден. Көрүп олурага, ол уруг чунудаа тыппайн, багаай базып чорупкан.

Ыңчап олура, ченгезиниң кухнядан чедип келгенин эскербээн.

— Ам база номчуттунгаш олуруп алдың бе, оол? — дээн ченгезиниң шириин сөстери ону сырбаш кылдыр сүртедипкен.

— Бо номнуң солуну аажок боорга, көрүп олур мен, ченгей — деп чугаалааш, оол туруп кээп-тир.

Ченгезин көөрге, куу-шокар хылыргай чуга тонун кедип, эрниң кызыдыр будуттунуп, арның кууартыр чагдынып алган турган.

— Беш шак четкелек турда, уруглар садында дуңманын эккээр сен. Шак эрттири номчуттунуп кааптың халак, оол. Ногаан сакпында мүн барын, акың кээргэ, чугаалаар сен. Электри плитазынга чүве чылыгтпас сен, бо айда эмин эрттири кыпсып каапкан-дыр силер.

Хлебтен садып аар сен, стол кырында көпектер салып каан мен.

— Чая, чеңгей — деп, оол чугаалааш, номун уламчылаарынга белеткени берген.

— Ном номчааш, эрттири олуруп кааптың халак, оол — деп, чеңгези ыыткыр катаптааш, долан-далаң кылдыр базып үнүпкен.

Монгуш-оол улуг тынгаш, «кижини дүлей чүве ышкаш алғырып чугаалаар, чеңгем дыка-ла каржы кижи-дирим» деп бодап артып калган.

Шынап-ла, Монгуш-оол ном номчуурунга дыка-ла ынак. Номчуй бергенде, кулаанга безин чүве дыңналбастай бергензиг апаар. База бир бөлүктү номчааш, ында бижээн коргунчуг-даа болуушкуннарның дугайын катап боданып, соңгаже көрүп олур, хлеб садар шагы чеде бергенин сактып каан.

Номунуң чедир номчаан чериниң бир саазынының азыын сый тудуп салып кааш, кухняга чеде берген. Стол кырында чыткан чес көпектерни санап көөрге, он алды-ла көпек бооп-тур. Оол ону алгаш, кудумчуга үнүп келген.

Ишкәэр шыкчө оол көргеш, демги уругнуң дилегзинип базып турганын сактып кәэп-тир. Чүнү дилеп турган уруг боор дээш, ооң кылаштап турган черинге чеде бергеш, ыңай-бээр дилегзинип көргүллээн, чүве-даа көзүлбес. Ол-ла ынчап базып тургаш, сиғен аразында бир-ле чүве кылаш кынганын көрүп каан. Топтап көөрге, бичии төгерик алдын шак болган. Шакты сонуургап, холунга баглап алгаш, кезек боданып турган: «Чүү-ле уругнуң шагы ирги? Хөөкүй дыка-ла хомудаан боор. Чедирип бээр дээргэ, ону кижи таныыр эввес. Канчаар чоор?» Шакты билектен чежип, кармактап алган. Ол уруг катап чедип кээр ирги бе дээш элээн манагзынып, ыңай-бээр кылаштагылаан-даа. Элээн үр болу бергенин эскерип кааш, далажы берген. Хлеб садарын озалдадып кагзымза, чеңгем база чемелээр ийнен дээш, дурген-дурген базып чорупкан. Ол чорааш, шакты канчаарын дыка-ла боданып, ак-көк платьелиг уругну кудумчугадаа, садыгга-даа көрзүнүп чораан.

Улугларның чугаазынга дыңнангыр бооп чаңчыккан Монгуш-оол чеңгезиниң чагыгларын ол хевээр күүседип каап-тыр.

Кежээ акызы, чеңгези чедип кээргэ:

— Шагдаа чери кайдал? — деп айтырган.

— Канчаарың ол? — деп, акызы айтырага:

- Херек бар апарды — деп, оол харыбылаан.
- Кандыг херектиг апардың? — деп, чөңгези үзе кирип айтырган.

Монгуш-оол шактың дугайын чугаалаваза-даа, чөңгезиниң ону ыяап-ла сөглөттириерин бодааш, чугаалапкан:

- Бир уруг шагын чидирген-дир.
- Ол меңээ хамаан бе. Азы ол шакты тып алдың бе? — деп, чөңгези сиңгигип-ле кээп-тир.

Оол-даа чөңгезиниң ыйыдарынга шыдашпайн, карманындан шакты уштуп келген.

— Каям — дээш, чөңгези шакты оолдуң холундан барык-ла ушта тыртып алган. — Мону шагдаа черинге дужаарың ол бе? Орук олчазын ынчанмас чоор. Кымга-даа чугаалава.

- Ынчап... — деп, акызы бир-ле чүве чугаалаксаан.
- Ынчап-анчап деп чүңүл — дээш, ашаанга чүве-даа чугаалаттырбайн, шакты шкавының хааржаанче супкан.

Бир катап угбазы магазиннеп чорааш, чөэрби беш тудуш рубль чидириптерге, ону авазының хүннү бадыр, кежээ дургу кончуп келгенин сагынгаш, ак-көк платьелиг уругнуң авазы база-ла ынчаар уруун кончуп тур боор деп-даа бодап, ачазы черден фотоаппарат тып алгаш, ону шагдаа черинге чедирип бергенин-даа сактып, хөйлө чүве боданып кежээлээн.

Эртен шайлап олурал:

- Ол уругнуң шагын, хөөкүйнү аа, чөңгей — деп, Монгуш-оол шыдашпайн диттип чугаалаан.
- Ол дугайында чүнү-даа ыттава дижик мен — дээш, чөңгези караан чидидир көрнүрге, Монгуш-оол чүнү-даа чугаалавайн барган.

\* \* \*

Шагдааның начальниги бир шагдаа кыйгырып келгеш:

- Дүүнгү уругну утпаан боор сен аа, шагын чидирген уругну? — деп айтырган.
- Кайын уттур ийик мен. Студент уруг-ла болгай — деп, шагдаа харыбылаан.
- Ынчаарга мындыг-дыр, эш Васильев, бо оол шак тып алгандыр. Ону хүлээп алгаш, ол уругже телефоннап дыңнат — дээш, Монгуш-оолду шагдаага начальник таныштырган.

Васильев шакты топтап көргеш, мынча дээн:

— Ол уругнуц чугаалааны-ла хевээр-дир.

Оолдуц фамилиязын, адын, харын, өөренип турар школазын, Кызылда турар бажыңын шагдаа айтырып алгаш:

— Эрес эр-дир сен, четтиридивис — дээш, Монгуш-оолдуц холун шагдаа туткан.

Монгуш-оол чанып чоруп ора, «Менден элээн хөй чувө айтыргаш, бижип алыр, ону чоор улус боор» деп боданган. «Үүлгеткен хэрээн» бодааш, Монгуш-оол бирде чоргаарланып-даа, бирде сестрип-даа чоруп орган. Ынчалза-даа хөректе аар чүве чок, боду чиих чүве дег апарган. «Акшам чок эвес, автобус-бile чана берейн адырам» деп бодал чораан...

Эртэнгиниц сес шакта чоруур автобустуц биледин садып алгаш кээрge, акызы салын чулээн, а ченгези кухняда чөм кылып турган.

Эжикте чиндэг үннүг кижи чөвшээрел айтырза-ла, Монгуш-оол көөрge, ак-көк платьелиг аныяк уруг кирип кээп-тир. Монгуш-оолдуц арны изиш дээн.

— Монгуш-оол Ондар мында чурттап турар ирги бе? — деп, ол уруг айтырган.

«Билбайн турда, чоруптар деп бодаан кижи болгай мен. Хамык чүвени сандараадыры ол-дур аа моон» деп, Монгуш-оол бодааш, аймаарай берген турган.

— Мында ийин. Канчаарыңар ол? — деп, акызы айтырарга:

— Ол-ла-дыр, чүү болган? — деп, ченгези киржи берген.

Монгуш-оол ыыттавайн турган.

— Улуу-бile четтиридим, дуцмам. Менээ эц-не үнелиг шак чүве. Фестивальга киришкеш, шаңнаткан шагым чүве — дээш, Монгуш-оолга кылын ном тудускан.

— Силерге база улуу-бile четтиридим, ак сеткилдиг өг-буле-дир силер — деп, уруг өөрээниндөн үнү сиринейнип чугаалаан.

Оолдуц акы-ченгези баштай чүвениц аайын тыппайн турган. Ынчалза-даа ченгезиниц хорадаан шырайы дораан-на илден апарганын оол эскерип каан.

Ак-көк платьелиг уруг байырлашкаш үнэ берген соонда, ченгезиниц арны хуулуп, кончуттуунуп-ла эгелээн.

— Кижиниц шкавын үжеп турар оолул бо. Ыядыр арын чок үренил моң — дээн сөстер чыккыцайнып-ла турган.

— Сокса — деп, ченгезин акызы хоруурга:  
— Сен база... Сен база ындыг сен харын. Мени оорлап турда,  
мен ыттавас кижи мен бе. Амыр-дыр харын — деп улам-на  
кончуттунган.

— Чүнү оорлапкан оол чүвөл? Орталан, Айлыңмаа, сен. Чөптүг  
чүве кылган школачы-дыр — дәэн акызының сөстери Монгуш-  
оолду дидимнендирипкен.

— Эртен чана бээр мен, ченгей. Автобус биледин садып алган  
мен — деп, оол чугаалааш, диванга олуруп алган.

Ол аразында кухняда хайындырган сүттүң ажа хөөрөй бергенин  
дыңап кааш, ченгези кончуттунмушаан ынаар чоруй барган.

Монгуш-оол демги уругнуң берген номун ам-на көре берген.  
Н. Островскийниң «Каң канчаар катканыл» деп номунуң даштыкы  
кылын каъдын ажыздыптарга:

«Ынак дуңмам Монгуш-оол. Улуу-бile өөрүп четтирдим. Өөрүш-  
күмнү илередир сөс безин тыппайн, бо номда бижиттинген эң-не  
эки сөстер сеңә хамаарышсын дәеш, мыя бо белекчигешти сеңә  
туттум. Студент Валя Донгак» деп бижип каан бооп-тур.

- 
-  1. Монгуш-оолдуң мәзүлүг болгаш туруштуг аажы-чаңын тайылбырлап,  
ындыг таварылгада өскөлерниң кылып турары-бile азы бодуңарның  
кылып болуруңар-бile деңненер.  
2. Монгуш-оолдуң ченгезиниң болгаш акызының аажы-чаңын сайгарып,  
оларның харылзаазын канчаар билип турарыңарны чугаалаңар.  
3. «Кижиның кылган буяны кижиже дедир эглип кээр» деп бодалдың  
утказын тайылбырлап, амыдыралыңарда кандыг эки чүүлдер кылып  
бооруңарны боданыңар.
- 

### III кезээ. ОЖУРГАЛ ЧОК САГЫШ-СЕТКИЛ...

#### Степан САРЫГ-ООЛ

С. Сарыг-оолдуң «Соругга» деп чечен чугаазы 1957 чылда (№12) «Улуг-Хем» сеткүүлүнгө, соңда «Байлак чуртум», «Кижи — бойдустук төлү», «Хүннүң ыраажылары» деп чыныздыларга парлаттынган. Ынчалзадаа чогаалчының «С.А. Сарыг-оол. № 2, 1954» деп даштында бижиктүг кыдышраажында «Дыт», «Ойнаан оолдар», «Дыштанган эжишкiler» деп шүлүктөринде айыткан чылын барымдаалап, 1955 чылда бижиттинген

деп санап болур. Ол кыдырааштың 31—112 арыннарында «Хайырда», «Ийи чагаа», «Тынын алдым» (ол атты балааш, «Шончалай» кылдыр кырындан солуй бижээн), «Аңчыга улуг олча», «Кадарчының ужуралы», «Чиктиг ыр» деп чечен чугааларның хол-бile бижээн эдилгелерлиг бижимели бар. «Хайырда» деп чечен чугааның эгезинде чогаалчы боду «Ам-даа дыңзыдып, сөзүн байыдар. Өскээр дүжүрүп эткен» деп демдеглел кылган. Чечен чугааның адын ынчан «Соругга» деп өскерткен.

## Соругга

*Чечен чугаа*

### 1

— Ам орайтаан-дыр. Аң келзе-даа, хараал көзүлбестеп келди. Мээн карактарым кордал чок-тур, оглум.

— Ындыг-ла апарды харын — деп, чаашкында дыт чаглаанга чылбыйты чагдырып алгаш, көжүй берген тас аны дег апарган бичии куу аңчы, чанында шеттиң шалыңын дүжүрбес дәеш, боду мырыңай шимчевейн, оожуму-бile харыылады.

— Мен чоруй аңнап, одаже чангаш, аyttar солуп оъткарайн. Сен хайырны барып манаар дизидзе, арай эртежик чедип, черниң эвин көрүп ал. Оон башка мурнунда көрбээн кижи тыппайн-даа баар сен — деп, улуг аңчы эләэн дыңзыг үн-бile сүмелээн.

— Ынчалыйн харын, ирем. Бетинде хемни сүзүп кежери-ле берге боор аа?

— О, ол хемни сүзүп кежер дәэр хуу-даа чок, кургаг чөвүрээден дора эстей бээр сен. Дем хүндүс бараанын көрбедин бе? Ак божа дег чүве хайнып чытпады бе. Амдыгы мээн хайыр барааны айтып берип органым қаъттың үстүү чарыында кыйыгда караңгы шиви аразында хемни кежир ушкан улуг сыра бар, ону қырлап кежер сен. Тайгаш чайлы бээдин, чөвүрээ өл болдур эвеспе. Одаже чанарында база чүгле олап кежер сен. Оон өске кежиг чок. Шыргайы-ла кедергей чер, бетинге аң кедеп саадавайн, дүрген чүгүргеш, кежип ал. Чогум дүне болза, карак шимгенден дора. Хүндүс безин адыш оюу дег дәэр көзүлбес болгулаар арыг чүве. Мен дег кырган кижи ол шиви иштинге кыжын безин чырык хүндүс-ле дииң тыппас оран-на болгай...

Ашактың оожум сургаалын оол чүгле бажы-бile согаш кылып чөпшээрээш, ынча ырактан-на коогайнып дыңналып чыдар кашпал

кара хемче углааш, кончуг кадыр өзенни куду, элик оглу эзирик дег, чиик кылдыр кулбуртуп бадыпкан.

«Карабини-бile барык-ла дең чыгыны, хөлүн эрттири-даа бичии аңчы-дыр ийин моң. Ол хирезинде шак ындыг мунгаш хем иштинде көрбээни хайыр дыңнааш, аңа хонар дээш бар чыдар чүреккир эрес-ле-дир. Ча, эр хей, ындыг кижи аңчы болур чүве. Олчалыг хонзун!» деп, колхозтуң хоочун аңчызы Чарык-Чаак ашак он алды харлыг өөреникчизи — аныяк аңчы Дукарның соонче элээн үр эдерти көрүп, иштинде боданып, йөрээгеш, одаанче чоруй аңнап базыпкан.

## 2

Дукар хемче чавызап баткан тудум-на, имиртиң дээрде шаштыккан сыннар кыры ырап, хүндүс көөргө, шак ол кызыдыр хөрүктеп каан ышкаш көстүр хорум шыпкан, а ам кара-көк кылдыр соой берген, хүлер куяктар кеткен дүндүгүр шырайлыг маадырлар аар тулчуушкун соонда хөлестеп чыдар ышкаш, мөөрүктөр улам-на карарып чыткылаан. А кашпал кара хемниң ишти дам-на кызаалап, мырыңай-ла дүвү көзүлбес кылдыр ханылаан. Дужааш-дужааш шорааннар аразы чарыктардан бот-боттарынга медерел чогу-бile ынакшышкаш, уткуштур шурашкан селбегер-селбегер ак арзылаңнар дег ужарлар хемниң улуг унунга кээп башташкан, калчаалыны-бile хербележип, куспактажып, каткы-хөглүг алгыржып, хем унун тар боорга, ону алгыдыр онгаштап бадып чыткан ышкаш сагындырар.

Ол күштүг шимчээшкинни бир-бир бодап кээрge, хамык-ла тарамык чон каттышкан, чаа амыдыралды тудуп турар Дукарның колхозу-даа сагышка кирер.

Шак ындыг дааш-шимээн Дукарның аңчы арга-билиглерин шуут-ла үзе кирип, мунгаштап турган: көөр дээрge, караңгы; дыңнаар дээрge, дүлейден дора. Оларда аңның даажы хамаанчок, бодунуң баскан даваннарының даажы дыңналбас. А аңның думчуубиле билири Дукардан артык-ла болгай.

«Ча, аң база-ла бо даашкан албан чоруур болдур эвеспе» дээш, Дукар далаш-бile базып олурган.

Хем иштинге кирип кээрge, шиви, пөш, дыт, хадың дээш түмен шырыш тудушкан эзимниң чүгле ыяжы караңгы ханы эвес,

а малдырган, кара-ай, алаңгыыш ышкаш оът-сигени Дукардан ыракта-ла бедик хана. Чүгле ийи хол-бile ожук-шалыңны шииледир карбанып чорааш, демги көвүрүгнү тып алган.

Эриинге кээрге, хат хадып турар, қышкырып, мөөреп чыдар хемни кежир ушкан хөлчок чоон сыраны мунгаш, үңгеп кежипкен, хире-хире чүлгүй шаап чыдар чалғыгларга чугдурган дириг мезил дег тайгыр чудуктан олурган кижи безин чаштай бер чазып турган.

Хамыктан берге чүве — ол караңгыда хемниң ындыры кыдышында шырыш, чиңгис, хорум, кат-чимис аразында малгаш-балар, дазыл долган чүс-чүс шаа кооргал хөөлбектерни эртери.

Арай боорда мургыйлап чорааш, улуг арыгны эртип, хемден эләэн ыракта оялык эриинден кээп демги ашак аңчының хүндүс айтып бергени оңгузун кедевишаан дилеп эгеләэн.

Хүндүс бедик черден дужааштыр көөргө-ле, ак чөр кылдыр көзүлген оялык кайда боор. Чүгле сижен безин оолдан бедик. Оялыктың бодун ширбиил, дая үгләэн. Ам аңың кидин-не кээп хайыр чылгаар үзи. Караңгы имир каксы аң дыка келир. Чылгап-даа турар чадавас. Дааш ап, чыт хапса, ол аң чүгле боду келбейн арлы бәэр эвес, а бо чоок-кавыда аңнарның дөгерезин хойзуп, сидиреңдер ыңай болур-ла болгай. Ынчангаш Дукар далаш-бile үңгевишаан дилеп-ле турган. Шет аразында оңгуну чандыр диләеш, хайыр чоогун барып базыпса, база-ла аңаа аң келбес, чыт аптар.

«Ага, бо-дур. Эх, хувура, қылымал оңгу чок, ана-ла чайгаар үнген шет дөзүнде олут чазап, боо хөлдәэр чудук салып каан чердир ийин мон» деп, Дукар хараадавышаан суйбап ылавылап, оңгу биле танышкан.

Мырыңай-ла ырак эвес — он беш метр хире черде бичии иемдикте оңгар кара ийи үт бар. Ол ийиден аңгы аң чылгаар соругдаа чок чөр деп әжинин чугаалааны ёзулаар шал-бул көстүр соругну ылавылап көрүп алган.

Ам хамык ужур олурад черде. Боо хөлдәэр черни ылавылаар, шылышт кыннып дааш үнмес бе? Ол оңгуланыг шеттиң ожуун оожум дүжүр силгип каалтар херек. Боо иштинче суг кирбәэн бе? Ок, патрон шыгып үрелбәэн бе? Чыт кайнаар кагар черил? Салгын чаңгыс аай бе? Борап турар бе? Дөгерезин боданып ылавылап көрген.

Аң келир болза, караңгызы-ла кедергей оран-дыр. Хире-хире булуттар эртип, туманнап кээрге, мырыңай көңгүс дуна бәэр болган.

Дукар оон ыңдай бодап олурага, бо хайырның бир эпчок байдалы болза, хем ишти оялыкта болгаштың, аң чүк бүрүден кәэп болур. Ылаңгыя оңгуунуң чиге артындан келзе, дораан-на аңчының кырынга келгеш, чытталыр. Улуг чаашкын болур болза, ол оңгу кырында шет көңгүс чаглак болбас.

Дукар ам-на оожургап, дыңнаалап, соругнуң үттеринче карак өөредип көрүп, ол чоокта каарып көстүр демдек бүрүзүн санап, боо аксын ол үттерже канчаар солуп шимчедирин шенеп олурган. Ыракта, хемниң чаңгыс аай шаалаажындан өске, чүү-даа дыңналбас — шыппышың-на кара чуве.

Олуруп-ла турган. Олуруп-ла турган. Чүве-даа сураг. Дыка орайтай бергенде, кезек чаашкын эрткен соонда, сыйдыстар көстүп, чүгээр чыраан-даа ышкаш болган. Бүгү-ле хеви удазынга чедир өткен кижи үр шимчевейн олурага, дыка соок. Менгилер болгаш ам-даа эривээн доштар оон ырак эвес-ле болгай. Дукар хире-хире дидирегилээш, бүдүү нугуттунуп, херлип шимченгилээш, чылыхып ап олурган.



1. Аныяк аңчы деп чүвени кайы одуруглар херечилеп турарыл?
2. Дукарның овур-хевириң кандыг уран-чечен аргалар-бile чураан-дыр тыпкаш, тайылбырлаңар.
3. Дүнеки арганың чурумалың көргүскен эпитет, деңнелгелерни ушта бижээш, сайгарыңар. Ону кандыг сорулга-бile ажыглаан деп бодаар сiler? 4. Дукарның хайырга четкенин допчуулай чугаалаңар.

### 3

Хенертен бир-ле черде аң даваны дирт кынны бергенин Дукар тода дыңнаап кааш, дүрген-не боозун хөлчок аяар ылавылап туткаш, олурупкан.

«Шимчеве, улуг аң ышкаш-тыр, дыка аар чүве сирт кылышынды. Дааш апкаш, халый хона бергеш, дыңнаалап турары-даа чадавас. Хайырга частырып, балыглаттырып кезээн-даа аң боор ийин оң» деп бодалы-бile сүмелешшишаан, ыяк белеткенгеш олурган. Ол аразы элээн үр бооп, караа-даа, боду-даа шылап келген.

Чаңгыс черже үр көөрге, карак мырыңай дедирленип, чүнүңдаа аайы билдинместей бээр. Хамык чүве шимчеп турганзыг апаар болгай. Кулак база ынчап баар.

Дукарның чиге-ле артында бир-ле чүве шалбаа суг сүзүп кешкени дыңалган.

«Ол чүл? Чоп даваны шөлүрээш дааштыг чүвел? Койгун ирги бе? Чок, койгун ынчалдыр суг сүспес. Хайырга келген аң болза, мәэң мырыңай кырымга келири-ле ол-дур, халак-халак!»

Ол аразында Дукар дыка хөйнү бодай каапкан: «Уваа, чиктиг чүве, хайыр манаан адыг бар чүве боор бе?»

Ооргазынга бижәэн мурнунга эккеп азынгаш, дайзазының оң талакы ужунда ап чоруур чес баштыг дөрт огун дизии-бile хевээр чүвүрүнүң оң талакы карманынга баглап алган. Далашканда даадыла карманын үжәэр чаңы-даа ындыг, шынап-ла, дайзадан уштуру — ол ыракта дүрген-даа.

Бир-ле черде дая шылырт дәэн соонда, сиғенде даваннар база шылыраан.

«Адыр, кайда даажыл? Артымда бе азы өрү бе?»

Дукар боозун сегирип алгаш, дыңнаалаан, чүве-даа сураг. Харын чүрээниң согары әләэн дүргедәэн болгаш, демги донуп органы чок, арны изиннәэр болган.

«А ядара, коргуп олурап кижи боор мен бе? Бужар багай херек... Ындыг кижи канчап аңнаарыл? Чүү-даа аң болза, кортканың херәэ чүл? Улам-на багай болганы ол, кижи адыгдан артык угаанныгдаа, чепсектиг-даа болгай. Коргар болза, черле тиилеп шыдавас» деп, бодун чемеленмишаан эде олуруп, бир эвес артындан чүве келзе, боонуң аксын канчалдыр эптиг, дүрген эргилдир туткаш, боолаарын база магадылап алган.

Канчангаш-ла дыңнаар дәэрge, мырыңай-ла мурнунда — боо аксында чүве чызылаан.

«Бо чүзүл? Чыт тырткан ыт-даа думчуу ышкаш... Құске чемнеп чоруур чүве бе? Құскеде ындыг дааш кайда боор? Коргарга кулак база мегелептер чүве болгай.»

Дықадыр дирт кынны берген соонда, хайырда дааш дәэрzi тодарал келген. Улуг кара көстүр үт көңгүс өскерилиген: улам-на улгады берген-даа ышкаш азы харын кажарып-даа көстүр апарған чүве дег. Ам дыңнаарга, чылгаан дыл-даа даажы, тынган думчук-даа даажы илдең дыңналып келген.

Хөлчок ылавылап чыткаш, баскан-на!

Ында-мында дая, ширбиил-даа чылжыраан. Сидиреңир маңнаан

даван-даа дыңналган... Суг-даа шалыраан... Дукар боозун катап октавышаан, ол-ла секунда иштинде хайыр уунче үне маңнап келгеш, дааш-шимээнниң уг-шиин ылавылап чадап турда, ынаар, оңгу артында караңғы шырыш аразындан бужар коргунчуг кышкы хөректеп үнген.

— Ог! О-уг!

«Бо чүзү апаарды, адыг боолапканым ол бе?!»

— Ог! У-у-у-р-р!

«Ага, адыг-дыр. Аң кедеп, хайыр манап чыткан-дыр, көр. Мени билбээн-дир. Хенертен боо эдерге, меннеп хорадап турагы ол... Кедерезе, менче шавар чадавас эвеспе бо. Соонче улаштыр боолапсымза, улам хорадап маңнап келир ирги бе? А-дыр, соңтайтын алғырган үн ыңайлай берген ышкаш болду...» деп, Дукар кезек када канчаар-даа аайын тыппайн аңгадап, долгандыр көрдүнүп, мажыны базылтарынга белен турган. Адыг ынаар, ырак хем чоогунда улуг арыгда, барып, ийи-уш алғырган соонда, шимээн чок-ла барган.

Дукар боозун белеткендир тудуп алгаш, ынаар — хайырның кедәэр талазында дөңче — кылаптавышаан, шимээргеп чөдүргүлекш, бодун боду кайгай берген:

«А чүгө чөдүрүп шимээргээrim ол? Боо даажындан, дары чыдындан kortkan адыг ырааннай ыраай-ла... Мәэң бичии чөдүлүм даажын дыңнааш, дедир маңнап келзе? Азы улам коргар ирги бе?» деп бодангылааш, коргары дам барып, ам харын балдыры сирилеп эгеләэн.

«Ча, адыг демги көвүрүг чанында барган. Бо караңғыда олап чанып-даа болбас. Мынча шимээн болгаш чыт соонда, маңаа ам кандыг-даа аң келбес: хайырга-даа хонган дүжүк чок. Бир эптиг хайыы черге дан атсып алгаш, чогум чүнү боолаанымны даарта ылавылап болур» дәэш, Дукар ынаар, хүндүс дужааштыр көргени кара пөштерже, базылкан.

Одаг чырыны улгаткан соонда, долгандыр турагай дескиле кара апарган. Дукар ам харын эки оожургаар орнуунга сестири дам барып олурган.

«Мәэң-бile кады хайыр манаан адыг мени канчап билбээн чоор? Дем-не дагжап турган чүве ол-дур. Мени кедеп, халып кәэринден дидинмейн, мәэң туруп шимчээримни манап чыткан боор ол. Аң, ийикпе, мал тудуп чиген изин көөрге, кандыг ийик! Ооң баар черинге — чингис, шырыш иштинге — кедеп чыдар болгай.

Ынчангаш ол хайырга келген аңнарны безин хоюспайн кедеп чытканы ол. Хенертен боо дагжаваан болза, ондактыг адыг мээн артымга шимээргеп турган-дыр. Бир эвес аң балыглапкан болзумза, хан чыды алгаш, бээр келир-даа магатчок-ла бо. Мырыңай чырый бээрge, алгырар чүзүл мооң?

Даарта Чарык-Чаак ашак мени kortкаш, хайыр манавайн, харын ооң чанынга от салып алгаш, хамык аңны хойзуп хонду дээр ирги бе? Ындыг болза-даа, бо адыгның изи база бар. Ооң-бile кады мурнунда бир удаа соруг манааш, сыынны часканын дыңнааш, колхозта комсомолчу өөрүнүң кыжырааны, ылаңгыя Долзаттың: «Сен-даа тайга үнүп аңнаар деп тенивейн, бистиң-бile огород касканың-на кедилиг боор ийин оң, эш» дээни база-ла сагышка кирер. Чер чырыры билек, хайырга маңнаап чеде бээрge, улуг-бичелиг иий аң ылап-ла келген. Артында-ла истиң улуун боолааны илден. Улуг хайыр аксында элээн дүктөр-даа чаштагылаан. Истеп кылаштаарга, көңгүс-ле ыраваан, он адыр мыйыстыг аныяк сыын бо чыткан.

Дукар мооң-бile катай ам үш-ле катап хайыр манааны бо. Энir чылын баштайгы удаа манааш, кидин-не мыйыс үези турда, он иий адырны көңгүс чазып чоруткан. Ол чазарда, хайырга аң кылаштап кээрge, коргуп-сүрээдеп чыткаш, часкан. Ооң соонда элээн үр үеде аңчылар ацаа хайыр манатпастаан. Чooкта чаа база-ла бо Чарык-Чаак ашак чөпшээреп, ийиги удаа хайыр манаткаш, бир хүлбүстү ол-ла черинге ужурган.

Ам үшкү удаа манааш, колхозтуң бир лимидин күүсеткени бо. Өөредип чоруур кырган аңчызының идегелин шынзыткан. Барып-барып мындыг берге, танышпазы хайырга кээп, адыгга таваржы-таваржы, оон коргуп, онгузун кагбайн, адыг-бile иелээ хайыр кедээш, Дукар ону ажып, былаап үнген.

Дукарның иштинде бодап чоруур ам бир бедик күзели — эптиг черге хүндүс таваржып, адыг даялаары. Аныяк аңчызының даңзызында тудап туар берге араатаннарның бирээзи болурдан артык, ол болза аң амытанга, малга, харын кижиге — аңчыларга бир коргунчуг, айыылдыг кулугур. Ынчангаш эки аңчылар ону дыка улуг хараал деп санаар.

- 
1. Дукарның хайыр манаашкынының үезинде дүвүрелин, сагыш-чо-ваашкынын допчулай чугаалацар.

2. Чарык-Чаак ашактың идегелин, бүзүрелин Дукар шынзыдып шыдаан деп бодаар сiler бе? 3. Дукар бо удаа каш дугаар хайыр манааныл, олчазы кандыг болган? 4. Дукарның кол күзели чүл, ооң күзели бүдер деп бодаар сiler бе? Бодалыңарны шынзыдыңар. 5. Чечен чугааның бижиттинген төөгүзү кандыгыл?
6. Силерниң чурттап турага чериңде суралыг аңчылар бар бе? Оларның дугайында чүнү билир сiler? Ужуражып чугаалашкан сiler бе?
7. «Бистин суралыг аңчыларывыс», «Мээн кырган-ачам — аңчы», «Аңчылар дугайында чүнү билир мен...» дәэн чижектиг темаларга кыска чогаадыгдан бижицер. 8. «Соругга» деп чечен чугаага дүүштүр теманы шилээш, чуруктан чуруур.
9. *Даялаары, дары, кашпал, куяк, лимит, онгу, соруг, хараал, хайыр* деп сөстерниң утказын «Тыва дылдың тайылбыр словарындан» ушта бижээш, утказын тайылбырлаңар. Чамдықтары-бile домактардан чогаадыңар.

## ЧОГААЛ ТЕОРИЯЗЫ

### Чечен чугаа дугайында билиг

Чечен чугаа — улуг эвес, биче хемчээлдиг проза жанры. Аңаа кандыг-бир маадырның азы хөй эвес санныг маадырларның амыдыралында таварышкан чангыс болуушкунну көргүзүп тураг. Чүгле ховар таварылгаларда эләэн каш болуушкуннарны көргүзер, олар аразында сырый харылзаалыг.

Ынчалза-даа ол чорук чечен чугааның хөй-ниити ужур-дузазын бичии-даа кудулатпайн тураг. Чогаалдың еске хевирлери-бile бир дөмей, чечен чугаага улуг болгаш чугула айтырыгларны көдүрүп, амыдыралдың кандыг-бир талазын ханызы-бile чуруп көргүзер.

Тыва литератураның үндезилекчилериниң бирээзи О. К Саган-оол 1941 чылда «Ужуражыышкын» деп бир дугаар чечен чугааны номчукчуларга сөңнээн.

О. Саган-оолдуң «Сумудан келген оол» деп чечен чугаазы республиканың ажылчын аңгызы чаа-ла тыптып, өзүп быжыгып тураг үеде бижиттинген.

Тыва чечен чугаа прозаның четчиp быжыккан хевири болу берген. Ол тема, идея, хевир, стиль талазы-бile чылдан чылч байып тураг. Чечен чугаа улам өзүп, бөгүнгү номчукчуңун эстетиктиг негелделерин хандырар шыдамырлыг.

Тыва чогаалчылар уругларга янзы-бүрү темалыг чечен чугааларны хөйү-бile сөңнээн. Оларга С. Сарыг-оолдуң «Шончалай»,

«Соругга», «Ийи өңнүк»; С. Пюрбюнүң «Шынаппайның чугаалары»; О. Сувакпитеттиң «Тывынгыр оол», «Атт чарыжы»; Э. Кечил-оолдуң «Чарыш аъды мунганым», «Баштайғы олча»; К. Аракчааның «Элдептиг киш», «Чашкаадайның ырызы»; Ш. Суваңың «Медәә», «Тоол чурттуғ оол», «Кара-Баштығ» дәеш оон-даа өске чечен чугаалар хамааржыр.

Силер 7 класска С. Сарығ-оолдуң «Соругга», О. Саган-оолдуң «Найырал», Б. Хөвеңмейниң «Чүү болганыл?», М. Доржуңун «Дайынныг кино көргеш...», Ш. Суваңың «Чәэн оол», И. Иргиттиң «Эргим Уля угбай» деп янзы-бүрү темалыг чечен чугааларын өөренип, сайгарып, чаа-чаа маадырлар-бile ужуражыр силер.

- 
1. Чечен чугаа деп чүл, ону чижектерге бадыткаңар.
2. Тыва литературада бир дугаар бижиттинген чечен чугааны номчааш, ооң кол маадырынга характеристикадан бериндер.
3. XXI чүс чылдың тыва литературазында бижиттинген 2–3 чечен чугааларның аттарын, авторларын, кол көдүрген айтырыгларын болгаш бодалын тодарадып бижиңер.
4. «Тыва чогаалчылар — уругларга» деп төлевилелден чогааткаш, ону класстан дашкаар номчулга кичәэлинге камгалаар.
- 

## Олег Өдербеевич СУВАКПИТ

(1925–2002)

### Іылар

Үржым өттүр  
Үй-сыы менәә дыңналып кәэр.  
Үрмам сыныш,  
Үглап чоруур апарған мен.  
Удуп чыда  
Улаарай-даа бергиләэр мен.  
Харын мырай  
Харам безин бастыгар мен.  
Ажық-байлак,  
Арга-арыг, хемнер, хөлдер  
Амы-тын чок,

Анаа өлүг болгулай бәэр.  
Тынар агаар  
Тывылbastap ышкамнай бәэр.  
Ээн, үн чок,  
Элеш кынныр чүве-даа чок  
Чиктиг оран  
Чиргилчинней эргий көстүр.  
Кайда-ла бир  
Кавайлыг чаш ыглап чыдар.  
Чанында ооң  
Чалыы ие өлүп чыдар...

Оттуп чадап,  
Орунумга дывыланып,  
Арай боорда  
Ала караам көрүп кээр мен.  
Дүжүм боорга,  
Дүкпүртүнүп чыткылаар мен.  
Ынчалза-даа  
Ыржым өттүр база катап  
Ыы-сыы менээ

Ырма сынчыг дыңналып кээр.  
Карак огун  
Казып тургаш, дешкен эвес.  
Кулак дыыжын  
Кузумуурлап дуглаан эвес,  
Эргим чонум,  
Эриг баарлыг кижилиерим!  
Ыржым үрээн  
Ыы-сыыны дыңнацар даан.

### Аргалар ызызы

Балды туткан кижилиер кээр —  
Балдырларже тутсу-ла бээр.  
Барып ужуп човууртаарга,  
Баштак-хөглүү кедерей бээр.

Хирээ туткан кижилиер кээр —  
Хилиредир тырта-ла бээр.  
Хилинчээвис дыңнай-дыңнай,  
Хиккиледир каттыржы бээр.

Хай чок улус ужурундан  
Кайы хире өрттенмээн дээр.  
Хамык дириг амытаннаар  
Кайы хире кырылбаан дээр.

Өртемчейге өкпе болур  
Өршээливис билбес ол бе?  
Арга-арыг бис чок болза  
Амыдырал буянчыыр бе?

### Аңнаар ызызы

Боолуг кижи бисти көргеш,  
Бодал-даа чок ада бээр-дир.  
Сезингештиң чашты бээргэ,  
Сегирткештиң туруп бээр-дир.

Чайлап дезер турлаавыс чок,  
Чайлыг оъттаар черивис чок,  
Чай, кыш чокка аттырып кээр  
Чаглак тыппас апардывыс.

Хамаан чокка кыра адар,  
Кандыг үүле кылышкан бис?  
Чуртувустуң малы болуп,  
Чурттаар эрге бисте чок бе?

### Хемнери ызызы

Кедек сындан дамырак чыып,  
Хемнери болуп тывылган бис.  
Херектигге суксун болуп,  
Кежиивисти өргүп чор бис.

Бок-хир октап, оо холуп,  
Боой тудуп, ескээр чайып,  
Хайыра чок аажыладып,  
Кара хинчек көрүп чор бис.

Балык, кундус, күштарывыс...  
Барык төнер чыгай берди.  
Барып-барып көңгүс соглууп,  
Бажы-били чидер бис бе?

## Каттар ызы

Сыргавысты дүжур дырап,  
Сывывысты сыга тудуп,  
Чимизивис үнмес кылдыр  
Чинчерлей бээр уржуундар чул?

Эмзиг, чемзиг амдан сиңген  
Элбек үнер боттарывыс  
Ам кээп мырай артында-ла  
Ажыывыс чок апарган бе?

Келир үе салгалдары  
Хевиривис көрбес ол бе?  
Четчиp бышкан, салам аар-аар  
Чемиживис чивес ол бе?

Кат-ла дээштиц бисти чуге  
Камналга чок чаңнаар силер?  
Кажан-чежен угаан кирип,  
Карак аштыр улус силер?

## Ховулар ызы

Эрте бурун шагдан тура  
Элбек оъттуг ховулар бис.  
Каш-каш янзы амылыглар  
Кадагалаан делгемнер бис.

Үе солчуп эрткен тудум,  
Үен-даян чарган тудум,  
Малдар безин семиртпестеп,  
Байлак дүжүт бербестээн бис.

Тогдук, чээрэн, дуруялар...  
Дооза каапкаш, чиде берген.  
Дойтук койгун, торлаа безин  
Тоовас, дезер болу берген.

Хову бисти черле чүге  
Хоозурадып турар силер?  
Кажан барып ээ болуп,  
Карак-кулак болур силер?

## Дээрниң ызы

Арыг агаар тыныжымны  
Аймак чонга берип келдим.  
Ак-көк өңнүг Дээр менээ  
Ак сүт чажып, чүдүп чорду.

Шагның солчур үелерин  
Шагдан тура сагып келдим.  
Чайын чайстап, кыжын харлап,  
Чаргы-чаалы кылбайн келдим.

Черниң кырын чырык хүнүм  
Чечектелдир чылдып келди.  
Айым болгаш сыйдыстарым  
Аян ырга кирип келди.

Ам кээп мени бужартадып,  
Агаарымны сырыладып,  
Айыыл диргеп, чепсек шенеп,  
Аглап турар херээндер чул?

## Черниң ызы

Чер бооп чүге бүткеним ол,  
Черле чажым чана берди.

Эйтте-кеште бүдүн чер чок,  
Элбер-самдар болу бердим.

Далай хемим боой тудуп,  
Таңды-сыным буза тепсип,  
Хамык байлаам үтпеп-тонап,  
Ханым соруп, хемдий берди.

Чечектерим өнү чидип,  
Чимистерим амдан чок бооп,

Чер бооп чаялан шырай-арным  
Чидип бар чор, сойлуп бар чор.

Алыс барып канчаарымны  
Ам чер билбес болу бердим.  
Ада-чуртум дижир улус  
Амым алыр шаацар бар бе?

### Кижилер ызызы

Амылыгны узуткан каар,  
Ава черни хуюктап каар  
Атом-бомба чепсегленип,  
Адааннашкан дүжүү чүдел?

Чурттарывыс тудуг-суурун  
Чуура тепсип кааптар бис бе?  
Боттарывыс көзүлдүр-ле  
Боолажып кырлыр бис бе?

Октаргайны хораннааштың,  
Ораннарны ыйбалааштың,

Төре-даа чок, салгал-даа чок,  
Төөгүвүстү хөөп каар бис бе?

Арга-арыг, аң-мең ызызы,  
Ак-көк Дээрниң, Черниң ызызы,  
Күштар, балык, каттар ызызы  
Кулак уюк болу берди.

Бодувуска халап чыгап,  
Бодараткан уржуувус чүл?  
Бойдуузувус холга алыр  
Бодал-күзел бисте чок бе?

Дээрниң, Черниң  
Денгел-шинээн тудуп турар  
Аймак чонум,  
Амгы шагның кижилер!

Кандыг арга  
Кандыг херек кылзывысса,  
Ыы-сыы чидип,  
Ыржым-шөлээн болу бээрил?



1. Шүлүктүң тема, идеязын тодарадыңар.
2. Шүлүктүң бирги болгаш сөөлгү строфаларын деңнеп номчуңар, чүнү эскердинер?
3. Ыыларны кандыг уран-чечен аргалар-бile дамчыткан-дыр, ушта бижээш, сайгарыңар.
4. «Ыыларның» аразында ылгалдыг болгаш дөмей талаларын тодарадыңар.
5. Бойдус темазынга бижиттинген 1—2 шүлүктерден тыпкаш, оларның сайгарылгазын кылыңар.

6. Силерниң сагыш-сеткилиңерни хөлзедип дүвүредиптер «Ыыларның» кайы-бирээзин аянынг номчааш, шээжи-бile доктааткаш, уран номчулга мөөрэйин эрттириңер.
7. Шүлүкке (бөлүктеп) шиижиткен көргүзүгден тургускаш, эге школа өөреникчилеринге көргүзүңдер.
- Адаан, аглаар, деңгел-шинек, салам аар-аар, карак аштыр, харам бастыгар, ышкам деп сөстерни «Тыва дылдың тайылбыр словарындан» ушта бижээш, утказын тайылбырлап, сөзүглелде ажыглалын тайылбырлаңар.

## Кызыл-Эник Кыргысович КУДАЖЫ

(1929—2006)

Кызыл-Бөрттүг

Тоожу

Бирги эгे

Озалааш казанак. Оспаксырак ашак. Сургуулдаанының ажыны чүл? Өгнү кым ээлээрил?

Кызыл-Бөрттүг ынчан чаш турган. Ада-иезинин хеп-хенертен чарлы берген ужурун билир хире эвес.

Кызыл-Бөрттүгнүң адазы — чүве ыыттавас, оспаксырак, кайы хамаанчок алдарга барбас, чүлүвес салы үргүлчү карара берген чоруур, дөгүй берген ашак кижи — чаңгыс өг чурттап чораан. Шынында ол өг-даа эвес. Соңгалар чок, тар эжиктиг казанак бажың. Ооң ишти мат кара ыш, ортузунда часпак изиг-демир салып каан, дөрде ийи кара аптара. Адашкылар кышты орта хоргадап эрттириер. А чайын дээрge Хүт ол кавының кезек маадылары серийн тайгаларже көжүп үнүптер. Адашкыларда чүү боор, аар чүктүг инээн сүргеш, ийи айдын мунгаш, боттацнап чоруптарлар. Чайлагга баргаш, улустан kortкан-даа ышкаш, улусту эш тырткан-даа ышкаш, алдардан озалааш-даа бол, оларның чоогунга хонуп алыр. Адазы ыяштар кезе шаап эккелгеш, чадыр кыла кааптар. Чайстан чаглак ол.

Адазының аажы-чаңын оглу кара олчаан дөзеп алган. Кызыл-Бөрттүг кожазында алдарның ажы-төлү-бile барып ойнавас. Олар ында-хааяя чедип кээргэ, чадырындан үнмес, хоруп олуруптар.

Чааскаан каттап, тооруктап, тояап чоруур, чалгаараарын-даа бодавас.

Кызыл-Бөрттүг Тывага революция үнген соонда, дөрт-беш-ле чыл болганда төрүттүнген. Ону төп черден Хүт ол ынчаар сургакчылап чораан кижи ынчаар адап каан. Черле ынчааш, ол чылдарда «кызыл» деп сөс кедергей өктерээн, кижи болганның аксынга баглап каан чүве дег, турган үе ол. «Кызылдар», «кызыл партизан», «кызыл тук», «кызыл шериг», «Кызыл хоорай», «кызыл-булун» дээн сөстер Хүтке шуужуп кээп-ле турган. Бичии-ле чаа чүве көстүп келзе, улус ону «кызыл» деп сөс-бile таарыштыр адаар дээш, бүгү эптиг арганы хереглээр. Аалдарның ажы-төлдериниң аразында «Кызыл-оол», «Кызыл-Уруг» дээн аттар шуут-ла эндерик. Ынчалза-даа Кызыл-Бөрттүгнүң ады кымныынга-даа дөмөйлөшпээн.

— Сени сургуулдадып чорудар кижи мен — деп, ачазы ашак бола чугааланы берген олуурын Кызыл-Бөрттүг каш-даа дыңнаан.

— Чүүже сургуулдаар, каяа сургуулдаар?

— Дөвүн, хем куду Кызыл деп хоорай бар, улус ынаар сургуулдап чоруп туар чүве-дир, оглум — дээш, хола-сарыг даңзазын таалап соруп олургулаар.

Күс келир-ле — ашак дииңнеп чоруптар. Ынчан адазы: «Аң-мен өлүрүп, сенээ бичии акша-көпек сурал аайн, ам-на келир чайын сургуулдап чоруптар сен» деп каар. Чай келир, сургуулдаар дугайында чугаа-даа үнмес. Акшазы база төнүп каар чүве ыйнаан, ынчага дээр кайын артар. Адазы чүве-даа ыыттавас. Диинээр үе чедип келирге, сургуул дугайын адазының сагыжынга база катап кирип кээр. Ынчаар-ла чылдар эртип турган. Кызыл-Бөрттүг сургуулдап чорбаан-даа.

Сургуулдаар деп чүл ол дээрзиниң дугайын, ооң ажык-дузазын Кызыл-Бөрттүг окта-ла билбес. Ону билип алышын оралдашпаандаа. Ооң бажынга мындыг бодалдар киргилээр: «Сургуулдаарының ажыы чүл? Адазы аңнап-дииңнеп азы өлүк садып, Туран кирип сурал баарга, өгнү кым ээлээрил? Чаңгыс инекти кым ажаап-карактап, ооң адаан аштаарыл? Чок, Кызыл-Бөрттүг ынчаар чурттаар ужурлуг. А иий-үш чыл болза-ла, адазы аңнаар-дииңнээрде, ону эдертип чоруур апаар. Адазынга эш болу бергени ол. Дорту-бile чугаалаарга, ол сургуулдавайн баарга, арт алчая бээр эвес, хем келдее бээр эвес. Шынында, Хүт ол кавыдан кым-даа сургуулдап көрбээн, ынчалза-

даа кым чуден-даа качыгдаваан, кижилер амыдырап-ла чоруур чүве-дир».

Кызыл-Бөрттүг доруккан тудум, чүгле аңнаар, боо-моңгу дугайы бодаар апарган.

1. Бо әгеде Тываның кайы үезин бижип турар-дыр, ол бодалыңарны бадыткаңар.
2. Адашкыларның амыдырал-чуртталгазында кандыг онзагай чүүлдерни эскердиңер?
3. Кызыл-Бөрттүг чүге өөренип чоруксавайн турган деп бодаар силер?

### Ийиги әге

**Кара чааскаан.\* Хапта кажык.\* Инээн сокканы.\* Сүт болгаш карак чажы.**

Бир-ле күзүн Кызыл-Бөрттүгнүң адазы дииңнеп чорупкан. Аъттаныр мурнуунда ашак багай бажыңының чанынга бир ай хире одаар ыяшты оваалап каан. Ында-хаая хайгаарап көрүп турар силер деп кожазында аалдарны дилеп каан.

Хүтке кыш эрте дүжер, час орай келир. Тайга чер болгаш, кыжы соок эвес. Хар дугайын ыыттаан дүжүк чок, чамдык чылдарда курлак чедир чаггылаптар.

Кызыл-Бөрттүг кежээ эрте-ле удууп чыдып алыр. Чааскаан чүнүү кылып орар боор. Эртен тура халааш, чем кыла шаап чип алгаш, чаңгыс инээн сүрүп үндүрер. Оозу чанында аалдарның инектериниц соондан калгып үнүптер. Хүндүс талыгырда бараанын көөрге, инектерден ырак, ээзиниц аалдар кыйынында багай бажыңы дег, озалааш апарган каара берген оъттап чоруур. Ону көргеш, Кызыл-Бөрттүг амырап, хөртүк кырлап, чунгулап ойнай-даа бергилээр.

Кызыл-Бөрттүг хүндүс ажылын база утпас. Чаңгыс инээниц кажаазының иштин аштап каар. Аъдын база колуп өртээр. Кежээ оттуулар ыяжын чаар, инээ кирип кээргэ, оозун хайдактап саар. Бызаазы күзүн аш бөрү аксынга барган.

Адазы аъттанып тура: «Эки чөмненип турар сен» деп чагаан. Кызыл-Бөрттүг ону арай сагывайн турган. Эъдин-даа, далганындаа бичиилеп, камнап чиир. Саап алган сүдүн доңуруп, хар адаанга шыгжал, шайны чүгле өлөртирип сүттеп алгаш, ижер. Ол бүгү

камналга-бите адазын өөртүр деп бодап алган. Ону ынчанмас болза, адазынга мактадыпкы дег оон өске чүве бодап шыдываан.

Адазы чораандан бээр, ай чыгай берген. Соок шыңгырап, хар улгаткан. Чамдык хүннерде инээн аалга хүнзедип эгелээн. Үнчап чоруй, аалда бичии сигени төнер дей берген. Адазының чагааны-бите Кызыл-Бөрттүг альын эрзии сүргей шанактааш, сигенниэр дээш ырак эввесте хем унунчэ чорупкан. Инээн аал эжинчэ сүрүп каан. Үнда, кажаазын бузуп каапкан сараат ортузунда, өске аалдарның инектери дойлуп турган.

Дүүш эрте дүжүп чорда, хөпээн четпес сигени шанаанга опайтыр салгаш, негей тоннуг эзирик кадайлар қуру дег, бөлбүрерти бастырыктап алгаш, Кызыл-Бөрттүг аалынга калгып келген. Сигенниг шанаан шаарааш кажаа иштинге кииргеш, шала-була чэмнени шаап алы-сой, өг дөрүндэ баалык кырынче маңнап үнген. Инээниң барааны көзүлбээн. Ажыт черде чор ыйнаан кылдыр бодаан. Оон эрги чунгузунга ац кежи дөжээн салгаш, өдекче сыг дээн. Харлыг дүвү арынчэ улдаарга, тыныш бачыдап, арын соолацайнып чораан...

...Кызыл-Бөрттүг үнүп келгеш сактырга, инээниң адаан аштаваан болган. Бистери чирилгилей берген деспи дег калбак ыяш хүүректи алгаш, инек кажаазынга келген. Ооң чаңгыс-ла инекке өй-тап эжинден бакылап турда, карактары караңгыга элээн өөренип чорда, Кызыл-Бөрттүгнүүр арны-бажы от-көс дег изиш дээн. Чартык чер караңгы кажааның иштин долдур-ла, улуг-ла бөмбүк дег, бөп-бөрбек, дөртегер кара чүве чыткан. Бичии оолдуң ооргазын куду соок дымырааштар чаржып баткаш, ээжектеринден үнгелек чорда, кажаа иштинде бир-ле амытан «шүш» кылдыр тынган. Дөртегер кара чүвениң иштиниң дүктери улам адыйып келгеш, соорту соолбуурарып кире бээрge, аар болгаш хилинчектиг тыныштар дыңналган. Ол амытаның тыныжының салгазы улуг аарыг кижиниң ышкаш сагындырган. Кызыл-Бөрттүгнүүр бажынга «бистиң инээвис-тир» деп бодал хенертен чаңык дег чык дээн соонда, өдекти куду дукпурту дег шимеш-ле дээн.

Кызыл-Бөрттүг маңнаан уу-бите кожазында хөй малдыг өгнү оюп каапкаш, адазының үе-чергези ашак сүгга чеде берген. Биеэ ашак оолду дыңнап-дыңнап, чаа эсken сарыг шайын аартааш олуруп берген. Оон чула таакпылап алгаш, ам-на үнүп чорупкан.

Тар кажаа иштинче арай боорда кирип келгеннер. Чырыдып көөргө, инек бажын өдек кырында салып алган, кулактарын халайтыр салып бадырыпкан, карааның чажы төкту берген, шаг чок чыткан. Ооң дартагар иштин амдыы ашак баскылаарга, инектиң хөрээ каргырткайнып, тыныжы четпестеп, човулаңыг ышкыштаан. Ашак үнүп келгеш, ыйт чок бажын чайгылааш, кожазында аалче базып чорупкан.

Үр болбаанды ийи аныяк эр эдертип эккелген. Кызыл-Бөрттүг-нүң кулаанга дыңналдыр-ла үш кижи сүмележип турганнар:

— Девин, хүндүс, сараат орнунга сижен хунаашкаш, дуу аалдың бугазы үзүпкен болгай aan.

— Шандыры чарлы берген-дир. Шөйүндүлери шуптузу кеш адаанчы уштунуп келген.

— Мал болбас апарган инек-тир.

— Ам хондурап болза, чуде-даа чок болур. Хей-ле эъди чажып каар.

Демги ашак Кызыл-Бөрттүгге ылавылап чугаалаан:

— Мындыг-дыр, оглум. Эр болган кижи-дир сен, чүнү-даа билир апарган. Инээнни согар деп сүмелештивис. Эъдиниң чартынын буганың ээлери алгайлар aan. Мен сүмележип көөр мен. Соонда молдурга-казыра азы бөгбө-чаваа дээн ышкаш дуюг тургузар чүведен бээрлер ыйнаан. Мал-маганныг улус чүвени билирлер боор оң.

Аныяк эрлерниң бирээзи моң балды эккелген соонда, инектиң бажынчы дырт-ла кылган. Кызыл-Бөрттүг караан шийипкен. Сактырга, ооң бажын орта каккан ышкаш болган. Артында-ла тендирий берген. Караан көрүп кээрge, бүлүртүн ден чырында инээниң боскунда бижек балыындан дестиг хан дөмбүң иштинче көвүктелдир аттыгып кирип чыткан. Кызыл-Бөрттүг бүдүү иш-кирнип-ишкирнип, бажыңынга от салыр дээш, үнүпкен.

Улуг иштин аңгылап уштуп каапкаш, чүгле ынчан инекти тар эжиктен арай боорда үндүр сөөртүп алганнар. Кежээ орайга дээр эътти кезип каапканнар. Буга ээзи аал инек эъдиниң чартынын-даа кээп албаан, сураг-ла барганнар.

Ай ажып чорда, дииңчилер чангылап келген. Адазын көрүп кааш, Кызыл-Бөрттүг туттунуп чадап каан. Ыглапкан. Инээ дириг турда-ла, донуруп алганы борбак сүдүн, ачазынга шай сүттеп бээр

дээш, буза шаап орда, Кызыл-Бөрттүгнүүц карааның чажы ооң кырынга кылаңайндыр дүжүп турган.

— Чүү болду — деп, ачазы катап-катап айтырган.

— Инээвис, инээвис... — дээш-ле, Кызыл-Бөрттүг, боостаазынга дүктүг бышкак чыдыпкан дег, харлыгып, чүве чугаалап чадап каан...

### Үшкү эгэ

#### Чээрби акша.\* Кара чаваа.\* Ачам чортуп каап-тыр, чонум...

Чазаан. Чайның адак айы үнүп келген.

Бир-ле эртен адашкылар шайлап олурғаннар.

— Сургуулдап чоруур кижи сен — деп, ачазы хенертен мындыг болган.

Кызыл-Бөрттүг аңгадай-ла берген: «Орта чоор бе? Ачам аңнап-менеп чоруп бээрge, өгнү кым ээлээрил? Кайы, ачамның мени, шынап-ла, аартыктап эгелээни ол-ла бе? Чок, ол ындыг доң баарлыг эвес-ле кижи болгай. Күзүн кады аңнаар ужурлуг бис. Ийи кижииниң олчазы хэй-ле болгай. Инек база садып алгай бис. Оон ёске чүнү-даа кылгай бис. Чамдык улус канчап бистен артык малмаганныг, эт-септиг-дир. Чок, мен моон чорбас мен. Сургуул деп чувениң ажык-дүжүүн кым көрген.»

Ачазы хэй чүве чугаалааан:

— Чоруур сен, оглум. Шыгжап каан 20 акшам бар. Бежи-бile салчылар хөлезилеп бээр мен. Он бежин хойлап алгаш, улустуң Кызыл дижир хоорайынче чорувут. Сөөлүнде база салчылар-бile акшадан чорудуп тураган. Шагда сени Кызыл-Бөрттүг деп адаан кижи ынча дижик чоп. Кызыл партизаннар дээр улустуң даргазы кызыл хавактыг бөрттүг кижи улусту шуптузун сургуулдазын дээндир. Менде чүү боор, кырган кижи-дир мен.

Сургуул деп чувениң ужурун чедир билбезе-даа, ооң дугайында отчугаш Кызыл-Бөрттүгнүүц угаанынга, бүлүрерти-даа бол, хып турган. Оон улуг моондак база бар. Ол дээргэ Хүт ужары-дыр. Орта өлген-барган салчыларның дугайында шын-даа, меге-даа тоолдомактар аалдарга дыргын турган. Севиге, Сыстыг-Хемге дыңдалган чугаа-сооттар Хүтке үш-дөрт илиг хөөрөй берген дидирткейнип келир.

Ындыг-мындыг чылдагааннар ужун Кызыл-Бөрттүг даш тепкеш чыдыпкан. Адазы ээрежип чадашкан.

Ол кыжын Кызыл-Бөрттүгнүц адазы дииңневейн барган. Ашак арай хоочурап турар апарган. Аалдан үнүп, аң-менге мөлдүк-каалдык чедип, чүгле хонук успейн турган.

Инээнин дугайын адашкылар шагда-ла уттулканнар. Ыя аразында күскәэр кыжын биееки үзөр буганыц ээлери: «Инээнцер дуюунга чаваа айтып кагдывыс, ал алышар» деп сөглеткен болган. Кызыл-Бөрттүгнүц адазы улуг-ла бүзүрревээн. Кыш удур җанчаар боор, чазын ал көрээли деп ашак дилээн.

Час әртип, аалдар мырыңай чайлагга барганда, чавааны өөретпээже хоржок апарган. Оон әртер болза талаар. Құзұн семирип, улгады бәэрge, ону өөредири берге.

— Дүнмаңарага ыя ол чавааныц аксын чайып берип көрүңерем, оолдар — деп, аныяк әрлерни ашак дилеп чадап каан.

Бир-ле шала сериин, әдир булуттарлыг хүн ашак чавааны оолдарга туттургаш, әзертээш, олурупкан. Оозу улуг-ла мөгбәээн, шуут-ла маңнап алгаш чорупкан. «Ийи-үш хонукта ынчаар аксын эдип берзе, оон ыңай оглум боду өөредип апаар боор» деп, ашак иштинде өөрүп бодап чораан. Ол ам он ийиләэн, шору эр апарган болгай.

Адазы ол хүнзедир келбәээн. Кызыл-Бөрттүг әртенинде оттуп кәэрge, ам-даа сураг болган. Оон арай сести хона берген.

Кызыл-Бөрттүг аъдын эзертей соккаш, адазыныц дүүн чоруткан уунче иде-иде хапкан. Чайгы хүн девин-не бедип келгеш, изиг түлүү кирип орган.

Аалдар чанында эләэн баалыктарны эрткен соонда, дөңгеликтерлиг, малгаштыг, чиндиңнәэш шыкчे Кызыл-Бөрттүг доңгайтыпкан. Эләэн бадып ора, дүүнгү әмдик чаваа дег кара чүзүннүг айт шык ортузунда согая берген турганын оол корүп каан. Оон чанында кижи хевирлиг шәйбек чүве-даа чыткан ышкаш. Кызыл-Бөрттүг дүвү-далаш-бile ынаар хапкан.

Шык ортузунчे аyttыг кирери берге болган. Кызыл-Бөрттүг дүже халааш, аъдын чыраага баглай соп кааш, дөңгеликтер баштап маңнапкан. Доңгайып алгаш чыткан кижини хевинден-не ачам-дыр деп танып каан.

Кызыл-Бөрттүг ачазыныц чанынга келген.

— Ачай, канчап бардың? — дей каапкаш, ооң чецинден туткаш, ойтур соп келген.

Ачазы ыяш дег ээлбес, көжүй берген, аары кончуг. Арны, ак тос дег, каштайып калган, карактары шимдинчек, аксын шала ажып алган. Оон бир-ле чuve төктүп чыткан болган.

Кызыл-Бөрттүг ыглапкаш, бажын ачазының хөрээнге салыпкан.

Та кайы хире үр олурду ыйнаан, шаг болганды, бажын көдүрүп келген. Сагыш караңгылап, чер саргарып турар. Ачазының солагай холу малгашче кадалдыр кээп ушкан болган. Кызыл-Бөрттүг ону байгы күш-били ушта соп келген. Ачазы ол холу-били аргамчының ужуундан ыяк тудуп алган болган. Эмдик мал ону ушта соп чадап каан хире.

Кызыл-Бөрттүг аyttангаш ээпкен. Чанында аалдарга келгеш, бичии када-ла улуг кижи дег апарган чугаалап турган:

— Ачам ашак чортуп каап-тыр. Сөөгүн тутчуп каап көруңер, чонум, чааскаан чүнү канчап шыдаар мен.

Адазын улус ажаажып каан.

Кызыл-Бөрттүг багай чадырынга кара чааскаан арткан. Дүне уйгузу келбес. Даңны атсы көрүп чыда хонар. Даңгаар эртен, чер чырып келгенде, бичии кум кынныр.

Улустуң колдуу Кызыл-Бөрттүгге сургуул, өөредилге, эртем-билиг дугайын сүмелеп турган. А боду бир янзы бодалдыг: сургуулдап чоруй баргаш, аyttарын канчаарыл? Оларны кым карактаарыл? Улустуң чугаалааны дег, саткан херээ чүл? Ооң соонда аалдар аразынга чадаг кылаштаар бе, кыжын ыяш-дашты канчап сөөртүп алышыл? Аyttары чокта, Кызыл-Бөрттүг ам ырап шыдавас.

Чай дургузунда Кызыл-Бөрттүг хөй-ле боданган: каяя чурттаарыл, канчаар амыдыраарыл? Чеже-даа боданып келгеш, кыштагда адазының озалааш казанаанга баар дээрge, чүрээ чагдатпаан. Ында ачазының эрги-каксы хеви бар. Аза-бук сагыжынга кирер.

## Дөрткү эгे

**Төрээн ие.\* Соңгуада.\* Аякта мүн.\* Өштүң төвии.**

Изиг-халыын эрте дүжүп, сериидеш кыннып чорда, Кызыл-Бөрттүг төрээн иезиниң аалын айтырып чорааш, чедип келген. Соңгу адазы болур ужурлуг кижи өгде чок болган.

Төрээн оглун көрүп кааш, иезиниң үнү чидип, харлыгып, карааның чажын хирлиг чеци-бile чоткулаан. Оглунче удур көрүп чадал, дунук дацзазын соруп олуруп берген.

Таакпызын тыртып алгаш, авазы орталанып кээрge, Кызыл-Бөрттүг таваар чугаалап эгелээн:

— Дыңнадыңар ыйнаан, чааскаан арткан болгай мен, авай. Өскен өөм, төрээним бооруңарга, чедип келдим. Оон өскээр кайнаар баар мен? Мени даңзыңарга кирип ап көрүңер. Силерге кайын дужамык халдадыр мен, дуза боордан өске, доруга берген кижи. Альттарым-даа бар-дыр. Шаг шаа-бile тураг эвес, улгадып, башкаланып чоруй-ла баар мен ыйнаан, авай...

Авазы эйт доорап, мүн кыла берген.

— Менде чүү боор, оглум. Сагыш ышкаш чүве болза, сени шагда-ла ап алган турбас мен бе. Дораан чедип кел харын, оглум. Эр апарган кижи өл-чаш дуцмаларың азырашкай сен, имилеве чувелер-дир ийин.

Мүннү авазы эскеш, улуг-ла дазыл хувага эриин долдур куткаш, оглунга сунган. Ыя аразында даштын ыттар ээрген соонда, мал даванының даажы дидирткейнип келген.

Иези эжиктен бакылап көрген.

— Амдыы ашак-ла-дыр — дээш, дөрдэ ында-мында чыткан үүр-савырны эде-хере каай берген.

Кызыл-Бөрттүг эжикчे куду союп алгаш, чыышкынче чыыра, улам бичеледир олуруп алган.

Сонгу адазы шимээни ынаар чугааланыр-даа. Хирези, халаа эзирик янзылыг.

Ашак кире халып келгеш, Кызыл-Бөрттүгнү көрүп кааш, эжикке кезек када ыыт чок турган. Оон оолдуң баары-бile эртип чыда, оолдуң изиг мүннүг аяк туткан холун орта тепкен. Аяк ушта халааш, эжик кастынга кээп дүшкен. Изиг мүн оолдуң арнынче харын-даа чаштай бербээн. Кызыл-Бөрттүг уне халаан. Шимээни сааскан дег шыжыладыр чаңчанып чыдып калган.

Кызыл-Бөрттүг өг чанында чикти кеже халааш, ында арга ужунда шеттер аразынга баргаш, черге доңгая дүшкеш, мөөреп-ле чыткан. Кежээгэ дээр ыглап келген. Ону кым-даа аргалаваан.

Чеже ыглаар боор, карактары кургап калган. Хире-хире болгаш, аажок хандыр улуг тынып каап-ла чыткан. Кызыл-Бөрттүг ам

оранны одуртур, делегейни дескинди бодап каапкан: чаш чорааны, казанак бажыңы, кызыл-дустай берген ачазы, аyttары, төрээн иези, соңгу адазы...

Имиртиңеп келген. Арга ишти дораан караңгылай берген. Ында-мында будук-даа дызырт дээр. Ындазында сезинчии сүргей. Кызыл-Бөрттүг серт-даа дивээн. Ам аңаа чүү-даа коргунчуг эвес: аң-бөрү-даа, адыг-мажаалай-даа, хүннүң изии-даа, Хүттүң ужарыдаа. Ол ыяап-ла өжүн негеп алыр ужурлуг.

Кызыл-Бөрттүг өртеп каан турган аյдын чедип эккелгеш, кончуг дуюкаа эзертээш, аyttаныпкан. Соңгу адазының аалындан үнгүже, аяар чортуп чоруй, аյдының саарынч дыргс кылдыр каккаш, Севи кайы сен дээш, садырт-ла дээн. Кызыл-Бөрттүгнүң кулактарының ийи-бile эртенги салгын сыйгайндыр хадып эртип турган.



1. Кызыл-Бөрттүгнүң адазы чокта амьыдрылыш чүнү херечилеп туаралыр?

2. Инээн соккан үеде Кызыл-Бөрттүгнүң психологтуг байдалын тыпкаш, номчуңар.

3. Адазының оглунга өөредилгэ дугайында чугаазын чүү деп бодаар силер?



4. Инээниң дуюунга алган чаваазы болгаш ачазының салым-чолу.

5. Кызыл-Бөрттүгнүң муңчулуушкун-хинчектениишкини.

6. Авазы болгаш соңгу адазының хүлээп алганы.

7. «Оранны одуртур, делегейни дескинди бодап каапкан» деп домакты канчаар билип туаралыр?

8. Кызыл-Бөрттүг чүгэ өөренир деп шийтпирлеп алганыл?

## Бешки эгэ

**Севи.\* Изиг картошка.\* Орус сүгжу.**

Кызыл-Бөрттүг кылышының тевиинден хүннүң черни шаал эрткенин эскербээн. Дүүш четпээнде, Севиге халдып кирип келген.

Ынчан Севиге элээн каш аалдар, Бии-Хемниң эрик кырынга үш-дөрт казанак бажыңнаар, чадырлар турган.

Эрик кырынга Кызыл-Бөрттүг чортуп келиргэ, сугда хөй-ле кожактыг улуг сал чыткан. Чолдак хөректээштерлиг, узун хончуг идиктерлиг тыва кижилер ол-бо кылашташкан, чамдык ко-

жугларны быжыглап баглаан турганнар. Сал кырында аът чаа кескен шал көк сиген чип турган.

Кызыл-Бөрттүг аъдын баглап кааш, салга кылаштап чеде бергеш, ооң кырынче үне халызырындан диттип чадап каан. Ында кижилер ону көрзэ-даа, ынаар дыргак каразы дег-даа сагыш салбаан.

— Сал көрбээн кижи сен бе, ынча дыка кайгаар? — дээн соонда, ол кижилерниң шала улуу ооң чанынга келген.

Кызыл-Бөрттүг харыы тыппайн барган. Ындыг-даа болза, бо хире таарымчалыг үени эрттирип болбас кылдыр бодааш, кызып-кызып чугааже кирипкен:

— Хүт чурттуг турган болзуңза, ону кайгавас харыың кайдал.

— Кайы, Хүт чурттуг сен бе?

— Ийе, ам чаа оон келдим — дээш, оол дерлиг аъдынче көрген.

— Дыка-ла шапкан-дыр сен аа? Чүге далаштың?

— Силерниң салыңдардан озалдалп каар ирги мен бе деп бодадым.

Сургуулдалп чоруур дээш келдим — дей каапкаш, демги кижиже үзе кайгап алган турган.

— Сургуулдалп че?

— Ийе, акым.

— Кайнаар?

— Силерниң ол, амдыы... Чүү дээр ийик, улуг хоорайыңарның адын аан? Кызылче аан.

— Кым-бile келдиң?

— Чааскаан.

— Аваң, ачаң чорутту бе?

— Чок. Ачам энир чылын чок апарган.

— Аван чорутту бе?

Оол харыы орнуунга доңгайгаш турупкан.

— Ана аттыг үрен-дир сен але, ол оранче кара чааскаан. Ужар-ны канчаар сен? Өлзүңзе кым... — деп чоруй, ол кижи соксалп каан.

Кызыл-Бөрттүг шала ыгламзыравышаан, каяа ёскенинден эгелээш, ачазының өлгенингэ, соңгу адазының кыжыктаныпканынга чедир чугаалап-ла турган.

Оолду дыңнаап-дыңнаап, демгизи мынча дээн:

— Мээн билбезим чүве-дир, дуңмакым. Бистиң лоцманывыс билир. Ол кижи чөпшээрээр болза, бисте чүү боор, ап алыр бис, сал аартыктаар эвес.

Кызыл-Бөрттүг эрикче дүже халааш, сай кырынга барып олуруп алган. Салда улус ынаар бөлдүнчүп алгаш, бир-ле чүве дугайын чугаалажып турганнар. Хире-хире болгаш, сайда оолче-даа көөрлер, оон тарай хона бергеш, эрикте тал адаанга паштаны бергеннер.

Эллэн үр болганды, салчылар Кызыл-Бөрттүгнү кый дээннер. Улуг-ла ак-демир аякка кара-паштан, кадык бе дээрge, кадык-даа эвес, сай дажы дег, борбак сарыг чүвелерлиг бир-ле чем каап бергеннер.

— Чип көрем. Хартышка деп чүве бо-ла болгай.

Кызыл-Бөрттүг канчаар чиир аайын тыппайн олуруп-олуруп, бир улуг борбакты шопулактааш, аксынчे суга каапкан. Оозун чуура дайнаптарга, аксынче оттүг көс киир каапкан чүве дег, изиш-ле дээн. Ажырыптар дээрge улуу кончуг. Изиг картошканы аксындан адыжынч төге каапкаш, карактарының чажы булденейни берген, уруп-чайып-ла орган. Эрлерниң кара баары кадып-ла турган.

— Девидеве. Чуура иткилеп алгаш, бичиилеп чи — дээш, демги таныры кижи хлеб ап берген. — Холуй дайнап чи.

Кызыл-Бөрттүг картошказы-бите-ле бержип орда, «Силер кандыг чем чип тураг-ла аа?» дээн танывазы аялгалыг чоон үн ооргазындан дыңналган. Хая көрнүп кээрge, кедергей узун кижи ооң чанында турган. Кызыл-Бөрттүг ол кишиниң адаандан өry көрүп олурага, узун буттары ийи сыра дег болган, кара идиктерин мырыңай-ла дөңмек дөзүнгө чедир тыртып алган. «Ындиг узун буттарлыг кижи сүгжу болбайн канчаар, хире барык хемнерни анаала сүзүп кеже бээр ыйнаан ол» деп, Кызыл-Бөрттүг боданмышаан, чөмненирин уттуukan, ол кишини кайгап олурган.

— Бо кым келген-дир? — дээш, узун кижи Кызыл-Бөрттүгже ээгэ берген. Ооң үрде чүлүвээн чокпак сарыг салы хөрөэн дуй алы берген, коңзагар думчуунуң кырында безин дүктөр бар ышкаш болган. Ол дээрge салчыларның «лоцман» дээр даргазы ол чүвэдир.

Тыва эрлер орус, тываны холуп-булүп тура, тайылбырлап-ла турганнар.

— Күш эки сургуул тывылган-дыр — дээш, оолдуң дүүнден бээр ыглаг каапкан, калдар хуна дег, арнынчे топтап көрген. — Ай, ай, Пий-Хем суу бичии-даа өртек чок-тур, халас-тыр. А сен чунар чок. Че, чунар-ла, таныш. Оон чугаалажыр.

Кызыл-Бөрттүг дүвү-далаш чунуп каапкаш, холдарын эдээ-бile, арнын чеңнери-бile чода тырткылап алган. Оон черле адырылбас хорлаңгылыг мат кара холдарын ооргазынга чажыра туткаш, сугжу ашактың баарынга кәэп, томаанныг туруп алган...

— Кызылга канчаап чурттаар aa? Акша бар? — деп, орус кижи айтырган.

Кызыл-Бөрттүг ооң чугаазының аянынга алзы берген:

— Согур көпек чок кижи мен. Мен салга олурган, мен бо айтты бәэр.

— Оо, аyt бисте херекчок, кайда салыр?

— Дуу айттар-бile кады салда салыр, оон силер алыр.

— Чок, чо-ок. Сен аyt херекчок.

Оон ыңай Кызыл-Бөрттүг адырылбастааш турупкан, элепчук-ла. Орус сугжу тыва эштеринге орустап чугаалап әгеләэн. Олары база билир-ле шаа-бile имнеп-самнаап орустап турғаннар. Хирезин бодаарга, Кызыл-Бөрттүгнүң дугайын, ону алыр бе, албас бе дәэр дугайын оон чажырып чугаалажып турған ышкаш. Маргыжып-даа турғаннар. Дыка-ла үр үрүннейнип келгеннер.

— Аyt албас бис. Сени бис алыр бис — деп, адак соонда орус ашак чугаалаан.

Кызыл-Бөрттүг хап чоруткаш, аъдын авазы сугже чорудуптар кылдыр улуска чагып кааш келген.

### Алдыгы әге

**Шуугайда үжүктөр.\* Баштайгы онаалга.\* Ужар.\* Ёзулуг кижилер.**

Даартазында даң чырырыры билек, өртегни чешкеш, хемни куду салдап бадыпканнар. Ындыг кайгамчык хүннү Кызыл-Бөрттүг көрүп чорбаан. Дәэр кааң, хат чок. Агаар үргүлчү сериин болгаш шык. Эрлер салдың бир болза мурнунда, бир болза соонда эшқиишке турупкаш, чаңгыс кижи дег, бир дем-бile эшкеш туруптар. Дорт болгаш турум черлерге сал бодунун ҳөлү-бile бадып чыдар.

Айттарны сал кырында бичиي кажаа иштинде баглагылап каан. Салчылар боттары орта-ла одагланып, чемненип чораан. Сал кырында бедик кажаа кылгаш, аъш-чемни, идик-хепти ында салып каан.

Турум болгаш делгем черлерге одагга сүгжулар бо-ла бөлдүнчүп кээр турган. Ында үс-бileе чаап каан шуугай бар. Ону хүлгө борай шапкаш, кактап каапкаш, орта үжүктөр бижиир, адаар, элдеп-эзин, кижи сагыжынга кирбес ыргак-шоргак чүвелер бижип турганнар. Өскелери адап бээрge, бирээзи бижиир. Оон кээп маргыжар. Чадажып кааш, орус сүгжуга баар. Оозу үзе шиитпирлөп бээрge, ам арай боорда соксаар. Ол ашак шагда орус чуртунга эмчиге бичии өөренген кижи бооп-тур. Ынчангаш латин алфавитти шору билир.

— Мында чүү деп бижээн-дир? — дээш, шуугайда ширбажылап каан ийи кезек шыйыгны Кызыл-Бөрттүггө номчутканнар.

Ооң угаанынга кирер дээр ужур чок, ырма сынчыг херек болган.

— Кызыл-Бөрттүг дээн-дир — дээш, эрлер са-ла каттырыптарлар.

Үжүк-бижик билбес кончуумну кылдыр бодап, Кызыл-Бөрттүг оларже адааргап көрүп турган.

— Тываның чаа бижинн өөренип чор бис. Нам, чазак бижик билбес чоруктуң когун үзе узуткаар дээн-дир. Сен база өөрен — дишкеш, «а» деп үжүктүң улуг, бичезин канчаар бижиирин айтып-айтып бергеннер. — Баштайгы онаалга ол эвеспе. Кежээ шылгаар бис. Эки кыс, дүгээ баарыңга сургуулун база моон эгелээр — дээннер.

Кызыл-Бөрттүгнүң сагыжындан хүлдүг шуугай ыравастаан. Чай кадында-ла ында баар. Оон база бир арга тып алган. Одагдан хөмүр ап алгаш, чудуктарда кайда-ла балды-бileе чона шаап каан чөр бар болдур, ацаа «а»-ны бижип-ле чораан. Ындыг янзы-бileе Кызыл-Бөрттүг шылгалданы дүүште-ле тудуп каапкан. Сүгжулар ону аажок мактааш, кежээгэ дээр база бир үжүк берип кааннар. Бичии оол ындыг чедиишкинге кедергей сорук кирген.

Шала кежээликтей хемниң уну чингелеп, ийи эриктерден чалымнар үргүлчү көстүп, чалгыглар мөөп тураг апарган:

Сүгжулар:

— Ужар удавас — дижип чоруур апарғаннар.

Хүт ужары! Кызыл-Бөрттүг ооң дугайында кандыг коргунчуг чугаалар дыңнаваан дээр. Девин безин сүгжулар база ооң дугайын чугаалажып чордулар. Чоокта чаа-ла орта беш кижи кырлып калган, сөөгү безин тывылбаан. Кызыл-Бөрттүг Хүт ужарын бодап көөргө, тоолдарда азыг-дижи шаараарган амырга-моос сагыжынга кирген. Чокпак салдыг орус ашак тыва эштерин, Кызыл-Бөрттүгнү эдертип алгаш, ооң аксынче, чайлаш чок өлүмчө бар чыткан.

Ынчалза-даа сүгжуларның шырайында бичии-даа девидээн, хөлзээн шинчи чок. Олар бүзүрелдиг болгаш маажым сеткилдиг чорааннар. Олар хензиг-ле эптиг ўе тывылганда, хүлдүг шуугайынга баар турганнар. Ындыг халаптыг айыыл кыжанып келген хиреде-ле, ол кижилерниң бижики-билигже чүткүлүнүң сыйныш чогун, өндүр-чаагайын Кызыл-Бөрттүг магадап ханмаан. Ооң тайлымынга ол алзып, соңгу адазының өжүн, Хүт ужарының чалгыын уттупкаш, сүгжуларның амдыы чаа айтып берген үжүктөриниң дугайын бодап чораан.

Бир турум ээтке келгеш, сүгжулар хонары-бile салын өртеп алганнар. Аъттарны эрикке оъткарып каан. Одаг қыпсыпканнар.

Одаг чырыынга Кызыл-Бөрттүгнүң сүгга кирген мөөн дег өл идиин көрүп кааш, салчыларның даргазы алгырыпкан:

— Дораан уштур херек. Доңар болза багай — дээш, бодунуң анаа сапыктарын ап берген. — Кедип ал. Суг кыдышы кезээде шык, серийин-дир.

Кызыл-Бөрттүг багай ойбак идиктерин уштуп кааш, орус ашактың сапыктарын кедип алган. Ол идиктер бичии оолга сүгжуларны-бile дөмей узун, дөңмектөр дөзүнгө чүгле четпес болган.

Ону көргеш, орус ашак:

— Бир-ле сүгжу кижи болган-дыр ол — деп аажок чазык каттырып орган.

Оон бодунуң солуп кедер хөвөңнег хөректээжин база оолга кедирип каан. Ол аңаа кышкы негей-бile дөмей, ченнери черде сөөрттүнүп туар.

Кызыл-Бөрттүгнү чула чөмгергеш:

— Дыштанып ал. Даарта эрте туарар бис — дишкеш, сүгжулар оолду чыттыргаш, чылышы шугласп кааннар.

Кызыл-Бөрттүг бүгү-ле чүвеге тааланчыг өпейледип, анаа-ла удуучанып чыткан. Сүгжулар одаан улай чүшкүрүп, таакпылап каап, солун чугаазын төп-ле органнар. Кажан удаанын Кызыл-Бөрттүг эскербейн барган.

Эртенинде удатпаанда-ла ужарга келгеннер. Сүт дег ак саарыглар аразындан өглер дег хаяларның баштары караңнагылаан. Ужарның дааш-шиммәни ол-бо чарыктарда чалымнарга чанғылангаш, ку-лакты уюк кылыш турган.

Сүгжу ашак эң сөөлгү командазын берген соонда, салчылар эшкiiиштерни уштуп каапкаш, кажаа кырынче үне халчып келгеннер. Кызыл-Бөрттүг акыларындан туттунупкан. Сал саарыгларга каш катап кырлаш дээн соонда, ийи чалым аразында келген. Кожуп каан салдарның бажы бир чал кырынга дээр шокар көдүрлүп келгеш, онгарже согунналы берген. Оон чаштаан суг сал кырында улусту хөмө чажыпкан. Ыя аразында салдың кудуруу база-ла көдүрлүп-көдүрлүп, улуг саарыгны ажа халып дүшкеш, сүгже шымнена берген. Кажаа кырында кижилерни безин чалгыг чүлгүй шаап аппаар часкан. Кызыл-Бөрттүг туттунар дээш, арнын безин чодар чай алынмаан. Чамдыкта сал шуут көзүлбейн баргылаар. Ынчан аyttарның чүгле баштары караңагылаар. Олар, кортканындан-на боор, кээргенчиг киштей кагтылап чорааннаар.

Кызыл-Бөрттүг коргар безин чай тыппаан. Элээн каш саарыглар эрткен. Байдал оожургаш кылынган. Улус чугаа солчуп четтикпээнде-ле, база бир ужар келген. Ол баштайгызынга деңнээрге, арамныг болган.

Сөөлгү ужарны эрткен дораан, сүгжу ашактың дужааганзыг эвес, харын өөрүшкүлүг үнү дыңналган:

— Менди-чаагай болган-дыр, оолдар! Эшкiiиштерни салган-дыр!

Эрлер салчып чоруткаш, салдың ужу-бажында ийи эшкiiишти суккаш, ийи үзе турупкан. Чокпак салдыг даргазының командазы-били бирде бирээзи эжип, салды башкарып чорааннаар.

Шай хайындырым хире-ле үе эрткен. Саарыглар чок септер эгелээн. Кижилер эшкiiиштерин каапкаш, бөлдүнчүп кээп, даңзаларын тип, хаптарда кээшпезин ораай бергеннер. Улустун чугаазы үне берген.

Кызыл-Бөрттүгнүң баштай-ла ужурашканы сүгжу эр шарыгылап каан, өде берген чүү-хөө адаандан хүлдүг шуугайын ушта соп эккелген. Оозу канчанмаан-даа, кургаг хөвээр боорга, эр амырап, эш-эш, бызаалыг инек дег, улуг-биче үжүктерни шуугайынга бижигилээн.

«Ёзулуг-ла кижилер-дир бо, мындыг тура-соруктуг кижилер кандыг-даа бергелерге торулбас» деп, Кызыл-Бөрттүг ханы боданган.

Тар кызаалар эртип, Бии-Хемниң уну улам делгемчип бар чыткан. Сактырга, Кызыл-Бөрттүгнүң оруу база калбарып орган ышкаш болган.



1. Салчыларның аныяқ оолду хұләэп алганы.
2. Чогаалчы Кызыл-Бөрттүгнүң билигже чұтқұлұн канчаар көргүскени?
3. Хұт ужарын ашканын чүге бо әгеже кииргени? Ону дамчыштыр чұну илереткен деп бодаар силер?
4. «Кызыл-Бөрттүгнүң оруу калбарып орган ышқаш болған» деп домакты канчаар билип турар силер?

### Чедиги эгे

**База катап Хұт.\* Соңғу ада ыглап олур.\* Дирип-дирип.\* Дирип суртаал.**

Аревәчи Маады Кызыл-Бөрттүг Хұтке чанып келген. Орта келбәэ-ле үр болған. Дөрт чыл әрткен. Чаңғыс катап-даа көзүлбәэн.

Кызыл-Бөрттүгнү, Кызылга өөренип турда, ада-иези чок, оон ыңай ырак-узак чұрттүг дәэш, чайын школага арттырып каар турған. Сөөлгү чылдарда пионер лагеринге дыштанып келген.

Культура революциязы кидин тұлұқ. Кызылга нам школазы, башкы сургуулу, каттышкан школа, кожууннарга әге чада школовлары ажыттынғылаан. Сумуларга ликпунктулар (бижик билбес чорукту узуткаарының өөредилге пунктудары), улаан-булуңдар ажылдан турған.

Бижик-билиглиг кадрлар агаар дег негеттинип келген. Оларны кайыны алдырыл? Бижикке чаа-ла өөренип әгеләэн кижилерниң ортумак азы дәэди билиг чедип алдырын манап, он-чәэрби чыл олуар бе? Чон әгезинде кыска орукту шилип алған: бижикке өөренип алғаннар бижикке өөренип албааннарны бижикке өөредип алыр.

Кызыл-Бөрттүг бир чайын Улуг-Хем кожуунунга башкылап чайлааш келген. Дараазында өскен-төрәэн чери — Хұтче хапкан. Артында-ла боду дилеп алған.

Аалдар чайлалгарында. Хек үнү чайтылавышаан. Оът-сиген шал көк. Чечектер чұзұнү өң-баазын боордан, часкы чайынды-ла, сүстүп чыдар.

Кызыл-Бөрттүг сумудан улаг аъды мунупкаш, сеткили сергеп, сагыжы чаагай тутсуп орган. Өскен чериниң каазын, үр үе әрткен соонда, көрүп кааш, өөрүшкүзу хайнып, куюм чүрәә кустугуп чораан. Ыңчалза-даа ол канчаар доругуп келгенин, ачазының

хенертең барганын, төрээн иезиниң карааның изиг чажын, соңгу адазының доң баарлыын утпаан, база-ла бодап кел чыткан.

Дөрт чыл дургузунда Кызыл-Бөрттүг хөйнү көргөн, хойге өөренген. Оон туржук билиглерин өскелерге дамчыдып эгелээн.

Бир эвес Кызыл-Бөрттүг адышыргак, бодун тогдунар, колчук эр болза, иезиниң аалынч доозунун доюлдур, ыт-кушту ээртир чөлзип кире бээр ийик. Өгге баргаш, ында улус-бile каш борбак эрбенниг каржы сөстер солужа каапкаш, соңгу адазының кырынга-ла баар ийик: “Буура кырыыр, бодаган өзөр. Таңды дег бедик, далай дег улуг эртемниг, кайы хире-дир мен че? Шагда мени канчалчык сен?” Хол чедеринден безин чалданмас ийик.

Чок, аревәчи Маады Кызыл-Бөрттүг ынчаар кижизиттинмээн. Ол чаа үениң, чаа салгалдың кижизи. Кызыл-Бөрттүг соңгу адазының сеткилиң хомудатпас дээш, ооң-бile канчаар ужуражырының, канчаар чугаа-соот кылышының дугайын бодап чораан. Кызыл-Бөрттүг соңгу адазын эвес, эрткен үени, феодалдыг тургузугну хайыра чок буруудадып чораан: аш-түрэгге, караңгы-бүдүүлүкке шаагдаткан арат Тывада болуп эгелээн улуг өскөрлиишкиннерни чедир билбээн, чедир үнелевээн. Ындында-ла көвүдеп орган өг-булезиниң иштинге ам база бир, кидин хырын үезинде артык аас немежип кээрge, ашак кылыштанмас харыы чок болган.

Кызыл-Бөрттүг чортпушаан келгеш, иезиниң өөнүң чанында баглаашка кээп дүшкен. Дуңмалары үне халчып кээп, акызын танытай, өөнче дедир маңнажып кирип турганнар.

Өгге кирип келгеш, Кызыл-Бөрттүг аажок хүлүмзүрүп, чедип келдим дээн ышкаш, үр-ле кайгап турган.

— Экий, авай! — дээш, баштай-ла иезиниң холундан барып алган. Адаан тазартып таартып алган бажының дүгү, айт чели дег, туруп келген; калбак баг сарыг курун чыыра куржангаш, шериг хөйлецин чиңгэ белинчे шевергини кончуг бөле тыртып алган; кылаң кара савыяя сапыктыг, таныры шырайлыг аныяк эрни көрүп кааш, соңгу адазы сербээдей хона берген. Ооң угаанында бодалдар, дээрде кызаңнаашкын дег, маңнажып турган. Селбер баштыг, самдар терликтиг, ойбак идиктиг балдыр-бээжек бичии оолдуң тудуп орган аяан ол дүүн чаа-ла тепкен ышкаш болган.

Кызыл-Бөрттүг соңгу адазынга оон ыңай боданыр чай бербейн барган. Ашактың холундан алгаш, хөөрээн турган:

— Кырганнар, кайы хире чурттап ор силер? Канчанмаан-даадыр силер, ха-ха.

Кызыл-Бөрттүг харының даа манавайн, дуңмаларында-ла барган. Бичиилерин өрү қөдүрүп, ортууннарының баштарын сүйбап, шала уулугларының холдарын-даа тудар.

Иези буу-хаа чем кыла берген. Соңгу адазы орта-ла чугаа кылыш чадап каан. Кызыл-Бөрттүг ооң ындышызын баш удур билип, ону эскербээн кижи болуп билбээчеңнеп, өөренип чораанының дугайын тө каап-ла орган.

Шай болу бээрge, Кызыл-Бөрттүгже иези аяк сунарга, соңгу адазы артында өскээр көрнү берген.

Элээн үе эрткен соонда, ашак оң кирип:

— Оглуус-даа келген чуве-дир. Бичи чүвени база шурады кааптас сен бе? — деп кадайындан айтырган.

— Ажырбас. Мен ындыг чүве аас дээр эвес мен — дидиртизин-не иези тура халааш, хойтпаанда-ла барган.

Кызыл-Бөрттүг таалыбын кирип келгеш, үжей берген. Оон баштай-ла дуңмаларынга чигир үлөп әгелээн. Кижи бурузу элдепейлиг чараш белектер алган. Кым — сарыг баштыг, чингири көк карактыг ойнаар-кыс, кым — ала бөмбүк, кым — долгап-долгап салыптарга, маңрап турар бичи чычаан, кым — тударга-ла сыйт дээр ыт, кым — хүрең хилиң адыг... Үндиг кайгамчык ойнаарактар көрген эвес, чамдыктары шуут коргуп, ыглажып, чанынга чагдавайн турганнар. Кожазында өглерниң уруг-дарыны база чет-килеп келген, ойнаарактарны магадап, үглеп-ле турган. Кызыл-Бөрттүг ол уругларга чигирлөр бергилээн.

— Сеңээ белээм бо-дур, авай — дээш, Кызыл-Бөрттүг иезинче чүндөн аргып каан хөректээш хөйлең сунган.

Иези оглунуң белээн канчаар алышының безин эвин тыппайн, хайде-ле холун чоттунган турган. «Менээ кайын чүве эккелген боор» деп, чигзинген соңгу адазы анаа-ла сөс тыппайн:

— Амыраан-дыр сен, кадай, чылыг хөйлең-дир — дей тыртып кааш, идегел чок көргүлээш, кылыш чүве тыппайн, чадагай отту чүшкүргүлээн.

Кызыл-Бөрттүг савыяа чолдак тон ужуулгаш, соңгу адазынче сунган. Ону алгалакта, шуут боду тура халааш, ацаа кедирипкен. Ашак ол-бо көрдүнген, каткы-иткизи аажок турган.

- Ынча чүвени канчап садып алдың? — деп, иези айтырган.
- Эрткен чайын башкылап чайладым, шалың бээр чүве-дир — деп, оглу харылаан.

Кадай хойтпаан эзиптерге, үш-дөрт дугураанны ижипкеш, ашак анаа ыглап олуруп берген:

- Бо-даа шагның магалыын, мээн-даа кончуумну...
- Кызыл-Бөрттүг арай боорда, ооң чугаазын өскээр эдерти берген.
- Ол-даа хей чүве-дир. Ажыл-агыйның дугайын чугаалап көр.
- Ындыг бе, оглум — дей каапкаш, чожуй хона бергеш, ашак чугаалаан. — Үш аъдың бар болгай. Менди кадагалап турдувус.
- Оларны силер алыңар. Бирээзи-бile андазын садып алыңар. Ол кедилиг ажыл. Мынаар кожууннарда араттар эвилелдежип алгаш, ажылдан тураг чүве-дир. Эртен таптыг чугаалап бээр мен — деп, Кызыл-Бөрттүг катап-катап чугаалап орган.

Аревәчи Маады Кызыл-Бөрттүгнүң Хүтке чайлаг школазы башкылаар дээш чедип келгени ол кежээзинде-ле, даартазында-ла бүгү аалдарга тарай берген.

Эр улустуң аразынга мындыг хевирлиг чугаа чоруп турган:

- Чажындан-на томааның оол чүве.
- Эр-ле бооп-тур ам. Канчаар түреп өскен ийик.
- Ол ам-даа өөренир.
- Өскүстен өлбээни ол-дур...

Херээжен улустуң аразында чугааның аяны мындыг:

- Иезинге хөйлец эккеп берген дидир.
- Соңгу адазы ону канчаар үндүр сывырыпчык?
- Альттарын соңгу адазынга берипкен дидир.
- Андазын садып ал дээн дидир.

Бичии уруг-дарыгны бо:

- Ындыг ақылтыг болза.
- Чигир эккеп бээр, ойнаарактар эккеп бээр дедаан.
- Авам, ачам акымны өөредип чорудар деп тур.
- Мен чайлаг школазында бижидип алдым.
- Мен база.

Кызыл-Бөрттүгнүң үе-чергези кыстар арай бижииргеп тураг хире. Олар чоокшулавайн, өглериниң дыдыктарындан барааннап, саап орган инектериниң әмиглериниң аразындан бүдүү көрүп, ырактан хайгаарал чоруп турганнар. Ынчалза-даа оларның

чугааларында чалызы назын халынының төвий чүден көску болган.

- Дөрт чыл өөренгеш, дөрт чүүл эртемніг келген диidor.
- Оңрап, солагайлаап бижиир диidor.
- Орустап, тывалап чугаалаар диidor.
- Эртеннің-не хол, будун сургуулдадып тураар диidor.
- Чунган санында чыттыг-суг-бile чагдынаар диidor.
- Орус душтуктуг диidor.
- Оозу инек әмии тудуп көрбээн бараскан диidor.
- Хұлурешпенер, Хұттуң оғлу-дур.
- Семевенер, Севиниң оғлу-дур.

А ооң үе-чергези оолдар чугаа-соот үндүрбээннер. Ынчалза-даа адааргал сомазы турган болгай aan.

Чон улуг-бичези чокка Кызыл-Бөрттүгнүү хүндүлөп турган. Адын безин адавастар, чүгле «башкы» деп каарга, каяя-даа билдингир. Улус уруг-дарынын безин кончуурда, болганчок-ла: «Кызыл-Бөрттүгнүү көр, кандыг кижи болуп алган чанып келген-диir» дижир. Аныяктар ону өттүнүксәэш, арыг-силиг, эвилең-әэлдек болуксаар. Хұтке ол чайын төрүттүнген үш-дөрт-даа чаш уругларны адаиези Кызыл-Бөрттүг деп адап алган. Ол күзүн әлләэн хөй аныяктар Кызылче өөренип чоруткан. Чаңгыс сөс-бile чугаалаарга, Кызыл-Бөрттүг Хұтке ээп келгеш, дириг суртаал апарган.

- 
-  1. Ол үеде Тывага күлтүрлүг революция канчаар чоруп турганыл?
-  2. Кызыл-Бөрттүг Хұтке чүге келгенил? 3. Соңғу адазы оглун канчаар уткуп алган-дыр?
4. Кызыл-Бөрттүгнүүң угаанынын, төлептиин, кижи-зин кайы одуруугларда домактар херечилеп тураар-дыр, тыпкаш, тайылбырлаңар.
5. Чогаалчы хұтчүлерниң чугааларын дамчыштыр чүнү илере-диir бодаан-дыр?
6. Кызыл-Бөрттүгнүүң үлегери Хұтке кандыг салдарлыг болган-дыр?
7. «Мәң әң-не сонуургаан эгем», «Кызыл-Бөрттүг — ёзулаг маадыр», «Башкы дәэрge...» дәэн чижектиг темаларның кайы-бирәэзин шиләэш, чогаадыгдан бижиир.
8. «Кызыл-Бөрттүгнүүң ачазының овур-хевири» деп темага дыңнадыгдан кылгаш, класска номчуур.
- «Буура кырыыр, бодаган өзөр» деп үлегер домакка утказы чоок үлегер домактарны тыпкаш, тайылбырлаңар.
9. Эртем-билиг дугайында еске чоннарның болгаш тыва улустарның үлегер домактарын чыггаш тускай төлевилелден чогаадыңар.



10. Аревэ, амырга-моос, казанак, кожактыг сал, лоцман, сургакчы деп сөстерни «Тыва дылдың тайылбыр словарындан» тыпкаш, утказын тайылбырлацаар.

11. Даши тепкеш чыдыпкан, доң баарлыг, дыргак каразы дег, кара баары кадар, кулак уюк, кызыл-дустай берген, эзди чажып каар деп турум сөс каттыжыышкыннарын «Тыва фразеология словарындан» тыпкаш, утказын тайылбырлацаар.



**Шаңгыр-оол Монгушович  
СУВАН**  
(1949)

**Чээн оол**

*Чечен чугаа*

Аңгыр-оолдуң шагдагы күзели ам-на бүткен. Ам бир аңнап келгеш, әдертип алыр мен деп даайы аазаан. Келир хүнүн безин болчап каан. Ол хүн бөгүн келген. Аалдың чанында тейжигештиң бажынче үне маңнап, даайы чоруп ор ирги бе деп, шынааже чингелеп бады барган дыйлагар оруқче каш-даа катап харап көрген. Даайының барааны безин көзүлбес.

Аңгыр-оол даайынга аажок чоргаарланыр. Черле ынчаш, даайы ол чоок-кавыда хүндүткелдиг кижилерниң бирээзи. Шолазы безин «Аңчы». Кижилер ооң дугайында чугаалажып тура, ёзулуг адын адавас, «Аңчы» дижир. Аңгыр-оол даайынга дөмөй болуксаар, ону өттүнер. Бо бүгүнү даайы билир. Ол дээш чээнинге ынаа кончуг.

Аңгыр-оол база бир харааш, келирге:

- Аңчы кижи дөскел чок болбас. Таваар, далаш чок боор чоор — деп, авазы чугаалаан.
- Далашкан күске сүтке дүжер деп чуве бар.
- Кээр мен дээн хүнү эртер деп барды ышкаждыл — деп, оол чөгөнгөн.

— Манап өөрен. Чогум-на ынчан даайың ышкаш аңчы боор сен — деп, авазы оглун сургаан.

Ооң үнүнде чоргаарал дыңналган.

Авазының аайы-бile Аңгыр-оол тей бажынче үнмес деп шиит-пирлеп алган. Бынчалза-даа бар-ла сагыжы ынаар тырткаш турар. Бодун алаактырып, даайы-бile аңнап чоруурун сагыжынга чуруп эгелээн. Эгеректиң ээргени ону күзелдеринден адыра соп эккелген. Аңгыр-оол даштыгаар үне-ле халаан.

Даайы аңнап мунаар доруг аъдының кырында шала тыртыйты эрестии кончуг кылдыр саадапкан, аал мурнунда шыкты кежир саяктадып орган. Аъдын даайы «Кыяр сиген сыя баспас, чүстүг сиген үзе баспас Аңчы-Доруг» деп мактаар. Уткуй маңнап келген чээнин айт кырындан ээгип, күштүг холдары-бile иийи колдуктан ап, агаарга чииги кончуг бедидир октай аарак көдүрүп, хөрээнге чыпшыр куспактап, мурнунга ушкарьып алган.

— Аа-че, күжүр кайгалды — деп эргеледип айтырган. — Четтикпейн тур сен бе?

— Иие. Чиде бээриңгэ, келбес деп бодадым.

— Ээ — деп, даайының хатка, соокка дадыккан хүрец-кызыл арны, чидиг кара карактары шириин апарган. — Эр кижи сөглээн сөзүнгэ ээ болбаска, сөөлүндө барып дөңгүр көк буга бооп хуула бээр хоржок болгай. Сөглээн сөс — керткен ыяш. Чедип келгеним бо-дур.

Даайы чээниниң аңнаксаар күзелин билип, ону баш бурунгаар белеткеп келген. Аңгыр-оол-бile кады арга-арыг кирип чорааш, аңнарның, күштарның истерин көргүзүп, дааш-шимээни, алгызы, үннери-бile таныштырып, аңнап келген назынының иштинде көрген-билген чүүлдерин чээнингэ өөредип каарын кызып чораан.

Даарта эртенги одарда аңнаар деп даайлышкылар дугурушканнаар.

Ижин изидер шай чылышып иже тыртып алгаш, чер чаа-ла чырып орда, аалдан үнүпкеннер. Аңгыр-оол даайының дүүн белекке эккеп берген дүүргезин чүктеп алган.

— Хүн үнмээнде сын кырынга чедип алыр-дыр — дээш, даайы орукту баштап, мурнай чиик-чиик базыпкан.

Даайындан чыдып калбас дээш, Аңгыр-оол дүрген-дүрген чоруп орган. Бежен хар ажа берген-даа болза, даайының ам-даа кашпагайын ол магадаан.

Сын кырынче үнүп олурда, хүннүң алдын-сарыг дукпуртузу, даглар артындан оларның-бile деңге көстүп кәэп, мәэстерни кызылдыр шона берген.

— Сынны кырладып, мәэстерниң кырындан харап көрээли — деп, даайы тайылбырлаан. — Бедидир чоруурга, аңнар белен чыт кага албас. Бистинң чыдывыс агаарга дүрген эсти бәэр.

Мәэс бүрүзүнүң бажындан кәэп харап, дужунда мәэстерде аң көстүр ирги бе деп көрзүнүп чорааннар. Бир мәэстинң бажындан өндейип харап көргеш, даайы күдүш кыннып, дис бажынга шимәэн чок ора душкеш, дужунда мәэсче холу-бile имнәэн. Аңгыр-оол оожум харап көөрге, ында ийи аң сезик чок оъттап турган.

— Идиктеривисти маңаа уштуп кааптаал — деп, даайы сымыранып чугаалаан. — Кызыл-даван кижи белен дааш үндүрбес боор чүве.

Идиктерин уштуп каапканнар. Даайының кылажы көңгүс дааш чок апарган. Ону соондан көөрге, күске кедәэн диис-ле. Чүгле кулбуруур чүве. Аңгыр-оол база, барык-ла тын тынмайын, даайының изин соора баспайн, кеденгирлеп чоруп орган. Кылажы чүгле бут баштай берген. Сактырга, әләэн дыңзыдыр базыптар болза, чер ойлуп кире бәэр ышкаш.

Аңнар көргени мәэстинң бажындан хөлөгелер дег шип-шимәэн чок харап келгеннер. Эртенги сериин салғын аңчыларның чыдын аңнарга чедирбейн, хемни куду алгаш бадып турган болгаш, аңнар чүнү-даа эскербейн, тайбын оъттап турганнары ол.

— Элик биле хұлбұс-түр — деп, даайы сымыранып тайылбырлаан. — Мыйыстыы хұлбұс. Ооң чанында элии-дир.

Дириг аңнарны бо хире чоокка бир-ле дугаар көрген болгаш, Аңгыр-оол ала-чайгаар-ла оларны чарапсынып кайгай берген. Буттары узун, чинге, мага-боду шилгедек. Кулактары сүүр-сүүр. Шим-чәэрge, кежининң дүгү эртенги хүннүң херелинге кылаш кыннып, алдынналып каап туар. Дааш-шимәэн дыңнаалап, чыт тыртып, шимчеш дивейн, тура кагылаптарга, даштан чазап каан ышкаш.

— Чараштарын! — деп, боду безин билбейн, Аңгыр-оол оожум чугааланы каапкан.

— Ш-ш-ш — деп, шииңейндиr сымыранып, даайы оолчугаштың аксын чодур-чодур чоон, бұзүргей салаалары-бile дуй тудупкан.

— Адар-боолаар дәэн аңын аңчы кижи чарапсынmas чоор.

Кайы хире айыыл оларның кырында диргелип келгенин элик биле хұлбұс кайын билир. Агаарның ағымында сезинчиг дааш-даа, чыт-даа эскербейн, бот-боттарынга эргеленчип, үскүлешкиләэн.

Бодун-даа, даайын-даа, аңнаашкын-даа дугайында уттупкаш, Аңғыр-оол аңнаарны чарапшынышаан. Даайы боозун оожум көдүрүп кәэп, хұлбұстүң чарап мага-бодунга эң-не өлүмнүг черни дилеп, чүрек дужун бодап, боозунуң хараалын тас колдуқка доктаадып, шыгаай бергенин эскербәэн. Чер-дәэрни сиртиледи чаңыңдың чыжырт кылдыр дүжүп, эртенги шыпшыңын чара шаапкан ышкаш болган соонда, хұлбұс бир ийинче тендиш дигеш, турган-на черинден өру дүндүүштелдир окталдыр шурааш, черге молдурукталы кәэп дүжүп, мәэсти куду хая-дашты кизиреدير дукпурланып бадып чыда, улуг дашка ызыртынгаш, мыйыстарын адаанга эпчогу кончуг кылдыр баскаш, тепкилени берген. Элик чүү болганын аайын тыппайн, дөрт будун хере тепкеш, кезек када ыңай-бәэр сүүреңейнип турган.

Хұлбұстүң даайы адыпкан-дыр деп Аңғыр-оол ам кәэп билип каап, олче көрнү хонуп кәэрge, демгизи, шураарынга белеткени берген бөрү ышкаш, шала өндөйип туруп келген, боозунуң мажызын базарының кырында келген болган. Аңғыр-оолдуң холу карбаш кынгаш, боону бир ийинче шеле сопкан. Бoo частып, ооң даажы хемни өру динейнип чоктай берген. Ол өйде элик ыяш аразынче шимеш-ле дәэн.

— Ол канчаарың ол! — дәэш, даайы оолду ойтур иде каапкан.— Ок-боо ойнаарап эвес ышкажды.

Аңғыр-оол чүнү-даа ыыттавайн, даайынче кезе көрүп алган орган. Оолдуң мурнунда даайы эвес, а көңгүс өске кижи ышкаш болган. Үнү донгун, карактары соок, шимчәэшкиннери каржы.

— Хайыраан элиkti. Сен эвес болзуңза... — деп, даайы оолду чемеләэн. — Че, олчавыс барып көрәэли.

Хұлбұс ам-даа өлбәэн. Эртенги арыг агаарны кара күш-бile хөрәенче харамдығып киир тынып, тура халааш, өлүмден дезип ыңай болур дәэнзиг, тепкиленип чыткан. Даайы ооң мыйызындан алгаш, күштүг-күштүг шеле соккулаптарга, хұлбұс дөрт даванын хере теп, мага-боду хенертен дыңзыш кынгаш, чоорту суларап бады барган. Хұлбұстүң шимчевес өлүг карактарында мәэс кыдышында ыяштарының баштары, аяс дәэр, даайы биле Аңғыр-оол боду көрүнчүктелдир көстүп турган. Сактырга, хұлбұс ам-даа өлбәэн, чер, дәэрни,

кижилерни мага хандыр көрүп алышсап, каракты караңгылады, хөрек-чуректи дакпыжадыр базып келген коргунчуг күштүң кайын келгенин билбейн, Аңғыр-оолдан айтырып чыдар ышкаш болган.

Олчугаштың карактарының чажы бүлдеңейнип келген. Даа-йынга бодунуң кошкаан көргүспес дәеш хая көрнүп, даш кырынга барып олуруп алган.

Ийи билээн даап каапкаш, даайы хүлбүстү союп эгелээн. Аңғыр-оол көрүп олурага, ооң аң союп өөренгени аажок болган. Шимчээшкіннери, артында, аай-аай. Чүгле холунда бижээниң бизи кылацнаар.

Даайы:

— Бээр кел. Аң соярын көрүп ал — дээн.

Аңғыр-оол:

— Хөңнүм чогул — дәеш, ынаваан.

— Аң-мең кээргээр кижи аңнаар-меннээр мен деп сөс эткен хөрөө чок — деп, даайы шириин чугаалаан.

— Моон соңгаар силерни эдербес мен. Ма, боондарны ап алышар — дәеш, дүүргени даайынга тутсуп берген. — Аңчы болбас мен.

— Ыы, билдине берди. Алыс черле аңчы болур балдыр сенде чок-тур — деп, даайының үнүнде чемелээшкін дыңналган. — Боону эгидип берип турарың шын-дыр. Эр кижи боону аңнаар дәеш чүктээр. Аңнавас болза, азынган ажыы-даа чок.

Аалга даайлышкылар кээрге, оларның аразында бир-ле эпчок чүве болганын авазы дораан-на эскерип кааш:

— Олча-омактыг келген хирендерде, чүге дүндүгүр-ле дүмбей апарган силер? — деп айтырган.

— Аң-мең кээргээр оол-дур — деп, даайы кончуттунган. — Ындыг кижи кайын аңчы болурул бо. Тайга-таскылдың аң-медин кижи аңнаап чип чорзун дәеш агаар-бойдустан чаяаттынган чүве ыйнаан.

— Чаяаттынганы, харын ындыг-ла ыйнаан — деп, авазы оглун бодунче чыыра туткан. — Оглумнуң эриг баарлыг эр кижи бооп өзүп орары эки-дир.

— Эр кижини эргээ өстүрөргө кайын боор. Эр кижи эргээ эвес, бергээ өөренир хөрек, чәэн — дәеш, даайы чәэниниң караанче топтап көрген.

Оолдуң карактарында мурнундагы хүндүткелдин, эргелениши-кинниң ис чок эстип каанын ол эскерген.

- 
-  1. Даайлышкыларның аразында найыралын көргүскен одуругларны номчааш, аңа хамаарылгаңарны илерединер?
2. Чүгө Аңғыр-оолдуң мурнунда даайы эвес, а көңгүс өске кижи болган деп бодаар сiler?
3. Даайының овур-хевириң кандыг уран-чечен аргалар-бile чураан-дыр?
4. Аңғыр-оолдуң турум, кәэргээчелин кандыг таварылганы дамчыштыр көргүскен-дир?
5. Авазының «Оглумнуң эриг баарлыг эр кижи бооп өзүп орары эки-дир» дәэниң канчаар тайылбырлаар сiler? Оң ол бодалынга каттыжар сiler бе?
6. Чогаалда ажыглаан аас чогаалын тыпкаш, тайылбырлаңар.
-  7. Чогаалга пландан тургускаш, ооң-бile делгеренгей чугаалаңар.
-  8. Ш. Суваңының эләэди оолдарның овур-хевириң чурааны «Сүлде» деп чечен чугаазын номчааш, «Аңғыр-оол биле Каң-оолдуң овур-хевирлери» деп дыңнадыгдан бижицер.
- 

#### IV кезээ. ЧЕЧЕН ЧОГААЛ ДЕЛЕГЕЙИНДЕ МӨНГЕ ТЕМАЛАР...

**Сергей Бакизович  
ПЮРБЮ**

(1913—1975)

Эргеппей дугайында тоожу

Суурнуң артый талазын куду чиңгир ногаан шык шөйлүп баткан. Оң ындында чодур-чодур теректер баарында кезек-кезек талдар болгаш чодураалар, иелериниң эдектеринден туттунгулаан уруглар дег, бөкперлешкен. Хем ол чарында дагларның мөрзең-мөрзең баштары кара-көк, ак-көк, чидиг кызыл, алдын-сарыг апарылаан ашкан хұнчес көрүп алған турғаннар.



Колхозтуң хоочун чылгычызы Сандан-бile ооң бажыңының верандазынга хөөрежип олур бис. Бажыңың хериминден чуксуг болгаш дозузуг чидиг чыт кәэп тур. Сандан шалада ширтек кырында баскактандыр олуруп алган, чаа шериг эзер-бile үрелдешкен олур.

— Чaa эзер ышкаждыл. Ооң чүзүн канчап олуарыңар ол? — деп сонуургадым.

— Чaa эзер харын, дергизи чок чүве-дир. Чер чоруур, мал көөр кижи дерги чокта хоржок боор чүве болгай, аргамчы, кижен дергилеттинмес. Дерги кылып олур мен.

Ол аразында хүн ажып, даглар баштары кууарып, ыяштар карарып келди. Сыннар баштары биле дээр хаяазы кып-кызыл апарган, ооң кырында дээр ак-көк, бораңгай куу кылдыр алаланып чоруй барган. Веранда баарында чодураага бора-хирилээ хона каапкаш, шимчеп турган чинде будукка думчуун шалып-шалып, бисче шымыраш кылынгаш, хирт диди. Кежээликтээн тудум-на, суурнуң дааш-шимээни чоорту чавырлып, ыржымы улам дам бар чыдар.

Сандан сугнуң алдыны дужунда колхоз конторазы кудумчуже көрнүп алган турага мындыг чүве. Ооң кырында радио тургузуп каан. Ыржым өттүр дикторнуң үнү кончуг тода дыңналып келди:

«Өртемчейде хамык улус  
Өске башка өскен черлиг,  
Аразында билчи албас  
Аңгы-аңгы чугаа дылдыг,  
Ынчалза-даа Ленинни  
Ылап четче — төдү билир...»

— Диқа-ла сөглеп каап-тыр аа, ашак? — деп кагдым.

— Черле ам — дээш, Сандан эзерин ынаар салып кааш, стол чанынга кәэп, мээн-бile дужааштыр олуруп алды. Оон холунуң улуг-эргээ-бile тарамык сегел салын өйдүктүрүп, кежээки дээрниң кылайган хаяазынче кайгап, ыыт чок боданып олур.

— Чүнү боданып олуарыңар ол? — деп ыыт чок олуарга, эпчок боорга айтырдым.

— Чок аан. Бо радиода чугаалап турган чүвени дыңнаарымга, биеэги Эргеппей ашак сагыжымга кире-дир ийин — дидир.

— Ол ашактың дугайын шала-була дыңнаан кижи мен. Силер ону эки билир боор силер аа? — деп айттырдым.

— Ээй-да. Барык-ла ооң холунга өскен кижи болбазык мен бе!

— Кончуг солун кижи дижир чүве. Кезек хөөрөп берип көрүнчөрөм — деп ээрштим.

Сандан хола-бile сиилбип каастаан докпак баштыг даңзазынга таакпылап, боданып олура, далаш чок чугаалап эгеледи...

## I

Билип кээримге, ачам-даа чок, бичиимде-ле өлүп калган дээр, авам-бile иелээ улус чораан бис. Мал-маган дээр чүве-даа чок, чаңгыс дөңгүр кара инектиг бис. Авам Хүндүппей мээреңниң инээн саар, алгы-кеҗин эттээр, идик-хевин даараар, а мен оларның хоюн кадарар мындыг мен.

Хүндүппей мээреңниң чылгычызы Эргеппей деп бир кижи бар. Өг-баш чок болгаш, бистиң өөвүске тураг чүве. Улус ооң лимбилээрин магадаар. Ындыг-даа болза, мен ооң лимбилеп олурганын дыңрап көрбээн мен: эртен туруп кээримге, чылгы манап хонгаш, эрте чедип келген удуп чыдар, а хой кадарып хүнзээш, кежээ чанып кээримге, чылгыже чоруй барган боор.

Чайллагга көжүп чедип келген соонда, чылгыны кадарbastай бээр: бистиң чайллагны билир силер ыйнаан, кайы-даа талазы муңгаш эзим, сериин хем бажы, барык-ла сын кыры чер-ле болгай. Мал оон үнүп кай-даа барбас, оът оъттаар, девээлээр черлери илдең, саар белерни аал иштиндөн кым-даа хавырып эккээр. Ынчангаш чайллагга үнген соонда, Эргеппей аңнаар дээш сураг чок баар, чүгле күскээр көстүп келир. А мен дээрge чай, кыш чок хойдан чарылбас, ойнаар-хөглээр оолдар аразынга-даа шоолуг кирбес мындыг мен. Кара чажымдан эр болгужемче хүннүң тооннуг ынчап кээримге, өөрени-даа бергени ол ыйнаан. Ынчаар-ла чурттап чордум.

Бир-ле катап, күскээр чайын, кежээликтей Хүндүппей мээреңниң оглу Доржатпаа өөвүске кире халып келди.

— Ачам силерни келицер дидир — дээш, уне болду.

Авам курун эде куржангаш, шала авырара берген чоон кара чажын суйбай туткулааш, чорупту. Кылыр чүве тышпайн, от көзөп, хүл бузурадып олур мен. Эжик ажыттына берди. Көөрүмгэ, Эргеппей таалың тудуп алган, эжиккө сыңып чадай-чадай, кирип олур.

— Аваң кай барган? — деп, чушкууш-бile даңзазын ажыдып олура, айтыра-дыр.

— Кел дирткен. Улуг өгде барды — дээш, ам чүнү айтырар ирги деп манап, чугаа ээреп олур мен.

— Аа, улуг өгде — дээш, соксаш кынгаш: — Хүндүппей сугда де? — деп ылавылап удур айтыра-дыр. Арай кайгай бердим: улус Хүндүппейниң адын адавас, “мээрен” дээр, ооң өөн “улуг өг”, аалын “улуг аал” дээр чүве болгай.

— Ийе, Хүндүп... — дей каапкаш, шок дүшкеш: — улуг өгде — деп кагдым.

— Ийет, ындыг-дыр. Че, чүнү кылып тур сен? — дээш, тудушкак хаваааның кирбиин адыраш кылгаш, менче көрүп олур.

— Хой-ла кадарып тур мен — дээш, оон ыңай чугаалаар чүве тыппайн, от чүшкүре бердим.

— Аа, хой кадарып де? — деп, чаңы-бile ылавылааш, хомудаандаа чүве дег, бир бодаарга, сургаан-даа чүве дег, чугаалай-дыр. — Ол дээргэ эр кижиниң херээ эвес-тир ийин. Эр кижи альт мунаар, ырак-узак чорук кылтыр чүве боор...

Чугаа төнгелекте, авам кирип келди.

— Чүге кел дээн-дир, дом? — деп, Эргеппей айтырды.

— Аайын-даа тыппас мен, акыжыым. Бо оолду сilerниң-бile кады чылгы кадарзын деп чарлык боор чүве-дир — дээш, делегей кырында оон өске ацаа сүме кадар, дуза болур кижи чок ышкаш кылдыр Эргеппейже кезек кайгап алган олур. Мен база-ла чүү дээр ирги дээш, бүгү бодум сундуга берген манап олур мен.

— Ында аайын тыппастаар чүү боор! Харын болган-дыр. Он алды хар четкен, эр апарган кижи чылгы манавайн, альт мунмайн канчаар! — дээш, Эргеппей дүндүгүр арны хүлүмзүрүгден чырып келген, дүктүгүр кара хаваааның кирбиктериниң адаандан карааның шозу чайынналып келген көрүп олур.

— Шынап-ла, авай, хой кадаарга кижи эки чүве көрбес чүвэдир. Бо акым-бile кады чылгыдан кадарып көрэйн. Черле ажырбас мен! — деп, хөрээм долган бүгү-ле бодалымны илередип, авамче сицниге-ле бердим.

— Альт-хөлден ушса канчаар, улустуң мал-маганын оскунупса канчаар. Моон ужур-чөвүн мээренгэ айыткап көрүцер, акым. Мен ынча дей албас, коргар кижи-дир мен — деп, авам үнү сирицейнип, Эргеппейден дилей-дир. Ынча дээргэ, хөнгүм карара-ла берди.

— Ам үш-дөрт хонгаш, ишкээр көжер ыйнаан. Ыя аразында

оглуңнуң орбак-дыдынын илип бер. Оон башка чай тывылбайн баар. Кижи аyttка шавар, чылгы манаар кылдыр төрүттүнүп келбес чuve боор. Өөрени бээр, ажырбас. Буту назынында хой соондан кылаштаар эвес бо — дээш, таалыңындан аң эъди ужуулгаш, деспиге салгаш, авамче сунду. Бис ышкаш улус ол шагда, этт чиир хамаанчок, оон бараанын безин хаая көөр чuve болгай.

## II

Чайлагдан көшкен дораан, бисти Эргеппей-бile иелдиривисти ээн чадырга эккеп, чылгы манадып каан.

— Баштайгы каш хонукта хол ызырты манап тургаш, ызырындырып өөредип албааже хоржок — дээш, Эргеппей чадырдан үндгей аарак ээгип алгаш, үнүпту.

— Дүне када корга бербес боор сен аа? — деп, Эргеппей дедир келгеш, эжиктен бакылааш, айтыра-дыр.

— Чуден коргар мен.

— Иие, ындыг харын... Эр кижи кортук болбас — дээш, чорупту.

Чадырда чааскаан калдым. Чалгааранчыы сүргей. Даشتыгаа үнүп келдим. Ишкээр көөрүм-ге, ыйылактарлыг, борбак-борбак тейлерлиг хову чаттылып бады барган. Кедээр көрген — ол-ла хову кызаалаза-кызаалаза, ийи ой кылдыр чарлы берген. Ойларның аразында узун каъттың бажында ашкан хүннүң херели алдын-сарыг кылдыр төкту берген.

Бистин чадырлыстың устүү дужунда дедир көрген улуг кара чалым. Та канчап оон үнүп келген чuve ийик, ол туругнуң кырында чаңгыс чодур кара пөш, хереп келген адыг дег, сирбее берген тур.

Имир дүжүп келгенде, ыяш чарып кирип алгаш, тараа соктап кагдым. Караптылап, дүн дүшкен. Ыржымы дүлей чuve-бile дөмейле. Чеже олурап, удуп чыдып алдым. Чaa-ла удумзурап чыдырымда, шала өрүлдүр ыт ээрэ-дир. Черниң черинге чоруур кандаай ыт боор, тенек аарыг ыт бооп чадавас дээш тура халааш, чадырым эжин шарып тур мен. Ол аразында демги ыт суг унун куду ээрип батты. Удаткан чок бир-ле кургамзыг үннүг кижи чадыр баарын өрү дайгырып чоктады. Угааным арай чиктии кончуг. Чүрээмниң согары илден, тиккигейнип-ле тур. Ынчап аайын тыппайн боданып турумда, ынаар өрүлдүр чаш уруг-даа аацайнып үндү. Ам-на арным изиңейнип, чартык-чартыым чымырткайны-ла берди. Кылаштаар

дээн — бир бут көңгүс шимчэттинмес, чөрдө чыпшыр кадап каан чүве-били дөмөй-ле. Бир будумну сөөртүп чорааш, орнумга арай боорда чедип келгеш, тонумну башче дуй тырттынгаш, доңгая барып дүштүм. Сактырымга, чадырның дыдыктарындан хөй-хөй карактар бакылап, даштын кодан долдор ыттар маңнажып турган ышкаш. Ынчап коргуп чыда, удуу каап-тыр мен. Бир билип чыдарымга, кижи алгырып тур. Уйгум-били тураллааш, чүнүң-даа ужурун тыппайн, сербээдэй берген тур мен. Ам-на дыңнаарымга, даштын Эргеппейниң үнү үне-дир:

— Эй, оол, ойт! Кандыг кончуг удуур кижи сен? Эжииң ажыт!

Топтап көөрүмге, чадырның дүндүүнден болгаш дыдыындан хүн херели кирип кээп-тир. Баргаш, эжийимниң шарыын чежип, ажыдыптым.

— Чүдөн коргар кижи сен? Эжииң чоп шидип алган сен? Чоп кортпас мен дижик сен? — деп, Эргеппей кирип олура, айтырды.

Ам канчаар, дуне болган чүвени чугаалап бердим.

— Уваа. Бараа элдеп чүве-дир, а оттан салып, шайдан хайындырып олур — дээш, ашак боозун алгаш үндү. Элээн бооп чорда, боо дирс диди. Шайны эзип олурумда, Эргеппей үгү салбайтыр тудуп алган кирип келди.

— Коргуп турган чүвөң бо ышкажды.

— Элдептиин але. Ол кандыг аайллыг чүве боор, акый!

— Кылышмазы чок кулугур болдур ийин. Дуне койгун көрүп алгаш, ыт өттүнүп ээрип, кижи өттүнүп дайгырып, ону шүүргедеп турганы ол-дур ийин.

— Чаш уруг ыглап турагар, ол чүл?

— Ол үгүгэ тептирип алган койгуннуң алгырып турганы ол-дур ийин.

Шынында-ла, ол үгү өлүрткен соонда, ындыг чүве болбаан. Ооң соонда каш хонганды, Эргеппейни лимбилип көрүнер деп ээрежип эгеледим. Ашак-даа улуг дилетпейн, ойнап берди. Тааланчыг аялгалар чүрээмгэ чедип, бүгү мага-бодумга тарап турган ышкаш болду. Ийи караам шийипкен дыңнап олур мен. Лимбиниң үнү хенертен үстү хона берди.

— Че, ам болзун. Мөөң-били дыка бержип болбас чүве болдур ийин — дээш, лимбизин хаптап алды.

— Чүгэ ындыг чүвел, акым?

— Мөоң-бile эмин эрттир эптеҗир болза, кижи уярап, кедерәэр. Эр кижи уян-кенен болбас чүве боор.

— Адаа кижи лимбилеп өөрени берип болур бе кандыгыл?

— Лимбиниң үнү биле кижиниң сеткили хөөннеш болза, өөрени берип болбайн аан.

Ооң соонда әләэн каш хүн оралдажып келгеш, лимбиге бир-ле ыңдыг аялга ойнап тураг апарған мен. Оомну бир катап Эргеппейге ойнап бердим. Ашак мәэң салааларымче көрүп, топтап дыңнатап олуруп-олуруп, мынча дидир:

— Ужур бар-дыр. Лимбилеп олура, иштинде бүдүү ырлап көрем, кандыг эвес.

Шенеп көөрүмгө, тааржып тураг болду.

— Ам ажырбас, дүне чылгы манап болур сен — деп, Эргеппей бүзүрелдии-бile чугаалады. — Чылгычы кижи дүне лимбиләэрge, бөрү шеглиг боор чүве. Бо чылгы база өөренип калган. Дүн эрттириеринге база дөгүм.

- 
- 
1. Суурнуң пейзажын чуруп көргүсken уран-чечен аргаларын ажыглаанын тайылбырланар.
  2. Санданың Эргеппейге хамаарылгазын кайы домактар бадыткан туар-дыр тыпкаш, сайгарындар.
  3. Сандан канчап чылгычы апарғаныл?
  4. Чайлагга көжүп келгеш, баштайгы дүннү Сандан канчаар эрттиргенил, ооң чылдагааны чүдел?
- 

### III

Бир кыжын Булук-Бели деп черге чылгы кадарып кыштадывыс.

Бистиң тураг черивис аалдардан ырак. Бистиң-бile улус-даа шоолуг аргышпас. Чылгыда ийи-чаңгыс малын бүдүү чагып салып каан улус бар. Олар-ла харын ында-хаая малын көрүп, биске дуюкаа шай, таакпы берип четкилеп кээр чүве.

Хүндүс чылгы хавырар, чадырга олурбас болгаш, оларның Эргеппей-бile аразында чугаазының чүгле ужу-кыдышын дыңнаар мен.

Шала часкаар, оът бажы чап-чаа шымырарып чыдырда, чылгы бөлүп чорааш кээримге, Карапмай ашак келген олур. Богбалыг бези бар чүве, оозун көрүп чораан болду. Бирээзи дөрнүү дуй эжеләэн,

бирээзи чүйк баарын дуй алы берген, ийи улуг кара эзирлер дег, эрлер шала күдүйжүпкен шагда-ла өжүп калган от кыдырында аяар чугаалажып олурлар. Мен кирип кээримге, чугаазын арай шеглей берди.

— Шаг бажы кадыраан, төре дошкуураан мындыг чүве-ледир, та чүү болур чүве ыйнаан бо — деп, Карацмай шейүп чугаалаан.

— «Шаг шаа-бile турбас, чавылдак көгү-бile турбас» дээр чүве болгай. Шаг эргилдэзи келгени бо боор — деп, Эргеппей боданып олура, чугаалады.

— Ийет, харын аан — деп, Эргеппей менчे көргеш, чугаалады. — Өртегде мээн аъдымны суттаргаш, даштыгаа эккеп баглап каайт.

Оларның чугаазын дыңнаксаарым кончуг. Ындыг-даа болза, олар мен турумда чугаалажыр хөңну чок шинчилиг, ынчангаш чоруптум. Чедип кээримге, Карацмай чоруй барган болду.

Ооң соонда Эргеппей, ындында-ла чүве ыттавас боду, улам дам үнү читкен. Чамдыкта бир-ле көрүп алган чүвэзинден карак салбайн боданып-ла олурар. Ынчап барганда, кижи чүве айтыррага, сырбаш дээш туруп келгеш, хүлүмзүрүп каар. Сагыжын саарзыйтып чоруур бир-ле чүве бары илден.

...Бир хүн чылгы хавырып чоруур деп турумда, мынча дидир:

— Қулуннар ам улгады берген, ажырбас. Аан бээр барып көрүп каар сен. Ам бичии чугаалажыл.

Чүнү чугаалаар дээн кижи боор дээш, манап олур мен.

— Эр кижи үш эттиг боор чүве. Ону билир сен бе? — деп меңээ мындыг тывызык салды. Аайын тыппайн, караам чивеңнедип олур мен. — Эр кижи оттук-бижектиг, сыйым аргамчылыг, эки альтыг боор чүве. Оттук-бижек, сыйым аргамчың бар-ла-дыр харын. Аъды чок эр кижи кандыгыл билир сен бе?

— Харын... — дээш, чугаалаар чүве тыппайн олур мен.

— Аъды чок эр кижи чалгыны чок күш дег боор чүве, билдиң бе? Ам бодунду бодап көрем, кандыг-дыр сен.

— Хүү-салым ындыг болганда, ам канчаар боор — деп, бир талазында, альт-даа чок, чадаг, түреңгимге муңгарап, ийи талазында, ындыг чадаг түреңгимниң уржуун тыппайн, шыжыгып харыыладым.

— Сен ам чаш уруг эвес, эр апарган кижи-дир сен. Күш төлүкандыг ийик. Чалгын-чакпазы чедишкен соонда, ажы-төлүн төрүп чоруй баар. Мээн калчан шилги альдымын альт кылып ал. Оон соонда канчаарыңындаа бодуң бил.

— А силер?.. — дээш, аңгадай берген олур мен.

— Менээ сагыш човааш чоор сен. Менээ карак болур улус хөй... «Чону — чоорган, хөйү — хөйлец» дээр чүве болгай. Мен ажырбас мен. Сен ам альттангаш, чылгыңын маңаа бөлүп эккел — дидир.

Ашактың чүве чугаалап олуарын бодаарымга ёскелиг, чиктиг деп чувези аажок. Ам канчаар, чылгымны хавырып эккелдим. Эргеппей мээренциң суму кырында чүгүрүк бора альдын туткаш, эзертеп алды.

— Хүндүппейниң чылгызын он ажыг чылда кадарып келдим, чаңгыс кулун-даа оскуунмадым. Кижи күжү халас барбас чүве. Оон чажыңынга бо бора альтты актын-били алышым ол. Ынчаар домактаныр сен — дээш, таалыңын арттынш алды. Чувээ чоруур деп барганы илден.

— А силер кай баарыңар ол, акым? — деп, диттип чадай-чадай, үнүм сириенеийн айттырдым. — А мен канчаар мен?

— Ам дээрэзинде мээренциң чылгызын кадарып тур. Оон соонда оруун тыва бээр сен, ажырбас. Чылгычы кижээ бо херек чүве — дээш, лимбини берди. — А мен дээрге, мен ышкаш кижи байларың чылгызын кадарып чыдар хире эвес, ёскээр хайдынаар апарган шагдыр бо — дээш, альттангаш чорупту.

Булук адаанда чикти кешкеш, баалык кырынга чортуп үне бергеш, бир хая көргеш, альдын каккаш, караш диди.

- 
1. Кыштагның турага чуруп көргүсken уран-чечен аргаларны ушта бижээш, сайгарыңар.  
2. Эргеппейниң Санданга чагыын чүү деп бодаар силер?  
3. Эргеппей «Шаг шаа-били турбас, чавылдак көгү-били турбас», «Чону — чоорган, хөйү — хөйлец» деп үлегер домактарны чуге ажыглаанын тайылбырлаңар.  
4. Эргеппей кайнаар, чуге чорупкан деп бодаар силер?
- 

## IV

Эргеппей чоруй барган соонда, сактырымга, оран-делегей ээн калган чүве-били дөмей-ле. Чааскаанзыраар магазы-били чааскаанзырап пат-ла болган мен. Угаан-сагышка чүве кирбес,

артында-ла сээдең апарган мен. Каш хонгаш, чадырымны бузуп, базырып кааш, чылгыны чайлагга үндүре бәәримге, Хұндүппей чайлаанда көжүп келген болду. Эргеппейниң дугайын чугаалаар дәэш, диттип чадап-ла каан мен. Авамга безин ыттавайын чылгычылап чоруп тур мен.

Ооң соонда каш хонуп chorda, Хұндүппей мәэрекниң хаазы болур Даңчыр-Дагба өөвүске кирип келди. Солагай караа бастынчак, солагай талакы чырыы астынчак болгаш сириләэш, арган кара кижи чүве. Ынчангаш ону улус Даңчыр-Дагба дижир.

- Эргеппей көзүлбес, кай барганы ол? — деп айтыра-дыр.
- Таң ыйнаан.
- Мәэрекниң бора аъды чылгыда чоп чогул?
- Эргеппей ашак-ла муна бержик.
- Ону чоп доп-дораан сөглевәәниң ол?
- Таң ыйнаан...
- Берге-ле херек-тир. Қичәэн, оол, кичәэн — дәэш, үне берди.

Даарта чедип кәәримге, кел дирткен болду. Хұндүппей мәэрек эриннери дәрбее берген, сыгдығыр карактары көстүр-көзүлбес апарган, чолдак-ой деп күске дег, дөрде дыгыла берген олур. Даңчыр-Дагбаның дүүн айтырган чүвелерин-не айтырап. База ынчаар-ла харыылап бердим.

- Дургун-кайгал кижи оор-дәәрбедел кылып турда, көре тура, чүте чажырып, бузуруп тураң сен?
- Ооң оор-дәәрбедел кылып турганын көрбәэн мен.
- Ынчанмаан болза, бора аът канчап барган?
- «Мәэрекниң чылгызын он ажыг чылда кадарып келген мен. Кижи күжү халас эвес. Чажыңынга актыбылие алым ол» дәэр кижи болчук.
- Аа! Чүү дидир сен, тарийги? Ам база ынча деп, канчаар эвес мен сени! — деп, Хұндүппей мәэрек сөс санында-ла кожаңайып, чатпайты тудуп алган холдары-билие менче дап бергилеп, хөректенип-ле үндү.
- А чөвүн-не айыткап олур мен, хайыраатым.
- Чөвүн сеңәэ таптыг көргүзүп бергей мен аан, кончуг дора-өлчүк!
- Мунуп турарың шилги аът кымның аъдыл? — деп ээгип чадай-чадай, менче караан сыгдыйттыр көрүп алган айтыра-дыр.

- Бодумнуң аъдым-на-дыр.
- Хош! — дээш, өрге дег опаш диidi. — Кижи көрбээн каяа ындыг альттыг чораан сен сен? Кымның аъдыл, орта сөгле!
- Эргеппей ашактан алган аъдым-на-дыр.
- Чүнүң ужун алганың ол?
- Альт кылып мун дээш, анаа берген-не чүве.
- Кижээ халас альт берип чоруур кижи кайда чүвел? Мегелеве!
- Бар-ла болганы ол-дур ийин ол, хайыраатым.
- Аа! Ынчап турбайн aan бо! Хап турза, база сөглевес бе бо! Хүлүп экkel, мону! — дээрge, Далчыр-Дагба бо-ла халып олур. Холум бижээмде-ле баарды. Далчыр-Дагба тура дүштү, үне-ле халыдым. Баглаашта аъдымны муна каапкаш, аргаже караш дидим.

## V

Он шаа хонукта өске аалдар тегерип чоруп тур мен. Ындыг-мындыг чүве-даа сураг. Улустан каксы айтыргылаарымга-даа, чүве билдинмес. Бир дүне дуюкаа өөмгө кирип келдим.

- Бо кым сен? — деп, авам орун кырындан айтыра-дыр.
- Мен-дир мен, авай, мен-дир мен — деп аяар чугааладым. — Дыка ыыттава. Улус дыңнаап каар...
- Хей коргуп тураг кижи-дир сен ийин, оглум. Боду билзин — дээш, авамның шимээни туруп келди.
- Эттеп-эриидээр деп турда, ынчанмайн канчаар.
- Анаа кортпактап турган улус-тур ийин. Мээрөң бөгүн чаңгыс инээвиске эжей, саап ижицер дээш, кырган-даа болза, бир инек база айтып берди.
- Өлүр четкен чөнүк чүве ыйнаан, кижээ балазы халдаар чыгыы.
- Ону чоор сен. Кижи үүлезин кижи эдилээр эвес, оглуңну эде сурга, хей тенивезин дээр чорду. Сыртык, дөжек салып берейн, удууп ал.
- Чок, чок, авай, бодум салып алыр мен — дээш, альт оъткаар дээш үнүптүм. Авамның ол сөзүн шынга алзымза-даа, черле сезингеш, аъдымны эзери-бile өртээш, кээп идик-хевим-бile бүдүнгэ чыдып алдым. Даарта хүнзедир манагзындым. Сезик алгы дег чүве-даа билдирбес. Ооң соонда каш-даа хондур ол хевээр-ле. Ынчангаш сестир, каразыыр чүве чок апарган мен. Ол аразында күзегже көжер өй база чедип келген.
- Бир хүн-не авам халаг эзирик кирип келди.

— Мээрең сугнуң кежиин четтириптим, оглум. Ында чагырыкчы моорлап кәэп-тир. Сени лимбилеп берзин дидир. Барып бараан бооп көрем, оглум.

Барып-барып чагырыкчы ынча дээрge, барбас арга чок. Кире бээримгэ, бистиң сумунуң чагырыкчызы Назыты дөрde күшпүгүр куу апарган олур, чүк баарында бистиң арбаның даргазы Чыккылаа, ооң адаанда Хүндүппей, мээреңниң чалчазы Үнүжок арага сөңнээн, Далчыр-Дагба дашка туткан тур. Амырлааш, эжикке олура дүштүм.

— Бээр эртип кел, оол— дээш, Назыты дуруяа дег узун мойнун кылчайтпышаан, шиш думчуу-бile чүк баарынче айты-дыр. Аайын тыппайн кайгап олур мен.

— Ийет-ийет! Эртип кел— деп, Чыккылаа дыйылааш үнү-бile шыжылай-дыр. Ам канчаар, барып олуруп алдым.

— Чылгычыга арагадан кудуңар — деп, Хүндүппей көргүрэй-дир. Кайгаар деп чувем дам барды. Чүнү-даа бодангалаң чорумда, Далчыр-Дагба дашка долу араганы бо-ла эккелди. Дашканы ийи холдап тудуп алган, канчаар-даа аайын тыппайн кайгап олурумда, Далчыр-Дагба билээмден сегирип-ле алды. Ол аразында Чыккылаа соомдан кәэп куспактаны каапты. Дораан-на хүлүй шаап алгаш, байысаай бердилер.

— Дургун Эргеппей-бile кандыг сүлчээ чугаалыг сiler?

— Кандыг-даа чугаа кылбаан мен.

— Мээреңниң чылгызының баштыңы чүгүрүк бора аъдын дургун Эргеппейге чүге тудуп берген сен? Сөглөп олур!

— Тудуп-даа бербээн мен. «Хүндүппей мээреңниң чылгызын он ажыг чылда кадарып келгеш, чаңгыс бышкак-даа ап көрбээн мен. Чажыңынга бо аътты актыы-бile алышым ол» дээр кижи чоржук.

— Бо-даа белен өчүк бербес-тир. Хап туруңар! — дээн соонда, доңгайтыр баскаш, кага-ла бердилер. Кызыл эytke от-көс салып турган чүве-бile дөмей-ле. Алгырып-кышкырып-ла чыдыр мен. Соонда-соонда какканы билдирбес, анаа-ла изицнээр. Хап-хап, олурту идип кагдылар.

— Че, ам таптыг өчүп олур! — дидирлер. Хорадаар деп чувемни кандыг дээр!

— Оон өске өчүк тыппас мен — дээш, шыжыгып, ыглаптар чазып олур мен. Ол аразында авам алгы-кышкы-бile кире халып келди:

— Чүнү канчап каан дээш, кижииниң чаңгыс төлүн ынчап туар силер? Ооң орнунга мээн эъдимни шылып чип, мээн ханымны ижицер!

— Бо кандыг кончуг дүржок херээжогул? Мону моон ырадындар! — деп, Хұндуппей алғыра-дыр. Далчыр-Дагба авамны туткаш, ынаар-ла үндүр октап чорудупту.

— Че, боданып алдың бе?

— Чүнү боданыр мен мен? — деп удур айтырдым. Ынча дээримге, база-ла кага бердилер. Ооң соонда билбес сен. Моорап каап-тыр мен.

- 
- 1. Сандан биле Далчыр-Дагбаның аразында чугаалажышкынын дамчыштыр чогаалчы чүнү илереткен-дир?
  - 2. Сандан чүгө дезер ужурга таварышканыл?
  - 3. Дүжүметтер Санданны кандыг арга-бile тудуп алганнарыл? Ындыг арганы канчаар үнелээр силер?
  - 4. Сандан байысаалганы канчаар эрткенил? Бодалыңарны шынзыдыңар.
- 

## VI

Бир-ле миннип чыдарымга, ынаар-ла ырак черде бир кижи кый деп турган ышкаш.

— А-а! — деп улаштыр-ла алғырдым.

— Күжүр оглум, хөөкүй оглум! Онгарлып келдиң бе?..

Караам көрүп кээримге, авам менче ээгип алган чугааланып олур. Шимченир дээримге, чанагаштааш, кызыл-хараган кырында салып каан чүве-бile дөмей-ле. Алғыра кааптым.

— Хөөкүй оглум, шимчевейн көр, кончуг кулугурлар эттекежицни диригге шылып чипкеннери ол ышкаждыл... Каргыжым на четсин...

Авамның ол ыы-сызыын, каргыш-иргижин дыңнап, ызыртынып алгаш чыда, та моорап калганым ол, та удуй бергеним ол, билбес мен. Бир көөрүмгө, дуне-даа боор, бир көөрүмгө, хұндус-даа боор. Та чеже хонган чүве. Бир эртен дыңнап чыдарымга, авам мынча дидир:

— Чайлагда чаңгыс-даа аал чок, улус шупту көжүп бады барган. Чуртта калдывыс.

— Ам канчаар улус боор бис, авай?

— Сен-не сегий берзиңзе, ажырбас оң, оглум.

Бир-бир бодаарымга, муңгаравазын дээш көгүткен-даа ышкаш, бир-бир бодаарымга, иштинде бир-ле ындыг, ханы идегелдиг-даа ышкаш.

Дүрген-не экирий берзе дээримге, сагышка четтирбес, хүннүң батпазы-даа кончуг, даңыңц атпазы-даа аажок. Эртеннин-не шенет-тинип көөр мен: бирде чүгээр-даа чүве дег, бирде хевээр-даа чүве дег.

— Аъдывыс канчап барган, авай? — деп бир эртен айтырдым.

— Мээренниң аъдывыңц орнуунга торгап алганнар-ла болгай, оглум — деп, авам хөндү багай чугаалады. Ону дыңнааш, сагыжым карара-ла берди.

— Даштын ыяжывыс төне берип-тир. Аргадан будуктап каайн — дээш, үне болду. Хевирин бодаарымга, мээн муңгаралым часкаар аайын тыппайн ынчалды ышкаш. Мен чүнү-даа бодап чадааш, лимбим алгаш, лимбилей бердим. Авам дыка-ла үр келбеди. Мени чазыгып алзын дээш, өжегээр ынчангандоор он.

— Чежеге чедир ээн чуртка мынчап олуурап улус боор бис? — деп, кежээ авамдан айтырдым.

— Каң кадык апаарыңга, көргей бис аан, оглум.

— Менде чүү боор, авай, каяа-даа чедир кылаштай бээр мен. Харын канчалзывысса экил, чугаала, авай. Чок болза мен кылаштап баткаш, ачыланып кээйн бе?

— Чок, оглум, иелэн чоруул.

— Өөвүстү канчаар бис.

— Ачыланып алгаш, көжүрүп алгай бис аан...

Ол душта даштын альт даваны дизиреدير дагжап, улус-даа чугаалажыр. Чүзү-кандызы ирги дээш, ылым-чылым олур бис. Кирип келзэ-ле, Караңмай биле Черлик-оол. Бирээзи бистин арбанывыс даргазы Чыккылааның оглу чүве. Соңгу иези көрбес боорга, адазын каапкан. Ынчангаш улус Черлик-оол деп шолалап каан. Оозу ат бооп алдаржып калган. Чүгүртүлеңнээш кара-сарыг карактарлыг, чугаазы дээрге, дыдык таардан төгүлген тараа дег, саарайнып-ла тураг, бир-ле чүвеже далашкан чүве дег, буу-хаа чоруур эр чүве. Бодун кайгал деп санаар.

— Кайы чедеринер ол, акым — деп, авам мендилешкен соонда, Караңмайдан айттырган.

— Силерни көжүрүп алза, дээш-ле келдим, дом.

- Кончуг-ла чүве-дир, акым. Диригге-ле чуртта калдывыс.
- Чүү дээр сiler, дуңмакым. Кандыг-даа болза, хаан албатызы кижини ынчаар аажылаар деп кым сактыр боор. Сilerни көжүрүп алыр-ла улус ыйнаан деп бодаан улус бис.
- Мен-даа ынчап бодаан-на болгай мен.
- Ам көрүп турарывыска, чүвениң утказы өске. Буян, нүгүлүн бурган билгей аан дээш, бо оолду дилеп алгаш, чедип келгеним бо-дур.
- Чүү дээш сени ынчап турганы ол, эжим? — деп, Черлик-оол айтыра-дыр.
- Хүндүппей мээреңниң бора аъдын Эргеппейге тудуп берген сен-не дээр чорду...
- Сенээ альт туттуруп чыдар кижи барып-барып Эргеппей боор бе? Харын-даа кодан чылгызын таваан каарты сүре бербээн-дир. Ынчанган болза, кайгал Эргеппейни кайыын тыварыл олар — деп, Черлик-оол хөөрөй-дир.
- Ол ирейни улус дургун, кайгал-ла дижир. Мен ооң экиден өске багын черле көрбээн мен — деп, авам болушкан хевирлиг үзе кирди.
- Шынап-ла, элдеп чүве харын. Улус ону «кайгал-ла» дижир, ёзулуг кайгалдар-бile өдеришпес кижи болдур ийин. Мен ооң аайын тыппас мен — деп, Черлик-оол саалай-дыр.
- Ында чүнүң багы боор ийин. Биеэде бистиң чагырчының адазы калган чейзенциң чылгычызы чораан кижи. Бо чагырчы чаа өгленип турар душта, ооң-бile Эргептиң аразынга уруг-дарыг дугайында бир ындыг хоп үнген чүве. Ооң ужун чагырчы-бile эп баксырашкаш, Эргеп чурт дескелеп бурунгаар чоруткан кижи. Оон назылап ашак апаргаш, чоокта чаа чанып келбеди бе. Ынчалздаа ол-ла адаан-өжээн ам-даа хевээрээн, ынчангаш дургун кайгал диртип, көрдүрбейн чорууру ол-дур ийин — деп, Карапмай ашак тайылбырлап берди.
- Уваа, ындыг чүве турган чүл оң. Кым билчик ону — деп, Черлик-оол топтап дыңрап олура, ашактарзы кончуг шөйүп кагды. Ынчап олурувуста, база-ла альт даваны дагжап, төрепчи далдырап келди. Эжик ажыттынган соонда, Эргеппей кирип келди. Ноян-дүжүмет кирип келген чүве дег, турса халыштывыс. Улус-бile мендилешкеш, дөрже эртип келди, улус-даа удур-дедир айтыржып чугаалажып-ла үндү.

## VII

— Че, каяа-даа чедип кааптыңар, чораан черицерде чүү тур? — деп, Карапмай таакпывлавышаан айтырды.

— Мен-даа ырак-ла чордум. Бурунгаар Хем-Белдиинге четкеш, оон эгдим. Көрген, билген чүве хөй-ле. Черле кайызын кандыг дээр ону — дээш, Эргеппей кезек боданып олур.

— Чогум черле чүл аан? Ындыг-мындыг дамчыыр чугаа домакла хөй болгай бо — деп, Карапмай ылавылады. Эргеппей кезек таакпывалап, боданып олур, чугаалады:

— Орус улус ак орус, кызыл оруп бооп иийи чарылгаш, ужуртөре хунаашкан мындыг чүве-дир. Ак орусту хаан баштаан, кызыл орусту Ленин башкы деп кижи баштаан.

— Оон ам чүү болчук ирги ынчаш?

— Ак орус бастырган, ужур-төрени ам кызыл орус холда туткан чүве-дир.

— Ынчаарга ам ак хаан дүжүлгеден дүшкен, кызыл хаан саадаан мындыг-дыр аа?

— Чок, ол хаан эвес, ол дээрge чаа ужурну номнаан, чамбыдиптиң хамык ядыы чонунуң улуг башкызы кижи дээр чорду.

— Ынчаарга ам чүл, хамык ядыы кижилер ацаа шавы бооп кирер мындыг чүве ирги бе?

— Чок, ооң номналын эдерер апаар чүве дидир.

— Чогум ооң номналы чүү кижи ирги?

— Хамык-ла ноян-дүжүметтерни, баяаттарны чок кылтыр, ядыы-түреңги кижилерге төдүзүнгэ эрге-шөлээ тыпсыр дээр чорду. Албан-херек ушкарып-башкаары-бile чоннуң иштинде топтугтомуаанныг, угаанынг кижилерин шилип алтыр чүве-дир.

— Ол-даа эки-ле ужур-дур ол — деп, Карапмай чугаалай тыртып кагды.

— Ам бис канчаар бис? — деп четтикпейн харамдыгып айтырдым.

— А сен Ленинниң номналын сагып эдериксээр сен бе? — деп бодумдан удур айтырды.

— Эдербейн канчаар. Эдерер мен, эдерер! — деп, меңээ бүзүревейн баар чүве дег, далажып харыыладым.

— Силер мону кайыын мындыг кончуг таптыг билип алганыңар ол? — деп, Черлик-оол сонуургады.

— Хем бажынга аңнап чорааш, кызыл орустарга таваржы бердим. Ленинниң шериглери болду. Хем-Белдирингө чедир оларга оруқ баштап чордум. Оларның чанчыны меңәэ мынча деп чугаалап берди.

— Ленинниң шерии-даа хөй-ле чүве боор аа?

— Чамбы-диптиң хамык-ла ядыылары — ооң шерии чүве-дир.

— Силер база ооң шериингө кирип алдыңар бе? — деп айтырдым.

— Ийе, ланчыны боо-даа алдым. Шеригниң сүлде демдәэн-даа чаладым.

— Ынча хөй аг-шеригни канчап ушкарлып-башкаар чүве ирги?

— Херек апарганда, Ленин башкы чарлык болур чүве-дир. Ооң ол чарлыны дәэр дамчылып, чамбы-дипке тараар, орус кижиғе орустап, тыва кижиғе тывалап, моол кижиғе моолдап, кыдат кижиғе кыдаттап дыңналыр чүве дидир.

— Ол-даа кайын кижи боор ол, бурган боор — деп, Черлик-оол үзе кирди.

— Бурган-даа эвес, кончуг улуг эртемніг кижи-дир. Ол хамаанчок оран-делегей кырын дүне-хүндүс чырыдар, өртемчейге мөңге чыргал дөгүннадыр дәэн кижи-дир.

— А бис канчаар улус бис? — деп, Черлик-оол айтырды.

— Ленинниң номналын эдерип чурттаар апаар-дыр бис ийин — деп, Эргеппей ашак чугаалап кагды.

— Ындыг-дыр. Ынчаарга боо-чепсектиг, шериг сүлде демдектиг кижи болганында, бисти Ленинниң шериингө кирип ап, бистиң чанчынывыс бол — деп, Черлик-оол ээрешти. Эргеппей бажын согаш кылгаш, чүве-даа ыыттавайн, бисти ылавылап көрдү.

Даартазында чаа чуртка көжүп хонгаш, Эргеппей-бile кады партизаннарже чоруккан бис. Оон бәэр ооң ады улустуң аксындан дүшпестәэн...

Сандан ашак чугаазын доосту. Чүү хире үр олурганывысты билбейн барып-тыр мен. Сактырымга, Сандан ашак-бile кады чажындан тура, бүгү назынын деңгө чурттап эрткен ышкаш бодум.

Даштыгаа үнүп кәәримге, даң агарып кәәп-тир. Артыкы шыкта хамнаарактар әртенгى хаяланы уткуп, кыңгырткайны бердилер.

- 
1. Авашкыларны чүгө ээн чуртка каапкан деп бодаар сiler?
2. Берге өйде оларга кымнар дузалажып келгенил?
3. Эргеппей каяя чорааныл, араттарга чүнү тайылбырлааныл? Ооң түнели канчаар төнгенил?

4. Санданың салым-чолунга Эргеппейниң салдары кандыг деп бодаар силер? Бодалыңарны сөзүглелдер-бите бадыткаңар.

5. С.Пюрбюнүң дугайында кыска дыңнадыгдан бижиңер.

6. Тоожунуң 7 дугаар эгезинге аттан чогааткаш, эдертигден бижиңер.

7. «Эргеппей — ядыыларның камгалакчызы» деп темалыг чогаадыгдан бижиңер. Чогаадыкчы ажылдарның кайы-бирээзин шилип алгаш кылыңар.

 *Басқактанаң, дайгырапар, ужур-төре, номнал, мәэрен, чагырчы, чажыңынга, чарлык, шавы* деп сөстерни «Тыва дылдың тайылбыр словарындан» ушта бижээш, утказын тайылбырлап, сөзүглелде ажыглалын тайылбырланар.

## ЧОГААЛ ТЕОРИЯЗЫ Тоожу дугайында билиг

Тоожу — ортумак хемчээлдиг проза жанры (жанры). Ол чечен чугаага бодаарга, элээн каш болуушкуннарлыг, маадырлары элээн хөй, амыдыралды делгем болгаш ханы көргүскен проза чогаалы болур.

Тыва литературага тоожу жанры XX чүс чылдың дөртенги чылдарның эгезинде салдынган. Ооң бир дугаар тоожузунга Тыва литератураның үндезилекчилериниң бирээзи, Тываның улустуң чогаалчызы С.А. Сарыг-оолдуң 1942 чылда бижээни «Белек» деп тоожузу хамааржып. «Белек» — Тоожунуң аңчыларының патриоттук чижээнге үндезилээш, Ада-чурттуң Улуг дайынының чылдарында Тываның ажылчы чоннары могаг-шылаг чок күш-ажылы биле Кызыл Армияга канчаар дузалажып турганын төөгүп бижээн баштайгы тоожу.

XX чүс чылдың 60-гы чылдарның эгезинден соңгаар Тыва тоожунуң боттанишкынының ёзуулуг шапкын чадазы эгелээн. Оон бээр янзы-бүрү темаларны көргүскен тоожулар чыл санында удаадараа үнүп кээп турар апарган. Баштайгы документалдыг тоожуларны С. Тока, О. Саган-оол бижээннер. Ол болза С. Токаның «Ада көрбээнийн оглу көөр», О. Саган-оолдуң «Баян-Таланың кижиши» деп тоожулары хамааржып.

Дараазында чылдарда К-Э. Кудажы, С. Сүрүн-оол эң-не улуг үлүгнүү кииргеннер. С. Сүрүн-оолдуң аңгы-аңгы чылдарда «Ынакшылдыр», «Озалааш хем», «Лейтенанттының даалгазы», «Авазынга данғырак», «Кымның оглу», «Өске кадай» деп тоожулары чырыкче үнүп, Тыва литератураны улам сайзыраткан.

Бичии уругларга тоожулар база бижиттинген. Оларга С. Сүрүн-оолдуң «Чайгы хүннер», «Ак аның биле Арбай-оол»; Б. Ондарның «Алдын-оол база Эникпен»; М. Эргептиң «Өдүгенде чайлаг»; М. Кенин-Лопсанның «Калдарак»; К. Чамыяңның «Мөңгүн оттук»; Л. Чадамбаның «Аян-чорук»; Е. Танованаң «Иениң салым-хуузу»; Ш. Суваңның «Хүн-Херелден аалчылар» дээн чергелиг чогаалдары санаттынар.

XXI чус чылдың эгезинде уругларга Э. Донгак «Менниг-Сегел», «Четкерлерге чагааларым»; Ш. Суван «Кижи-Бүрүс»; Э. Мижит «Течик»; Н. Куулар «Танаа-Херелдин чуртунда» деп янзы-бүру темаларлыг тоожуларны сөннээннер.

- 
- 1. Тоожу биле чечен чугааның ылгалы чүдел?
  - 2. Баштайгы тоожунун адын, авторун, кол утказын чугаалаңар.
  - 3. Уругларга бижээн тоожуларның кайызын номчаан-дыр силер? Утказын эштериңерге чугаалап бериндер.
  - 4. «Мээн сонуургаан тоожум...», «Ынак тоожуларым бирээзи...», «Тоожуда мээн ынак маадырларым», «Бо тоожуну номчуурун сүмелээр ийик мен...» дээн чижектиг темаларның кайы-бирээзинге рефераттан бижиңер.
- 

## Олег Карламович САГАН-ООЛ (1913—1971)

Найырал  
Чечен чугаа

Өртээл өөндөн эмчи үнүп келгеш,  
эртөнгөниниң аяс чаагайын магадап,  
чарашсынгаш, алгырыпкан.

— Дыка-ла чарааш оран-дыр эвес-  
пе!

Ооң карактарының мурнуунда  
булуттарга чедир бедик, эң сүвүр-  
сүвүр болгаш коргунчуг кадыр база  
мээстериnde дүрзүгүр чалымнар-би-



ле, артыы талалары дагыр-дагыр дыттар-бile, селбeгер-сeлбeгер пөштер-бile долган, чogум баштары кылчагар буурул тайгалар долгандыр бедээннер. Дээрниң хиндиинде хир чок болгаш марттың эртengи хүнү көстүп үнүп келбезе-даа, ooң xерелдери kайгамчык тайгаларның баштарында сарала кылдыр xерелденгеннер. Тыва шүлүкчүлерниң ырларында «Экти бедик ээр Таңдым» деп туары сыннары бо-дур ийин бо кылдыр эмчи бодаан.

Ийи хемчигештерниң белдирлeжип келген черинде деспекте өртээл өө турган. Оон ырак эввесте шала тудуп каан бажың турган, ону долгандыр чонгулаан чудуктар козурт — өртээлдин чаа тудуу ол-дур. Оортan тайгаже телефон чагыларын шууштур дизипкен, сывырган-демир чок, оларның баштарында чүгле шаажаң доңгалар кылайгылааннар.

— Күзүн өг маңаа турбас, ooң орнунга чаа бажың туар, ooң хаалгаларын, соңгаларын, шалаларын дозулааш, хевис чадып каар бис. Эрткен, дүшкен эргим кижилер хонуп-дүжүп тургайлар аан — деп, эмчи кыска өртээл таңнакчызы чугаалааш, бодунүң чугаакырын илередип үргүлчүлээн:

— Чычаан оруу турууптары база чадавас. Ынчалза биске улам хөглүг болур-дур ийин.

Ырак эввесте, арганың кыдышында, дыттың төжүнүң бажында, селбeгер бөрт дег, харны көрүп кааш, өгде аржыылын ап алгаш, Маруся чүгүрүп чеде бергеш, чуна берген. Угдерей берген хар-бile холун, арнын амырап дүрбээн:

— А-ах, соогун! Дош-ла — деп, эмчи дидирээн.

Арганың иштинде ыяштың дырс кылдыр сыйылганы дыңналган. Оон уунче көрүп каап, холдарын болгаш кыза берген арнын чот-пушаан, эмчи кыс өртээлче арай далаш кылаштапкан. «Адыг болурун канчап билир!» деп боданган.

Дыттарның аразындан эзерлиг ийи аyttарны чедип алган аныяк оол кел чораан.

Ол кижи — сыны хөнү, мөге боттуг, шырайы чидиг хурен, чаактары чывардан долбаннарлыг апарган, кара-кара карактарлыг оол болган.

Хүлүмзүревишаан, кысчe холун дидим эвес сунмушаан, оол мендилээн:

— Экии!

Оолдуң холун албадал чокка тутпушаан, ооң арнынче сонуургал-  
биле көрүп, эмчи найыралдыг харыылаан:

— Мендээ!

Демги оол тыва негей алгы тоннуг, ак-көк даалымба курлуг,  
чымчак идиктиг чораан. Кара хураган кежи бөргүнүң халбаңнарын  
дүжүрбээн, оозун оң талакы кулаан көзүлбес кылдыр базыра салып  
алган, ооң солагай кыдышындан бажының дүктери дыдырарып  
көстүп чораан — ол ооң эрес, аваангыр хевирин илереткен.

— Эмчи силер бе? — деп айтыргаш, харызын-даа манавайн,  
оол немээн: — Чоруур-ла. Оон башка орайтай бээр бис. Район  
төвүнгэ чедир ырак болгаш тайга ажар болгай бис. Чырыкта синның  
кырынга үнүп алыры чугула.

Ол оол ынчаар тывалап чугаалаарга, эмчи мүн-не билип, база-  
ла тывалаан:

— Силер мен кады чоруур?

Оол баштай арай билбейн бар часкаш, оон билип кааш, чугаалаан:

— Ийе, кады чоруур, силерни мен чедирер.

— Эки-дир, мен дораан-на, чүгле кеттинип алыйн — дээш, кыс  
өгже кире берген...

Адар-оол кезек ыыт чок олура, оон тургаш, эмчини далаштырган:

— Чорувааже боор бе, эмчи? Орайтап тур ышкаш бис. Чер аразы  
ырак болгай.

— Мен белен мен — дээш, эмчи тургаш, өшкү кежи чагызын  
кедип турган, аңаа өгнүң эр ээзи дузалашкан.

Ол аразында өгнүң хөрөэжэн ээзи дүлген борбак этт солунга  
ораагаш, оозун эмчиге сунган:

— Орукка дүштээр силер, уруум.

— Ажырбас, ажырбас. Чемгердиндер, оон артык чүү боор. Албас  
мен! — деп, эмчи чугаалаан.

— Үнчаарга кайын боор ийик! Ап алыңар харын. Чер ырак,  
кадыр болгай, орукка чүү болбас дээр, орук ара аалдар бар эвес—  
дээш, өгнүң эр ээзи эттэ алгаш, эмчиниң хааржаанга суп берген.

— Четтирдим, кырганнаар. Мырыңдай чованчыг чүве болду-  
ла... — дээш, оларның холдарын эмчи өөрүп шыңгыы туткан.

— Кайызын мен мунаар мен?

— Мону — дээш, борбак чүве дег, семис чыкпак доруг айтты  
чежип әккелгеш, чамдык херекселдерни айт хоюп турда-ла,

мергежилдии-бile артып дергилээш, эмчини ол мундуурап деп чорда, ооң холун эмчи чайлаткаш, боду арай каңдайы-бile айттаныпкан.

— Чүнү көөрүцөр ол? — дээш, оолдуң кайгаан арнынчे көргеш, хөглүг каттырыпкаш, үргүлчүлээн: — Тывага чыл ажыг чурттап тур мен, эзерлиг аյтты мунуп өөрени берген мен. Силерниң дузанар чокка-ла айттаныптар мен, мунупканым бо-дур.

Оол база айттаныпкан. Өгнүң ээлери-бile байырлашкаш, кожалажыпкаш, иелээ узун орукче чорупкан.

Мурнунда чортуп орган оол хая көрнүрге, ооң эмчизи дүвү чок кашпалче арай коргуп көрүп чораан ышкаш болган. Делгем черге келгеш, айдындан дүшкеш, кыска чугаалаан:

— Маңаа дүжүп алыр-дыр, эмчи. Чадаг кылаштаажыр апаргандыр. Тынны меңээ тутсунар. Куду көрбендер, оон башка баш дескине бээр.

— Кылаштаар-дыр, харын, а тынны бодум тудар мен — дээш, куду коргуп көргеш, эмчи айдындан дүже халаан.

Дөш бергедээн, олар дыштанып каап чоруп органнаар. Дөштүң бажынга келгеш, калбак даштың кырынга оол олурупкаш, кысчे көргеш, сагыш човап сүмелээн:

— Маңаа дыштанып алзывысса кандыгыл?

— Дыштанып алыр-дыр, харын — деп, кыс өөрүп чугаалааш, кожа даштың кырынга олурупкан.

— Силерни кым деп адаарыл, эмчи?

— Мени... Мария Михайловна Иванова дээр. Ынчалза-даа анаала Маруся деп болур силер... А силерни кым дээрил? Уттуптум.

— Мени Адар-оол дээр.

— Адар деп чүл?

— Мерген адыгжы дээн чуве-дир ийин — дээш, адыгжы арай хүлүмзүрээн, ацаа эпчок апарган.

— Аа, ындыг чуве турган чул... — дээш, оолче чугле сонуургал-бile эвес, харын хүндүткел-бile эмчи көрген.

— Силер бистинц районга үр болур силер бе, Маруся? — деп, анаа адап чугаала дээн эргени ажыглап, Адар-оол бөдүүн сеткил-бile чугаалаан.

— Мен ында үр эмнээр. Мен — эмчи.

— Ол эки-дир... ынчалза-даа чалгаарай бээр боор силер.

— Чок, мен чаңчыга бээр мен. Харын тывалап дүрген өөренип алза.

- Бичии билир-дир силер.  
— Чок, мен мырыңай билбес-тир мен. Ийи-үш сөстер дээрден башка.

Хүн орайтап, шораан хаяларлыг сыннарның артынчे дүргедеп бар чораан.

— Моң мурнунда дагларлыг черлерге чораан силер бе? — деп, оол катап айтырган.

— Кавказка чораан мен, ооң даглары база мындыг чарааш — баштарында менги харларлыг. Институтка өөренип тургаш, студентилер-бile кады аян-чорук қылыш чораан бис.

— А аалыңдар кайдал? Төрелдериңер ырак чурттап туарлар бе?

— Ам силерге харылаайн — дээш, Маруся билир тыва сөстерни таарыштырып, көстүктөрийн шимчеткилээн: — Ам дыңнаңар, мен Москва чурттаар, мен таныш улус ында чурттаар. Билдинер бе?

Адар-оол бажын безеректелдир чайган:

— О, эмчи!.. Чогум чүнү чугаалаар дидинер ыйнаан?

Маруся ак сеткил-бile дыкадыр аажок каттырган:

— Бичии билир-дир силер дээн хиренцерде, мээн тывалап чугаалаанымны билбедиңер...

Адар-оол арай ыядыксай бергеш, оозун куюктурган.

— Силер сөстерни билир, а домак тургузуп билбес-тир силер.

— Чугаалап туар кылдыр өөрени бээр мен! Оон башка чонга дузалаары берге болгай, бир эвес ооң дылын билбес болза... Че, чоруптар бис бе? Мен дыштанып-ла алдым — дээш, Маруся турупкан.

Альттаныпкаш, оон ыңай чорупканнаар.

Оон ыңай орук алгый берген. Адар-оол дүрген чорткаш, Маруся биле кожалажып келген. Бодалынга эмчини Маруся деп шээжилеп адап ап чораан.

Бир кезек ыытташпайн чорааннаар, чүгле альттар хаая былгырып каап чорааннаар.

Адар-оолче Маруся көргеш, хүлүмзүрээш, айтырган:

— Че, ам чүл? Силерниң айтырыксап чорууруңарны карактарындардан-на көрүп чор мен.

Адар-оол каттырган:

— Бар, бар, харын. Бо орукка чоруур аравыста дыка хөй айтырыглар менде чыглып келди. Москвада бо турган хаялар ышкаш бажыңнаар бар бе, эмчи?

- Бар.
  - Каш каът барыл?
  - Каът? Аа, хәй бар, он беш каът. Удавас үжен, үжен беш каът бажыңнар бар болур.
  - О-о! Дыка-ла бедик-тири аа? А Кызыл шөлде Кремльге чораан силер бе? Ында кайы хире чарааш ирги?
  - Аажок чарааш болгаш эки, Адар-оол.
  - Мен Кремльди кинога көрген мен.
- Кезек ыыт чок чоруп орган, оон немээн:
- Бир шагда мен база Москвага чедер мен...
- Орук кадыр ийде шораан хаяларның баары-бите одурту чорткан бажың дег хаяның баарынга чедип кәэрge, алгылар болгаш өлүк чүйктерлиг сарлыктар уткуштур бо чедип келгеннер.
- Альттарлыг ийи арат сарлыктарны сүрүп албадай бәэрge, олары эмчиниң чанынга сезиктиг чедип келгеш, оон дагже талазы-бите бичии чириктеп, кулбуртуп эртилкеннер.

- Араттар ээлдек болгаш хайыралыг сонуургал-бите:
- Чүгэ кылаштажып чоруур силер? Мунуп алза?—диген.
  - Бо кадыр чер.
  - Мында кадыр чүү боор, каалама орук ышкаждыл.
  - Эмчиғе кадыр, эң-не баштай болап чоруп турап-дыр.
  - Эмчи кижи-дир аа?
  - Эмчи кижи, бистинг районга барып ажылдаары ол-дур.
- Араттар ээлдек болгаш хайыралыг сонуургал-бите көрүп эрткеннер:
- Байырлыг, эмчи! — дәэш эрткеннер.

Эмчи база мендилеп эрткен.

Одуругларны эртил кәэрge, эмчиниң чанынга Адар-оол чедип келгеш, оон сагыш човап айтырган:

- Кандыг чор силер, эмчи?
- Мен анаа, ажырбас.
- Ынчаарга ам айттанып алышар — дәэш, айттың дынын тудуп турат, эмчини Адар-оол айткарыпкаш, боду айттаныпкан. Ыңай чорупканнар.

Эмчиниң карактарының ужуңда бир чүве караш дәэн, эдертир көре бәэрge, шораан хаялар аразында эзир чоргаар салдап чораан. Ол эзирниң чалгыннары чалымнарга дәэр чазып чорааннар, оон

боду чорумалдарже бажын ээктирип көрүп каап, көөргеттинген чүве дег, ужуп чораан.

Хүн-даа барыын чүкче доңгайып бадыпкан. Адар-оол аъдын албадап, соонда эмчиже көрүп каап чоруурун эмчи билип кааш, айтырган:

— Силер чүге далажып чор?

— Далашпааже хоржок, тайганың кыры шуурганный бергендир, дөө көрүцерден — дээш, хүн бадар талазында турган тайгаже Адар-оол айыткан.

Шынап-ла, тайганың бажы бораанналчак туман-бile хайныгып турган, оортан булуттар салбаарып үстүп, чиге бурунгаар далажып чоруп турганнар. Хүн ол булуттарның артынче кирип, херелдерин ышкыныпкан, агара берген, булуттарның шимчээшкенингে удур маргыжып, чара чүткүп бар чораан. Чоокку тайгаларның бажында дүвүлөр, хойган чүве дег, шуужуп бар чорааннар. Хаттың даажы бир-ле черде хооңайып турган.

Оруктуң уу кадыр ийни өрү чоктапкан, хат өйлеп-өйлеп хадып келгеш, харны казыргыландыр бөле шаап турган. Адар-оол дүже халаан, эмчи база. Адар-оол эмчиже сумелээн:

— Бөрттү дуй баглацаар, моюндурукту дуй тырттыңар, эки чылыгланыр, оон башка соок болур — дээш, боду эмчиже дузалажып турган, оон эмчини аyttкарыпкаш, боду аyttтаныпкан, эмчиниң аъдының узун дынындан чедип алгаш, чорупкан.

Удаваанда хат улам күштелген, дүвү-даа аажок, аyttтар чамдыкта хөртүкке дүжүп, буруп чорааннар. Айт кырынга чоруттунмас апарган, иелээ дүжүп алганныар. Адар-оол аyttтарны шууштур чедип алгаш, эмчини чанынга кожаландырыпкаш, кылаштап чорупкан.

...Адар-оол өй-өйлеп эмчиже көрүп каап чораан, оон бир-ле көрүп келгеш, оожургал-бile айтырган:

— Соок-тур бе, эмчи?

— Чок, соок эвес, мен чылыг, бо бар — дээш, чагызынче айыткан.

— Ол-даа улуг дузалап шыдаар деп бе.

— Силер доха чок, силер соок, ам канчаар? Мен бодаар, силер соок, эш Адар-оол.

— Чок, мен ажырбас, мээн тонум чылыг, негей — дээш, тонун эде тырттынып чорда, хенертен хат кагарга, ооң аайы-бile Адар-оол тендириэш, тайбышаан, барып ушкаш, ийни куду дын дуртугче кулбурап бадыпкан. Адар-оол дыннардан салдынмаан, аyttтар

тендирип чоруй, даваннары-бile хере тепкеш, турупканнар. Оон башка эмчини аъттары-бile каапкаш, оңгар чооганың дүвүнгө чуңгулап чедер турган. Адар-оол бодунуң чөгөнчиин көргүскенинге ыядыксаза-даа, эмчиниң коргуксай берген арнынчे көргеш, кандыгдаа утка чок хүлүмзүрээн.

Кадыр дагның ийин өрүлээн тудум-на чүве улам көзүлбестээн, соок күштелген, караңгы дүшкен, хөртүк улгаткан, аъттар чорбастаан: хөртүкке кадалгаш чыдар, чаңгыс черге турар арга чок.

Хат-бile хүрежип, кадырны ажып, хөртүктерни чамдыкта оюп чорааш, тас тайганың кырынга Адар-оол биле эмчи үнүп келгеннер. Эмчиниң чүрээниң согары бодунга билдинип, ооң тыныжы кыскалап чораан — бедик улгаткан, агаар эвээжээн.

Мурнунда кудургай апарган, чогум чүү чери билдинмес, черниң уу ёскерлип, угаан тенип эгелээн. Район төвү ам тывылбас деп чүве билдинген, ыжык чер тып, асаа кандыг-даа арга-бile хонары чугула апарган. Аъттарны чедип алгаш, кудургайны куду, бурунгаар чорупканнар. Кадыг хөртүктүг чөрге келгеннер, аъттар хөртүкту кырлап чорааннар. Каралычаа чорниң байдалы орта билдинмес: шулу ак-ла чүве. Хатка соондан сүрдүрүп алгаш, кичээнгейлиг чоруп олурганнар. Хенертен, чөр дүвүнде чүве дег, улуг дааш үнгөн, эмчи дыңцаалааш түрүпкан, Адар-оол база. Чүве шимээн чок, чүгле хат сыйцайнып турган, боттары шимчеп турган.

— Эш Адар-оол! Бо чүл? Шимчеп тур!

— Мээн холумдан туттунуңар! — дээш, Адар-оол дыннарны салыпкаш, эмчиниң холундан дүрген сегирип алгаш, бодунче чыпшыр тырта берген. Бот-боттарының холдарындан туттунушкаш, удур көрүшкеш түрүпканнар. Олар кезек хөртүк кырында, шапкын сугда сал кырында чүве дег, чоорту дүргедээш, бадыпканнар. Дүвүлөр казыргыланып, чүү-даа көзүлбес түрүпканнар. Чүвүүлөр көзүлбес түрүпканнар. Элээн ырап чорда, кадыш-кудуш-ла дээн, чүнүң-даа аайы тывылбас, чүгле моң чүвелер-бile эмчини оон-моон хайыра чокка бүдүү нугуп түрүпкан чүве дег апарган, ооң соонда шуут билдинместээн.

Эмчи билип кээрge, хар иштинде тырлы берген, холдары Адар-оолдуң холдарындан салдынмаан чыткан, сөөк-даяктары-даа бүдүн болган. Адар-оолдуң холдарын эмчи бодунче тыртарга, шимчевес болгаш ыыттавас мындыг.

Эмчи дегийт тура халаан, хөмө баскан харлар ооң бодун саарбышаан, төктүп дүжүп турганнар. Эмчи Адар-оолда-ла барган. Ооң кырында харларны холдары-били ыңай-бээр эжип, кызып тургаш уштуп алган. Эмчиниң бодалынга ол аразында чүс-чүс аайы тывылбас бодалдар төрүттүнүп турган. Эмчи бо бүгү таварылгалар кайын шын чүве боор, дүжүм боор кылдыр бодаан, ооң соонда бодун шыңгызы туттунган.

Адар-оолдуң тонунуң өөгүн чешкеш, тонну чада тырткаш, ооң чүрээн дыңнаалаан, чүрек ажылдап турган.

— Дириг-дир! — деп, эмчи алгырыпкан. Ооң бажының чанынга сөгедектей олура, ооң холдарын дедир туткаш, бодунче аяар тыртып, уннаштыр аяар бадырып тындышышкын кылган, чоорту дүргедедип үргүлчүлөп олурган.

Адар-оол карактарын көрүп келген, эмчи ооң холдарын салыпкаш, бажындан туткаш, ковайтыр тыртып эккелген, оон Адар-оол холдарын шимчедип, херлип олура, эмчиден айтырган:

— Эмчи, сiler анаа бе?

— Анаа, кадык.

Эмчи өөрээш, оон ыңай чугаалап шыдавайн, чүгле Адар-оолдуң холдарын дыңзыдыр туткан, а ол база-ла чугаалаар чүве тыппайн орган...

— Айттарывыс мырыңай кашпал дүвүнче чуглуп кире бергеннер боор аа? — деп, Маруся айтырган.

— Чок, эмчи. Олар өрү чыдып калганинар боор. Мен ынчап бодай-дыр мен. Мен өрү чоктааш, оларны бээр бадырып келийн, мында хаттан ыжык-тыр. Сiler мацаа олурундар.

— Чок, мен черле артпас мен! Кады бараалы — деп, Маруся удурлангаш, оон айтырган:

— Кандыг аайлыг чоор, Адар-оол. Бисти бадырып келген, айттарывыс ында артып калган ужуру чүл?

— Ол мындыг: ийниң мээзи ыжык, ацаа хат четпес, ооң хары чымчак чыдар, хат кагар чер-билие ооң аразынга хөртүктелип кырлыг апаар. Бис ындыг хөртүктүң кырынга билбейн чедип келиривиске, бистиң аарывысты угбайн, бусту берген, ол бузулган хөртүктүң кудургайже талазы чымчак харлыг болганда бисти алгаш, чылып бадыпканы ол-дур. Чооганың дүвүнгө четкеш, оон ол чарыныче кайтыгып үнер дээрge, оон ынды база кадыг хөртүк-

түг болган, ынчангаш ийи хөртүк аразында үскүлешкеш, буступ чуурлуп, аразында эпчок таварышкан чүвелерни кызып, базырып каапканы ол-дур. Бис харын-даа кадыры улуг эвес, ырак эвес черге таварышкан-дыр бис. Оон башка шуптувус кырлып, ис чок чидип болур турган бис. Чүгле чазын, хар аккан соонда, таварылга бооп, бисти тып болур. Маңаа ындыг болуушкуннар хөй болур, малдыдаа, ыяшты-даа кыра базып каан тургулаан черлер долу.

Адар-оол ыыттавайн баргаш, тайганың бажында хаттың хоолаарын кезек дыннаалап олургаш, Марусяның холундан тудуп алгаш, немей чугаалаан:

— Бис аас-кежиктиглер-дир бис, эмчи... Харга бастырып кагза, оон мелегей чүве кайда боор...

Маруся сырбаш кылышкан, ону оол оожургаткан.

— Ам ажырбас, эмчи. Кортпацар. Ам чүнү канчаарын мен билир мен... Ам аyttарны дилеп чоруур-дур.

Маруся бажы-бile чөвшээрээн, иелээ чорупканнар. Удавайн аyttарын тып алганнар. Олары кудулап бады келген турганнар.

Аyttарны чедип алгаш, дүрзүгүр чалым хаяның баарынга элээн үр болгаш ужуп, туруп чорааш чедип келгеннер.

Эмчи аайын тыпрайн айтырган:

— Мында чүнү кылыш?

— Ижээн.

— Чүнү?

— Үңгүр. Адыгның удуур чери, ону ижээн дээр, ындыг чер кылыш алыш.

Эмчи билген, ижээнни казарынга дузалажып эгелээн чымчак харны холдары-бile, буттары-бile үндүр эшчип ажылдажып турган. Ийи кижи союп кире бээр ижээнни катышкан күжениишкин-бile казыш алганнар.

Адар-оол аyttарның артынчактарын дүжургеш, эзерлери-бile хөвээрзин өртээри-бile чоруптарга, эмчи артынчакты ижээн аксынче кирип турган. Ол аразында дүлгэн борбак эйтти база уштуул алган. Адар-оол кээргэ, ол эйтти үлжип чип алганнар.

Ижээнниң иштинче иелээ үңгеп киргеш, бүдүнгэ кожа чыдып алганнар.

Элээн ыыт чок чытканнар. Оон Маруся айтырган:

— Адар-оол, сiler үдүй бердинцер бе?

— Чок, эмчи, удувайн-дыр мен.

— Бир эвес хөртүк ужунче кире берген болзувусса, чүү болур турганыл, чугаалап көрүцерем? Дем чугааладыңар, ынчаарда чүнү-даа эскерип билбедим. Менээ коргунчуг апаарга дыңнавайн барган мен.

— Бисти, эмчи, чүгле чайын, хар эрий берген соонда тып ап болур турган.

— О-о!

Ыытташпайн барганныар.

— Эмчи, удувайн-дыр сiler бе?

— Чок, удувайн-дыр мен, бак чуведен чайлааныбысты бодап чыдыр мен.

...Оларның тыныштарындан ижээн ишти мырыңай чылый берген. Маруся бөргүн ужуулгаш, бажының адаанга сыртай салып алган. Оон бажының дүктери частып, Адар-оолдуң чаактарынга дээй бергеннер.

Иелээ шимээн чок барганныар.

Маруся бодунуң чоок өңнүү Галинаны сагынган: «Бир эвес мээц ижээн иштинде чытканымны эжим көрген болза, та чүү деп бодаар ыйнаан?» Ол бодал-бile эмчи хүлүмзүүрүпкен. Минута хире болганда уйгузунга алзыпкан.

Адар-оол шимчээринден безин коргуп чыткан, Марусяның бажының дүктери ооң чаактарынга дээргэ, ацаа аажок өөрүнчүг болгаш эки болган. Боданып чыткан, амыдыралының иштинде бир-ле дугаар ынчаар ханы боданган.

«Дыка-ла эки кыс-тыг: аныяк-даа, эртемнig-даа!..» Хенертэн ацаа боду чөгөнчиг апарган, барык-ла өөренмээн болгаш амыдыралының иштинде чүнү-даа көрүп четтикпээн.

\* \* \*

Адар-оол баштай оттуп келген, ижээн ишти бүлүртүң болган, чүгле хөртүк хаалгандың үстүкү кыдыындан хүннүң херели чыраан. Кыстың дески тыныжын үр-ле дыңнап көрүп чыткан. Кысты оттурбазы-бile ижээнден аяар үнгеп үнүп келген.

Альттар холдарты-бile кадыр ийниң харын казып, оъттап турганныар.

Альттарже бар чорааш, Адар-оол агыналар көрүп каан. Хар-бile өңнеш болгаш, оларның чүгле карактары дозур кара-кара, олары-бile харга ылгалып көстүрлөр. Харның адаандан даш казып тып алгаш, кедеп четкеш, чазыг чок кагышкын-бile оларның бирээзин

Адар-оол соп алган. Өскелери алгы-кышкы-бile ужуп чорупканнар.

Альттарны чедип алгаш, тоолда шил бажында удуп чыдар алдын даңгына ышкаш, кыска — эмчиге келирге, демгизи ам-даа удувшаш болган.

Ону оттурбас дээш, Адар-оол дедир чоруткаш, альттарының хыраазын аштап эгелээн, элээн болган. Бир көөрге, Маруся ижээнден үнүп келген хүлүмзүрүп турган.

— Ой, ой! Чырыын аа! — дээш, холдары-бile чылчырыктаан карактарын дуглаан.

— Эмчи, эки хондува! — деп, Адар-оол мендилээш, ол-ла дораан айтырган: — Кандыг-дыр силер?

— Четтиридим, Адар-оол. Эки удудум, мырыңай доңмадым. А силер аарывайн-дыр силер бе?

— Чок, эмчи. Каң кадык-тыр мен... Силерге бээр дээш тыпкан олчам бо-дур, ап көрүцерем... — дээш, ак күшту ооң мурнунга салып каан.

— Чаражын аа! — деп, Маруся магадаан. — Ону чүге өлүргенниер ол? Кым деп күш боор?

— Агына деп күш-тур, ак торлаа. Бо сыннарда эмгежок болдур ийин.

— Белээнцер ужун четтиридим. А каяа канчап алыр мен?

Адар-оол ону ап алгаш, эмчиниң мурнуку дергизинге дергилеп бергеш, оозунга чоргаарланып хөглүг чугаалаан:

— Ам чоруптаалы, эмчи.

Чартык шакта чорааш, сынның кырынга үнүп келгеннер. Удавайн артты ажып бадып кааннар. Тайганы эдектелдир улам чылып, час кирип келген, карандыларда хек-даваннары үнгүлеп келгилээн чытканнар.

— Бистиң хоорайывыс дөө турган ол-дур — дээш, ыяш тудугларлыг суурже Адар-оол холу-бile айыткан.

Маруся танывазы суурже көргеш, ажыы-бile билинген:

— Арай дүвүреп чор мен, та чүге ынчаарым ол ийик... чаа чер... мырыңай танывазым чон болур... канчаар уткуп алыр ийик. Ажылдан-даа kortпайн-дыр мен, мени дүвүредип чоруур чүве: бо хире улуг районга четтигип шыдаар ирги мен бе — деп айтыра-дыр...

— Чон боду силерге дузалаар-ла болгай, эмчи!

Мырыңай эртен-не суурга чедип келгеннер. Чаа школаның эжинде уруглар ойнаан, ажылдақчылар албан черлеринче шуушкан турганныар, а херээжженер садыгларже далажып чүгүрүшкеннер.

Кадык камгалалының килдизинге келирге, элээн улгады берген Анна Сергеевна Марусяны өөрүп хұлләп алган, аныяқ әмчиниң келгенингे өөрээниң чажырбайн чугаалаан:

— Дыка-ла эки болуп-тур! Силерниң чедип келгенингे өөрүп тур мен — дәеш, Марусяның арнынче, ооң долбанығ кызыл чаактынче топтап көргеш: — Дыка-ла аныяқ-тыр силер! — деп өөрээн.

— Бир үе келирге, мен база-ла назыдай бәэр болгай мен — деп, Маруся баштактанышкан.

— Ох, хоржок, қыраан херек чок, кеззәде бо хевәэр артып көрүндер, бистиң үениң қаасталгазы, чаражы болур силер...

Чугаалашкаш, чедирип келген оолду мырыңай уттуппаннаар. А демгизи ханада чөленип алган Маруся же мұңгаргай көрүп турган. Чарлыр үе келген. Орукка қыс-бile ооң аразында төрүттүнген чоок найырал ам эстири ол ышкаш аңаа сагындырган. «Ам қыс катап көрбези ол боор бе, хұлумзүревези ол ирги бе?.. Мен ооң چузу мен ынчаш, бижиқ-билик биче билир бәдүүн оол-ла мен ыйнаан, мал кадаардан, аң аңаардан башка менде чүү боор...».

Үнүп чоруптарда, оол аяар чугаалаан:

— Байырлыг, әмчи!

— Адыр, адыр, Адар-оол. Кайнаар чорууруңар ол? — дәеш, ооң арай элдеп байдалын Маруся эскерип қааш, аалынче чаныксай берген боор деп бодааш, айтырган:

— Моон ыракта туар сидер бе?

— Ырак эвисте, бистиң колхоз моон беш километр черде.

— Ынчаарга далашкаш чоор сидер, чаңгыс бо хұн-даа болза турзуңарза...

— Чок, әмчи. Мен ам чоруүйн дәеш — деп арай мұңгак чугаалаан.

Ооң чодураа дег кара-кара карактарынче Маруся көрген.

— Сидер меңзә ажынып тур сидер бе, Адар-оол?

— Чүү дәэрицер ол, әмчи... Сидерге кым хорадап шыдаар боор. Ооң холун Маруся быжыг туткаш, сеткилиниң ханызындан чугаалаан:

— Ындыг-дыр, Адар-оол. Сидер-бile өңдүк болуулу. Мен бодаарымга черле эки әр-дир сидер.

— Ындыг-дыр, эмчи. Аажок эки болду! — дээш, Адар-оол кончуг өөрүшкүлүг апаргаш, чугаалаан: — Бир эвес Адар-оол силерге херек апарза, чугаалаар силер, силерге шуптуну кылып болур мен. Байырлыг, эмчи, байырлыг!

— Байырлыг, Адар-оол, дүрген ужурашкы же!

- 
- ✍ 1. Чечен чугаада болуушкуннар кажан болуп турган деп бодаар силер?
2. Маруся деп кымыл? 3. Адар-оолдуң портредин кандыг уран-чечен аргалар-бите чураанын сайгарыңар. 4. Харлыг көшке деп чул? 5. Адар-оол биле Маруся көшкеге таварышкаш, боттарының кандыг талазын көргүскеннери?
- 👉 6. Адар-оолдуң бойдустуң болуушкуннарын, ооң «аажы-чаңын» эки билирин кайы домактар херечилеп турар-дыр? Ону сөзүгледен тыпкаш, бодалыңарны бадытканар. 7. Чогаалчы бойдус чурумалын дамчыштыр чүнү илереткен деп бодаар силер?
- 🎭 8. «Адар-оол биле Марусяның көшкеге таварышканы» деп темалыг чуруктан чурааш, ооң камгалалын кылыңар.
- ⌚ 9. «Тыва литературада маадырлыг чоруктар хөй», «Чогаалдың маадыры — бөдүүн арат» азы «Найырал» дээн чижектиг темаларның кайы-бириэзинге төлевилелди бөлүктеп ажылдан тургаш кылыңар.
- 🧠 Ижээн, дээр хинди, дцвц, медерел, өртээл, шораан хаялар деп сөстерни «Тыва дылдың тайылбыр словарындан» ушта бижээш, сайгарыңар.
- 



## Кызыл-Эник Кыргысович КУДАЖЫ

### Сарыг-оолдуң плантациязы

(«Таңды кежии» деп чечен чугаалар  
чыныңдызындан)

Чаваш дээргэ Уш-Белдир курорт-түң чиге хүн үнер чүгүндөн ағып кирген бичии хемчигеш чүве. Ооң бир чамдызын дозуп алгаш, изиг аржаан соодарынга ажыглап турар.

Курортка дыштанып турувуста, бир хүн Степан Агбанович менээ санал киирди:

— Удавас чоруур болгай бис, сын оъду казып алыр-дыр.  
— Ооң кайда чүвел?  
— Мен билир мен. Энир чылын Матпа Сумбууевич Хомушкуну эдертип чордум. Чаңгыс кижи кайын чоруй аар. Хонар апаар. Адыг-мажаалай... — дээш, хоочун чогаалчы арай чииренип хүлүм-зүрүп кагды...

Мооң-бile Уш-Белдирге Степан Агбанович-бile иийи дугаар дыштанып турагын бо. Кады балыктаарга кедергей солун кижи. Боду хоржок, ооң орнунга кадайы Мария Давыдовна чедер сыйрт-кыыш тудуп алганда, ужур чок болгай. Чамдык эрлерге аштырбас.

Степан Агбанович спиннинг мырыңдай октай албас кижи чораан. Орааштындырып-ла алыр. Оон ону чазып олура хүнзээр. Ооң орнунга балык ишти аштап, мун кылыш, одагга паштанып турда, ындыг-даа кадай чок. Мун амданы киирер күлча-согуна, оът-сигенни шуптузун черден алыр, шай чеми черле муңзавас — янзы-бүрү каттар, шеңде, черлик-шай. Мөөгүлөр ылгап, чыып турда база кайгамчык. Кандыг үнүште кандыг витаминнер барын, ооң хоолулуун, чүү деп аарыгга удур ажыглаарын дөгерезин чугаалап кээр. Ёзуулуг-ла хуулгаазын эмчи. Уш-Белдирниң дагларын дөгерезин бодунуу-бile адап алган кижи: Маны-Шораан, Сыын-Чүрээ, Кадын-Каът, Мөңгүн-Дуруг... Мен ону өттүнгеш, курорт артында улуг сарыг кожагарны Сарыг-оол дээр апарган мен. Күзүн оът-сиген быжып, сөөскөннөр саргара бээрge, ол сүүрнүң Степан Агбановичиге дөмөйи аажок чүве.

Улуг чогаалчы Уш-Белдирге тураскаал база арттырып каан. Чамдык шолук кижилер дег, чер-чуртунуң хая-дажын чүдертедип, адын чуруп каан эвес. Степан Агбанович бистиң төрээн черивистиң каас-чарааш булуунуң дугайында онзагай чечен чугааларны арттырып каан. Ооң «Кижи — бойдустун төлү» деп номун номчуп, редакторлап тургаш, дылдың ол эртинелерин номчукчуларга чедиржир аас-кеҗиктig болганымга чоргаарланып чоруур мен.

Оон ыңай чүгле чаңгыс бодумнуң билир тураскаалым база бар. Ону көрүп кааш, хоочун башкымның хөглүг, баштак, аныяк кыстар ышкаш, бижииргээчел, чөгенчиг чувведен-не арны кыза хона бээр чаптанчыг аажы-чаңын сактыр боор мен.

Степан Агбанович-бile Белим хемниң унунга балыктап чораан бис. Мен калбак саарыгга турдум, Сарыг-оол адырык сеп унун куду бадып орган.

— Бээр бол! — деп, кижимниң үнүн дыңнадым. — Бо чүвеңни адырып чадап кагдым.

Маңнап чеде бергеш, кара баарым каткы же каттырган мен. Тевенениң үдүн чире аткаш, уттүг-чарынның үдүн өттүр аткан дээн тоолда-бile дөмөй чүве болду. Ындында-ла сыйрткыш октай албас Степан Агбановичиниң та канчап ынчаар чайыпканы ол ийик, ооң спиннингизиниң чүгү бежен метр чыгам септи көжир ужууккаш, ол чарыкта кудай өеэн дырбап туар куу сыраның шыпшык бажында барып ораажы берип-тир. Тыртарга, ыяш боду чайганыр...

— Канчаар бис, Агбанович? — деп кайгап айтырдым.

Шынап-ла, ындыг чүве, ол чарык көжер арга база чок.

Хоочун чогаалчы ойнаан-даа ышкаш, шыннаан-даа ышкаш, ийи аразында дүжүрүп кагды:

— Жилка ириир эвес, кылаңнааш кырыыр эвес, тураскаал бооп тургай aan. Ында-хаая келгенинде, көрүп каап туар сен харын.

Чогаалчының сыйрткышыжының кылаңнааш демириниң иштин кызыл өң-бile будуп каан чораан. Ынчангаш көскүзү аажок, куу сыра бажында кызыл чечек-ле.

Кара-хаактыг, мыйгак-хараганныг, малдырганныг, мургулуг кара кашпал ишти. Катты холуң сунгаш-ла, үңгүп чоруур сен. Ирей ораны чер чораан. Изи бо-ла чыдар, өдээ чап-чаа. Мээн харыысалгам базым бүрүзүндө улгадып чор. Сарыг-оол дег кортпас кижи көрбээн мен, куу даянгыш тудуп алган, мурнумда хөөрөп-хөөрөп базып-ла орар.

— Дуу ииде кошкара деп кончуг әмиң ол боор. Хан базышкыны улуг кижи хайындырып ижер. Бо малгашта орап калбак көк бүрүлүг калбыыш бадан деп үнүш-тур. Хан доктаадырынга херек. Бо тевекудуруу ышкаждыл, билир-ле болгай сен, Хендерге унунда эндерик. Ооң хандызы нерви оожуктурап боор чүве. Қадайлар кылыштаны бээрге, ону бериптерге ол-ла, анаа халбыя-ла бээр.

Бир черге дүштеп, шай хайындырып ижип ора, айтырдым:

— Силер черле коргар чүректиг силер бе, Степан Агбанович? Хөөрөп-ле чоруур, хөөрөп-ле чоруур.

Чогаалчы шын сеткили-бile чугаалай-дыр:

— Чүү дээр мен, қадайымны кыйгырар мен бе? Сээн бо хөректеп алган чоруур дүүргең база хей чүве-дир ийин. Ирей келзе-даа, ооң биле чүнү канчаар сен?

Шынап-ла, чөп-түр ийин, тараа ок-бile адыгны кичигелээш чоор боор, улам өжүгер ыйнаан.

— Ооц орнуунга таакпылашканы дээрэ — деп, Степан Агбанович карманындан «Беломор» уштууп көргүстү. — Бо черниц ирейлери ыш билбес чадавас.

Чүктенипкеш, оон ыңай оруувус улап чоруптуус. Чинде кара хемниц ол-бо талазынчэ чеже-даа катап кештивис. Ооц соонда солагай талазында кадыр дагже үнүп каан бис. Ында айт оруу бар чорду.

Шилгедек, ындазында чиик болгаш, дөшкө Степан Агбанович меңээ кызыдыр четтирибес кижи чораан.

Кадыр одуругну дүжүп баткаш, база катап хем иштинге келген бис.

Чай чок чораан хирезинде, Степан Агбанович чугаазын үспеди:

— Дужувуста турган ак чалымнарлыг шаңгырны көрдэн. Мрамордан бүткен даг-дыр. Ооц ак манызы-бile келир үениц хоорайлары, суурлары каастаныр боор.

Баарывыста арыскан чыжыр-чажыр-ла диди. Мен Степан Агбановичиниң чанынчэ шурай бердим. Бoom тудуп алган шыптыраңнаан тур мен. Кайыын-на келир ирги?

Степан Агбанович папирос ызыра тыртып алган, от шап чадаан тур. Ында мөгүдээн шинчи черле чок болду. Херек болза, ирей-бile таакпылаҗыры ол боор. Ол черле ыш сөөртпес кижи. Ынчангаш от шап туарының эпчок-упчогу-даа аажок. Алгаш кыпсы шаап бердим.

Дааш ынаар-ла ырап чоруй барды. Та кандыг ацы, хирезин бодаарывыска, черле адыг ышкаш.

Сарыг-оол карактарын имирертир хүлүмзүрээн тур:

— Өгбевис чоруй барды аа?

Оон кезек кылашташкан, изин көрдүвүс, шынап-ла, ол чорду. Адыг. Ынчан мени оожкутурары ол бе, Сарыг-оол чаш ыяштан туттунуп алган алганган тур:

— Чодураа дег кара карактыым, чойган ышкаш хөнү сынныым...

Шынап-ла, чойган чорду, согун-на.

Степан Агбанович ооц бүрүлерин чыттаан, суйбаан, сыйын келген чуктарын аксынчэ суккан тур:

— Мындыг эм чок. Ижин-баарга, өкпе-чүрекке. Хөрекке дег-диргенде, чөңгүлгенде. Тайгада шупту чүве эм — агаар, суг, оът-

сиген, кат-чимис. Хөрзүн безин — дээш, доңгайгаш кара довурак адыштап келди. — Көрден, артында үстүг ышкаш. Мында кандыг эм-дом бүдүмелдер сицмээн дээр сен! — Оон каш баскаш, өл күзүрүмнү чада туткулааш, черге дискектенип олуруп алды. — Бо-дур чиир мөөгүлер. Чигге-чиирни көрдүң бе? Дуу дээргэ саржаг-хавыдыр. Хаа, хүргүлбейлерни, дилгижектерни, чингиспейлерни, өдектуун... Боларны канчаар чивес дээр сен — хаарып, быдаалап, дузап, кургадып, үүжелеп... Мөөгүнү кочулаар улус болгай бис. Пенициллин дээр кончуг өмни быйыргын мөөгүлерден кылыр болгай. Ол дээргэ мөөгу дээн сөс-тур.

Степан Агбанович шаанга киир номнанып алырга, аяар айтырдым:

— Чедер черивис ам ырак бе, Степан Агбанович?

— Харааданчыг-дыр, харааданчыг-дыр. Черниң байлаан четче ажаап, ажыглап шыдавас-тыр бис. Чеже кат-чимис, чочагайтоорук хар адаанга барып турар деп бодаар сен? Санаар арга чок. — Оон хөңүн чазамыктап кагды. — Ажырбас, бойдуста артык чуве чок. Кижи чивес-даа болза, аң-менгэ, балық-байланга, курт-кушка чемиш болур, оон артканы үрезин-хүнезин, оон артканы хөрзүн-күзүрүм болур... Ам удавас, удавас...

База-ла сүржүп алгааш базыптывыс. Үр-даа болбайн, ажык черге кылаштажып үнүп келдивис...

Аңчыларның казанак бажыңы бо-дур. Ооң каш базым кыйыны биле Чаваш хем кыңгырткайндыр ырлап бадып чыдыр. Ында ооң үнү, мөңгүн удазын дег, чинге, кижи анаа-ла арта халып турар, ынчалза-даа көвүктелдир саарыглап, даштарга үскүләэш бызыргыннары эрик кырынче чаштап турар. Арыын канчаар, суунунч дүүнде даш бүрүзү көстүп, куржааңгыландыр ойнап чыткылаар. Аржаан чок чер болза, ол база аржаан.

Казанакты ылап кылган чорду. Соңгазын-даа, эжин-даа. Ынчалза-даа оларны үреп, шилди буза шаап турган хевир бар чораан.

— Ирейлерниң аалдап турганнары ол-дур ийин — деп, Степан Агбанович тайылбырлады.

Ёзуулуг чурттап болур бажың, аъш-чемниг, шуглак-дөжектиг, тодуг-догаа.

— Чедип алганда, ам далашкаш чоор бис — деп, Степан Агбанович чугаалады.

— Эм-шагаан, дом-шагаан оът-сигенни даарта эртенги сырын-били казар бис.

Арыг агаарлыг даштын одагга паштанып эгеледивис.

Аъш-чем болу бээрge, оозун өру-куду чашкан кижим дээрge алганып-ла олур:

— Чаваш хемим — чарап хемим, бай одаг, байлак одаг! Ижип, чип ижээвээн мен, ап чип амдажываан мен. Бээрицни бээр сен, берген шаац-били алыр мен. Алырымны алыр мен, артык-тудуу албас мен. Катап база чедип кээр мен, хайырацны харамнанма, соонда база чедип кээр, чоруум чогуп чоруур болзун...

Дыка орайга чедир чугаалашкан бис. Колдуу-ла хоочун башкы хөөрөп турду. Мээн эвес, оон амыдыралы меңээ солун болду: Ногаан-Дарийги, Сагаан-Дарийги деп кыс бурганнар-били хой кадарып өскени, партизаннап чорааны, Москвага дүктүг негей тоннуг, андарык хаайлыг кадыг идиктиг эрниц эц баштай өөренип чеде бергени, чогаал бижип эгелээн...

Хөөрөп-хөөрөп, адак соонда мынча дээш, эр соруу, эът-ханы хайнып каттыргылады:

— Тывада менден өске, дириг бурганнар суйбап чораан кижи чок ийин.

Даартазында эртен эрте эрестиг тура халыштывыс. Чемнени шаал алгаш, хүүректерни туткаш, бажың үстүнчэ чоктаптывыс. Ында көк чыраалар аразында тарамык мээстер адаанда ийлерде эндериk сыйн оъду үнгэн болду.

— Улугларын казар, бичиилери ам-даа чедишин — деп, Степан Агбанович чугаалай-дыр.

Ыяш, даш чок ак ийге чеде бердивис. Улустуң эргиде казып турганы илден чорду. Ширикти коптарып каапкан.

Ынчан күс турган болгай. Кедек черниц оът-сигени саргарып эгелээн. Сыйн оъдуунун узун сывы база када берген чорду.

Сыйн оъду даштындан көөрге безин онзагай, чарап, хөрлүг, сывы бедик үнүш болду. Эц узуннары бүдүн-чартык метр хире бар. Оон шыпшык бажында кара чаңгыс, беш-алды харлыг уруглар чудуруу хире төкпек, эмишкеектии дег ягаан өннүг чечектиг. Ынчан оон быйыргын үрезиннери быжып, тоглап турар апарган.

Сыйн оъду казарда, хүүрек-били тепкеш, ай ышкаш ушта соп алыр деп бодаан мен. Ындыг эвес чораан. Оон дазылы чер тарай

берген чыдар. Ынчангаш ырактан дөгээлеп эгелээр. Адаан база хозаар. Довураан дүжүр кактаар. Бичии-даа дазыл-дамыр үзе тыртып болбас. Оъттуг эм шынары кошкай бээр.

Он шаа дөс казып чорувуста, Степан Агбанович соксады берди:

— Ам болзун. Болар биске каш-даа чылда чедер. Чүү дээр ийик, чедер болгаш артар, чегдирип-даа болур.

Степан Агбанович ынчан чүрээндэ саргышкын-бile чугааланып турду:

— Мурнувуста улус үрэзинни каяа тарып турган боор? Бо ийни үргүлчү мынчаар хаван ышкаш часпарлаар болза, чүү артар? Ам ийи-үш чыл болгаш, моон сыын оъду тыппас бис. Бойдуста төнчү чок чүве чок. Төрээн черивистиц байлаан камнаар, хумагалаар, ёсту-рер ужурлуг бис. Келир үеде ажы-төлдер база бойдузунун каазынга таалазыннаа, амыразыннаа.

Дазыл казып алганынга бодаарга, үрэзин тарып каанынга хоочун чогаалчы дыка-ла таарзынды. Артында, чаш уруглар дег, амырап, таалап, өөрүп турду. Адак-бышкайаа безин чиигей берди.

— Көрдүц бе, ам каш чыл болгаш келиривиске, бүдүн огород турар эвеспе. Сыын оъттуг плантация — деп сеткили ханып чугааланды. — Кырган ақыңны өттүнүп чор. Аныяк эш-өөрүнгэ база айтып бээр сен...

Чүге-ле ийик, хоочун чогаалчы ол чоок-кавыны эргилдир шала муңгак кылдыр көргеш, суг кыдышынче аскай аарак кылаштап кирипти. Мен чүнү-даа ыыттавадым.

Чаваш хемниң час бажында сыын оъттуг шөл туруп кагды.

Амыдырал ынчаар чаяап каан болган, Степан Агбанович ол черге катап келир арга чок болган. Ынчалза-даа Чаваш бажында ажык мээстэрде хоочун чогаалчының холу-бile тарып каан ягаан өңнүг чечектери кижилерниң кадыын камгалап, караан өөртүп, сериин салғынга аяар чайганып каап турарлар. Степан Сарыг-оолдуң плантациязы.

- 
1. Чечен чугаада кандыг кол бодалды илереткен-дир, ону кезектерге чаргаш, аттардан беринцер.
2. С. Сарыг-оол кандыг тураскаал арттырган-дыр?
3. Хоочун чогаалчының төрээн чериниң бойдузунга ынаан, буюн сет-килдиниң дугайында бижээн абзацтарны катап номчуңар.

4. Аңчыларның казанак бажыңы кандыг черде турар-дыр, ону канчаар әдилеп турарын номчуп, сайгарылганы чорудуңар.
5. Сыын оъдун кандыг уран-чечен аргалар-бile чураан-дыр?
6. Сыын оъдун касканын болгаш ооң үрезинин олуртканын делгеренгей чугаалаңар.
7. С. Сарыг-оолдуң берген чагынын ушта бижээш, сайгарыңар.
8. Чүге чечен чугааны «Степан Сарыг-оолдуң плантациязы» деп адааныл? Бодалыңарны сөзүглелдер-бile бадыткаңар.
9. Силенриң чурттап турар чериңерде эм үнүштер бар бе? Оларның дугайында ава-ачаңар, улуг назылыглардан соңуургап бижиңер.
10. Чечен чугааның маадырларының чоруп турар маршруттарын картадан демдегле.
11. «Тыва улустуң алгыш-йөрээлдери» деп номдан эм оъттар чалап алырда, ажыглаар чалбарыгларны ушта бижээш, сайгарып танышыңар.
12. С. Сарыг-оолдуң «Кижи — бойдустуң төлү» деп ному-бile танышкаш, бойдус камгалалынга бижиттинген чечен чугааларын соңуургап номчуңар.
13. Жилка, катушка, кош-дүңгө, плантация, спиннинг, сыын-оъду, чиренип, шолук деп сөстерни «Орус-тыва» болгаш «Тыва дылдың тайылбыр словарындан» ушта бижээш, сайгарыңар.

## Монгуш ДОРЖУ

БИнак оолдарым —  
Назым биле Мусага

### Дайынныг кино көргеш...

Ыңчан Москва чанынга бир колхозка шефтеп турган бис. Ийи чүс ажыг бажыңыг, улуг әвес колхоз чүве ийин. Ооң өоогунга сиғен сарааттап турган бис.

Курузуусту бригада кылдыр үскеш, ийи аңгы колхозче октап-каннар. Бистиң мында келгенивис бо. Он ийи эр — он ийи аңгы сөөк. Интернационалчы бригада. Бистерни үш-үш кылдыр колхозчулар бажыңнарынга үлеп кагган. Хонар, дүжер черлеривис ол.

Кино, танцы хаая болгулаар. Аныяктар ховар. Өөренирлери өөренип, ажылдаарлары ажылдап, хоорайже чорупкан болганныар. Эләэн каш кызыжактар бар. Бистиң дөспес оолдарывыстың кайы-бирәэзи-ле кандыг-бир кыс-бile ылчыңнажы берген болза, авазы дораан-на уруун кый деп аппаар. Мында кызыжактарны иелери

хайгаарал турарлар-дыр. Субботаларда хоорайдан кээп турар кыстар-бile таптыг хөөрежирин дугурушкулаар бис...

Бис үш эжишикелер: Кавказ чурттуг Ахмат, Соңгу чүктүң Геназы, Ак-көк Тывадан мен Матрёна угбайның бажыңында бис.

Матрёна угбай дээргэ, бежен хар ажа берген, кырлаң думчуктуг, арын-шырайы болганчок-ла хуулар, шангыр карактарлыг, чугаакыры аажок кадай чүве ийин.

Баштай келгенивис кежээ-ле, бистиң шуптувустуң хар-назыны-выстан эгелээш, душтуктарывыска чедир «байысаап» каапкан.

Бир-ле кежээ клубка чаа кино болур апарган. Матрёна угбайсты чаладывыс.

— Чок, оолдар, мен барбас мен. Боттарыңар барып көрүңер — дидир.

— Чүге, угбай? — деп, Ахмат айтырды.

— Ынчаар болзуңарза, хомудай бээр бис — деп, Гена улашты.

— Солун дижир-дир — деп, өөрүмгө мен ушкаштым.

— А дайынныг бе?

— Та. Оозун билбединис — деп, Ахмат тулуксады.

— Дайынныг болза, херек чок. Дайынныг кино көөр хөндүүм чок — дээш, угбавыс улуг тынды. «Чүге? Чүге?» дижиривис соксай берген, алаң кайгап манап тур бис.

— Мындыг-дыр, оолдар. Дайынныг болза, көрбес мен. Көрген улус бар боор — айтыраалыңар.

\* \* \*

Клубка келиривиске, журнал эгелей берген болду. Айтырар кижи-даа тыппадывыс.

Кино-даа эгеледи.

Тайбың хоорай оттуп келген.

Кижилерниң арын-шырайында өөрүшкү. Ажыл-ишче шуужуптурлар.

Чечек-чимис эртенги салгынга өпейледип, кижилерге мөңгө аас-кежиин күзөп турганзыг-даа...

Хенертен самолёттар даажы дыңналган соонда, аяс, ак-көк дээрден коргулчун октар чаап, бомбалар улай-улай дүшкүлээр!..

Тайбың хоорай сандараан. Ында-мында ыы-сыы, алгы-кышкы, өлген кижилер... Каас, чарааш чечектер-даа ханга, довурак-доозунга

борашкан. Бир-ле херээжен ылым чаш уруун тудуп алган бар-ла шаабиле алгырып, дуза дилеп турага... База бир дицмирээшкен — демги херээжен-даа, чаш төл-даа дээрже ужуп, черже кире берген-не чүве...

— Ол-дур! Ол-дур! Дузалажыңар! — дээш, Матрёна угбавыс тура халып келди.

— Олуруп көрүнцер — деп, Гена аймап чугаалады.

— Хоорай-даа, кижилер-даа чок! Өлген! — дээш, угбавыс чонаада ужуулбас аржылын ушта соп алган, ийи холдап ууштаан, кышкырып тур.

— Оожургадып көрүнцерем — деп, артывыста бир эр дилей-дир.

Ол аразында кино үстү берди. Ында-мында шүжүлешкен херээжен кижилерниң ыяңғылыг, човууртаанзыг үннери дынналыр...

— Чорууйн, оолдар — дээш, угбавыс эжикче углапты. Бис базала үнүптувүс.

Бажыңга чедир чүнү-даа чугаалашпадывыс.

— Каям, кымда таакпы чор, оолдар — деп, угбавыс ам-даа сирилевишаан, чугаалай-дыр.

Узун хоюг ышчыгаштарны таваар үрбүштээн, хоода чуруктарже көрүп олур, чугааланып үндү:

— Дуу ол кара салдыг матрос мээн ашаам-дыр. Дайынга өлген. Ооң чанында олурап оглум-дур. Мырыңай Берлинге өлүрткен. А ооң адаанда — уруум Надя. Ону холумга тудуп алгаш тур, бо суурга дүшкен бомбаларны көрүп, дайынның бүгү-ле бергелерин чүктеп эрттим. Уруум ам эмчи институтунуң сөөлгү курузунда...

Угбавыс ажып бар чораан хүннүң соонче соңга өттүр көрүп олур. Ооң херелдери чылынын, чырынын ам-даа черже чашпышаан. Ооң уруу Надяның, бистиң интернационалчы бригадавыстың чырык хүнүн кандыг-даа кылын кара булуттарлыг шуурган дуглап шыдавас. Амыңыралдың маңын чүү-даа доктаады албас. Акыдуңмалышкы чоннуң чаңгыс аай соруун чүү-даа сый шаап шыдавас.

\* \* \*

Өөредилгэ чылы караш дээн. Дыштанылгамны аалымга эртирип, хостуг шактарымны үргүлчү-ле библиотекага чарыгдал турдум.

Бистиинден үш бажың ажылдыр бажында чаа чурттакчылар кээп олурупкан чораан. Элээн улуг дарга кижиниң өг-бүлэзи. Олар

Мергенмаа дээр уругlug. Оозу үргүлчү-ле библиотекага келир. Ацаа ооц-бile таныжа шаap алган мен.

Мергенмаа чараш-даа уруг болган. Ындыг-даа бол, кижиниц даштыкы чаражы чеже-даа хире болза, «шай хайындырып ижер эвес» дээш, сагыш-сеткилинч шоглаар чаңчылым ынчан база хайны-гып келген. Бир-ле катап Мергенмаа-бile хөөрежиксей берген мен.

- Номнар номчуурууцар кончуг-дур аа, дуцмам?
  - Номчуур-ла мен. Бо библиотекада номнар эвээш-тири.
  - Ховар номнар харын мында ышкаждыл.
  - Кандыг?
  - Улуг хоорайларга тывылбас аан.
  - Ынчаарга, менээ бир номдан шилип бериндерем.
  - Кандыг? Совет чогаалчының бе, даштыкы бе?
  - Силерниң шилип бергеницерни-ле номчуур мен.
  - «Анна Каренинаны» номчаан силер бе?
  - Совет бе, даштыкы бе?
  - Лев Толстойнуң аан?
  - Чок. Ону номчуп көрэйн.
- Уругга номну тутсуп бээримгэ, кезек боданып олура, айтыра-дыр:
- Москвада кандыг танцылар теп турарыл?
  - Яңзы-бүрү.
  - Твиист, чарльстон сугларны бе?
  - Оларны база.
  - Бистиң клувувуска ындыг танцылар тептер болза, хана солунга чыпшыр шаap каар.
  - Орта, культуруу-бile ойнавайн, «курлуп», «далып» туруп бээр силер ыйнаан?
  - Кизи бүрүзү-ле бодунуу-бile тевер улус-ла болгай бис.
  - Бөгүн кино болур ирги бе?
  - Ийе.
  - Көөр силер бе?
  - Чугаажок.
  - Мен база...

\* \* \*

...Шүлүк бижип эгелей берген шаамда, «челээшти клазымда бир уругнуң хоюг кара чатьштарынга кончуг-ла баглаксап чораан мен ийин» деп боданмышаан клубка чедип келдим.

Мергенмааны көөрүмгө, үнген кижиден-не айтырган тур:

- Дайынныг-дыр бе?
- Чок.
- Шпионнуг-дур бе?
- Чок.
- Ынчаарга, хей кино ышкажды!

\* \* \*

Кончуг солун кинокомедия доозулду.

Орук ара Мергенмаадан айтырдым:

- Че, кандыг-дыр?
- Солун-на-дыр.
- Дайынныг деп бодадыңар бе?
- Иие. Дайынныг, шпионнуг киноларга ынак кижи мен.
- Чуге?
- Солун боорга.

— Дайында солун чүү боор. Дайын биле шпион чарылбас дайзыннар ышкажды! Дайынныг киноларга хөндүм чок — деп, Матрёна угбайны өттүндүм.

— Ынчаарга дайынныг киноларны чүге үндүрүп турар чүвел?

— Дайын кажан-даа болбазын дээш, делегейге чаңгыс-даа хөрээжен кижи дулгужак артпазын дээш, чаңгыс-даа төл өскүс артпазын дээш, чырык черниң кырын хан-чин, өрт, ыш боравазын дээш! Дайынныг кинолар дээрge — дайынга удур кинолар-дыр — дээш, Москва чанынга бир суурга Матрёна угбайның амыдыралын Мергенмаага бирден бирээ чокка чугаалап бердим...

Уруг кезек ыыт чок, таваар базып ора, эргелиг карактары-бile чымчаңнады шонмушаан, дилей-дир:

- Институтче экзамен дужаап чоруурум ол-дур. Чамдык эртемнерге менээ дузалажып көрүнцер аа.
- Шыдаар-ла шаам-бile дузалажыр мен.

\* \* \*

Сылдыстар кылаң дээрде оттуг чечектер ышкаш апаргылаан, чивенейнин турлар.

Чедишкен ай, даарта силерге бараан болур аяс хүннү чалап эккээйн дээнзиг, сынның кырында калгып чор.

Мергенмаа биле бис, чырык черге дайынны үндүрбес, ацаа согуг кылдыр өөренип, чурттаар бис дижип даңғыраглашканзыг, чалыы эгиннеривис чоокшулаҗы бергилээн чанып орган бис.



1. Чечен чугааның тема, идеязын тодарадыңар.
2. «Интернационалчы бригаданы» канчаар билип турар сiler?
3. Матрёна угбай чүгө дайынныг кино көрүксөвөс деп бодаар сiler? Бодалдарыңарны сөзүглөл-бile бадыткаңар.
4. Салгалдар аразында харылзааны канчаар көгүскенил?
5. Чечен чугаага пландан тургускаш, кезек бүрүзүнгө аттан чогаадыңар.
6. Кайы-бир теманы шилээш, кыска чогаадыгны бижиңер: «Дайын дээргэ... », «Бодандырып келир эгелер... »
7. «А мен бо чогаалды мынчаар төндүрөр ийик мен...» деп чогаадыкчы ажыл.
-  8. *Интернационалчы, дулгуяк, коргулчун оқтар, шоглаар* деп сөстерниң утказын тайылбырааш, домактардан чогаадыңар.

## ЧОГААЛ ТЕОРИЯЗЫ

### Композиция болгаш сюжет дугайында билиг

Композиция биле сюжет чечен чогаалдың чугула айтырыгларының бирээзи болур. Оларны чедимчелиг ажыглаанындан чогаалдың тема-идеязы тодаргай илереттинер.

Кандыг-даа чогаалга болуушкун бир-ле чуведен эгелээш, чоорту уламчылап, дыңзыза-дыңзыза, кандыг-ла бир түннелдиг доостур.

Маадырларның аразында харылзааларынга үндезилеттинген чогаалдың ындыг шимчээшкүннег хөгжүлделиг апаарын ооң *сюжети* дээр.

Сюжеттиң таарымчалыг тургустунганындан чогаалдың идеязы улам тодараар. Сюжет элээн каш кезектерлиг: *дүцүкүн, өөскуңдүлгэ, дыңзыгышкүн, чештиниишкүн*.

Дараазында үнүп кээр чөрүлдээниң эгезин салыр, ооң чылдагааны болур таварылганы *дүцүкүн* дээр.

Чөрүлдээ үнүп келгеш, баштайгы үелерде болуушкуннуң уламчылаарын өөскуңдүлгэ дээр. Чөрүлдээ улам дыңзыгып, чаа чада дыңзыгышкүнчө кирер.

*Дыңзыгыышының чөрүлдээниң эң-не шыңгызыраар үези.*

А чөрүлдээниң кандыг-ла бир түнел-бile шиитпирлеттинип доостурун *чештинишишкин* дээр.

Сюжеттиң иштинге *экспозиция* болгаш *эпилог* база туруп болур.

*Экспозиция* дээргэ чөрүлдээ дорту-бile эгелээриниң мурнунда удуурланышкак маадырларның аразында харылзаазын, оларның эрткен оруун көргүскен үзүндү. Экспозиция чогаалдың эгезинге, ортузунга, сөөлүнгө-даа туруп болур.

*Эпилог* дээргэ чөрүлдээ кандыг-бир түнелдиг доозулган соонда, маадырларның оон ыңай кандыг салымныг болганын дыңнадыр кыска медээ-чугаа. Эпилог чогаалдың сөөлүнгө чоруур, кончуг ховар таварылгаларда эгезинге туруп болур.

Кандыг-даа чогаалдар — улуг-даа, биче-даа, кыска шүлүктөрден эгелээш улуг романнарга чедир — ыяавыла *композицияның дүрүмцингө* чагырткан турар.

*Композиция* дээргэ чогаалдың бүгү кезектериниң идеялыг утказын илередир сорулгага таарыштыр чагыртып, бүдүн система кылдыр тургустунганы болур. Сюжеттиң бүгү кезектери композицияның дүрүмнеринге чагыртыр.

Сюжет композицияның бир кезээ, өске кезектерин (элементилерин) допчулай көрээлиндер.

*Лириктиг кирилде.* Чечен чогаалдың идеязы маадырларның аажы-чаңындан, ажыл-херектеринден болгаш өске-даа хөй-хөй чурумалдардан илереттинер. Оон-бile кады чуруп көргүзүп турар чүүлдериниң дугайында сеткил-бодалдарны чогаалчы бодунун мурнундан дорту-бile илередип болур. Чогаалчының шак ынчаар дорту-бile чугаалаан бодалдарын *лириктиг кирилде* дээр.

Лириктиг кирилде чүгле эпос чогаалдарынга таваржыр. Шии чогаалынга чогаалчының чугаазы азы лириктиг кирилде чок, чуге дээргэ ында хөделиишкен маадырларның аразында чугаазын дамчыштыр илередир. А лирика долузу-бile сагыш-сеткилдин илерээшкени болур.

*Пейзаж* дээргэ бойдустуң байдалын чогаалга уран-чечен чурумал-бile чуруп көргүскени.

Чогаалчы пейзажка бойдустуң чаражын, чаагайын, күчүзүн, чер-черниң онзагайын көргүспүшүшүн, номчукчуларны бойдуска хумагалыг, ынак болурунга кижизидер.

Пейзаж маадырларның сагыш-сеткилини, ниити байдалын улам ханыладыр чуруп көргүзериниң бир аргазы болур.

Кижининң даштыкы байдалының (арын-шырайының, идикхевиниң дәэш оон-даа өске) чурумалын *портрет* дәэр.

Портретке маадырның өскелерге дәмейлешпес онзагай шырайы, социал байдалы болгаш өске-даа талалары илереп көстүр. А чамдыкта арын-шырайындан маадырның аажы-чаңы, мөзү-бүдүжү-даа көстүп келир.



1. Сюжеттиң кезектерин адааш, оларның аразында ылгалдарын чижектерге бадыткаңар.
2. Өөрөнген чогаалдарыңарның (1–2 чижзәнгө) композициязын сайгарыңар.
3. О. Саган-оолдуң «Найырал» деп чечен чугаазындан портреттерни ушта бижәеш, уран-чеченин сайгарыңар.
4. К. Кудажының «Қызыл-Бөрттүг» деп тоожунуң сюжедин тодарадып бижицер.
5. Өөрөнген чогаалдарыңардан пейзажты ушта бижәеш, уран-чеченин сайгарыңар.



## Игорь Иргитович БАДРА

(1952)

Эргим Уля угбай

Новелла

Оон бәэр ам таптыг-ла он ийи чыл эртти. Ол чеден ийи харлап чоруй, «ушкан» ийин. Чылы кирерде, угбайн барганы ол, хөөкүй... Алыс аажок бөдүүн, улуг назылааже сеткил-чүрэй буюнныг, ажы-төлү, бажың-ораны, чону дәэш дүвүрепле, үүртеп-ле чораан кижи-дир ийин, күжүр. Элдеп чүве, төрелдөргүл, чум-даа эвес хиреде, ол кырган кижи мәэң сеткилимге дириг сактыышкын бооп, амдыгаа дәэр чурттап чору.

Боду орус кижи. Ады база бөдүүн, чымчак дыңналыр, Ульяна, а адазыны-бile Михайлова деп хүндүлөп адаар. Ыңчалза-даа күжүрну кым-даа ынчаар адавас: оглунун ҹаңғыс-ла оглу арагачы

Колядан әгеләэш, кожаларынга чедир шупту улус ону анаала «бабка Уля» дәэр. Тывалаарга, «Уля кадай» дәэн-дир ийин. Барнаул хоорайга өөренип турган чылдарымда, ооң бажыңынга өрээл хөлезилеп, бир кыжын чурттаан мен.

Күжүр мени оолзуна берген. А мен, авам чок болгаш, база-ла кырган кижини кәэргеп, авазына берген мен. Өөрөнгөш кәэримге, аъш-чемни кылып алган, соңгалар бакылап манап орган боор. Тыва шай хайындырып өөредип каан мен: чүдек хайындыраг апарган. Шайлап каап-ла, ийи кадай дег, хөөрежип-ле орар бис. Онаалга кылып олуруптарымга, чанымга кәэп улуг тынып-ла, манап олурап. Чугаалажыр дәэрge, менээ шаптыктай бәэр, чугаалашпас дәэрge — кырган кижиге чалгааранчыг болду ыйнаан. Ооң оозун эскерзимзе-даа, иштимде каткым кәэп, олче көрбәэчеңнеп олурап мен.

А бажың база бөдүүн ыяш бажың. Та каялан-чежен туткан чувези, чудуктары чоон, быжыг-ла бажың. Хоорай кыдынында. Даشتын бичии огородтуг, дөрт соңгалыг, ийи өрээлдиг, чаңгыс улуг орус суугулуг; ийи орун, бир эрги шагның диваны, улуг-ла кеңгиргей шуугай шкаф, ооң кырында карты хыралы берген эрги патефон, медәэжок калбак стол, каш төкпек сандай — чаа, бо-ладыр ийин, күжүрнүң эт-севи. Ийе, ынаар азыгда бичежек үлгүүрге, подвалда дузап каан ногаалар бар...

Күскелер-били база байлак бис. Чүгө дәэрge Маня дәэр дийис Уля кадайның бодундан дора чөлдүр апарып, сүруг кырынга дүн-хүн чок хөлестеп, эзеп каап, саваарал-ла чыдар. Диизеге бичии сүт күдүп бәэрge, арылдыр чылгай каапкаш, чыдынынче үнгеп үнгеш, улаштыр-ла хаарыктааш чыдыптар, байгы-ла үүлези ол.

— Аа богда, бажыңга ажыы чок мал-маган тударга, берге-дир — деп, кадай чүвең дийизинге хыйланы берген-даа тураг-ла.

— Чоп бактажы бердинер? — деп айттыралымга:

— Черле ындыг бис, хире-хире хөрээвис хере алгыржып каап тураг — деп, кадай чүвең, кырган-даа бол, шорузу кончуг баштактандылаар чүве...

Бир хана долдур чурук. Та чеже чүве. Кымнарыл дәэрge, күжүр чөнәэш уттуп алган. Ынчалза-даа дөрт оглу биле өөнүң ээзи Евсей Ильчинин чуруктарын хүннүң чыгыы чодар. Шоозу куурага берген көк карактары шыгый берген, курушкак эриннерин чымыңна-

дып, чоржак чұстүг салааларлыг арган холун хөрээнге чыпшыр туткаш, сымыранып-ла туарар.

— Оларның соондан дүрген чорзумза, Игорушкам. Дықа туруп-тум, ай, хұн-даа караамга көзүлбес-тири... — деп, хөөкүй чугааланып-ла олуарар. А мен доңгайып алгаш, онаалғам қылышп-ла олуарар мен.

Олдары шупту чаңгыс чылын фронтуга калган. Оларның өлгениниң дугайында дәрт херечилелди бичии хааржак иштинде суп каан, бар. Ирейи күжүр вагон септәэр заводка дүн-хұн чок ажылдан тургаш, соокка алыскаш, калгый берген. База-ла дайын үезинде... Улуг оғлунуң чаңгыс оғлу бар. Ооң авазы өске кижиге баарда, оолду соңғу адазы «өскәэр» кижизидип қаапкан, қырган-авазындаа тоо бодавас, орта ажыл-даа қылбас, көзөрләэр, арагалаар кижи бооп өскен... Далдыргай әрги «Волга» деп машиналыг. Халдып келгеш-ле, акша чәэр, оон кедерезе менәэ шорлур, чөңгәэлии аажок чүве. Ынчап-ынчап чоруптарга, оон кадайы бо кәэр. База-ла шорулгактыг, байбаң аастыг, чоон буттарлыг, ак баштыг, кедегер-чаагай херәзжен. Олар хөөкүй қырганга дузалашпас-даа, сагыш човавас, анаа-ла бир өске улус дег...

Ол-ла ханада үрелген, әрги, илчирбелиг шак азып каан. Чаа чыл бүдүүзүнде бажыңны чугайлап тура, шакты дүжүрүп көре бердим. «Петроградтың қызыл мануфактуразы» деп артында бижиктиг. Ооң адаанды көк будуктүг карандаш-бile «Уля, Евсей, силерниң кудаңар байырында Алтайның күрүнениң бир дугаар кидис өөр фабриказының оолдар, қыстарындан белек. 1925 чыл, октябрь» деп каан. Иий бижик частырыбы бар.

Бичии бажында чүү боор, чугайлап қаапкаш, ол кежээ демги шакты чушкүп оргаш, септеп кагдым, ажылдай берген. Уля кадай ону көргеш, ыглапкан.

— Үжен иий чыл ажылдаваан шак бо. Евсей чок калганда, эзирик улус оскунупкан. Кижи чок калганда, бажында шакты тургузар ышкаждык — деп, кадай ишкирнип, тайылбырлап турду.

Ынчаар-ла чурттап тур бис. Тывадан улузумдан чагаа кәэр, очулдуруп бәэр мен. Дыңрап-ла, база ыглап-ла олуарар.

— Мени маңаа кагба. Тываже аппар. Уругларың ап бәэр мен. Шаптық катпас мен. Менәэ чүгле чаңгыс стакан шай биле хензиг сухариктен берип каар силер — дәэр болгай.

Бир-ле катап өөрөнгөш кээримге, кадайның кенни келген олур. Ажыныштыы дегет. Кирдим-кирбедим, чалчып-ла эгеледи.

— Моон чор. Мегелеп маңаа киир бижидип алгаш, бо қырган өлүрге, ооң бажыңын алыр дээш кызып тур сен бе? — деп бо.

Чым-сырт дидим. Ыңчалза-даа чаңгыс-даа сөс харыылавайн, чемоданымга бок-сагым суктунгаш, чорупкан мен. Чогум ниити чуртталга бажыңында орнум-даа бар чүве. Хөлдүг, шимээнниг боорга, аңгыланыксаар кижи-дир мен ийин... Болчуп кээр чүвем-даа чок, эр чаңгыс бодум аас-дылдыг, дестүг, былжыг кижилер-бile колдамнажыр ҳарыым-даа чок. Қижи чурту кидирээштиг болгай. Ыңча-келбиже шын дөмей-ле бодунуң оруун тыва бээр чоржук. Қырганга орус ёзу-бile мөгейгеш, үнүпкен мен. Хөөкүй қыйгырып-ла, ыглап-ла чыдыш каан.

Ооң соонда, ай-даа четпээнде, хүндүс өрээлимгэ олурумда, вахтёр угбай келгеш:

— Даشتын аваң келди — деп бо.

Элдепсинип кеттингеш, адаанда кальта кээримге, ында сандайда Уля кадай бо олур-ла. Та канчап мени тып алган?! Хоорайның бир ужуундан бир ужунче та канчап-чиоп чедип келген, аргыжары берге чер-ле болгай. Юринога чедир автобустаар, оон трамвайлаар...

Мени көрүп кааш, аажок өорүп, чецимден туттунгаш, салдыкпаан.

— Чанаалы, оглум. Сени манап-ла турдум. Сээдең хөрээженинч чугаазын тоова. Мен сенээ бир-ле солун чүве чугаалап бээр мен — деп ээрешти.

Кээргей бердим. Шынап-ла, ооң хинчээ чүү боор. Қады үнүптувүс. Бажыңга келгеш, ол меңээ бир-ле саазын көргүстү. Бодунуң бажыңын меңээ аазап каанының дугайында чагыг-шынзылга болду. Нотариус таңма хап каан...

Час дүжүп, хар эрип эгелей бергенде, Тываже чанып чорааш, чеди хонгаш, Барнаулга катап ужуп кээримге, Уля кадай кемдээн, эмнелгеде чыдар болду. Чунаар-бажыңнааш, чоруп ора, дошка тайгаш, ушкан. Бажы кемдээн... Эмнелгегс чанынга ийи хонdur ажаажып турумда, чок апарды.

Оглу Коля, кенни, кожалары, мээн каш тыва эштерим ынчаарла ажаап калдывыс. Багай кызыл думчуктуг дъяк-лама кээп, псалтырь-мөргүл ырлап каан, бо-ла. Ол-ла кежээ демги шынзылга бижикти Коляның бодунга уштуп берген мен. Бодум чеже-даа өс-

күс-чавыс өссүмзе, өске кижи эди ап амдажываан мен... Шала «апкан» Николай аңа мөгүдээш, кадайын эттээр часкан... Эртенинде шупту куспактажып, өң-тала бооп үдежип чарылдывыс. Демги Коляның чалчык кадайы безин ошкап-чыттап, буруузун миннип турду...

Оон бээр он ийи чыл болган-дыр. Төрээн авам хөөрү мында Кызылда, а Барнаулда мени «оглум» деп чораан орус кырган кадайың хөөрү бар. Бодум холум-бile доң черни соп тургаш, кастым ийин. Ол черниң довураа шык, кара хөрзүн болгаш, кыжын шуут демир дег кадыг кылдыр доңа бээр, кастынмас...

Чамдыкта сактырымга, эргим Уля угбай-бile ол-ла бажыңызыста стаканда кара шайга сухарик шыгыдып чип-ле олурган дег бис... А Маня дийс база ол-ла кыжын бүрлүп калган...

- 
-  1. Чечен чугааның сюжедин тодарадыңар.
  - 2. Тоожукчу маадыр биле Уля кадайың найыралын чугаалацар.
  - 3. Уля кадай тоожукчу маадырны чүге ниити чуртталга бажыңынга сүрүп чедип келгенил? Ону чүү деп бодаар сiler?
  - 4. Уля кадайың оолдарының салым-чолу кандыг болганыл?
  -  5. Уля угбай кылып каан шакты көрүп кааш, чүге ыглай бергенил?
  - 6. Чечен чугааның сюжедин чүте ынчаар тургускан деп бодаар сiler?
  - 7. Чогаалды чүге «Эргим Уля угбай» деп адааныл?
  - 8. Чоок кижилериниң болгаш тоожукчу маадырның Уля угбайга хамаарылгазын деңнеп сайгарыңар.
  -  9. *Кеңгиргей, нотариус, патефон, чөңгээлиг, шоо, шорулгактыг* деп сөстер-ниң тайылбырын словарь дамчыштыр кылыңар.
- 

## V кезээ. ПОЭТИКТИГ ОДУРУГЛАР...

Сергей ПЮРБЮ

Төрээн дылымга

Ораннарда  
улуг,  
биче  
Дыңнавааның  
кандыг дылдар  
чогул?

Ол дылдарның аразында  
Тыва дылга ынаам кончуг.  
Авам күжүр  
кавайымга  
Аадып ора,  
менәэ  
ырлап чораан  
Өпей ырын мен оон дыңнап  
Өскен болгаш, ынак боор мен.  
Хамык сөстүң  
эң-не чымчаа  
«Ынак мен» деп сөстү  
мен  
ол дылга  
Карам сеңәэ сөгләэн болгаш,  
Ындыг кончуг ынак боор мен.  
Арат чонга  
ыраажы бооп,  
Ынак чуртту  
мен  
ол дылга  
баштай  
Аян тудуп, алгап-йөрәэп,  
Ырлаан болгаш, ынак боор мен.  
*Москва, 1946*



1. Шүлүктүң тема, идеязын тодарадыңар.
2. Тыва дылга тураскааткан оон өске кандыг шүлүктер билир силер? Делегейде өске чоннарның боттарының терәэн дылынга тураскааткан кым деп авторнун чүү деп шүлүүн билир силер? Сактып чугаалаңар.
3. Шүлүктүң одуругларын чадаландыр бижәениниң ужурун тайыл-бырлаңар.
4. Тыва дылынга ынаан лириктиг маадыр канчаар илередип чурааныл?
5. Шүлүкте чуруттунган уран-чечен аргаларны сайгарыңар.
6. «Мәэн төрәэн дылым» деп темага кыска чогаадыгдан бижиңер.
7. Шүлүкте кирген эргижириәэн болгаш ховар ажыглаттынып турар дараазында сөстерниң болгаш сөс каттыжыышкыннарының утказын сактып ап, тайылбырлаңар: *аадып ора, арат чон, алгап-йөрәэп, өпей ыры*.



**Александр Александрович  
ДАРЖАЙ**  
*(1944)*

**Авамга**

Кажан удуp,  
карак шийип  
турганыңны  
Сагынгаш-даа,  
билбес мен чоп,  
күжүр авай.  
Оттүг суугу  
кыдырында-ла турганыңны  
Оттуп келген  
санымда-ла көөр чордум.  
Чараштанып,  
онза кылдыр  
кеттингениң  
Сагынгаш-даа,  
билбес мен чоп,  
күжүр авай.  
Куурагып,  
оңа берген  
шыва тонун  
Кударанчыг  
ыры болуп,  
куттулуп чор.  
«Өзе бергеш,  
көрүп турзун!  
Үеден бер!  
Өрү депшип,  
улуг дарга апаргаштың,  
Агайларның  
сынын каастаар  
чараш тонун

Авайым сээн  
эктиң орта  
каап бээр мен.  
Сылдыстыгда  
хаяаландыр  
чырып чоруур  
Сыргалардан  
белек кылдыр  
сунар мен!» — деп,  
Уйгум келбейн,  
дээвиирже  
кайгап алган,  
Улуг тынып,  
бодангылап  
чыткылаар мен...  
Амдыы чаа-ла  
ону сактып ордум, авай,  
Аравыска  
дириг бодуң  
чораан болза,  
Агайларның  
кедер тонун эктиңге каап,  
Алдын сырга эдилээрден —  
албас боор сен.  
«Кенним уруг  
эргижирээн  
кускү тонун  
Кедип каайн,  
төлдерим!» — деп  
дилээр боор сен...  
Чараштанып,  
онза кылдыр  
кеттингениң  
Сагынгаш-даа,  
билбес мен чоп,  
кужүр авай.

Кууарып,  
оңа берген  
шыва тонуң  
Кударанчыг  
ыры болуп  
куттулуп чор.

- 
-  1. Тыва литературада ава темазынга тураскааткан оон өске кандыг шүлүктөр билир сiler? Делегейде өске чоннарның ава темазынга тураскааткан кым деп авторнуң чүү деп чогаалдарын билир сiler?
2. С. А. Есенинниң «Письмо матери» («Авазынга чагаа») деп чогаалында аваның овур-хевири-бile шүлүкте лириктиг маадырның авазының овур-хевирлериниң дөмөйлешкек талаларын бижицер.
3. Чогаалчының «Авамга» деп шулүүнгө кымнар деп эртемденнеге үнелдер бергенил, сilerниң бодалдарыңар кандыгыл?
4. Лириктиг маадырга авазының овур-хевири канчаар артып калгандыр? *Шыва тон* деп сөс каттыжыышкыны-бile аваның ыдыктыг овур-хевирин канчаар тайылбырлап болур сiler?
5. Ие кижиниң сеткилиниң бичезин көргүскен одуругларны тывыңар.
6. Шүлүкте аваның ажы-төлүнгө ынаан көргүскен уран-чечен аргаларны тыпкаш, авторнуң чүнү илередиксээнин тайылбырлаңар.
-  7. Шүлүкте кирген эргижирээн болгаш ховар ажыглаттынып турар дараазында сөстерниң болгаш сөс каттыжыышкыннарының утказын тайылбырлааш, бижип алышар: *кууарып оңа берген, өрү депшип, агайлар, хаяландыр, дээвишр, кударанчыг, шыва тон*.
8. Шүлүкту доктаадып алышар.
-  9. А. Даржайның «Авамга» деп шулүүнгө К. Данзын аялганы бижээн. Күрүнениң «Тыва» телерадиокомпаниязының эрттиргени «ХХ чүс чылдың эн дээрे ырылар мөөрэйинге» бо ырның автору диплом шаңналынга төлептиг болган. Бо чүүлдү сiler канчаар тайылбырлап болур сiler?
- 

## ЧОГААЛ ТЕОРИЯЗЫ Шүлүк дугайында билиг

Проза болгаш шүлүк чогаалдарының ылгалдарының дугайында баштайгы билигни 5 класска чедип алган болгай бис: шүлүк проза чогаалынга бодаарга, онзагай тургузулуг, ында строфа, стопа болгаш аяннажылга бар база олар тускай хемчээлдиг болур.

Шүлүк дээргэ тускай хемчээлдиг, аянныг кылдыр организас-таттынган системалыг чугаа болур. Ооц кол ылгалы чугааны тус-тус одуругларга таарыштыр аяннаштырганы болгаш одуругларның хемчээлиниң деци болур.

Шүлүк утка талазы-бile бөлүглежип катышкан одуругларлыг болур. Ону шүлүкке *строфа*, а ырга *куплет* дээр. Строфа ийи, үш, дөрт, беш, алды, чеди, сес база оон-даа хөй одуругларлыг болгулаар. Оларның иштинде ийи-ийи, дөрт-дөрт, алды-алды одуруглар колдаан строфалыг шүлүктөр хөй бооп турар.

#### Ийи одуруглуг:

Кедээр каарга, доңмас эъдим,  
Кезип чииргэ, төнмес эъдим. (*Тывызык*)

#### Дөрт одуруглуг:

Айлан-кушкаш үнү долган  
Аргаларның хөглүүн канчаар!  
Кадыг чүрек уярап кээр  
Кандыг үннү ында чок дээр! (*C. Пюрбю «Ыржыгаш»*)

#### Алды одуруглуг:

Чайын, кыжын соокта, каанда  
Чаныр, сестир чувези чок,  
Чагган харлар, чарьстар туржук  
Чанык безин чайлай дүжер  
Чагыларны көөрүмгө,  
Чадаг шериг чыскаалган дег!  
(*M. Кенин-Лопсан «Харылзаачы таңныылчылар»*)

Шүлүктүң строфазында одуруглар слогтар аайы-бile чагырыш-как болур. Ол чагырышкак слогтарны *стопа* дээр. Строфының бир одуруунга стопа бир-даа, ийи-даа, үш-даа, дөрт-даа бооп болур. Ынчаарга ында слогтарның саны ыяап-ла дец болуру албан эвес.

#### Чаңгыс стопалыг:

Тайып ужар,||  
Даянып турар.|| (*Улегер домак*)

#### Ийи стопалыг:

Сыннаар бедии | хөвөц дег ак,||  
Салгын, хат-даа | сооп келди.  
Сыыннаар үнү | хемнэр кежир  
Чаңгыланып | киткей берди. (*B. Сагаан-оол «Күску ыр»*)

### Үш стопалыг:

Хаак баштаан | тевени | өшкү кайгаар.

Хая кырлаан | өшкүнү | тeve кайгаар. (*Улегер домак*)

### Дөрт стопалыг:

Орус дылды | номчуп, бижип, | сөглээр кылдыр | билир болза,

Ораннарга | салгын ышкаш хостуг ужар | эзир боор сен.

(*M. Кенин-Лопсан «Орус дылды өөрениңер»*)

Тыва шүлүк строфазында одуруглар колдуунда-ла эгезинге аяннажыр. Ону аллитерация азы *эге* рифма дээр. Аллитерация *одуругланчак, кожаланчак, аралашкак* база *кажааланчак* болгулаар. Оларның дес-дараалай кирген чижектери болза:

Кыдыйы ак дээр херелденди:

Кызыл хүннүг кежээ дүштү,

Кылыр ижин дооскан, хөглүг

Кырган, чалыы чанып келди. (*Л. Чадамба «Кежээ»*)

Мөнгө каазын хүнчэе чажып өргээн

Мөңгүннелчек ужар бо-ла келди.

Булуц, шынаа уюк кылдыр бустаан

Бугаларзыг, шимээн-даажы дендии!

Дээктиг сыйдым херип, ушта мойнаан

Мөөп тураг чүс-чүс эмдик ой айт,

Девип үнгеш, шүүлдени көөр дээн

Мөгелер-даа сагыжымга кирди. (*Ю. Кюнзегеш «Ужар»*)

Саасканнар «сартык» манап,

Талдар эргий мыжырашкан.

Дал дүүш изии дендезежок,

Сараатчылар могаг-даа чок. (*H. Ооржак «Сиженчилер»*)

Шүлүк строфазының одуруглары чүгле эгезинге аяннажыр эвес, харын сөөлүнгө база тааржып аяннажыр. Ону рифма дээр. Рифма, аллитерация ышкаш, одуругланчак-даа, кожаланчак-даа бооп болур.

Чечен менде,

Чечек черде. (*Улегер домак*)

Узун орук — мурнумда,

Уйгу — чүгле сагышта.

Хар-даа хөме урупкан,

Хат-даа ургеш турупкан. (*C. Сүрүн-оол «Күскү дүне»*)

Аян-чорук кылгаш келийн, тала,  
Ала-Дайны эзертээштиң берем.  
Алыс ырак барбас-ла мен, ол-ла,  
Амыракка душкаш келийн, көрем. (С. Сарыг-оол «Ойнаал, сарыым»)

Шүлүк болза прозадан тускай ылгалыр хемчээлдиг, аянныг  
кылдыр каттышкан тургугулуг база ханы өөредилгэ-кижизи-  
дилгелиг ужур-дузалыг уран-чечен чогаал.

**Мария Амын-ооловна  
КУЖУГЕТ  
(1955)**

**Бак сагыш башка халдаар**

*Йөрээл шүлүк  
кырган-авамга  
тураскаатым*

Өйлөп-өйлөп кырган-авам  
Өөн долдур бисти чыггаши,  
Саңын салып, чажыын чажып,  
Чалбаргылап, чагыгылаар:  
«Тос дээрим! Хайыракан!  
Долаан бурган! Хайыракан!  
Оран-таңдым, оъдум-ыяжым,  
Оонак-чааш ажы-төлүм,  
Оваарыңар! Хайыракан!  
Чамбы-дипке чурттаар кылдыр  
Чаяяаттынган кижи бүрү  
Чаңгыс катап эртер дооста  
Чарааш кылдыр амыдыраар.  
Мерген, дүрген угаанныг бооп,  
Меге, хопка алыспаңар.  
Хээрек, багай сеткил черле  
Кедизинде хугбай болур.  
Шаанды болаа чурттап чораан  
Чазый-чилби байның оглу



Хензиг өрге тудуп алгаш,  
Кежин сойгаш, салыпкан дээр.  
Өрге-даа бол, өзүп төрүүр  
Өртемчейниц эртинези  
Кежин сөөртүп, хинчектенип,  
Хецмеленип өлген дижир.  
Сөөлүнде барып-барып,  
Сөлгү чок ол каржы хейниң  
Үре дамчаан ажы-төлү  
Үңгүр аксын дуглай орган,  
Үвүргэй куу өргелер дег,  
Ийи буду бастынмастаан,  
Ийи холу хөрек душта  
Өргенин дег ыттайгылаан  
Өндэйипкен орар дижир.

Оон өске база чижек.  
Олудунар чазап алгаш,  
Кичээнгэйлиг дыңнап, билип,  
Кижи бүрү боданыңар.

Балыктаан эр четкизинге  
Мага хандыр олча тыпкаш,  
«Оон ыңай меңээ балык  
Он-даа болза херек чок» — дээш,  
Кадыргының бирээзиниң  
Казырыгын сивиргештиң  
Катап база хеминдиве  
Карааш кылдыр октапкан дээр.  
Сарыылы чок каржы хейниң  
Салгал дамчаан ажы-төлү  
Кадыргының кежи ышкаш  
Казырыктыг болган дижир.  
Бак сагыш башка халдаар.  
Барып-барып ээзин эргиир.  
Улус-чоннуң мерген сөзүн  
Утпайн чоргар, уругларым.

Аа өршээ, Хайыракан!  
Ада-чуртум, аал-ораным!  
Азыраан малым! Ажы-төлүм  
Сагыш-сеткил ядаралы  
Чамбы-дипти оя берзин!»

1990



1. Шүлүкте кирген уран-чечен аргаларны сайгарыңар.
2. Бо шүлүктен аңгыда оон ыңай кымнарның йөрээл шүлүктерин билир сiler? Деннелгелиг сайгарылгадан кылрыны оралдажыңар.
3. Шүлүктүң тема, идеязын тодарадыңар. Автор чунун дугайында чугаалаан-дыр?
4. Чүге шүлүктүң адын «Бак сагыш башка халдаар» деп адааныл?
5. Аа өршээ, Хайыракан!  
Ада-чуртум, аал-ораным!

Азыраан малым! Ажы-төлүм! деп кыйгы сөстерниң утказын канчаар билип туарыңарны тайылбырлаңар.

6. Шүлүктүң аас чогаалы-бile харылзаазын канчаар билип туар сiller?



7. Шүлүкте кирген эргижирээн болгаш ховар ажыглаттынып туар даразында сөстерниң болгаш сөс каттыжыышыннарының утказын тайылбырлаңар: *сан*, *чалбарыыр*, *Тос дээрим*, *Долаан бурган*, *Хайыракан*, *чаяаттынган*, *дооста*, *хәэрек*, *хүгбай*, *хөңмелендир*, *цре дамчаан*, *казырык*, *сарылыы чоң*, *салгал дамчаан*, *сагыш-сеткил ядаралы*.



8. Казырыктыг болган дижир, цүцргей куу өргелер дег, ийи буду бастын-мастаан деп одуругларга хамаарыштыр бодуңарның бодалдарыңарны илередип чугаалаңар.

## Роман Дамдинович ЛУДУП

(1963)

### Чавыс-чавыс көжүп чоруур булуттарлыг

Чавыс-чавыс көжүп чоруур булуттарлыг,  
Чаашкыннап, чаңнат туар чай-ла болду.  
Көктүг-шыгын көвей өңнүг чечек шыпкан,  
Көрүп ханмас чурумалдыг черлиг чордун.

Карактарым кударалга алзыпканын  
Кайгап, көрүп, ылавылап айтырган сен:  
— Анаа сен бе, аараан сен бе, эргим эжим,  
Азы черим сеткилинде таарышпаан бе?  
Улуг тынып, ужур-чөвүн сөгледим он:  
— Урал даглар чарапш-ла-дыр, ынчалза-даа  
Саян сыйнам мени кел дээн кыйгызы  
Сагыжымны Тывамдыва шиглетти.

- 
-  1. Шүлүкте лириктиг маадырның төрээн чериниң им-демдектерин көргүзүп турар кандыг одуруглар сilerге эң сактып алыхсанчыг болду?
-  2. Чаныксап турган өөрүнчүг азы муңгаранчыг үелериңerde төрээн черчурт дугайында кымның шүлүктерин эң номчуксаар сiler?
-  3. Лириктиг маадырның төрээн чер-чурт дугайында дамчыдыксаан сагыш-бодалын кандыг одуруглар-бile бадыткап болур сiler? Ында киргөн уран-чечен аргаларны автор чүгө ажыглаан деп бодаар сiler?
-  4. Авторнуң еске-даа төрээн чер-чурт дугайында шүлүктеринге болгаш А. Адаровтуң «Мөңгө даглар» деп шүлүүнгө даянып алгаш, «Төрээн черим, сеңээ тураскааттым» деп кыска төлевилелден чогаадыңар.
-  5. Шүлүкту шээжилеп алыңар.
- 

## VI кезээ. ТӨӨГҮНҮ КОПТАРЫҢАР...

### Степан САРЫГ-ООЛ

#### Алдан-маадыр

Өскелерге чагыртыр деп  
Өлүм багы каяя турар.  
Сактып келгеш, бодап кээрge,  
Сагыш-чүрек дакпыжап кээр.

Аймак, кожуун — бүгү чонум  
Эзээргектиң кулу чораан.  
Ада төрээн ынак чуртум  
Эрткен элчээ өртээл чораан.

Сүлде-чаялан, ужураг деп  
Сүзүгледип сүртетсе-даа,  
Ужур-шынны негеп келир  
Угаанныглар долу чораан.

Чазыйларга саттыныпкан  
Чалча болган феодалдарга  
Чагыртпас дээш тура халып,  
Чалданыш чок тулчуп чорду.

Арттар санай бажын аскан  
Алдан-маадыр кымнар ийик?  
Чоннуң ылаптыг оолдары,  
Чоргаар эрес маадырлары.

Ажып тиилеп үнмезе-даа,  
Ажы-төлге адаан кылдыр  
Хылыш бистиг селемеге  
Кызыл тынын кестиригеннер.

Адаан долган хөрек-чүрек  
Ажынмаан бе, хайынмаан бе?  
Адаларның амы-тынын  
Ажы-төлү негевээн бе?

Актыг черге төктүп калган  
Арыг ханыг адаанчызы  
Өпейлеткен кавайлыындан  
Өжээн ырын дыңрап келген.

Кежегелиг кара баштар  
Кежер-дүжер оруктарга —  
Өлүрүкчү ханыглардан  
Өжээн аарын айтып турган.

Алдан-маадыр адаларның  
Аккан ханы кызыл тук бооп,  
Өршээл чокка тулчурунун  
Өжээн одун кыпсып берген.

Тыва чоннуң хосталгазын  
Тывар дээштиң тынын берген  
Эрестерниң ады, чолу  
Эгииреде уттундурбас.

Ханныг бакты, кара хирни  
Хайыра чок буза шапкан  
Тиилелгениң төөгүзүнгө  
Дириг хөвээр мөңгө чоруур.

- 
1. Автор шүлүкту чүге «Алдан-маадыр» деп адааныл? Алдан-маадырлар дугайында чүнү дыңнаан, билир сiler? Оларның тура халышкыны кандыг үеде база каяя болуп турганын билип алгаш, чугаалацар.  
2. Шүлүкту кичээнгейлиг номчуцар. Ол үеде Тываның байдалы кандыг турган-дыр? Алдан-маадырлар чүге тура халышканыл?  
3. Тура халышкының чөптүү кайы одуругларда онза күштүг илөрээнүү? Ында дылдың кандыг уран аргалары ажыглаттынганыл?  
4. Адаанда одуругларда бодалды тайылбырлацар:

Алдан-маадыр адаларның  
Аккан ханы кызыл тук бооп,  
Өршээл чокка тулчурунун  
Өжээн одун кыпсып берген.


Тыва чоннуң хосталгазын  
Тывар дээштиң тынын берген  
Эрестерниң ады, чолу  
Эгииреде уттундурбас —

деп одуругларның утказын чугаалацар. Алдан-маадырларны чон чүге утпазыл? Амгы үеде оларның адын канчаар мөңгежидип, тураскаал кылдыр арттырганыл, шинчилеп тыпкаш, чугаалацар.

© 5.



6. Аймак, адаан, сүзүглел, өртээл, эзээргек, кул, кежеге деп сөстерниң утказын тайылбырлацаар.



## Роман ЛУДУП

Улаастайга  
Улай-улай,  
Кежегелиг баштарывыс  
кезип төтпээн.  
Тос эрииге  
Доозавысты  
донгайтыр соп шыдавааннар.  
Сүзүүвүстү чүдередип,  
Сүлдевисти таптай базып  
чадап кааннар.  
Ам бөгүн,  
ажыг суксун тулаазынче  
Дүлнү бергеш, аштырдывыс.



1. Бо шүлүктүң утказын сiler канчаар билдицер? Автор кандыг ындыг аштырышкын дугайында чугаалап турар-дыр?
2. «Арагалаашкын болгаш ооң хоразы» деп темага кыска чогаадыгдан бижицер.
3. Улаастайга шаажылал болгаш тос эрии дугайында чүнү билир сiler, ол кандыг болуушкуннары?
4. Сүзүк, сүлде деп сөстерниң утказын тайылбырлацаар. Бо сөстер кандыг дылдан тыва дылче кирип келген деп бодаар сiler?

**Иргит Үжүнмей оглу БАДРА**

(1910—1984)

## Ужуудукчу Кидиспей

*Тоожудан әгелер*

### 6. Ужар чүүл школазы

Өөредилгэ-даа әгелээн. Курсантылар аразында кандыг сөөк-язылыг кижини чок дээр. Улуг ССРЭ-ниң бүгүн булуунарындан келген улус өөренип тураг. Оларның-бile чоокшулаажып таныжып, чугаалажып, кадыволейбол ойнап, чаржып, күш-культура кичээлдери кылып, футбол деп оюнну база кедергей ойнап өөрени бергеннер. Ылаңгыя Кидиспей черле дендии кашпагай, ол чолдак будунга черле чалынмас, кандыг-даа берге байдалда бөмбүктү дозуп алгаш, хамык удурланыкчыларын былдап каапкаш, чолдак буду биле бөмбүктү биратааже киир тептер. Ынчангаш соонда барып ону ужар чүүл училищезиниң футбол командазының капитанынга-даа соңгуп ап турганнар. Кидиспей демир көдүреринге база тергиин. 32 килдиң шой борбаандыларын иий холунга чээрби ажыр көдүрүптер. А бодунуң деңизи көңгүс чиик, 63 кил. Кысказы-бile чугаалаарга, Тываның Араттың Революстуг Шериингэ алган дадыгыышын, мергежилдери Оренбургка өөредилгэ үезинде оолдарга кедергей-ле дузалаан.

Кидиспей Лапшыңга бодаарга, орус дылга ындыг-ла дыңзыг эвес турган. Лапшың өөренири-бile хамыкты кайгаткан. Дыл, литература, төөгү, экономика, физика, механика, аэродинамика эртэмнеринге Лапшыңны самбыраже кыйгырар-ла, бешке харыылааш, харын-даа программадан дашкаар, артыр харыылааш туруп бээрge, башкызы соксадып, дедир олудунче олуртуп тураг апаар. Кидиспей Лапшыңның чувени дүрген шингээдип алтырын кайгаан. Чангыс номчаан соонда, ол-ла — ону уттуп деп чок. Азы чангыс чугаалаан чувени сактып алгаш, ол-ла хевээр дүжүрүп чугаалап каар.



Кидиспейде ындыг шынар чок болгаш, эгезинде дыка бергедеп турган. Самолёттуң көзектери шупту нарын аттарлыг: «әлерон, лонжерон, фюзеляж» дәеш баар. Шак ол мун-мун сөстерни, артында орус безин эвес, а латин, француз, та кандыг дылга чүвези, шуптузун сактып ап деп чүве берге херек. Чүгле Лапшың! Дұне удуп чыдырда, оттур шапкаш, чугаала дәэрge, сууразын адаптар, ол хире угаанныг амытан болган. Кидиспей әжинден черле чыда калбас. Билдинмес чүве тыптып кәрғе-ле, Лапшыңдан айтырап. Ол сөзүгел-бile дәмей-ле. Артында кыдыраашка хәй чүве-даа чуруп, биживес. Аңаа көөрде, Кидиспей чүве бүрүзүн бижиp, демдектеп, шайып, дугаарлап аарын бодаар. Ооң кыдырааштары әндерли берген. Башкылары безин кайгап турган. «Чүү кончуг хынамчалыг кишил бо» дижип. Ол ышкаш шала берге чүвелерни Кидиспей шуут-ла доктаадып ап турган. Хондур-даа шээжилеп тургаш, төдүзүн өөренип аар.

— Сен-даа ёзуулуг штаб кырзазы апарған кижи-дир сен аа, әжим — деп, Лапшың әжин шоодуп-даа орап.

— Оо, орус дыл төнчү чок далай-бile дәмей-дир, әжим. Өөренген тудум, ооң нарыны, чаражы, байлаа ажыттынып кел-ле чыдар. Бо дыл бистиң чарылбас, төрәэн дылзывыс ышкаш апарды аа? — деп, Кидиспей әжинге чугаалап олурап.

— Көрден, әжим, долгандыр бис ышкаш ядыы аңғының оолдары-дыр. Татар, башкир, чуваш, казах, кыргыс, узбек, грузин, армян, литов, мордва... Олар шупту орус дылды хандыкшып өөренип турап. А ол дыл чок болза, бис олар-бile канчаар аралажыр, чугаалажыр, билчири бис? — деп, Лапшың әжинге чугаалап олурап.

«Кидиспей дәэрge чүве аттарын шээжилеп аар, ол талазы-бile ёзуулуг мастер кижи-дир» деп, башкылары бир чыл ажып чорда чугаалажы бергеннер... «Кызымак кижи каяла-даа кызатпас» дәэриле чөп...

Ай хуусаалыг карантин әрткен. Бир-ле хүн кичәэл соонда Кидиспей бile Лапшыңны начальник кел диген болган.

— Силер чүвени дыңрап, билип турап-ла болгай силер. Даشتыхы империалистиг чурттарның пропаганда-суртаалчылары бистиң чуртувусту, чедишишкиннеривисти нүгүлдәэр дәеш кызып туарлар. Артында «ССРЭ өске чурттардан келген террористиг дәрбечилерни шериг херәэнге өөредип турап» деп кара нүгүлүн тарадып туарар

лар-дыр. А өске талазында, ТАР биле МАР бистиң эвилелчи күрүнелеривис болганда, оларның айыыл чок чоруу база бистиң сонуургалышыста туруп турар. Ынчангаш силерге шериг кадрларын белеткежири бистиң күрүнелеривистиң аразында чардынган керээ ёзугаар чоруттунуп турар. Херек апарза, силер, бо ужар чүүл школазын дооскан ужуудукчулар, ТАР-даа дээш, ССРЭ-даа дээш агаарга тулчур, тайбың чоннарышты камгалажыр апаар силер. Бистиң ужуудукчуларыныс база, херек апарганда, Тываның дээрин дайзындан камгалай бээрлер... Ам чүл дээргэ, даштыкы агентилерге чемиш бербези-бile, оон ыңдай черле ынчаш башкыларга-даа, эш-өөрүңгергедаа адаттынгыр боор кылдыр аттарыңарны орус аттар-бile солуп алтындарны школаның мурнундан дилеп, сүмелеп тур мен...

— Силерни эки билдивис, Василий Семёнович. Мени черимчуртумда орус эштерим черле Лавров дээр чүве — деп, Лапшың чугаалаан.

Кидиспей начальникче хүлүмзүрүп көрүп олурган. Начальник база манагзынып, Кидиспейже хүлүмзүрүп көрүп олурган.

— Василий деп адап алзымза, кандыг ирги? — деп, Кидиспей оожум чугаалаан. Шупту кезек ыыт чок олурганнаар.

— Кай, Чапаевке тураскаадып бе? — деп, начальник айтырган.

— Ацаа-даа, силерге-даа...

— Четтиридим... Манавадым... Чүгле мээн адымны сен каяла-даа бедик тудар сен. Харысыалгаң улуг эвеспе, амыдай — деп, Василий Семёнович баштактантган. — Че, оолдарым, ам чоруптуңар. Эки кызып өөрениңер, ада ССРЭ силерни черле хомудатпас. Боттарыңарла чазып албас болзуңарза...

Кидиспей чаа адын төлептиг эдилей берген. Бир чыл хире болганда, биче буурай чоннарның төлээлериниң аразындан ол ылгалийп, шылгарап, эң эки сагылга-чурумнуг, өөредилгелиг база тергиин дээн спортчу деп атка чединген...

Кажан практиктиг ужуудушкуннаар эгелей бергенде, чамдыкта берген даалганы ажыр, хажыдыр ужуудуптар. Ол дээш башкыларындан чеже-даа удаа сагындырыг алган.

— Сен практиктиг ужуудушкун үезинде чер хемчээлин ыракта кызыра бээр-дир сен. Техниканы канчап билир сен, эжим. Анаа, каң-кара демир — деп, Лавров эжинге сагындырар. — Ок кадалдыр кээп дүшсе, ол-ла ышкаждыл.

— Чо-ок, эжим, бо техникаң бұзурелдиг деп бил. Ону эки билир, әргеледип-чассындар херек. А бистиң Тывавыс кадыр-берт дагларлыг чурт болгай, бо чер ышкаш мындыг оргу шөл эвес. Маңаа ындыг практиканы қылышп өөренип албаска, Тывага баргаш, ёзулаг-ла харын ок кадалыр-ла болгай бис. А даглар аразынга дайылдажыр апарза, канчаар бис?

Бир катап Кидиспей биле Лапшыңың курузун дайынчы практиктиг ужуудуушкун қылышп өөренип алғанын, нийтизи-билие школаның өөредилге шынарын хынаар дәен шылгалда-дыры, шыңғызы көрүлде-дир. Маңаа аттарывыс сыйпаал — дижип, эжишкілер ыяк дугурушкан.

— Че, бо дәәрге қымның қайы хире өөренип алғанын, нийтизи-билие школаның өөредилге шынарын хынаар дәен шылгалда-дыры, шыңғызы көрүлде-дир. Маңаа аттарывыс сыйпаал — дижип, эжишкілер ыяк дугурушкан.

Практиктиг ужуудуушкуннар бир неделя хире үргүлчүләэр турган. Курс, взвод айы-билие чыскаалыпкан. Лапшың Кидиспейден шала узун болгаш, одуругнұң бажынга барган. А курстуң иштинде оларның взводу ии дугаар одуругда туар.

Курсант бүрүзүнгө агаарга кандыг-кандыг мергежилгени қылышын баш удур айыткаш, планшетказында бижип, шыйып каан болур. Ында сүрәэденчиг, әләэн-не берге мергежилгелер бар, «өлүг доң», «доскаар», «андарлып алгаш ужуудары», «чылан ышкаш дырлацнаары» дәешш баар. Ол ышкаш бомба октаары, чажыт блиндаж тывары эң нарын мергежилгелерге хамааржыр. Моторун өжүрүпкеш, агаарга киискидип ужары база дыка нарын.

Курс чыскаалы-билие аэродромче чорупкан. Кижи бүрүзү бажында бодунуң дайынчы онаалгазын бодап чораан. Ол хүн чүгле бирги взводтуң ужуударын шупту сонуурган көрген. Ол взводтан чүгле уш кижи тергиин эки демдек алган. Даарта ии иги взвод «түлчүп» кириптер.

Лапшың-даа ии дугаарында ужуудуп үнген. Ооң мурнунда уш-каш келген татар оол Талгат чаңғыс частырыг қылгаш, дөрт демдек алган. Ол бомба октаар блиндажты тыппайн, оозун анаа шөлче октапкаш келген. Чүгө дәәрге үе чок. Берген минуталар доозулган...

Лапшың-даа қылышитып үнген-не. Шупту берген даалгаларны тергиин шын күүсеткеш, дендии чараң қылдыр хонуптарга,

ужудукчу комиссияның кежигүннери чаңгыс үн-бile «отлично» дигеннер. Ооң соонда ужуткан оолдардан база иийи кижи тергиин демдекти алган. Кидиспей эң сөөлгү кижиниң мурнунда болгаш, дурген-не ужуп үнүптерин манап турган.

Кидиспейниң ээлчээ келген.

— Дыка нарыыдатпайн, таптыг ужудуп көр. Бо комиссия мурну ышкаждыл, сәэң дагларың эвес. Кол-ла чүве — эки демдек алышында — деп, инструктор башкызы ооң кулаанга сымыранган.

Кидиспей күүседир онаалгазын катап эки дыңнаап алгаш, бичи чиик өөредилге самолёдунга олурупкан. Ужудуп үнериниң медәэзин берипкен. Ол-ла черинден шоолуг-ла ырадыр маңнатпайн, агаарже чииги-бile сыйгайндыр кылыйтып үне берген. «Кедередир салгылай бээр кижи бо, ам канчаар болду» деп, инструктор-башкызы чугаалаттынып турган. Кидиспей агаарга бүгү-ле мергежилгелерни тергиин чарап, шуут-ла «цирк» ёзузу-бile кылгаш, хондууарда, кончуг бедиктен октаан даш дег бадып келгеш, самолёдун аргажок черден дорттай тырткаш, айыткан девискээрge шын хондурупкан. Ол дәэш Кидиспей эң бедик үнелелди комиссия мурнундан алган.

— Че, Василь, сен алдың. Комиссия кежигүннери ындыг түңнелди кылган-дыр. Даглыг черниң ужудукчузу кижи шак ындыг мергежилгелерни кылзын деп айыткан. Сени мону доозарыңга, Москвандың ужар чүүл академиязынче чорудар болза эки деп база чөвүлжип тураган-дыр — деп, начальник Кидиспейни мактап, чугаалаан.

— Четтирдим, Василий Семёнович. Ам-даа кызар мен — деп, Кидиспей харыылаан. — Силерниң адыңарны сыйпас дәэш кызып чор мен, эш командир...

- 
- 1. Тывандың баштайгы ужудукчузу Чооду Кидиспей дугайында мооң мурнунда дыңнаан азы номчаан сiler бе? Кызыл кожууннун төвү Каа-Хем суурда аңаа тураскааткан чүү барыл?
  - 2. Кидиспей биле Лапшың иийи эжишкиниң ужудукчу болур дәэш кызып өөренип турганын тайылбырлап чугаалаңар. Олар кандыг бергелерни эрткенил база оларны канчап ажып эрткенил?
  - 3. Кидиспей биле Лапшың чүгө орус аттар алыр ужурга таварышканыл?
  - 4. Совет Эвилелиниң Тыва Арат Республикага чедирип турган бүгү талалыг дузаламчызы Кидиспейниң салым-чолунга канчаар илерәэн-дир, тайылбырланар.

⌚ 5. Бо номнунц автору, чогаалчы, күрүне ажылдакчызы, чогаалда Иргит Бадра (Бадыраа) дугайында медээлерден чыып, оон өске чогаалдарын, ылаңгыя «Арзылан Құдерек» деп романын, тып номчуңар.

---

## Тоску әге

### 2. Саян ажыр Тывазынче!

Бұғы Тыва соңгаартан самолёттарның келирин четтикпейн манап турған. Тыва ужар чүүлдүг болур дәэн деп чаагай медәэ чоннунц сеткил-сагыжын өөртүп, кижи болган-на «Кидиспей», «Лапшың» деп аттарны чоргаарал-бile адап чоруп турғаннар. «Кудай дәэрже ужуп үнер дәэн эрлер-дир, өршээ дадай!» дижип турар улус-даа бар. «Кижи күш эвес, канчап ужар чүвел? Бо-ла орустарның тыппас чүвези чок» деп, чамдық улус магадаар-даа. «Мындыг бедик тайгаларлыг Тываны чүү чүве ажыр ужар боор? Улуг хат келзе, хая-дашқа чылча үзер-ле ыйнаан» деп адааргаан, өжәэргәэн үннеридаа бар.

ССРЭ-ден Р-5 маркалыг ии самолёт Абаканда поезд-бile ап четкен деп дыңнадыг ТАРН ТК-га телеграмма-бile келген. Тока дарга Шооманы, Кидиспей биле Лапшыңы келдиртип алгаш:

— Ужар-хемелеривис Абаканда чедип келген-дир. Оларны ам Тываже мунуп әккәэр эвесп... Эш Шоома, бо ии командирге чиик машинадан үндүрүп бериңер. Кызыгаар эртер документилери кандығыл?

— Шупту белен, эш Тока — деп, Шоома харылаан.

— Эзенгиде тепкен турған эрлер-ле ыйнаан силер. Че, ынчаарга ол-ла-дыр. Техник-специалистериң алгаш чоруптуңар. Хакасияда шериг кезәениң ажылдакчылары ук самолётту эпте, ужарынга белеткежир. Ол дугайында Хакасияның удуртуқчу даргалары-бile дугурушкан бис. Чоруптуңар! Орук-суур менди-чаагай!

Самолёттарны үш хонук дургузунда бүрүнү-бile эпте, ужуп болурунун беленинге тургузупканнар. Моторларның ажылын хынаан. Баштайғы шенелде ужудуушкуннарны Абаканга кылғаннар. Шупту чүве әки. Ам чүгле агаар шоолуг эвес, хадып туруп берген. Оон соксаарын манаары берге. Кидиспей биле Лапшың

техниктери-бile сүмелешкеш, тус черниң ужар-хемелери ушпайиң турда-ла, ужуп үнүптер деп шиитпирләэннер.

Прохоров биле Ткачёв самолёттарны база катап хынамчалыг көргеш, ийи ужудукчу командирниң холдарын дыңзыг тутканнар. Самолёттар аэродромдан көдүрлүп үнгеш, кедергей дыңзыг хатка чайлыңнаштылаан, Саян сыннары кайы сен дәэш кылыйтыпканнар. Техниктер АРШ-тың чиик-каразынга олургаш, чаныпканнар. Чүгэ дәэрge мындыг нарын агаар байдалда бичии самолёттарга артык чүйк-түң херәэ чок...

#### 4. Ужудукчулар сургуулу

Ажылдың бирги угланышкыны — ужудар, Тываның яңзы-бүрү булуннарынче агаар оруун изәэр үүле-херек бүдүп эгеләэн. Кидиспей биле Лапшың кыска хуусаада Шагаан-Арыг, Чадаана, Барынын-Хемчик, Кaa-Хем, Бии-Хем, Таңды, Эрзин-Тесче агаар оруун ажыдып, почта чүйктерин чедиргилеп тураг апарганнар. Дараазында Тожу биле Куңгуртугже агаар оруун ажытканнар.

Ам ажылдың ийиги угланышкынынче кирери чугула. Ужар чүүлдүң кайы хире ажыктыын чон боду-ла биле берген. Кижилер көңгүс чаа парлаттынган солуннарны ап, чагаалажыр чорук көвү-деп, эм-таңны эң ырак аалдарга безин үр болбайн чедире бәэр. Улуг аараан, кемдәэн кижилерни ша-даа чедирбейн, Кызылдың шыырак эмчилериниң холунга хүләэдип бериптер. Та чеже кижиниң тынын алган. Аалдар кыры-бile ийи чалгынныг, ажык кырлыг аэроплан ужуп эртер-ле, чон үне халчып кәэп, ону сонуургап көрүп, хол чайып үдел: «Кидиспей ышкажды! Бистин Кидиспейивис!» деп өөрүп байырлап тураг. Дыка-ла чоргааранчыг, чарап-чаагай үе турган-дыр...

Ам ийиги айтырыгны чогудары хереглеттине берген. Тываның нам, чазааның диләэ-бile ам-даа беш ужар-хемени ССРЭ Тывага чамдызыын садып, чамдызыын белекке бәэр болган. Оларны мунаар чаа ужудукчулар дарый херек апарган. Ол ышкаш ужар-хемелерни белеткәэр, септәэр техниктиг кадрлар база херек. Чаа күштүг рациялар база келген. Оларны Тожу, Качык, Кызыл-Мажалык, Чадаана, Самагалдайда тургускулаан. Оларны ажылдадыр специалист база херек.

АРЕВЭ ТК-дан Бора хүннүң чыгыны дүвүредип кәэр:

— Че, кажан ужар чүүл сургуулун ажыдар силер? Мында шилип алган оолдарның мойну узады-ла — деп телефоннап-ла чыдар.

— Удавас-удавас — деп-ле, Кидиспей харылап каар.

А баш ыжык. «Чүнү канчалза экил? Чүүден эгелээрил?»

Ол аразында Лапшыңың кадыы дыка баксырай берген. Хөрээнден хан үнүп, суларап, аъш-чем чивестей берген. Кызылдың эмчилери кандыг-бир көску дуза кадыптар харыы чок болган. Аарыг ол хире ханылап, нептерей бергени илерээн.

Кидиспей ССРЭ-ден чаладып келген ужуудукчу-техник эжи Прохоров-бile дүн-хүн чок ажылдап тургаш, кадрлар өөредир курс-сургуулдуң эге чадада кылыр ажылдарын шуудадыпкан. Прохоровтуң эң-не онзагай талазы — ол Кидиспейни дендии хандыр бодап, билип, ооң берген даалгазын кандыг-даа дадагалзаа чокка, бар-ла күжү-бile ак сеткилдиг күүседип шыдаар, чаңы-даа Кидиспейний ышкаш, чөпшүл, далаш чок, шиитширилг, эш-өөрүнгэ ээлдек, сагыш човаачал кижи турган. Ол уеде ССРЭ-ден Тываже үен-даян тояланчылар келбейн турган. Кээп турган кадрларны тускай килдистер хынамчалыг сайгарып, шилип турган.

Ужуудукчулар курузу-даа ажыттынган. Ооң байырлыг ажыдышышкынынга ТАРН ТК-ның, чазактың база АРШ-тың удуртукчулары, командирлер киришкен. АРЕВЭ ТК-ның шынзылгазы-бile келген аныяк тыва оолдар Ёнзак, Хопуя, Хунан-оол, Чимит, Очур-оол, Дандар-оол дээш өскелер-даа курсуң баштайгы сургуулдары болу бергеннер. Оларны Бора биле Кидиспей кедергей ээлдек-эвилен, ынчалза-даа негелделиг шылгап тургаш шилээннэр. Чүс ажыг кордакчыдан бо каш оолду шилип алганы анаа халас эртпээн. Олар соонда барып Тываның ужар чүүлүнүң тергиииннери апаар ындыг төлөптиг кижилер болганныар. Өөредилгэ эгелээн...

## Онгу эге

### 3. Сөөлгү хүннери, сөөлгү оруу...

...Бүгү кижи төрөлгөтөнни герман фашизмниң айылындан Совет Эвилели чайлаткан! Ол кандыг-даа маргыш чокка кижи бүрүзүнгэ билдингир турган. Тываның эки турачы оолдар, кыстары база шак ол ыдыктыг чаага киришкеш, тиилелгелиг чанып келгеннер. Дыка хөйү фронтуга амы-тынын салганныар...

Майор Кидиспей ол тиилелгени сеткил ханышыкынныг уткуп хүлээп турган. Ооң өөреткен ужудукчулары Ёнзак, Хопуя, Хунан-оол суглар фронтуже эки турачылар бооп чоруткаш, Ада-чурттуц дайынынга киришкеш, ийи дугаар Украин фронтунуң составынга ужар чүүл кезээнге дайылдаш카ш, чанып келгеннер.

Кидиспей дайынның кадыг-берге чылдарында кайнаар-даа барып эмненир харыы чок турганы билдингир. Шуут бергедеп келгеш, ол ажылдан хостаткаш, арыг агаарлыг, эльт-чемниг чер-чуртунга барып сегип аар бодаан. «Чыварлыг-даа болза черим эргим, чымыштыг-даа болза чонум эки» дээш, Кидиспей уругларын ап алгаш, Тес-Хеминге чанып келген. Ооң ада-иези шагда-ла мөчүп қалган. Ында чүгле акызы Чөмбүрүк бора будүн борастанып чурттап олурган.

Кидиспей акызының өөнүң даштынга калгып үнүп келгеш, ак-тос ышкаш арыпкан ол-бо көрзүнүп олурап. Оон чанындан эрткен кижи болган-на мендилежип, хүндүткелдиң демдээ кылдыр бөрттерин уштуп, мөгейип турарлар. Уруглары чаа черге келгеш, амырап, эльт-чем, сүтке деңгел кирип, доругуп эгелээннер.

Бир хүн Кидиспей дыка баксырай берген. Акызы дуңмазын алгаш, Самагалдай эмчизинге эккелгеш, чыттыргаш, дүн-хүн чокка чанындан ыравайн, ажаап турган. Кидиспей онгарылбаан.

Оон канчангаш-ла угааны орталанып, сергеп келген ышкаш апаргаш, акызын кел деп алгаш: «Акый, мен-даа моон үнмес-тири мен. Уругларымны азырап өстүрүп каап көр. Аргалыг-ла болзуңза, мени Кызылга аппаргаш, Лапшиңың чанынга ажаап каар сен. Чүгэ дээрge ооң-бile чангыс күштуң иийи чалгыны ышкаш чурттап, ажылдал келдивис. өлзе-даа, кады чыдар деп дугурушкан улус бис» диген. Чөмбүрүк чүгле ыглаарынга өй болган.

Кидиспей база ойталаап чыда, караанга эрткен бүгү амыдыралын сайгара көрүп чыткан. Үжен сес хар аныяк назынында ол хамыкты кайгадып, бүгү тыва чоннуң ынакшылын, хүндүткелин чаалап алгаш, кылсыр үүлэзин чогудуп кааш, ырак орукче айттанып турганы ол...

1946 чылда Василий Дагбаевич Кидиспейниң сөөлгү оруу ын-чаар үстү берген. Ооң кылыйган чалгыны ам-даа Таңды-Тываның кырында ужуп чоруур ышкаш сагындырап. «Кидиспей ышкажыл. Бистиң Кидиспейивис ужуп чор!» деп улуг, биче чон үнүп келген хол чайып, дээр шаар өөрүп көрүп турган ышкаш. Ол ам-даа ужудуп чоруур...

Совет Армияның офицери, Тываның бир дугаар ужуудукчузу Василий Кидиспейниң ындыг чараш, кижиизиг овур-хевири бистиң сагыш-чүрээвисте мөңге дириг артар ужурлуг.

Кидиспей чок каарга, ооң акызы Чөмбүрүк дунмазының чагыын күүседип, ооң мөчү-бодун Кызылга эккеп орнукушткан.

- 
1. Кидиспей биле Лапшиңың төрээн Тывазынче Абакандан баштайгы ужуудушкуну кандыг байдалдарга эрткен-дир?
2. Кидиспейниң чаа тыва ужуудукчу салгалды белеткээр деп буюнныг ажыл-херээн канчаар боттандырып турганын номчааш, тайылбырлацар.
3. Ужуудукчу Кидиспей ындыг эрте амы-тынындан канчап чарылган деп бодаар силер? Чүге ол бодун Кызыл хоорайга ажаар кылдыр дилээнил?
4. Тываның баштайгы ужуудукчуларындан кымнарның аттарын билип алдыцар? Оларның аразында Ада-чурттуң Улуг дайынынга киржип чораан ужуудукчуларның аттарын тыпкаш, адацар.
- 

## Олег СУВАКПИТ

### Сат Бүрзеккей

#### *Баллада*

...Бүрзеккейниң оолдарының пулемёду  
Бүгү Тыва килеминче шилчий берген.  
Өлүмдүве кезе көрүп, тынын уттуп,  
Өжээтенге сүртөнчиг күш болу берген.

Дайзын огу хөме кудуп, күжү дендеп,  
Дайынчылар соңнуг-мурнуг хораза-даа,  
«Адывысты, соруувусту сыкпас бис!» деп,  
Ачыр-дачыр изиг түлүк тулчуп турган.

Октар биле дайынчылар деңге төнүп,  
Оңгу-шивээ оргуланып чиде берген.  
Ак-көк хемниң эзирлери көзүлбестеп,  
Араатаннар улам чыырлып, үглеп келген.

Бүткүр боду кызыл мыңгы болу берген,  
Бүгү күжүн холдарында чыыра туткан

Бүрзеккей-даа чааскаан арткаш, туруп келгеш,  
Бүкперлешкен дайзыннарже уткуй баскан.

Карактарга Хөндөргейниң делгемнери,  
Каттырышкан төлдери-даа көстүп келир.  
«Садымны» дээш, авазы-даа эргеледир,  
«Сарымны» дээш, кадайы-даа чыттай кааптар.

«Дүжүп бербе, Бүрзек!» дигеш, Кечил-оол-даа  
Дүре туткан чазыткыны тутсу кааптар.  
«Тыва чуртун дайзыннарга кайгаттың!» дээш,  
Дыңгылдайлаан чылгычы-даа сыгырты бээр.

Уткуй келген дайзыннарны кыра адып,  
Уунга турган бергелерни чире чуткүп,  
Берлинге дээр чула тулчуп, тиилеп үнгеш,  
Белдер-доруун мунувуткаш, тутсуп чангандар.

Орус, Тыва кызыгаары чиде берген —  
Аңгы чурт дээр эрги бодал уттундурган.  
Орус-тыва найыралчы күзел бүткен —  
Акы-дуңма чаңгыс бүле болу берген.

Кавказ, Урал, Саян даглар кайыын тура,  
Карак басчып, бөргүн чайжып, ойнап турар.  
Волга болгаш Днепр хем, Улуг-Хем-даа,  
Бодалышыс чаңгыс дижип, ырлап чыдар.

Хөрек долган хавыялар херелинден  
Көрген карак дөгерези чылчырыктап,  
Чечек тутсуп, байыр сөңнеп, ошкап-чыттап,  
Черни, дээрни ыры-хөглөл долуп келген.

«Агаарда бе, далайда бе, черде мен бе?  
Аайын черле тыппас-тыр мен, сарымны» дигеш,  
Бинак эжин ээгип баргаш, чыттаар дээрge,  
Ырак дээрде шолбан ышкаш, четпес болган...

Бүткүр боду хүлөрдиве шилчий берген,  
Бүгү күжү чоннуу кылдыр хуула берген  
Бүрзеккей-даа Тиилелгевис сыйдызы бооп,  
Бүгү чурттуң ынак оглу болу берген.

- 
1. Сат Бүрзеккей деп кымыл? Ооң эрес-маадырлыг овур-хевириң чогаалчы  
канчаар чуруп көргүскен-дир?
2. Балладаның сөөлгү дөрт одуруунуң утказын тайылбырлаңаң.
3. Бүрзеккейниң чок болур мурнунда ооң караанга кандыг чырык чуру-  
малдар көстүп кээп, тайбың-чаагай амыдыралды херечилеп туарар-дыр?
4. Ада-чурттуң Улуг дайынынга киришкен тыва эки турачылар дугайында  
чүнү билир сiler? Кожуунуңа болгаш сумуңардан, азы төрөлдөриңдерден  
ындыг кижилер бар бе, айтыртынып, тус черлерде музейлерден, тускай  
дерәэн булуңнардан медәзден чыңар.
5. Сат Бүрзеккейге командалылаткан тыва эки турачы пулемётчулар дуга-  
йында дыңнаан, номчаан чүүлүңерни бижип, дыңнадыгдан кылыңар.
- 

## Кызыл-Эник КУДАЖЫ

### Он бир

*Үш көнгөгелиг, алды көргүзүглүг маадырлыг шии*

#### КИРЖИКЧИЛЕРИ:

Бүрзеккей, улуг лейтенант, тыва эки турачыларның пулемёт  
воздушуң командири.

Дөңгүр-Кызыл, сержант, пулемёт расчёдуунуң командири.

Самбал, дайынчы.

Түмендей, дайынчы.

Монгул-оол, дайынчы.

Бичелмаа, дайынчы, санитар кыс.

Тоютук, дайынчы.

Иванов, дайынчы.

Ие, орус кадай, Вераның авазы.

Вера, орус кыс.

Курт Гиблер, капитан.

Эрист Вернер, обер-лейтенант.

Бруннер, фельдфебель.

Луиза, немец хелемечи кыс.

## Б И Р Г И КӨЖЕГЕ БИРГИ КӨРГҮЗҮГ

«Ыңдыхтыг дайын» деп ырның аялгазы «Тулчуушкунч» деп тыва ырның аялгазынчы шилчий бээр.

Көжеге ажыттынар. Тулчуушкун аразының кыска дыжы. Монгул-оол телефон долгаан орапар. Түмэндэй шоодайының аксын ажыдып алган, оон кадаглар алгаш, сапык улдуңу таваар каккан орапар. Бир буду кызыл-даван. Самбал дүвүреп, ыңдай-бээр кылаштаан турар.

Самбал (*чудуруктандгаш*). Чүге аткаарлап турар улус бис! Ужуру чүл?

Монгул-оол (*телефонун түдүп алган*). Мен «Он бир»-дир мен, мен «Он бир»-дир мен. Алло-алло! «Улуг-Хем», «Улуг-Хем»?

Самбал (*Монгул-оолга чеде бергеш*). Алло-алло-ла дээр, аксы-боксу-даа катпас. Канчап барган кижи сен, эжим дайынчы Монгул-оол? Капитан Кечил-оол кайыл? Командиривис Бүрзеккей кайыл?

Монгул-оол (*ынаар көрүмс-даа*). Алло-алло! «Улуг-Хем»! «Улуг-Хем»! «Он бир»-дир мен, «Он бир»-дир мен...

...Бүрзеккей биле Дөңгүр-Кызыл кирип кээр.

Бүрзеккей (*далаш болгаш шыңгыы цн-биле*). Эштер! Дөрт дугаар тыва эки турачылар эскадронунуң бистиң пулемёт взводунга Командылал чери чугула даалга дагзып турар-дыр...

Дөңгүр - Кызыл. Оске расчёттарның дайынчыларын келдирип алза кандыгыл, эжим командир?

Бүрзеккей. Ажырбас, мен бодум чеде бээр мен. Дайынчы туруштарны шуптувус ээн каап болбас бис, эштер.

Дөңгүр - Кызыл. Билдингир-дир, эжим командир.

Бүрзеккей. Немец фашистер Сурмичи суурнуң девискээринде хөй техники болгаш дириг күштү мөөңнеп алган, бистиң кезектөривиске бурунгаарлаар арганы бербейн турар-дыр.

Үндер. Кончуг чыланнарны! Ам база халбактанып бе? Оларны ынчаар амдажытпас бис! Атакаже дораан кирер бис!

Бүрзеккей. Баштай мээн чугаамны төндүр дыңцаар, эштер. Бистиң каш удаа карак кызыл атакаларывыс чедиишкүн чок болгандыр. Чая күштерни мөөңнеп алыры-бите бистиң эскадроннарывыс полк командири гвардейжи полковник эш Поповтуң дужаалы-

били түр када аткаарлааш, чаа камгалал шугумун ээлээр ужурлуг апарган-дыр. Эскадроннарың аткаарлаарын хандырып, дайзынның халдаашкынын бо угланышкынга доктаадып тударын бистиң пулемёт взводунга болгаш старшина Дажы-Серенге баштаткан куяк-танк үрекчилеринге командаалал чери дужааган. Ниити байдал мындыг-дыр, эштер. Пулемёт точкаларын каяа тургускулаар дугайын расчёттар командирлери-бile тускай чугаалажыр бис. (Үзүктелиишикин.)

С а м б а л. Дайзынны эрттиrbес бис. Бис шыдай-дыр!

Т у м е н д е й. Бисче семээн кара шорузу!

М о н г у л-о о.л. Дайзынның күжү тодаргай билдинип турар бе, эжим командир?

Б у р з е к к е й. Дайзынның күжү улуг: танкылар, куяктыг машиналар, артиллерия, кижи саны база хөй. Бистиң Украинаның бир дугаар фронтувустуң шериглеринге удур немец командаалдың «Төп» деп адаар эң күштүг бөлүү тулчуп турар. Дубно уунда болгаш Сурмичи кавызында фашистерниң дөрт дугаар танк шерии мөөннэттинген. Улуг тулчуушкуннар болур... Ханныг, өлүм-чидимнег. (Хүлүмзүрүй арак.) Коргунчуг-дур бе?

С а м б а л. Черле чок, эжим командир. Харын бо бижип алган чагаавысты Гитлер дириг турда, канчап дурген чедирип бээр чоор деп бодап тур мен.

Т у м е н д е й. Ыяап-ла чедирер бис!

Б у р з е к к е й. От шугумундан хайгааралды кошкадып болбас. Ок камнавас. Билдингир-дир бе?

Д еңгүр - К ы з ы л. Билдингир-дир, эжим командир.

Б у р з е к к е й (дайынчыларга). Силер ам барып, от шугумун ээлеп, дайынчы хайгааралды уламчылацаар.

Ү н н е р. Дыңнадывыс, эжим командир. (Чоруптарлар.)

Б у р з е к к е й (Дөңгүр-Кызылга). Силер амдызызында артып калыңцар, эжим сержант.

Д еңгүр - К ы з ы л. Дыңнадым, эжим командир.

Бүрзеккей биле Дөңгүр-Кызыл карта көре бээрлэр.

Б у р з е к к е й (эш-хуузу-бile). Кандыг деп бодаар сен, сержант. Командаалал чериниң дужаалын дайынчыларга ажыбылие чугааладым бе?

Дөңгүр - Кызыл. Шын болду, эжим командир, командашылал чериниң дужаалын дайынчылар ылап билдилер.

Бүрзекке. Мен база ынчаар билдим, сержант. (*Картаже айыткаш*.) Бистиң бо камгалап турар черивис эң чугула дилиндектир. Дайынның техник күжү чүгле болап эртип болур, оон өске орук чок. Сурмичи суурну долгандыр чиндиңнээш малгаш болгай. Дайынны бис моон пулемёттар, гранаттар-бile согар бис. Оң талада шугумда старшина Дажы-Серен бар. Ооң командашылалында дайынчылар: Канчыры-оол, Шойдакпан, Лакпа, Тыртык-оол, Нордуп сүглар бар. Дайын черле эртпес.

Дөңгүр-Кызыл. Дайынны эрттириениң орнунга борта өлүр бис.

Бүрзекке. Өлүм дугайын чугаалаан хөрөө чок, сержант. Дайынга бажын кара кылдыр салып бәэр дайынчыны кандыг маадыр дәэр боор. Тииләэр бис, дириг артар бис. (*Картазын шыгжап алыр. Телефон дагжап келир*.) «Он бир» дыңнап тур. Ийе, эжим капитан. Раз так, кончуг эки-дир. Нам кежигүннери-бile аңгы чугаалажып көөр бис. Дыңнадым, эжим капитан. (*Телефонун салып каар*.) Капитан Кечил-оол долгап тур.

Дааш-шимәэн дыңналып кәэр. Самбал маңнап кирип келир.

Самбал. Эжим командир, эжим командир! Фашистер...

Бүрзекке. Дүвүревеңер. Раз так, белеткениңер!..

## ИЙИГИ КӨРГҮЗҮГ

...Дөңгүр - Кызыл (*тыртылчак үн-бile*). Эжим командир, ам база бир илеткел бар. Чөпшәэреп көрүңер.

Бүрзекке. Илеткеңер.

Дөңгүр - Кызыл. Орукка ийи кижи тудуп эккелдивис, эжим командир.

Бүрзекке (*шыңғышырап*). Чүү ындыг кижилерил? Дайынның бисче чорудупкан шивишкеннери эвес ыйнаан?

Дөңгүр - Кызыл. Аскан-турәэн иешкилер бис дәэр, ийи хөрәэжен кижи-дир, эжим командир.

Бүрзекке (*улам кадыг*). Аскан-турәэн иешкилер?.. Дайын бистиң туружуусче кандыг-даа арга-бile — аскан-турәэн

иешкилер-даа бооп алгаш, диленген-колданган кырган-чөнүктөр-даа бооп алгаш, шургуп кирип болур.

Дөңгүр-Кызыл имнептерге, ийи автоматтыг Самбал улгады берген

назылыг орус кадай кижи биле аныяк орус кыс кирип келир.

Самбал (*чоргаар, сүрлүг үн-бile*). Туттурганнар, ол черге тур! (*Бүрзеккейгэ.*) Эжим командир! Дайынчы даалга күүсөттинген! Билдинмес ийи кижини тудуп эккелдивис!

Бүрзеккей. Кайынын келдицер?

Ие (*дидим эвес*). Бо суурдан... Сурмициден...

Бүрзеккей. Кайнаар бар чор силер?

Ие. Моон ырак эввесте, бо алаакта, бо уруумнуң даайы ирей чурттап тураг чuve. Ынаар бар чор бис.

Бүрзеккей. Чүү кижили?

Ие. Арга даамалы кижи.

Бүрзеккей. Чүгэ ынаар баарыңар ол?

Ие. Бо уруумну ол кончуг... ол кончуг фашистерден чажырап дээш... (*Туттуунуп шыддавайн, тендирип, ишикирни бээр.*)

Бүрзеккей. Дайынчы Бичелмаа, соок чүү барыл?

Бичелмаа. Бистиң шайызыс дустуг болгай, эжим командир.

Бүрзеккей. Сугдан!

Бичелмаа. Дыннадым.

Бичелмаа аякка суг эккээр. Ону ижипкеш, кадай оожургай бээр.

Ие. Силерни көөрүмгэ, орус эвес улус боорга, баштай аажок кортум. Бистиң улуузувус-тур деп, силерни ам-на чүрээм эндевейн тур, оолдарым.

Самбал. Авыяастынын көрүндерден!

Бүрзеккей (*Самбалга*). Дайынчы Самбал! (*Иегэ.*) Оон ыңай чүнү чугаалаар силер?

Ие. Черле Сурмичи чурттуг мен, оолдарым. Уш оглумнуң ийизи дайын эгезинде-ле фронтуга өлүрткен. Ооң соонда бичии оглум база акыларының өжүн негеп, чаалажып чорупкан. Ам ооң кайдазын-даа билбес мен. Та өлүг, та дириг... Оон бо кончуг фашист араатаннар бистиң суурувусту эжелеп алгаш, оолдары Улуг Германияга удур чаалажып тураг дээш, багай кырган ирейимни

боолап кааннар... (*Харлыгып, суг ижип алгаш.*) Ам дың кара чаңгыс идегелим, аргалалым бо ышкаждыл, оолдарым... (*Уруун күспактааш.*) Суурда фашистер Германия же сүрүп чорудар дээш, мындыг уругларны аглап-сүрүп эгелээн. Оон дезип чорупканы выс бо-дур. Билир оруувусту фашистер дуй углеп алган. Малгаштыг алаактап чорааш, аза бердивис. Чаңгыс кызымның тынын ап көрүчөр, оолдарым.

Самбала. Таан ынчаар канчап мегелээр деп але? Ак-өек деп курт эвес аан.

Ие. Мегелээш чоор ийик мен, оолдарым. Ол фашистер дээр ийи буттуг араатаннар бистиң бажыны высты саза базып туруп алган. Оларның командирлер дээр кижилериниң чугааларын бүдүү дыңнаап турдуус.

Бүрзекке. Чүү деп чугаалажып турдуулар?

Ие. «Сөөлгү тулчуушкунга үш танк чылча шаптырып алдывыс. Бежен хире шериглер база».

Самбала (*четтикпейн*). Оларны ынчаар мандаңнаап каапкан шыдай эрлер бистер-ле болгай бис, кадам!

Бүрзекке. Суурда фашистерниң кандыг күштери бар-дыр?

Ие. Харын орта билбедим. Чартык муң-даа хире бар ыйнаан. Оон ыңай...

Вера (*дөстүнмейн*). Оон ыңай танкылар база мотоциклдиг солдаттар немей келдирер деп, Гитлер долгап турар чораан.

Үже лээ (*кайгап*). Гитлер?..

Ие. Гитлер эвес, Гиблер. Оларның командири-дир.

Түмендэй. Ох, Гитлер деп дыңнааш, амырай бер частывыс. Аңаа чедирип бээр чагаалыг улус болгай бис. (*Өөрүнчө карак баскаш.*) Ындыг але, төрээннер?

Бүрзекке. Силерни маңаа арттырып ап шыдавас-тыр бис, кадам. Айыл болза улуг. Арга даамалы ақыңарның бажынын тыпчып бээринге дузалаар бис.

Ие. Ынчап-ла буян бооп көрүчөр, оолдарым. Бо кончуг дайын-чаа деп каргыштыг халаптың уржуундан ээдереп калган кадай-дыр мен. Орук-чирик безин тыппас апарган. (*Элээн бодангаш.*) А силер чүү деп мындыг эрес-эрслер силер, оолдарым? Казахтар силер бе? Татарлар силер бе?

Бүрзекке. Чок, кадам, тывалар бис. Тывадан келген бис.

И е (*боданып*). Тывалар... Тыва, Тыва... Та кайда оран чүве? Билзе-даа, бо-ла ажыг-шүжүгге туттургаш, уттуп алдым ыйнаан.

В е р а (*хенертен*). Мен билир мен, авай! Дайын мурнунда географияга өөрөнген бис. Тыва Арат Республика. Енисей хемниң бажында турар. Саян сыннарының аразында. Найысылалы — Кызыл хоорай.

Б ү р з е к к е й (*Вераже*). Сээң адың кымыл?

В е р а. Вера-ла дээр.

С а м б а л. Вера, Вера... Тывалап болза, чүү дээни ол?

Б ү р з е к к е й. Бүзүрел дээн ат-тыр.

С а м б а л (*магадап*). База чарааш ат аа!

И е. Болап баар оруун билбес-тири бис ийин. Бичии кара суг эриинде бажың чүве.

В е р а. Ак бажың. Огородтуг.

С а м б а л. Чанында арылар азыраар хааржактарлыг ийик бе?

И е. Ийе, ийе, чээрби хире хааржак бар.

С а м б а л. Үнчинаарга мен билир мен. Караамны дуй шарып-даа кагза, тып чеде бээр мен.

Т ү м е н д е й (*кайган*). Ону кажан көрүп алганың ол, төрээн?

С а м б а л (*баштактанаып*). Ол дээргэ шериг чажыды-дыр. Хайгылга үргүлчү чоруп турдум чоп, шыдай эвес эрни сени-даа аарай. (*Бүрзеккейгэ.*) Эжим командир, иешкилерни ол бажыңга чедирип каарын чөпшээреп көрүңцер! Оларны чаңгыс-даа фриц-ганс караанга көргүспес мен. (*Улус чөпсүнүп, иешкилерни үглей бээр.*)

Б ү р з е к к е й. (*Самбалды ийинче аппаргаш*). Серемчилелдиг бол, ол бажыңче кирбе. Иешкилерни чүгле бажың көстүр черге чедирип каг.

С а м б а л (*өөрүшкүлүг*). Даңнадым, эжим командир! Че, иешкилер, чоруп орар бис бе? Географка хирелиг-даа бол, топографка шыдай болдур мен ийин. Кырган-авай, сен бисти мурнап, шак мынаар дорт базып олур. Бис Вера-бile соондардан дайынчы ёзу-бile хайгаарал чоруулу. (*Ие чоруптар. Оон Верага.*) Эх, Вера, Вера! Бүзүрел, Бүзүрелмаа! Альт киштежип таныжар, кижилер чугаалажып таныжар деп, тывалар чугаалажыр болгай. А хупура, дайын дайын-на ыйнаан. Автоматты эгиннепкеш, аныяк кысты чедипкеш базыпса, канчап баар боор. (*Үнүп чоруптарлар.*)

- 
-  1. Сат Бүрзеккейге командалаткан пулемёт взводунга кандыг берге даалганы берген-дир? Олар кандыг тура-сорук-бile ону күүседииринге белен болганын тайылбыраңаң.
2. Дайзынга эжелеткен черниң тайбың чурттакчылары-бile тыва эки турачыларның аразынга бот-боттарын билчиp, деткижер харылзаалар канчаар тургустунуп, хөгжүп орарын тайылбыраңаң. Верага болгаш ооң иезинге тыва дайынчылар канчаар дузалаан-дир?
-  3. Самбал бile Вераның найыралын дамчыштыр украин болгаш тыва чоннарың найыралын илереткенин чугаалап, бо иий чоннуң дайын соонда харылзааларын тодарадып, шинчилеңер.
4. Сат Бүрзеккейниң пулемёт взводунуң он бир дайынчызының болгаш Дажы-Серенге командалаткан күяк дәже адыкчыларның эрес-маадырылыг чоруунуң дугайында медээлерден чыып, номнардан номчуп, материалдардан чыып тургаш, илеткелден кылышар.
- 

### ҮШКҮ КӨЖЕГЕ

### АЛДЫГЫ КӨРГҮЗҮГ

Дөңгүр - Қызыл (*хенертен*). Эжим командир, дөө ол арыг кыдырында фашистерниң үш танкызы чаштып туруп алды. Немец автоматчылар база.

Бүрзекке й (*дураннааш*). Дажы-Серенниң мырыңай баарында тургулап алғаннар ышкажды.

Түмениде й. Дажы-Серенниң адыгжылары оларны эрттирбестер-даа.

Дөңгүр-Қызыл. Эжим командир, бистиң баарывыста иий танк көстүп келди.

Бүрзекке й. Көрүп тур мен.

Самбал. Оларның соондан мотоциклдерлиг солдаттар база келди. Бирээ, иий, үш...

Бүрзекке й. Дүүревендер! Фашистерни эң баштай көрүп турарыңдар ол эвес.

Самбал. Дүүреп эвес. Келзиннер харын, эжим командир.

Монгул-оол. Ынча дыка манадыр деп чүү адам чоор. Чоокшулазыннар харын.

Бүрзекке й. Мээн командаам чокка от ажытпас. Эки чоокшуладып алыр. Бистиң баарывыста база танкылар көстүп келген болганда, гранаттардан кожа шарып, белеткеп алыр...

Дөңгүр - Кызыл (*пулемёт чанындан*). Эжим командир! Фашистер атакаже кириптилер.

Дайынчылар туруштарын ээлептерлер.

Бүрзекке й (*шыңғызы*). Эки чоокшулазыннар.

Монгул - оол. Ийи танкызын мурнадып алганнаар де. Олар биле мен таптыг көржү-дүр эвес мен бе! (*Кадык холун шенегилээр.*) Олар дээрge мээн оюнум-на ыйнаан.

Дөңгүр - Кызыл. Дажы-сереннерже үш танк бар чыдыры. Чүге ыйыт чок бардылар?

Бүрзекке й. Чоокшуладып ап чыдырлар болгай аан.

Частышкыннар даажы дыңналыр.

Түменидэй (*өөрүшкүлүг*). Эжим командир! Дажы-сереннер фашистерни сылба шаал эгелей бердилер!

Монгул - оол. Оларның ындында «Катюшалар» даажы дыңналып тур.

Самбал (*дөстүнмейн*). Дажы-сереннер эгелей бергеннер-дир, а бүрзеккейлер чоонган бис! Эгелей берейн бе, эжим командир?

Бүрзекке й. Далашпас! Ам-даа чоокшулазыннар!

Танкыларның даажы чоокшулаап кээр. Бүрзекке й пулемёт артынга чыдылтар. Өскелери гранаталарын белеткээш, автоматтарлыг чыткылалтар.

Боолашкын эгелээр.

Дөңгүр - Кызыл (*боолавышаан*). Тываларның изиг коргулчунун хойланцар, чолуктар!

Самбал. Орус маадыр Ивановтуң үлүү бо-дур!

Түменидэй. Тыва маадыр Тоютчуктуң үлүү бо-дур!

Монгул - оол. Бистиң өлүрткен эштеривистиң үлүү бо-дур!

Бүрзекке й (*Дөңгүр-Кызылга*). Сен бо пулемёт-бile боола! Мен өске расчёттарны барып көрейн. (*Маңнап үнэ бээр.*)

Түменидэй. Дажы-Серенниң баарында ам база бир танк ерттени берди.

Самбал. Дажы-сереннерге ураа!

Дөңгүр - Кызыл. Танкылар келди! Гранаттарыңар белеткендер!

Монгул - оол (*кожактыг гранаталарны алгаш*). Оларның биле мен барып хөөрежийн. Нам кежигүнүнгэ киреримде, Бүрзек-

кей командир мени дагдынып алыр болган чүве. Ол даалганы тулчуушкун соонда бижип берип көрүнөр деп, командирден дилээр силер, оолдар.

Монгул-оол команда-даа манавайн үнгеп чоруптар.

Дөңгүр - Кызыл. Отту соксадыңар! Монгул-оолга ок дээптер!

Түмэндэй. Гранадын чүге октавазы ол? Ой, халак, ам база балыгладыпты.

Самбал. Танк адаанче үнгепти!

Частышкын дыңналыр.

Дөңгүр-Кызыл. Ох! Хайыраан эживисти!

Тулчуушкун оожургай бээр. Бүрзеккей маңнап келир.

Бүрзеккей. Эки туттунуңар, оолдар. Өске расчёттардан дайынчы Кошкар-оол маадырлыны-били өлген-дир. Ында ам үш кижи арткан. Монгул-оол кайыл?

Дөңгүр - Кызыл. Дайынчы Монгул-оол дайынның танкызын кожактыг гранаттар-били буза тевискеш, боду орта маадырлыны-били өлдү, эжим командир.

Бүрзеккей. Хомуданчыг болган-дыр. Эрес-ле дайынчы чораан кижи...

Түмэндэй. Намга кирер дугайында даалганы тулчуушкун соонда бижип берип көрүнөр деп силерден дилээн кижи чүве, эжим командир.

Бүрзеккей. Ийе, Монгул-оол тулчуушкунга нам кежигүүнү дег өлген-дир. Ол Тываның Араттың Революстук Намының бедик адынга төлептиг болган-дыр.

Самбал (*пулемёт чанындан*). Эжим командир, дайыннаар база катап чоруп орлар!

Дөртэлээ пулемёт чанынга баарлар. Хайгаарал уламчылап тураг. Дайынның дааш-шимээни чоокшуулап орар. Тулчуушкун база катап эгелээр.

Частышкыннаар.

Дөңгүр-Кызыл. Дажы-Серенниң баарында ам бир танк ерттени берди. Фашистер дезипти!

Бүрзеккей. Өске эштеривис чүге ыыт чок барды? Мен оларда бардым. (*Маңнап үнэ бээр.*)

Түмэндэй. Ам бир танк чоруп олур, эжим сержант.

Дөңгүр-Кызыл (*пулемёдун дамчыдып бергеш*). Фашистерни сен моң-бile кыргы. Мен ол чаңгыс танкызы-бile сокчуп кааптайн. Дөңгүр-Кызыл гранаталарлыг үңгеп чоруптар. Частышын дыңналыр. Түмендей кезек боолап чыда, ыйт чок баар. Самбал ону сегирип алыр.

Самбал. Канчап бардың, Түмен? Шыдай эр, күжүр төрээним! Сөөлгү танкыны Дөңгүр-Кызыл узуткап каапты. (*Түмендей өлүрткен болур.*) Кончуг чыланнарны, өлүрүкчүлерни! (*Пулемёду-бile тарбыдашып-ла эгелээр.*)

Тулчуушкун үзүктели бээр. Бүрзеккей ээп келир. Самбал чааскаан доңгайып алган, пулемёт артында чыдар.

Бүрзеккей. Чүү болду, Самбал?

Самбал. Сержант Дөңгүр-Кызыл танк адаанга өлдү. Дайынчы Түмендей чанымга өлүрттү...

Бүрзеккей (*дунук цн-биле*). Өске расчёттарның оолдары база маадырлыы-бile шупту өлүрткеннер-дир...

Самбал. Дажы-Серенниң дайынчыларының шимээни база чидип кагды...

Бүрзеккей. Олар дайынның чаңгыс-даа танкызын эрттири-бедилер. Он бир пулемётчулардан ам иелээ арткан-дыр бис. Раз так, дайын-бile ам иелээ тулчур бис. Тыва эки турачылар деп кымнарыл ол дээрзин фашистер көрзүннөр!

Самбал. Солагай талавыста база боолар даажы дыңналы-дыр, эжим командир.

Бүрзеккей. Бында партизаннар атакаже кирип туарлар-дыр.

Самбал. Фашистер ам база атакаже кириптилер, эш командир.

Бүрзеккей (*пулемёт артынга чыдырпкаш*). Келзиннер харын.

Бүрзеккей боолап эгелээр. Үр болбаанда пулемёт ыыттавайн баар.

Самбал. Чүү болду, эжим командир?

Бүрзеккей. Пулемёт уну изий берген-дир. Ам өске пулемёттардан барып боолаалы. Мээн соомче! (*Маңнажып цне бээрлөр.*)

Сцена кезек ээн тураг. Тулчуушкун уламчылавышаан.

Вера иешкилер аьш-чем тудуп алган маңнажып келирлер.

Ие. Кайда барганныры ол дээр сен, уруум?

Вера. Турган чери бо-ла болгай, авай. (*Өлүрткен Түмендейни барып сегирип алгаши.*) Бо кым боор?

И е. Демги тыва дайынчыларның бирээзи-дир.

В е р а . Гиблерниң адын Гитлер деп дыңнааш, амырап турган дайынчы ышкаждыл, авай.

И е (карааның чажын чодуп). Ах, кандыг иениң төрүп каан төлү ирги? Төрээн Тывазын көрбейн барганы ол-дур күжүрнүң...

В е р а . Ооңада-иезинче чагаа бижиир бис, авай.

И е (дыңнаалааш). Мынаар боо даажы үне-дир. Ында барғаннар боор.

В е р а . Ынаар бараал, авай. (Далаш-бile цне бээрлер.)

Сценага Луиза биле Бруннер балыглаткан Гиблерни сөлеп алган кирип келирлер. Гиблер пистоледин тудуп алган олуар. Бруннер ол-бо димзенин туар. Оон өлүрткен Түмендейниң карманын үжээш, ак саазын уштуп алыр.

Л у и з а (кагылдыр номчуур). «Берлинге барып, белиң үзе шавар бис...» Эгезин орустааш, оон ыңайгызын боттарының дылында бижип каан чүве-дир. Кым билир ону, дээрги капитан. Фюгерниң адыла хөй черде кирген чүве-дир.

Г и б л е р (хорадап). Че, болзун! Оларның дылын кым билир.

Л у и з а . Үзе соп кааптайн бе, дээрги капитан?

Г и б л е р . Адыр, шыгжап ал. Шифр-бile чажырып бижээн чугула медээ чадавас. Фюгерниң ставказынче чорудуп бээр бис.

Л у и з а . Шынап-ла, ындыг болуп чадавас, дээрги капитан. Дораан чорудуп бээр бис. (Чагааны шыгжап алыр.)

Хенертен күчүлүг «ура» дыңналыр. Девидеп эгелээрлер. Гиблерниң пистолеттиг холу сирийнип, аайын тывынмайн туар. «Ураа» улам күштелип келир. Ынчан Луиза Гиблерни артындан хенертен боолаптар.

Г и б л е р (чуглуп бар чыда). Ол канчаарың ол, херээжен сойлук... (Пистоледин көдүрүп чадап каар.)

Л у и з а (серте-даа чок). Ол бе, дээрги капитан? Балыг-бышкын кижи-бile сөөрттүнчүр харызывыс чок апарганы ол-дур ийин. Ам эрлик оранынга мөөрэйлежир бис. Байырлыг, Куртчугаш. (Бруннерге.) Дүргеде! Бистиң солдаттарывыс аткаарлап турлар.

Л у и з а биле Бруннер дезип чоруптарлар. Бүрзеккей биле Самбал маңнажып кээр.

С а м б а л . Ураа! Фашистер дезипкен!

Пулемётче маңнажып бар чорда, оларны Бруннер автомат-бile кальташтыр боолаптар. Иелээ туттунчупкаш, кезек туарлар. Черже чоорту ужуп

бар чыдырда, Вера иешкилер маңнажып кээр. Вера Самбалды сегирип алгаш, чоорту олуруп бады баар. Вераның иези Бүрзеккейни сегирип алыр.

Вера (*кышкырып*). Чалыны назын ұзұлғени ол бе? Чок, чок! Чалыны назын кажан-даа ұзұлбес!

Ие (*Бүрзеккейни тудуп алган тұра*). Оглум! Оолдарым! Бистин шериглеривис бурунгаар шаап халдап кирип турлар!

Бүрзеккейни тудуп алган тұра (*бажын ковайтып келгеш*). Бистин шериглеривис... Раз так, тиилелге удавас, авай... (*Бажын халаш кылыр*.)

Күчүлүг «ура» дыңналып, Тиилелгениң өөрүшкүлүг хөгжүмү чаңғыланып турар. Көжеге баарынга хамааты хептерлиг, орден-хавыяларлыг Иванов, Бичелма а болгаш Вернер үнүп келгеш, Мөңге от мурнунга мөгейип алгаш турарлар.

- 
- 1. Тыва чоннуң Ада-чурттың Улуг дайынынга Совет Эвилелингеге бүгү тала-лыг деткимче, дузазының дугайында чұну билир база номчаан сiler? «Дайын-бile каңнаттынган ақы-дуңмашкы найырал» деп темага дыңна-дығдан кылышаар.
  - 2. Сат Бүрзеккейниң дайынчыларының сөөлгү тулчуушкунун сайгарып, оларның эрес-маадырлыг демиселиниң дугайында чугаалаңаар.
  - 3. Немец-фашистиг шеригниң төләэлериниң мәзү-шынар талазы-бile байдалын сайгарып, тыва дайынчылар-бile деңненер.
  - 4. «Тыва эки турачыларның командири капитан Кечил-оол», «Тыва эки турачы танкistер», «Тыва эки турачы санитар он кыс», «Бистин сумудан тыва эки турачылар», «Бүрзеккей болгаш ооң пулемётчулары» дәен чижектиг темаларга, боттарынар шилилгенер-бile, чогаадығдан бижинер.
  - 5. «Он бир» деп шииде интернационалчы найырал (орус, тыва, украин болгаш өске-даа чоннарның) темазын канчаар илереткен-дир, аңы омак-сөөктүг маадырларның овур-хевирлерин көргүскенин дамчыштыр тайыл-бырлаңаар.
  - 6. Тыва эки турачыларның маадырлыг чоруун көргүскен чуруктан чурааш, ооң утказын чугаалаңаар.
  - 7. Шииден бир ұзұндұну шилип алгаш, башкыңарның удуртулгазы-бile рольдап номчуп, ойнап күүседиңе.
  - 8. Дайынның аар-бергезин, дайынчылардан амы-тынын безин өргүүрун негей бәэрин канчаар билип алғаныңарны тайылбырлаңаар.
  - 9. Найысылал Кызылда болгаш республиканың кожуун-сумуларында эки турачыларның чырык адынга бараалгаткан кандыг тураскаалдар тургузуп, хемчеглерни ап чорутканыл, ол дугайында шинчиледен кылып, тайылбырлаңаар.
  - 10. *Күяк, семәэр, арга даамалы, тарбыдаадыр, димзенип* деп сөстериниң утказын билип ап, чугаалаңаар.
-

## VII көзәэ. РОССИЯ ЧОННАРЫНЫҢ ЛИТЕРАТУРАЗЫ

**Серафим Романович  
ЭЛЛЯЙ (КУЛАЧИКОВ)**  
(1904—1976)

Якутияның улустуң чогаалчызы, шүлцүкчү, очулдурукчү. Москвандың журналистика институтудун дооскан.

**Экии, тыва чонум!**


Эзир күштар уя туткан  
Эзим, дагда чурттап чоруур  
Якут, тыва найыралы  
Бінак быжыг чечектелzin!  
Хамнаарактар ырлап келген,  
Қадыргылар үүргенеләэн  
Солаңгылыг чырык өйде  
Соңгу чүктен ужуп келдим.  
Эргим тыва өңнүктерниң  
Эптиг, чылыг чалалгазы —  
Часкы күштүң чалгыны бооп,  
Чаяягаар-ла чүглеп чорду.  
Доңат, соокка чаржап катпаан  
Шұлук, чогаал ырывысты  
Доштуг далай донурутпаан  
Чүрәэвистиң эриг чылынын —  
Алмаз, дилги, алды-кишке  
Солуттунмас беләэвисти  
Айдың, чырык часкы хұндұс  
Сонуургадып эккелген бис.  
Аңған шагдан якут улус  
Азий диптиң төвүн чурттап,  
Акы-дуңма тыва чоннуң  
Аразынга чораан-даа боор.



Бижиктиг-Хая чурумалы —  
Бистиң ниити өгбевистиң  
Салгакчыга арттырып каан  
Чагаа-бижии — чагыы-даа боор.  
Херелденген Тыва чурттуң  
Кежик-чолу мөңге болзун.  
Акың болгаш өңнүүң чонга  
Аян тудуп ырла, хомус!  
Эзир күштар уя туткан  
Эзим дагда чурттап чоруур  
Якут, тыва найыралы  
Ыяк былжыг чечектелzin!

Ю. Кюнзегеш очулдурган.

- 
1. Тыва биле якут улустуң найыралын кандыг уран-чечен аргалар-бile  
дамчыткан-дыр. 2. Аалчывыс кандыг белектерлиг келгенил?  
3. Якут биле тыва чонда дөмөйлешкек кандыг чүүлдер бар деп бодаар  
силер?  
4. Тыва-якут найыралга тураскааткан викторинадан тургускаш, аттан  
чогаадыңар.
- 



## Цырен Галзутович ШАГЖИН

(1919—1994)

Россияның улустуң артизи, РФ-  
тиң культуразының алдарлыг ажыл-  
дакчызы, Бурят литератураны сайзы-  
радырынга цлцг-хуузун кириши тирген.  
Актёр, режиссёр, драматург, прозачы.

### Хураган

Менээ хураган белекке берген,  
анаа-ла бөдүүн ак хураган-на бол-  
гай. Ындыг хураганныг болурун  
мурнунда канчаар күзөвээн дээр! Бо-

дур, ам мээн хураганым бар, ону холдарымга көдүрүп, ооң-бile ойнап тур мен. Төгөрик карактарын ол арай-ла муңгаргай кылдыр көргүлээш, чинге, сирилээш үнү-бile «Ме-ме, ме» деп эткилээр. «Ме-ме» деп ол бодунуң авазын-на ынчаар кыйгырары ол боор он.

Хураган бистиң-бile кады бажыңга чурттап, мээн-бile кожа удуур турган.

Ооң хоюг дүгүнүң чаагай чыдын тынары меңээ тааланчыг турган.

Даштын дүвү-хар ам-даа калчаарал, хоолайда хат хорадаанзыг хоогайнып, соңгалар карактары тывызыксыг угулзалар-бile каас-таттынган, а меңээ бодумнуң дөрт буттуг өңнүүм-бile экизи аажок. А ол меңээ база чанчыга берген. Кажан мен бажындан чоруй баргылаарымга, ол мени база сакты бээр боор он.

Даштыгаа уруглар-бile ойнап туря, бичии када ооң дугайын утту кааптар мен, ындыг-даа бол, мени хураганым манап турар деп сактып келгеш, дүрген-не бажыңымче халыктар мен. Ол мени шагда-ла манап, бодунуң «ме-ме-ме»-зин этпишаан, үргүлчү-ле эжик аксында келген турарын көөр мен.

Час-даа дүжүп келген, оът-сиген ногаарарып, хамнаарак бодунуң ырын ырлай берген, а мен хураганым-бile хүннү бадыр ховуга чиде бээр апарган мен. Бис ийиге экиzin, хөглүүн чүү дээр!

Ол чулуккур, хоолулуг сигенни чулуп чип чоруур, а мен ацаа ырлап, шоорумга ойнап бээр чораан мен. Ховуга мен удуй хона бээримгэ, база бистиң чанар өйүүс чедип кээргэ, ол меңээ чедип келгеш, бодунуң дыдышаш хаваа-бile үскүлэй бээр.

Мээн хураганым хүн келген тудум улгадып олурган, чамдыкта ооң ынчаар дүрген өзүп орарынга харын хомудай-даа бээр мен, ынчалза-даа кым-бир кижи: «Сээн хураганыңың өскен деп чүвэзин. Ёзуулуг-ла ирт болган» деп мактаарга, өөрүп амыраар турган мен.

Ынчалзажок меңээ эц-не муңгаранчыг хүн чедип келген.

Бир-ле катап, кажан ховудан бодумнуң хураганымны сүрүп эккелгеш, ону казанакка (ол ам ында чурттап турар) суп кааш, а бодум чөмненип алгаш, уdup чыда, уйгум кадында, бистиң кожавыстың авамга:

— Че, Цэрэгма, иртивис кажан дөгерер бис? Эки-ле ирт-дир! — дээнийн дыңнадым.

Авам аар улуг тынып кагды. Ынчалза-даа ол-ла дораан Анюшаның ацаа ынаа медээжок болбас ийикпе, оон дугайын сагышсыраар ыйнаан ол дээрзин авам чугаалаан.

Мен тура халааш, алгырыптар деп бодадым, ынчалза-даа ол душта мээн холумдан бир-ле кижи чедип алгаш, ховулап, шынаалап чоруп каан. Мээн хураганым кожа халып чор, мээн эки тура-хөөнүүн чүү-даа кударатпады.

Эртенинде хөглүг, сергээм кончуг туруп келдим. Хүн эргелеткен дег хүннеп, бисти шөлче кый деп тур.

Хураган эжик аксында манап тур. Авам мени кый дей-дир. Бөгүн Ханзагай суурже, ол бистен ырак эвес чүве, чоруткаш, оон аргып каан уктарын ында бистиң ырак төреливиске чедирип бээрин авам меңэ чугаалады.

— Мээн хураганым канчаарыл? — деп айтырдым.

— Канчап баарыл ол, мен бодум көрүп тургай мен аан — деп, авам меңэ бүзүретти.

Хураганым-бile үскулежип, үскулежип алгаш (хураган-бile ынчаар ойнаар турган бис), мен кожавыс суурже чоруптум. Хураган менден чыдып калырын кузевейн, мээн соомдан чүткүп, бодунуң кээргенчиг «ме-ме-ме»-зин эдип туруп калды.

А дүүште, кажан чанып олурумда, чүгэ-ле ийик, меңэ чалгаа-ранчыг апарган — мен бодумнуң хураганымны сакты бердим. Бажың чанынга келгеш, сөөлгү метрлерни кылаштавайн, а чүгүрүп-кен мен. Бо чүү боор? Херимде мээн танырым кеш азып каан тур.

Мен бажыңымче кире халып келдим, оон хайындырган эльт-тиң — мээн хураганымның эъдиниң — чыды думчукка келди. Авам менден карактарын дестирбишаан, аяар чугаалады:

— Олуруп чемнен, оглум. Эң-не амданныг, кадарлыг ээгини сенээ каап кагдым.

Мен ыглапкаш, ховуже ыдып-ла бердим. Хураганымны үргүл-чу кадарып турганым кара-сугга чеде халып келгеш, ацаа шөлээн ыглал алдым.

Мацаа ол суг ижип, бо орта үскулежип ойнап чордувус. Сайлап каан тооруктар дег оон арттырып каан демдектери ол — а хураганым чок...

Кажан авам мени сүрүп чедип келгенде, имиртиңней берген. Ол мээн бажымны үр-ле суйбап, хураганымны деп эргеледип адап олурду.

Улуг апарган кижи чувени билир чоор, амыдырал-чуртталгавыс база берге-дир, хураганың кежи-бile тончугаш даарап бээр мен деп, авам меңээ чугаалады. Бо күзүн школаже баар болгай мен.

Бис бажыңызыска чедип келдивис. Эйтке ол-ла хевээр дегбейн, удууп чыдып алдым...

А жакан мен школага өөренип турумда, соок дүжүп келгенде, мени мээн хураганымның кежи чылдып чораан. Авам аазааның ёзугаар меңээ кышкы тончугаш даарап берген. Кышкы дүнелерде удуурумга чылбы кончуг болгаш ак хураганымның менээ таныш чыдын тынары тааланчыг. Дүне када ооң таныш «ме-ме-ме»-зи дыңналып кээр, ынчангаш ол мээн-бile кады ышкаш сагындырар.

*K. Сүттүг-оол очулдурган.*

- 
-  1. Анюша кандыг белектиг болганынга амырап турганыл? Хураган биле Анююшаның найыралын сөзүглел-бile бадыткан чугаалаңар.
  -  2. Кандыг муңгаранчыг хүн чедип келгенил? Ону Аниюша канчаар ажып эрткенил?
  - 3. Авазы оглун өске суурже чоруткаш, хураганны өзөп чигенин чүү деп бодаар силер? Ону оглу канчаар хүлээп алган-дыр?
  -  4. Тыва литературада шээр мал дугайында уругларга таарыштыр бижээн чогаалдар бар бе? Оларның данзызын тургузуңар.
  -  5. *Кадарлыг ээги, чулуккур, хоолулуг чөм, шоор* деп сөстер-бile домактардан чогаадыңар.
-

## ДОПЧУЗУ

Кирилде .....	3
<b>I-ги кезээ.</b> Чеченнерниң сөңү. Маадырлыг тоолдар (эпос) .....	4
Ачтыы Кезер-Мерген .....	5
Танаа-Херел .....	15
Бокту-Кириш, Бора-Шээлей .....	31
<b>Чогаал теориязы.</b> Маадырлыг тоолдар дугайында билиг .....	50
<b>II-ги кезээ.</b> Аас чогаалының салдары-бите. В. Серен-оол. Каң-кыс .....	51
М. Кенин-Лопсан. Хайыралыг Калчан-Шилги .....	64
<b>Чогаал териязы.</b> Чогаалдың темазы болгаш идеязы .....	80
М. Доржу. Аас чогаал .....	82
С. Тока. Араттың сөзү .....	83
С. Сарыг-оол. Аңғыр-оолдуң тоожузу .....	103
Б. Хөвеңмей. Чүү болганыл? .....	130
<b>III-ку кезээ.</b> Оожургал чок сагыш-сеткил.....	134
С. Сарыг-оол. Соругга .....	135
<b>Чогаал теориязы.</b> Чечен чугаа дугайында билиг.....	142
О. Сувакпит. Ыылар .....	143
К-Э. Кудажы. Кызыл-Бөрттүг .....	147
Ш. Суваң. Чээн оол .....	168
<b>IV-ку кезээ.</b> Чечен чогаал делегейинде мөңгө темалар.....	173
С. Пюрбю. Эргеппей дугайында тоожу .....	173
<b>Чогаал теориязы.</b> Тоожу дугайында билиг .....	190
О. Саган-оол. Найырал .....	191
К-Э. Кудажы. Сарыг-оолдуң плантациязы .....	204
М. Доржу. Дайынныг кино көргеш .....	211
<b>Чогаал теориязы.</b> Композиция болгаш сюжет дугайында билиг .....	216
И. Бадра. Эргим Уля угбай .....	218
<b>V-ки кезээ.</b> Поэтиктиг одуруглар. С. Пюрбю. Төрээн дылымга .....	222
А. Даржай. Авамга. ....	224
<b>Чогаал теориязы.</b> Шүлүк дугайында билиг .....	226
М. Күжүгет. Бак сагыш башка халдаар .....	229
Р. Лудуп. Чавыс-чавыс көжүп чоруур булуттарлыг. ....	231
<b>VI-гы кезээ.</b> Төөгүнү коптарыңар. С. Сарыг-оол. Алдан-маадыр .....	232
Р. Лудуп. Улаастайга .....	234
И. Бадра. Ужудукчу Кидиспей .....	235
О. Сувакпит. Сат Бүрзеккей дугайында баллада .....	244
К-Э. Кудажы. Он бир .....	246
<b>VII-ги кезээ.</b> Россия чоннарының литературазы С.Р. Элляй. Экий, тыва чонум!.....	259
Ц.Г. Шагжин. Хураган.....	260